

O Se Taiala mo le Galuega Faafaifeautalai

“Tala’i La’u Talalelei”

(MFF 50:14)



“Ina salamo ia outou tuluiga uma o le lalolagi ma o mai ia te au, ma ia papatisoina i lo’u igoa, ina ia faapaiaina outou i le Agaga Paia tou te talia” (3 Nifae 27:20).

“Tala’i La’u Talalelei” (MFF 50:14)

Lolomi ma Faasalalauina e le Ekalesia a Iesu Keriso o le Au Paia o Aso e Gata Ai
Aai o Sate Leki, Iuta

Faavaa: *O Loo Papatisoina Iesu e Ioane le Papatiso* © 1988 e Greg K. Olsen
Mai faaaloaloga a le Mill Pond Press ma Dr. Gerry Hooper. Aua ne'i kopiina.

© 2004 Puletaofia e le Intellectual Reserve, Inc.

Ua taofia aia tatau uma

Lolomiina i le Iunaite Setete o Amerika.

Faamaonia le faaPeretania: 11/04

Faamaonia le faaliliuga: 7/04.

Faaliliuga o le *Preach My Gospel*

Samoan

36617 890

“Tala’i La’u Talalelei” (MFF 50:14)

Savali a le Au Peresitene Sili	v
Folasaga: E Mafai Faapefea Ona Sili Atu Ona Ou Faaogaina le “Tala’i La’u Talalelei”?	vii
1 O Le A Lo’u Faamoemoega i le avea ai ma se Faifeautalai?	1
2 E Faapefea Ona Matuai Lelei La’u Suesue ma Saunia e Aoao Atu?	17
3 O A Mea Ou Te Suesue I Ai ma Aoao Atu?	29
• Lesona 1: O Le Savali o le Toefuataiga o le Talalelei a Iesu Keriso	31
• Lesona 2: O Le Ata o le Faaolataga	47
• Lesona 3: O Le Talalelei a Iesu Keriso	61
• Lesona 4: O Poloaiga	74
• Lesona 5: Tulafono ma Sauniga	86
4 E Faapefea Ona Ou Iloa ma Malamalama i le Agaga?	93
5 O Le a le Matafaioi a le Tusi a Mamona?	109
6 E Faapefea Ona Ou Atiina Ae Uiga FaaKeriso?	123
7 E Mafai Faapefea Ona Sili Atu Lo’u Aoaoina o le Gagana a La’u Misiona?	137
8 Pe Faapefea Ona Ou Faaogaina Tatau O’u Taimi?	147
9 E Faapefea Ona Ou Maua Tagata e Aoao?	169
10 E Mafai Faapefea Ona Ou Faaleleia O’u Tomai Faafiaaoga?	189
11 E Faapefea Ona Ou Fesoasoani i Tagata E Faia ma Tausia Tautinoga?	211
12 E Faapefea ona Ou Saunia Tagata mo le Papatisoga ma le Faamauga?	221
13 E Faapefea ona Matou Galulue ma Taitai o Siteki ma Uarota?	231
Faasino Upu	243

Savali a le Au Peresitene Sili

Mo Le Faifeautalai Pele:

Matou te faamalo atu ia te oe i le avanoa tele ua e maua e aveai o se faifeautalai. E leai se isi galuega e sili atu ona faatosina nai lo lenei, e leai foi se isi galuega e sili atu ona maua ai le faamalieina nai lo lenei.

O le “Tala’i La’u Talalelei” ua faamoemoe e fesoasoani ia te oe ina ia aveai ma se faifeautalai sili ona saunia lelei, ma sili atu ona matua i le faaleagaga ma sili atu ona aveai ma se faiaoga e tosina [mai ai]. Matou te uunaia oe ina ia faaoga i aso uma i au lava sauniuniga faapea foi ma sauniuniga faalesoa, ma a outou fonotaga faaleitu ma konafesi faalesone. Suesue i mau e faamaonia ai ma aoao ia aoaoga faavae ma mataupu faavae.

Matou te tuuina atu se lu’i ia te oe ina ia e tali atu i se lagona fou o le tautinoga ina ia lagolago atu i lo tatou Tama o i le Lagi i Lana galuega mamalu. Soo se faifeautalai lava, ua i ai se matafaioi taua e fesoasoani atu ai e “faataunuu le faaofuina o le tagata i le tino ola pea ma le ola faavavau” (Mose 1:39).

O le a tauia ma matuai faamanuiaina oe e le Alii, a o e auauna atu ma le faamaualalo ma le agaga tatalo ia te Ia. O loo tele le fiafia o loo faatalitali mai mo oe lea e te le’i iloaina muamua a o faapea ona e auauna atu i Ana fanau.

O Le Au Peresitene Sili

Folasaga: E Mafai Faapefea Ona Sili Atu Ona Ou Faaogaina le “Tala’i La’u Talalelei”?

“Tala’i La’u Talalelei”


Ia faaoga le “Tala’i La’u Talalelei” ina ia ausia ai ou manaoga i le avea ai ma se faifeautalai. E mafai ona e faaaluina se taimi atoa e suesue ai i ni nai parakalafa—po o se mataupu atoa. E mafai ona e suesueina ia mataupu pe fuafua se faasologa e sili atu ona ausia ai mea o loo e manaomia. O lenei fetuutuuna’iga e mafai ai e oe ona suesueina mea e te moomia pe a e manaomia, ma e pei foi ona faatonuina ai e lau peresitene o le misiona.

O mataupu uma lava i totonu o le “Tala’i La’u Talalelei” o le a fesoasoani ia te oe e faataunuu lou faamoemoega i le avea ai ma se faifeautalai. Ae peitai, a o e amata ona suesueina le mataupu e 3, o le a mafai ona e lagonaina se faalogona ese. O le tele lava o mataupu e faatatau lea ia te oe. O le mataupu e 3 o loo faatatau lea i se aofia toatele. E te aoaoina ia aoaoga faavae o loo i le mataupu e 3 (a) ina ia faamalosi ai lou lava malamalama i le talalelei ma lau molimau ma (e) ia aoao atu ma saunia ai isi ina ia osia ma tausia ia tautinoga ma feagaiga.

O aoaoga faavae o loo i totonu o nisi o mataupu e mafai foi ona fesoasoani ia te oe e aoao ai tagata sailiili ma tagata fou o le ekalesia. Mo se faataitaiga, o le mataupu e 4, “E Faapefea Ona Ou Iloa ma Malamalama i le Agaga?” e mafai ona fesoasoani ia te oe e aoao ai nisi o tagata sailiili e uiga i le auala e maua ai se molimau e ala i le mana o le Agaga Paia. O le mataupu e 5, “O Le a le Matafaioi a le Tusi a Mamona?” e mafai ona fesoasoani ia te oe e foia ai nisi o atugaluga o tagata sailiili e uiga i le faitauina o le Tusi a Mamona. O manatu mai le mataupu e 2, “E Faapefea Ona Matuai Lelei La’u Suesue ma Saunia e Aoao Atu?” e mafai ona fesoasoani i tagata faatoa liliu mai ina ia maua ni aoaoga se tele mai lo latou suesueina o le Tusi a Mamona.

O le “Tala’i La’u Talalelei” o loo taulai atu i vaega faavae o le galuega faafaifeautalai. E le o taliina uma ai soo se fesili po o soo se tulaga o le a e oo i ai. O le a sili atu ona faamanuiaina oe pe a e mulimuli i le Agaga, suesue i tusitusiga paia, tausi poloaiga, ma faaoga mea na e aoaoina.

Suesue ia mataupu i le taimi atoa o lau misiona. Ia faaoga mea e te aoaoina. Iloilo au galuega. O faifeautalai e taumafai ina ia saunia i latou lava i aso taitasi, ma saili pea lava pea ina ia faaleleia, o le a maua le taitaiga mai le Agaga Paia ma vaaia faamanuiaga i o latou olaga.



O Lesona a le Faifeautalai

Ua ia te oe le avanoa e fetuutuunai ai, e aoao atu ai lesona i soo se auala e sili atu ona fesoasoani ai i tagata ina ia saunia atoatoa mo o latou papatisoga ma faamauga. O lou faamoemoega e le gata ia aoao atu mea o loo aofia ai i lesona; ae ia fesoasoani atu i isi ia o mai ia Keriso e ala i le faatuatua ia Iesu Keriso, salamo, papatisoga, mauaina o le meaalofa o le Agaga Paia, ma le tumau e oo i le iuga. E le tatau lava ona sili atu ma le 45 minute le umi o se lesona. Atonu foi o le a e iloaina i lena taimi, e na o ni nai aoaoga pupuu e mafai ona fai ai i na asiasiga. I le tulaga lea, atonu e tatau ai ona e faia ni asiasiga pupuu faifaisoo, e aoao atu ai ni nai vaega o mea e tatau ona aoao atu.

E tele auala e aoao atu ai lesona. Pe o lē fea lesona e te aoaoina atu, o afea e aoao atu ai, ma pe o le a le tele o le taimi e te faaalaina ai, o le a sili ona iloa i mea e manaomia e le tagata sailiili ma le taitaiga a le Agaga. Aua le taulotoina le lesona atoa.

Suesuega Faaletagata Lava Ia, Suesuega Faalesoa, Fonotaga Faaleitu, ma Konafesi Faalesone

O le lelei o au suesuega i le taimi o lau misiona, o le a fesoasoani ia te oe e faataunuu ai lou faamoemoega o se faifeautalai, ma faamalositino ai lau molimau i le talalelei a Iesu Keriso. O ou avanoa e fa e sili ona taua e te suesue ai, o suesuega faaletagata lava ia, o suesuega faalesoa, o fonotaga faaleitu, ma konafesi faalesone. O au fuafuaga i aso taitasi e aofia ai le taimi mo suesuega faaletagata lava ia ma suesuega faalesoa i aso taitasi.

Faatulagaga a le Faifeautalai i Aso Taitasi *

6:30 i le taeao	Ala i luga, tatalo, faamalositino (30 minute), ma sauniuni mo le aso.
7:30 i le taeao	Taumafataga o le taeao.
8:00 i le taeao	Suesuega faaletagata lava ia: o le Tusi a Mamona, o isi tusitusiga paia, aoaoga faavae o lesona a le faifeautalai, ma isi mataupu mai le <i>"Tala'i La'u Talalelei."</i>
9:00 i le taeao	Suesuega faalesoa: fetufaai atu mea na e aoaoina i le taimi o au lava suesuega, sauniuni e aoao atu, faataitai ona aoao atu, suesue mataupu mai le <i>"Tala'i La'u Talalelei,"</i> faamautu fuafuaga o le aso.
10:00 i le taeao	Amata le talaiga. O faifeautalai o loo aoaoina se isi gagana, ia suesue i lena gagana mo se isi 30 i le 60 minute faapoopo, e aofia ai le fuafuaina o gaoioiga e aoaoina ai le gagana e faaoga i le aso. E mafai e faifeautalai ona faaoga se itula mo le taumafataga o le aoauli ma isi suesuega faapoopo, ma se itula mo le taumafataga i le afiafi i taimi e fetui tonu ma le la talaiga. O le mea lava e masani ai o taumafataga o le afiafi e tatau ona mae'a a o le'i taina le 6:00 i le afiafi.
9:00 i le po	Toe foi i le fale o loo nonofo ai (se'i vagana o loo aoaoina atu se lesona; ona foi lea i le fale i le 9:30) ma fuafua gaoioiga o le aso e sosoo ai (30 minute). Tusi le tusi talaaga, sauni e moe, tatalo.
10:30 i le po	Moe ma malolo.

**I se feutaga'iga ma le Au Peresitene o le Au Fitugafulu po o le Au Peresitene o le Eria, e mafai ai e lou peresitene o le misiona ona fetuunai lenei faatulagaga ina ia talafeagai ma tulaga o le lotoifale.*

O mea e te aoaoina i suesuega faaletagata lava ia o le a fesoasoani ia te oe i suesuega faalesoa, fonotaga faaleitu, ma konafesi faalesone, lea e mafai ai ona “aoao le tasi i le tasi i mataupu o le malo” (MFF 88:77). O mea e te maua mai au lava suesuega ma fonotaga faaleitu, o le a fesoasoani ia te oe e te aoao atu ai ma le mana faaleagaga.

Suesuega Faaletagata Lava Ia

O le faamoemoega o suesuega faaletagata lava ia o le faamalosi lea o lou atamai ma lau molimau i le talalelei toefuataiina, ma fesoasoani ia te oe ina ia saunia ai e ausia manaoga o i latou e te aoaoina. I au lava suesuega, ia taulai atu i tusitusiga faavae ma le fatatusi ua faamaonia a le faifeautalai:

- *Jesus the Christ*
- *O Le Talatuu*
- *Our Search for Happiness*
- *Faamaoni i le Faatuatua*

E mafai ona lelei au suesuega faaletagata lava ia pe a e:

- Faitau mai i le Tusi a Mamona ma isi tusitusiga paia.
- Suesue aoaoga faavae o lesona a le faifeautalai.
- Suesue isi mataupu mai le “*Tala’i La’u Talalelei.*”

Suesuega Faalesoa

O le faamoemoega o suesuega faalesoa o le (1) fausia ai lea o le lotogatasi i le lua soa ina ia mafai ai ona aoao atu e ala i le Agaga ma (2) taulai atu i le alualu i luma o i latou o loo oulua aoaoina. E mafai ona oulua faia ia suesuega faalesoa ma vaega e sili ona lelei ma aoga pe a oulua:

- Fetufaai ni manatu mai suesuega faaletagata lava ia.
- Ia saunia mo ni feiloaiga patino e aoao atu ai, feiloaiga ma tagata o le ekalesia, sailia o ni avanoa, ma isi gaoioiga. Suesue mea e faaaoaga e fesoasoani ai ia te oe ia aoao atu, sailia, ma faateleina ai le lelei o lau galue. Ia talatalanoa e uiga i tagata o loo outou galulue faatasi. Ia faia ni fuafuaga e faaaoaga ai mea na e aoaoina.
- I le gasologa o le aso atoa, ia faaauau le talanoaina o mataupu faavae, sini, tomai, ma fuafuaga mai suesuega faalesoa.

Fonotaga Faaleitu

O le faamoemoega o fonotaga faaleitu o le “ia aoao le tasi i le tasi i mataupu o le malo” (MFF 88:77).

- O fonotaga faaleitu e faia i vaiaso taitasi mo le 60 i le 90 minute.
- O le taitai o le itu e fuafuaina ma taita’ia le fonotaga faaleitu ma e mafai ona valaaulia isi faifeautalai e fesoasoani e aoao atu.



Faamatalaga

- O fonotaga faaleitu e mafai ona aofia ai le:
 - Fetufaai o manatu mai suesuega faaletagata lava ia ma suesuega faalesoa.
 - Faataitai ai lesona i faatulagaga eseese.
 - Faamalamalama, faatino, ma faataitai ai mataupu faavae ma tomai o loo faamatalaina i totonu o le *“Tala’i La’u Talalelei.”*
 - Talanoaina o le alualu i luma ma manaoga o tagata sailiili.
 - Talanoaina ma taulima ia lu’itau i totonu o le itu.
 - Fetufaai ia aafiaga ma molimau o le galuega faafaifeautalai.
- E mafai e taitai itu ona faaoga fonotaga faaleitu e maua mai ai lipoti e tusa ma taumafaiga a faifeautalai i totonu o le itu. E le tatau ona latou setiina ni sini po o ni aofaiga mo isi faifeautalai, e le tatau foi ona latou talosaga atu i isi faifeautalai e lipoti atu a latou sini.

Konafesi Faalesone

O konafesi faalesone e faia i lalo o le taitaiga a le peresitene o le misiona.

O Mea o loo Aofia ai i le *“Tala’i La’u Talalelei”*

O mataupu taitasi i totonu o le *“Tala’i La’u Talalelei”* o loo aofia ai ni vaaiga eseese. O nei vaaiga e tatau ona fesoasoani ia te oe ina ia e maua ni mea se tele mai au suesuega—ae le faamalosiā ai oe ina ia patino se auala e aoaoina ai oe. Ia faaoga nei vaaiga i se tulaga fetuunai e fuafua i mea o loo e manaomia.

Tusi Talaaga o Suesuega

E masani ona faapea mai le *“Tala’i La’u Talalelei”* e te faaogaina se tusi talaaga o suesuega ina ia fesoasoani ia te oe ina ia malamalama, manino, ma manatuaina mea na e aoaoina. Na aoao mai Elder Richard G. Scott, *“O le malamalama e faamaumauina ma le faaeteete o le malamalama lea e mafai ona maua i le taimi e moomia ai. O le mataala i faamatalaga faaleagaga e tatau ona teuina i se nofoaga lilo lea e faailoa atu ai i le Alii lou faatauaaina tele. O lenei faiga e faalateleina ai lou mauaina o se malamalama sili atu”* (*“Acquiring Spiritual Knowledge,” Ensign, Nov. 1993, 86*). Iloilo lau tusi talaaga o suesuega ina ia toe manatua ai aafiaga faaleagaga, iloa ai ni manatu fou, ma iloa ai lou alualu i luma.

O lau tusi talaaga o suesuega e mafai ona faaoga ai se api malo, se api tusitusi, po o se faavaa e i ai ni ona itulau. Ia tusitusi ma faatulaga ou manatu ma lagona i se auala e fetau lelei ma le auala o loo e aoaoina ai. Ia atiina ae sau lava faiga ina ia faigofie ai ona maua ia faamatalaga autu i le lumanai. Ia faaoga soo e iloilo ai, vaavaai i ai, ma faaoga mea na e aoaoina. Ia faaoga lau tusi talaaga o suesuega e tusitusi ai faamatalaga ma faamaumau ai lagona i le taimi o au lava suesuega faapea ma suesuega faalesoa, o fonotaga faaleitu, konafesi faalesone, ma faatalanoaga ma le peresitene o le misiona.

Pusa o Faamatalaga

O pusa i totonu o le *“Tala’i La’u Talalelei”* o le a fesoasoani ia te oe ina ia e aoaoina. O nisi pusa e muai iloilo pe tauaofai ai manatu autu. O isi e fesoasoani ia te oe ia tulaui atu ai lau suesue, aoao mai tusitusiga paia, faaoga ai mea na e aoaoina, atiina au taleni, ma ausia manaoga o i latou e te aoaoina. I le tele lava o tulaga, o nei pusa ua na o se amataga. Ia galueaiina ma le agaga tatalo ia gaoioiga o loo i totonu o pusa, e ala i le atiina ae o nisi gaoioiga fou e suesue ai ma saili nisi mau e faaopoopo i ai.

Manatunatu i le Mea

- O le a le uiga o le
- E faapefea ona ou
- Aisea e tatau ai on
- O le a le matafaini

“**Manatunatu i le Mea Lenei.**” O le tele lava o mataupu e amata i fesili i totonu o pusa “Manatunatu i le Mea Lenei.” O nei fesili e taulai atu i manatu autu o le mataupu, ma ua saunia ai se auivi mo lau suesuega. Ia faaoga fesili nei e faatulaga, malamalama, manatunatu loloto, ma faaoga ai mea na e aoaoina.

Manatua Le Mea Lenei

- Ia fausia le Ekalesia
- Ia saili mo le Agaga
- Ua saunia tagata o
- O tanata o le Ekalesia

“**Manatua le Mea Lenei.**” O le tele lava o mataupu e faauma i se pusa “Manatua le Mea Lenei”—o se tuuaofaiga o le tele o manatu taua mai le mataupu. A uma ona e suesueina se mataupu, ia iloilo faamatalaga nei ina ia mautinoa ai ua e malamalama i nei manatu autu. Ia toe iloilo po o le a se lelei o lou faaogaina o nei manatu, ma ia faia ni fuafuaga e faaoga ai mea na e aoaoina.

Mau Suesueina

- O a mea o loo ta’u ma
- 3 Nifae 12:48
- 3 Nifae 27:21, 27
- O le a le sontanu o ul

“**Mau Suesueina.**” O nei pusa e faasino atu ai oe i ni fautuaga e mafai ona fausia mai ai lou malamalama ma lau molimau. Ia atiina ae i luga o nei fautuaga e ala i le sailia o mau e faaopopo i ai. Ia fesili ifo ia te oe lava ni fesili faaopopo e faatatau i ai, lea o le a fesoasoani e te maua ai se malamalamaaga ma faaoga mea na e aoaoina.

Gaoioiga: Suesuega

- Mafaufau faapea o uiga i le toetu, ma e aoao atu e uiga i faavae e matuai ma

“**Gaoioiga.**” O le tele o mataupu e i ai gaoioiga mo suesuega faaletagata lava ia ma suesuega faalesoa ina ia faalatele ai lou iloa ma le faaogaina. Ia toe fai nei gaoioiga i le taimi atoa o lau misiona. O le a e maua ai ni manatu fou i taimi uma e te faia ai aua o ou manaoga—ma manaoga o i latou o loo e aoaoina—o le a suia.

Manatu mo le Fesoasoani

- E tele auuala e uunaia a faafaifeautalai. Mafau
- Saili le taitaiga a le faaopopo i lenei e

Pusa Mumu. O pusa nei o loo i ai ni faamatalaga ma ni fautuaga taua mo le tele o tulaga e aoao atu ma talai atu ai.

Tala

O tala uma lava o loo i totonu o le “*Tala’i La’u Talalelei*” e moni, e ui lava ina ua sui igoa o le toatele o tagata. O tala taitasi uma o loo faailoa mai ai nisi o mataupu faavae e o faatasi ma le galuega faafaifeautalai. A o e faitau i nei tala, ia vaavaai mo mataupu faavae o loo aumai ai.

Faamatalaga

Manatu mo Suesuega ma le Faaogaina

O mataupu taitasi uma lava e faaiuina i ni manatu faaopoopo mo suesuega faaletagata lava ia, suesuega faalesoa, fonotaga faaleitu, ma konafesi faalesone. O lenei punaoa tamaoaiga o gaoioiga e aoao ai, e maua ai ni faataitaiga o auala sili ona lelei e aoao ai mea e faaogaina. Ia fatufatu ni auala fou ma saili musumusuga e fausia ai ni gaoioiga faaopoopo i taimi uma e te suesue ai pe aoao atu ai se tasi o nei vaega. Ia faatele ona fai ia mae'a nei gaoioiga i le taimi o lau misiona.

Manatu mo Suesuega ma le Faa**Suesuega Faaletagata Lava Ia**


- Sauni se tautalaga e lima minute i se tasi o uiga o loo talanoaina i mataupu.
- Faaogaina le Guide to the Scriptures, e saili ai mo auala na faaa'oa'oa Faola ia uiga o loo faamatalaina i totonu o lenei mataupu. Ia tusi i e aoaoina, i totonu o lau tusi talaaga o suesuega.
- Ia faaturmu faavaitaimi le "Gaoioiga o Uiga" o loo i le faaiuga o leni
- Vaai ia iloa se uiga o loo i totonu o lenei mataupu. Ia fesili ifo ia te
 - E mafai faapefea ona ou atiina ae lenei uiga?
 - O le a se mea e tatau ona suia i lo'u loto, mafaufau, ma mea e ae ai lenei uiga?

Faifeautalai o loo Auauna Atu i Paranesi ma Itu

O le toatele o faifeautalai o loo auauna atu i paranesi ma itu. E ui lava o lenei tusi lesone o loo ta'u atu ai igoa o *uarota* ma *sitiki*, ae o mataupu faavae lava e tasi ma auala e faaogaina e faatatau foi lea i *paranesi* ma *itu*. O le a aoaoina oe e le peresitene o le misiona i soo se fetuunaiga e fai pe afai e galulue ma taitai o le paranesi ma le itu.

Faaogaina e Faifeautalai o le Uarota ma Taitai

O le "*Tala'i La'u Talalelei*" e mo faifeautalai faamisiona o le Ekalesia. Ae peitai, o mataupu faavae ma aoaoga faavae o loo aoaoina ai iina, e talafeagai foi mo faifeautalai o le uarota ma taitai a o latou saili e fausia le malo o le Alii. O le suesueina soo o lenei tusi lesone o le a mafai ai e i latou ona faataunuuina o latou tiutetauave i le aveai ai ma uso faifeautalai o le au paia, ma o le a saga atiina ae ai foi le galulue faatasi ma faifeautalai faamisiona.



O Dan Jones, o se tasi o faifeautalai maoae i leni tisipenisione, sa talaiina le talalelei i Uelese.

O Le A Lo'u Faamoemoega i le Avea ai ma se Faifeautalai?

O Lo'u Faamoemoega

Ia valaaulia isi e o mai ia Keriso e ala i le fesoasoani atu ia i latou ia maua le talalelei toefuataiina e ala i le faatuatua ia Iesu Keriso ma Lana Togiola, salamo, papatisoga, mauaina o le meaalofa o le Agaga Paia, ma tumau e oo i le iuga.

Manatunatu i le Mea Lenei

- O le a lo'u faamoemoega i le avea ai ma se faifeautalai?
- O le a le talalelei?
- Aisea tatou te talai atu ai le talalelei?
- Aisea e tatau ai ona ou aoao atu ma le mana ma le pule?
- O le a le savali o le Toefuataiga? Aisea e taua tele ai?
- O le a lo'u tiutetauave i le fesoasoani atu i isi ina ia liua?
- O le a faapefea ona ou iloa pe o a'u o se faifeautalai faamanuiaina?

O Lou Tofiga le Aoao Atu o le Talalelei Toefuataiina a Iesu Keriso

Oloo siomia oe e tagata. Tou te fetau'i ma i latou i le alatele, asiasi ia i latou i o latou fale, ma malaga faatasi ma i latou. O i latou uma o fanau a le Atua, o ou uso ma tuafafine. E alofa le Atua ia i latou e pei foi ona alofa o Ia ia te oe. O le toatele o nei tagata o loo sailia le faamoemoega o le olaga. E manatu popole i latou mo o latou aiga. Latou te manaomia le lagona o le fia avea ma se itutino po o se vaega, lea e maua mai i le malamalama o i latou o fanau a le Atua, o sui o Lona aiga faavavau. Latou te fia lagonaina

Faamatalaga

Faamatalaga

le malupuipua i totonu o se lalolagi ua fesuisui ai mea e faatauaina. Latou te mananao i le "filemu i lenei lalolagi, ma le olaga faavavau i le lalolagi a sau" (MFF 59:23), ae ua "taofia i [latou] mai le upumoni ona ua latou le iloa le mea e maua mai ai" (MFF 123:12).

O le talalelei a Iesu Keriso e pei ona toefuatai mai e le Perofeta o Iosefa Samita o le a faamanuiaina aiga, faafetaiaia o latou manaoga faaleagaga, ma fesoasoani ia i latou ina ia faataunuu o latou manaoga silisili. E ui lava atonu e le mafai ona latou iloa pe aisea, ae latou te moomia lava le faasaolotoina mai lagona o le tausalaina lea e maua mai mea sese ma agasala. Latou te moomia ona iloa le olioli o le togiola e ala i le mauaina o le faamagaloga o a latou agasala ma olioli i le meaalofa o le Agaga Paia.

I le avea ai ma se sui faatagaina o Iesu Keriso, e mafai ona e aoao atu i tagata i le mana ma le pule "e oo mai le togiola talu le Mesia Paia," ma e leai lava se tasi e "mafai ona nonofo faatasi ma le Atua, sei iloga ona o le tau ma le alofa mutimutivale ma le alofa tunoa o le Mesia Paia" (2 Nifae 2:6, 8). Afai e oo mai tagata ma talia le talalelei toefuataiina a Iesu Keriso ma mauaina sauniga o le papatisoga ma le faamauga e ala i le pule o le perisitua, e mafai ona faamautinoa atu ia i latou "ua le tuulafoaiina i latou e faavavau" (Tusi a Mamona, Itulau Faaulutala).



A o faatupulaia lou malamalama i le Togiola a Iesu Keriso, o lou manao e fetufaai atu le talalelei o le a faateleina. O le a e lagonaina e pei ona lagona e Liae, le "aoga sili . . . o le faailoa atu o ia mea i tagata o le lalolagi" (2 Nifae 2:8).

Na aoao mai Peresitene Ezra Taft Benson: "Ua poloaiina i tatou e le Atua ina ia avatu lenei talalelei i le lalolagi uma. O le galuega lena e tatau ona tuufaatasia ai i tatou uma i aso nei. E na o le talalelei lava o le a faasaoina le lalolagi mai le mala o lona faatafunaina. E na o le talalelei lava o le a tuufaatasia tagata o ituaiga ma atunuu uma i le filemu. E na o le talalelei lava o le a aumaia le olioli, fiafia, ma le faaolataga i le aiga o tagata" (*The Teachings of Ezra Taft Benson* [1988], 167).

Ua valaauina oe e fai ma sui o Iesu Keriso e fesoasoani i tagata ina ia faamamaina mai a latou agasala. E te faia lenei mea e ala lea i le valaaulia o i latou ina ia o mai ia Iesu Keriso ma liuaina i latou i Lana talalelei toefuataiina. Ina ia o mai i le Faaola e tatau ona latou maua le faatuatua ia te Ia e tau atu ai i le salamo—ia faia suiga e talafeagai ai ina ia ogatasi o latou olaga ma Ana aoaoga. E mafai ona e fesoasoani i tagata ina ia atiina ae lea faatuatua e ala i le aoaoina atu ia i latou o le talalelei toefuataiina e ala i le Agaga, ma valaaulia i latou ina ia tautino atu e ola e tusa ai ma aoaoga o le talalelei. O le tausia o poloaiga e saunia ai i latou mo feagaiga o le papatisoga ma le faamauga ma le meaalofa taua o le Agaga Paia. E ao ona latou tuuese le "tagata o le lalolagi" ma avea ma se tagata o le Au Paia "ona o le togiola a Keriso le Alii" (Mosaea 3:19).

Gaoioiga: Suesuega Faaletagata Lava la po o Suesuega Faalesoa

Vaavaai i le ata o le laau o le ola o loo i le itulau lenei, a o e suesueina le miti i le laau o le ola o loo maua i le 1 Nifae 8 ma le 11. I lenei miti, o loo faatusa ai le laau o le ola i le alofa o le Atua (tagai i le 1 Nifae 11:21–22).

- O le a le mea na manao i ai Liae ina ua uma ona ia 'ai i le fua o le laau? (Tagai i le 1 Nifae 8:10–18.)
- I le miti, o le a le mea na moomia ona faia e tagata ina ia aai ai i le fua o le laau? O le a se mea e moomia ona tatou faia ina ia maua ai faamanuiaga uma o le Togiola? O a ni aualea e fesoasoani ai tautinoga ma feagaiga ia i tatou ina ia tatou tofo i nei faamanuiaga?
- I le avea ai ma se faifeautalai, o le a lou tiute i le fesoasoani ai i isi ina ia latou maua ma aai i fua o le talalelei?

E Faamanuiaina Aiga e le Talalelei

O le savali o le Toefuataiga o le talalelei a Iesu Keriso e faamanuiaina ai aiga. Ua tatou malamalama i le faamoemoega o le Atua mo aiga ona o le Toefuataiga: “O le fuafuaga paia o le fiafia, ua mafai ai ona faaauau fegalegaleaiga faaleaiga i tala atu o le tuugamau. Ua mafai i sauniga paia ma feagaiga ua maua i malumalu paia ona toe foi atu ai tagata taitoatasi i le afioaga o le Atua ma toe faatasia aiga e faavavau” (“O Le Aiga: O Se Folafolaga i le Lalolagi,” *Liahona*, Ian. 1996, 122).

E mafai ona avea ia sootaga faaleaiga ma pogai o nisi o o tatou fiafiaga sili i luga o le fogaeleele. O loo osofaia e Satani le aiga i le tele o itu, ma ua tele naua aiga ua faaleagaina i ana taumafaiga. O le savali o le talalelei toefuataiina a Iesu Keriso ua mafai ai e aiga ona faatasia i le taimi nei ma le faavavau. O le ola ai i mataupu faavae o le talalelei, e mafai ai e aiga ona iloa le filemu, olioli, ma se lagona o le avea ma sui faapea ma lona faasinomaga i lenei olaga. O le malamalama o le talalelei, e mafai ai e aiga ona foia ni feeseesea'iga, fefinaua'iga, ma luitau. O aiga ua mavaevae i le feeseesea'i e mafai ona faaleleia e ala i le salamo, faamagaloga, ma le faatuatua i le mana o le Togiola a Iesu Keriso. “E maua le fiafia i le olaga faaleaiga pe a faavae i aoaoga a le Alii o Iesu Keriso. O faaipoipoga ma aiga manuia, e faavae ma tumau i mataupu faavae o le faatuatua, tatalo, salamo, faamagaloga, faaaloalo, alofa, agalelei, galuega, ma gaoioiga faafiafia tuufaatasi” (*Liahona*, Ian. 1996, 123).

Taumafai e sue ma aoaoina aiga—o se tamā, tina, ma le fanau—o e mafai ona felagolagomai i le ola ai i le talalelei ma taunuu atu ai lava i le faamauiina o se aiga e ala i le pule o le perisitua ua toefuataiina.

Aoao Atu e ala i le Agaga

Talu ai ona o le talalelei a Iesu Keriso o le “mana lava lea o le Atua e ola ai i latou uma o e faatuatua” (Roma 1:16), o le savali o le Toefuataiga o le talalelei e tatau ona aoaoina atu e ala i le mana mai le lagi—le mana o le Agaga Paia, o le sui lona tolu lea o le Aigaatua. E masani ona ta'ua o Ia o le Agaga, ma o se tasi o Ana matafaioi o le aoao atu ma molimau atu lea i le upumoni. A o e aoao atu e ala i lona mana, o le Agaga Paia o le a:

“O le galuega sili ona taua a le Alii o le a e faia, o le a faia lea i totonu o puipui o outou lava fale.”

– PERESITENE HAROLD B. LEE
THE TEACHINGS OF HAROLD B. LEE, SEL.
CLYDE J. WILLIAMS (1996), 280

Faamatalaga

- Aoaoina atu ia te oe ia upumoni ma aumaia aoaoga faavae na e aoaoina ina ia e manatuaina (tagai i le Ioane 14:26).
- Tuu atu ia te oe upu e tautala ai i le taimi lava e te moomia ai (tagai i le MFF 84:85).
- Momoliina atu lau savali i loto o tagata o loo e aoaoina (tagai i le 2 Nifae 33:1).
- Molimau atu i le moni o lau savali ma faamautuina atu au upu (tagai i le MFF 100:5–8).
- Fesoasoani ia te oe ia iloaitino manaoga o tagata o loo e aoaoina (tagai i le Alema 12:7).

E taua tele le Agaga mo le aoaoina atu o upumoni o le talalelei i se auala o le a fausia ai le faatuatua o isi. A o e tauivi ina ia atiina ae le faatuatua ina ia faalagolago i le Agaga, e tatau ona e:

- Tatalo mo le Agaga (tagai i le MFF 42:14).
- Faamama lou loto (tagai i le MFF 112:28).
- Tausi poloaiga (tagai i le MFF 20:77, 79).
- Ia faataua ma le maelega ia afioga a le Atua (tagai i le MFF 11:21; 84:85).
- Aoa atu ina ia malamalama ma faamanuiaina isi i lau savali (tagai i le MFF 50:13–22).
- Faatino le faatuatua (tagai i le Moronae 10:7).

Ua faamanuiaina oe mo lou valaauga paia faatasi ai ma le folafolaga faapea o le a tuuina atu le Agaga ia te oe pe a e ausia tulaga manaomia ua faatuina e le Alii. O le olioli ai i meaalofo a le Agaga, e tatau ona avea ma se tasi o ou faanaunauga silisili.

O Le Mana ma le Pule o Lou Valaauga

E ao i faifeautalai ona o atu “i le mana o le faauuga na faauuina ai [i latou], e talaiina atu tala fiafia o le olioli tele, o le talalelei faavavau lava” (MFF 79:1). Ua ia te oe le pulse e talai atu ai le talalelei. Afai o loo e umia le perisitua, ua ia te oe le pulse e faia ai sauniga o i ai. A o e faatinoina ma le agaga tatalo ma le agavaa lena pulse, o le a e mauaina le mana faaleagaga, o le faamaoniga lea o lou valaauga. Aua e te fefe pe matamuli e uiga i le faataunuaina o lena tofiga. E pei lava o atalii o Mosaea, e ao ona e aoa atu ma le mana ma le pulse a le Atua (tagai i le Alema 17:2–3).

Ina ua faamanuiaina oe e le pulse o le perisitua, na e maua le aia ma le avanoa e fai ai ma sui o le Alii. Na e mauaina se tusi faamaonia faafaifeau lea e faamaonia atu ai lena pulse i le lalolagi. Na saunoa Peresitene Spencer W. Kimball: “O le faamanuiaina i se valaauga e mafai ona tino mai; o le tuueseina lea mai le agasala, vavae ese mai le leaga; ia ese mai mea uma lava e mataga, maualalo, lē migao, taugofie, pe faatufanua foi; o le *tuueseina* mai le lalolagi i se tulaga maualuga atu o manatu ma gaoioiga. O le faamanuiaga e faalagolago lea i le faamaoni o le faatinoga” (*The Teachings of Spencer W. Kimball*, ed. Edward L. Kimball [1982], 478).

O le pulse ua ia te oe ua oo mai ai ma se tiutetauave ina ia ola agavaa mo lou valaauga. I le avea ai ma sui o le Alii, e ao ona avea oe ma se “faaaoao i e ua faatuatua” (1 Timoteo 4:12). Taumafai ina ia e ola e tusa ai ma poloaiga a le Atua ma tausia feagaiga na e osia i totonu o le malumalu; ia iloa tusitusiga paia; ia faaaloalo, tausisi i le taimi, ma faalagolago; mulimuli i faatulagaga a faifeautalai i le amio, laei, ma teuga; alofa i tagata o loo e auauna ma galue i ai. Ia faamamalu le suafa o Keriso e ala i au mea e fai.

E le gata i le pulse, e ao foi ona e faaogaina le mana i lau galuega. O le pulse ua e taliaina, e mafai ona tau atu i le mana. O le mea moni lava, o le mana faaleagaga o se tasi lea o faamaoniga e moni le pulse o loo ia te oe. O le mana faaleagaga o se meaalofo lea e te mafaia ai ona faia ia matuai lelei le galuega.

O lou mana ma le pule e tatau ona matuai iloga a o e galue ma aoao atu. E mafai ona faaalua le mana i le tele o mea e te faia, e pei o le:

- Taitaiina e le Agaga e ta'u atu mea e finagalo le Alii e te fai atu ai i le taimi tatau (tagai i le MFF 84:85).
- Mauaina le taitaiga i le mea e alu i ai po o le mea e fai (tagai i le MFF 28:15; 31:11; 75:26–27).
- Faamautuina o lau molimau e ala i le molimau a le Agaga (tagai i le 2 Nifae 33:1; MFF 100:5–8).
- Auai i sauniga o le faaolataga (tagai i le MFF 84:19–20).
- Tuuina atu faamanuiaga faaleperisitua pe afai o oe o se toeaina (tagai i le Iakopo 5:14–15).
- Tatalo faatasi ma tagata o loo e galue i ai ma tatalo mo i latou (tagai i le Alema 6:6; 8:18–22; 10:7–11; 31:26–35; MFF 75:19).
- Faailoa atu le alofa mo le Alii, o lou aiga, o ou uso a faifeautalai, ma tagata o loo e auaua atu i ai.

Mau Suesueina

E faapefea ona e mauaina le mana?

Alema 17:2–3

MFF 53:3

1 Korinito 2:4

Gaoioiga: Suesuega Faaletagata Lava la po o Suesuega Faalesoa

Vaavaai i le ata vali o Keriso o loo faauuina ia Aposetolo, ona faitau lea o le loane 15:1–16.

O le a le auala ua avea ai Keriso ma vine? E faapefea ona avea oe ma se lala o lena vine? E faapefea ona faatatau le tofiaina o oe i lena sootaga?

Toe faitau lou tusi faamaonia faafaifeau. Tusitusi i lalo ou lagona ma manatu e uiga i le mea na e faitauina. O taimi uma lava e te suesueina ai le mataupu lena, ia fai pea le faiga lea. Ia matauina le suia o ou lagona mai lea taimi i lea taimi.

Suesue le Mataupu Faavae ma Feagaiga 109:13–15, 21–30, 38–39, 55–57, o ni upusii ia mai le tatalo musuia o le faapaiaga a le Perofeta o Iosefa Samita mo le Malumalu o Katelani. O a faamanuiaga na ole atu ai Iosefa Samita mo ē faamaoni?



O Le Talalelei a Iesu Keriso

O le talalelei a Iesu Keriso e faamatala atu ai lau savali ma lou faamoemoega; o le saunia lea o le “pe o le a” ma le “pe aisea” o le galuega faafaifeautalai. Na faamatalaina e le Faola Lana talalelei ina ia aofia ai nisi o aoaoga faavae ma le taua. Na Ia afio mai i le lalolagi ina ia faia le finagalo o Lona Tama, ma na auina mai o Ia e Lona Tama i le lalolagi ina ia siitia i luga o le satauro. O Lana Togiola ma le Toetu, o le a siitia uma ai tagata ina ia tutu i luma o Keriso ina ia faamasinoina ia latou galuega, pe lelei pe leaga. O e na faatinoina le faatuatua ia Keriso, salamo ia latou agasala, ma papatisoina i le suafa o Keriso e mafai ona faapaiaina e le Agaga Paia. Afai latou te tumau e oo i le iuga, o le a latou tutu ma le lē pona i luma o Keriso i le aso gataaga ma o le a ulu atu i le malologa o le Alii. O le a ta'uamionuina i latou e Keriso i luma o le Tama. O le a avea o Ia ma o latou Puluvaaga ma Fautua. O i latou o ē le tumau i le amiotonu e oo i le iuga o le a “lafoina i le afi . . . ona o le faamasinoga tonu a le Tama.” (Tagai i le 3 Nifae 27:13–22; faatusatusa i le 2 Nifae 31:10–21; 3 Nifae 11:31–41; MFF 76:40–42, 50–53.)

O le faamoemoega o le talalelei o le faamamaina lea o tagata mai a latou agasala ina ia mafai ona latou mauaina le alofa tunoa o le Faola i le aso faamasino. O lea la, o le mea o loo taulai atu i ai lenei tusi, ma le mea sili atu ona taua, o le galuega o loo e faia i aso uma ina ia valaau atu i isi e o mai ia Keriso e ala lea i le fesoasoani ia i latou ia mauaina le talalelei toefuataiina e ala i le faatuatua ia Iesu Keriso ma Lana Togiola, salamo, papatiso, maua le agaga Paia, ma tumau e oo i le iuga.

E amata ona mulimuli tagata taitoatasi ma aiga ia Keriso a o latou faatinoina le faatuatua ia te Ia ma salamo ai a latou agasala. Latou te maua se faamagaloga o agasala e ala i le papatisoga ma le mauaina o le meaalofa o le Agaga Paia mai se tasi ua i ai le pule mai le Atua e faia ai nei sauniga. Ona latou tumau ai lea e oo i le iuga, i se isi faaupuga, latou te faaauau pea i o latou olaga atoa ona faatinoina le faatuatua ia Iesu Keriso, salamo, ma faafou a latou feagaiga na osia. E le o ni laasaga nei e na o le faatasi ona latou oo i ai i o latou olaga; ae, o le faia soo i le olaga atoa e avea ai nei laasaga ma se faatulagaga tauia o le olaga e faatupula'ia pea. O le mea moni lava, e na o le pau lava lea o le ala o le olaga e aumaia ai le filemu o le mafaufau, ma mafai ai e fanau a le Tama Faalelagi ona toe foi atu e nonofo i Lona afioaga.

O le usiuitai ia Iesu Keriso o se tautinoga lea o le olaga atoa. O le faatinoina o le faatuatua, salamo, papatisoina ma le tautino atu e tautuaina ia Keriso, faapea ma le mauaina o le Agaga Paia, e mafai ai ona tatou iloa le faamaloloina, faamagaloina o agasala, ma le liua atoatoa i le Faola ma Lana talalelei.

Fesoasoani i tagata ia maua le faatuatua ia Iesu Keriso e ala i le aoao atu ma le molimau atu e faapea o le atoatoaga o le talalelei a Iesu Keriso ma le pule o le perisitua ua uma ona toefuataiina mai faapea ma le valaaulia o i latou ina ia ola i Ana aoaoga.

“Ia talai atu ia uluai mataupu faavae o le Talalelei—ia talai atu pea lava pea: o le a outou iloa ina ai lea aso ma lea aso le faaalua mai ia te outou o manatu fou ma le malamalama faaopoopo e faatatau i ai. E mafai ona outou faalauteleina ina ia matuai malamalama lelei i ai. Ona mafai lea ona outou matuai faafaigofieina ina ia malamalama ai i latou [tou] te aoaoina.”

— AILAMA SAMITA
HISTORY OF THE CHURCH, 6:323

Mau Suesueina

O le a le talalelei, po o le mataupu a Keriso?

2 Nifae 31:10–21

3 Nifae 11:31–41

3 Nifae 27:13–22

Faamatalaga

O Le Savali o le Toefuataiga: O Le Faavae o le Faatuatua

E le afaina po o fea e te auauna ai ae po o ai foi o loo e aoaoina, ia faaautu lau aoao atu i le Toefuataiga o le talalelei a Iesu Keriso. “O le a faamanuia outou e le Alii a o outou aoao atu le savali o le Toefuataiga i se lalolagi o loo matuai moomia ai lava le talalelei a Iesu Keriso.” (“Faamatalaga i le Galuega Faafaifeautalai,” tusi a le Au Peresitene Sili, 11 Tes. 2002). A o e suesueina ia aoaoga faavae o loo i ai i totonu o lesona a faifeautalai, o le a e iloaina ai e tasi lava le tatou savali: Na auala mai i se perofeta o ona po nei, na toefuatai mai ai e le Atua le malamalama e uiga i le ata o le faaolataga, lea e faaautu i le Togiola a Keriso ae faataunuaina e ala i le ola ai i uluai mataupu faavae ma sauniga o le talalelei.

Ia mautinoa ia matuai malamalama lelei tagata uma o loo e aoaoina i mea nei:

- O le Atua o lo tatou Tama moni lava o loo i le Lagi. E alofa o Ia ia i tatou. O tagata uma lava o loo i le lalolagi o se atalii po o se afafine o le Atua ma o se tasi o le aiga o le Atua. O Iesu Keriso, o le Alo o le Atua, o lo tatou Faaola ma le Togiola.
- Sa aapa mai lo tatou Tama o i le Lagi alofa i Ana fanau i le talafaasolopito atoa o le tusi paia e ala i le faaali mai o Lana talalelei i perofeta. Ae faanoanoa, ona e toatele tagata na latou teena lena talalelei; e oo lava i nisi o e na taliaina na latou suia aoaoga faavae ma sauniga o le talalelei, ma oo atu ai i le lē talitonu ma le liliuese.
- Na auina mai e lo tatou Tama o i le Lagi Lona Alo Pele o Iesu Keriso i le lalolagi. Sa Ia faia vavega ma aoao atu Lana talalelei. Na ia faataunuaina le Togiola ma na toetu mai.
- E amata mai i le Uluai Faaaliga, na toe aapa mai ai le Atua i Lana fanau i le alofa. Na Ia toefuatai mai le talalelei a Iesu Keriso ma Lana pule o le perisitua ma faatuina Lana Ekalesia i le lalolagi e ala mai i le Perofeta o Iosefa Samita. O le Tusi a Mamona o se faamaoniga maumaututu lea o lenei Toefuataiga.



A o e fesoasoani i tagata sailiili ina ia iloa le faatulagaga o le liliuese ma le toefuataiga, o le a latou saunia ia malamalama ma lagona le matuai manaomia lava o le Toefuataiga i aso e gata ai. O le a latou vaai i le manaomia o le toefuataiga o le talalelei, mauaina o sauniga o le faaolataga e ala i le pule o le perisitua toefuatai, ma mulimuli i le ala e tau atu i le ola faavavau. Fesoasoani i tagata ia iloa o le Ekalesia e le na o se isi talitonuga faalelotu, e le o se lotu Amerika foi. Ae o se toefuataiga mai o le “atoatoaga [o le] talalelei” (MFF 1:23), lea lava sa faaalua ma aoaoina mai i le amataga.

O le Tusi a Mamona: O se Tasi Molimau ia Iesu Keriso o se faamaoniga maumaututu lea o Iosefa Samita o se perofeta ma o le talalelei a Iesu Keriso ua toefuataiina mai. O le maa ‘au’au

Faamatalaga

lea o lo tatou talitonuga faalelotu, o le punaoa sili ona malosi lea mo le aoaoina atu o lenei savali. O nisi upumoni taua na toefuataiina e ala mai ia Iosefa Samita e aofia ai le malamalamaaga faapea o le Atua o lo tatou Tama ma o i tatou o Ana fanau agaga, sa tatou nonofo faatasi ma Ia a o le'i fananau mai, ma e mafai e aiga ona ola e faavavau i le afioaga o le Atua e ala lea i le Togiola a Keriso i le usiusitai i tulafono ma sauniga o le talalelei.

O le Tusi a Mamona o le faamaoniga lea o le alofa o le Atua mo Lana fanau. O loo faaali mai ai faapea e fetalai mai le Atua i Lana fanau. A o e aoao ma molimau atu, ia valaaulia tagata ina ia faitau le Tusi a Mamona ma tatalo e uiga i lana savali. E tatou i tagata uma e te aoaoina ona filifili pe taliaina le Tusi a Mamona o se faaaliga mai le Atua.

Ia talitonuina le folafolaga maoae o loo i le Moronae 10:3–5. Ia faia mea uma e te mafaia ina ia faatauanau ai tagata e faitau le tusi, malamalama i ai, ma ole atu ma le faamaoni i le Atua pe moni. O le molimau a le Agaga Paia e ave ma maatulimanu o lo latou faatuatua e faapea na toefuatai mai e Keriso Lana Ekalesia. Fesoasoani ia i latou o loo e aoaoina ina ia mauaina lena faamautinoaga faaleagaga.

Mau Suesueina

E tatou faapefea ona e faaogaina le Tusi a Mamona i lau galuega faafaifeautalai?

1 Nifae 13:39	Moronae 10:3–5	MFF 42:12–14
2 Nifae 29:8–10	MFF 20:5–16	

Gaoioiga: Suesuega Faaletagata Lava Ia

Mafaufau faapea o le a e tusia se tala e uiga i le savali o le Toefuataiga mo se nusipepa i totonu o le atunuu. Ia tusi i totonu o lau tusi talaaga o suesuega se ulutala e faamatalaina ai le savali autu. Ona tusi lea o ou mafaufauga ma lagona e uiga i lenei savali, e aofia ai le suia faapefea o le olaga ua e ola ai ona o le malamalama lelei i ai ma lau vaai i le lalolagi o loo siomia ai oe.

Fesoasoani i Isi ia Faia ni Tautinoga: O Le Faitotoa i le Faatuatua ma le Salamo

Fesoasoani i tagata ina ia agavaa mo le papatisoga ma le faamauga e ala lea i le aoaoina atu ia i latou o aoaoga faavae moni ma valaaulia i latou ina ia salamo ma suia o latou olaga, e ala i le faia ma le tausia o tautinoga lea e fausia ai lo latou faatuatua ia Iesu Keriso. O nei tautinoga e saunia ai tagata e osia ma tausia feagaiga paia.

Na aoao mai Elder Jeffery R. Holland: “O le mea muamua lava o le a e faia pe afai e ta’u atu e se tagata sailiili ia te oe faapea na te le’i faitau ma tatalo e uiga i le Tusi a Mamona o le matuai faanoanoa lava! . . . O le tele o taimi ua tatou faatalale i lenei mea atoa. O le ola e faavavau lenei. O le faaolataga lenei o le fanau a le Atua. O le faavavau o loo i le ogatotonu. . . . O le ala sili lea ona taua o le a savalia e lenei tagata sailiili. Ae afai e le iloa e ia lena mea, ae o oe ua e iloa! . . . O lea, ia faato’ato’a ai le tulaga lenei. Aoao atu faatasi ma le mana ma le pule, ona faanoanoa lea pe afai e le’i faamanuaina le amataga o laasaga muamua e tau atu i le tausia o poloaiga ma le tausia o feagaiga” (“Making and Keeping Covenants,” faasalalauga faasatelite a faifeautalai, Ape. 1997).

A o e aoaoina tagata ina ia malamalama i le Toefuataiga o le atoatoaga o le talalelei, ia e “talai atu le salamo” (MFF 15:6). O le salamo e aofia ai se suiga o le loto ma se mana o le lafoai le agasala ae auauna atu i le Atua. E aofia ai le gauai atu ma le faamaualalo i le Agaga ma usiusitai i le finagalo o le Atua. E moomia ai le faateleina e tagata o a latou tautinoga ina ia ola e tusa ai ma le finagalo o le Atua. O le salamo e moomia ai se suiga moni ma le tumau o manatu, manaoga, amioga, ma mea e fai. O se aafiaga lelei lea e aumaia ai le olioli ma le filemu. Ia lototele ma fiafia i le fesoasoani i tagata ia malamalama i mea e tatau ona latou fai ina ia salamo ai. O le valaaulia o tagata e faia ia tautinoga, e mafai ai ona e sii leotele se leo malosi o le lapataiga ma le faamoemoe.

Mau Suesueina

O le a se mea o aoaoina mai e nei mau e uiga i le talaiina atu o le salamo?

Alema 29:1–4
Alema 42:31

Alema 62:45
MFF 14:8

MFF 15:6; 16:6

Papatisoga ma le Faamauga

O le papatisoina ma le faamauina o tagata e te aoaoina o le autu lea o lou faamoemoega. O le papatisoga mo le faamagaloina o agasala, ma le meaalofo o le Agaga Paia e oo mai ai le anoanoai o faamanuiaga ia i latou o e ola agavaa i ai. O nei sauniga e ulu atu ai tagata i le faitotoa ma faaauau ai i luga o lena ala e tau atu i le ola faavavau. Na saunoa Elder Dallin H. Oaks: “Tatou te le talai atu ma aoao atu ina ia ‘aumaia ai tagata i totonu o le Ekalesia’ pe faateleina ai le faitau aofai o le Ekalesia. Tatou te le talai ma aoao atu ina ia faatauanauna ai tagata ina ia ola i ni olaga sili atu. . . . Tatou te valaaulia i latou uma ina ia o mai ia Keriso e ala i le salamo ma le papatisoga ma le faamauga ina ia tatalaina ai faitotoa o le malo selesitila i atalii ma afafine o le Atua. E leai lava se isi e mafai ona faia lenei mea” (“The Purpose of Missionary Work,” faasalalauga faasatelite a faifeautalai, Ape. 1995).

A o e aoaoina atu le talalelei toefuataiina, ia fesoasoani i tagata ia malamalama i le natura paia o le papatisoga ma le faamauga. Fesoasoani ia i latou ia iloa o le mauaina o le meaalofo o le Agaga Paia o se faamanuiaga silisili lea i lenei olaga, ma o se ki i lo latou faaolataga. O le Agaga Paia o le a “aoao atu ia i [latou] mea uma lava” (Ioane 14:26). Na aoao mai Peresitene Boyd K. Packer: “Afai e te aoaoina ia tagata sailiili ma saunia i latou mo le papatisoga i le vai, e tatau foi ona e mafaufau i le meaalofo o le Agaga Paia—le papatisoga e ala i le afi. Mafaufau i ai o se fuaiupu e tasi. E muamua ona oo mai le papatisoga i le vai ona sosoo ai lea ma le papatisoga i le afi” (“The Gift of the Holy Ghost: What Every Missionary Should Know—and Every Member As Well,” seminar for new mission presidents, June 2003). Na aoao mai le Perofeta o Iosefa Samita, “O le papatisoga i le vai ua na o se afa papatisoga, ma e leai sona aoga pe a aunoa ma le isi afa—o le papatisoga lea a le Agaga Paia” (*History of the Church*, 5:499).

Fesoasoani ia i latou o loo e aoaoina ina ia malamalama, ina ia agavaa i latou mo le papatisoga ma le faamauga e tatau ona latou ausia tuutuuga o loo tuuina mai i totonu o le Mataupu Faavae ma Feagaiga 20:37.

Faamatalaga

MFF 20:37 Tulaga Agavaa mo le Papisoga

- Faamaualalo i latou lava i luma o le Atua.
- Mananao ina ia papatiso.
- O mai ma loto momomo ma agaga salamo.
- Salamo i a latou agasala uma.
- Ua naunau e tauave i o latou luga le suafa o Iesu Keriso.
- I ai se naunautaga e auauna atu ia Keriso e oo i le iuga.
- Faaalia i a latou galuega ua latou maua le Agaga o Keriso e tau atu i le faamagaloina o a latou agasala.

A maea ona papatisoina tagata liliu mai agavaa, e faamauina i latou o tagata o le Ekalesia ma e tuuina atu i o latou luga le meaalofo o le Agaga Paia. O lenei faamauga e faia i lalo o le taitaiga a le epikopo po o le peresitene o le paranesi i se sauniga faamanatuga pe a mae'a le papatisoga. E ui lava e puupuu le taimi e fai eseese ai nei sauniga e lua, ae o le faamauga e faaatoaina ma faamae'aina le papatisoga.

Mau Suesueina

O a ni auala ua avea ai le meaalofo o le Agaga Paia ma se tasi o meaalofo silisili e mafai ona tatou mauaina?

3 Nifae 19:1–13	Ioane 3:5	Kalatia 5:22–25
MFF 45:56–57	Ioane 14:26	Guide to the Scriptures, "Holy Ghost"

Aisea e tatau ai ona mananao tagata liliu mai i le meaalofo o le Agaga Paia?

2 Nifae 31:12–17	Galuega 8:14–17	Galuega 19:1–6 2 Nifae 32:1–5
------------------	-----------------	-------------------------------

Gaoioiga: Suesuega Faalesoa

Sue mau nei ma fai se lisi o tulaga agavaa ma feagaiga o le papatisoga. Ia talanoaina ma lau soa pe faapefea ona aoao atu nei tulaga manaomia i isi.

2 Nifae 31:13	Alema 7:14–16	Moronae 6:1–4
Mosaea 18:8–10	3 Nifae 11:21–41	MFF 20:37

Faavaeina o le Ekalesia

Afai e papatiso ma faamauina tagata e avea ma tagata o le Ekalesia, ia faaauau pea ona galulue faatasi ma taitai ma tagata o le uarota ina ia fesoasoani i nei tagata fou liliu mai ina ia fetuunai i lo latou olaga fou ma faaauau pea lo latou tuputupu a'e faaleagaga. E faavaeina le Ekalesia a o papatisoina ma faamauina ia tagata ua i ai molimau, tausia a latou feagaiga, ma saunia ma le atoatoa e o atu i le malumalu, ma fesoasoani e faamalosia le uarota po o le paranesi.

O tagata liliu mai e i ai ni uo, o e ua tuu atu i ai le tiutetauave, ma e ua fafagaina i le afioga a le Atua o le a tuputupu a'e le molimau ma le faatuatua. E le tatau i faifeautalai, taitai o le uarota, ma tagata o le Ekalesia ona lē faia lo latou tiutetauave o le faafailele ma faamalolosia tagata fou.

O Se Faifeautalai Faamanuiaina

O lou faamanuiaina i le avea ai ma se faifeautalai e fua lea i lau tautinoga ina ia saili, aoao, papatiso, ma faamau tagata ma fesoasoani ia i latou ina ia avea ma ni tagata faamaoni o le Ekalesia o e olioli i le faatasi ai o le Agaga Paia.

Aloese mai le faatusatusaina o oe i isi faifeautalai ma fuatia taunuuga vaaia o au galuega i a latou foi taumafaiga. Ia manatua e i ai le saolotoga i tagata e filifili ai pe latou te talia lau savali. O lou tiutetauave, o le aoao atu lea ma le manino ma le mamana ina ia mafai ai ona latou faia le filifiliga sa'o. O nisi atonu latou te le taliaina lau savali e tusa lava pe latou te maua se molimau faaleagaga faapea e moni. O le a e faanoanoa ona e te alofa ia i latou ma e naunau mo lo latou faaolataga. Ae peitai, e le tatau ona e lotovaivai ai; o le lotovaivai o le a faavaivaia ai lou faatuatua. Afai e tuu faamaualaloina mea e te faamoemoeina, o le a tuutiitia foi le lelei o au taumafaiga, o le a vaivai lou naunau, ma o le a matuai faigata ai lava ia te oe ona mulimuli i le Agaga.

E mafai ona e iloa ua avea oe ma se faifeautalai faamanuiaina pe a e:

- Lagonaina le molimau atu o le Agaga i tagata e ala atu ia te oe.
- Alofa i tagata ma naunau i lo latou faaolataga.
- Usiusitai atoatoa
- Ola ina ia mafai ona e maua ma iloa pe faapefea ona mulimuli i le Agaga, o le a ia faaali atu ia te oe le mea e te alu i ai, le mea e fai, ma mea e te tautala atu ai.
- Atiina ae uiga faaKeriso.
- Galue malosi i aso uma, fai le mea sili e te mafaia ina ia aumaia ai agaga ia Keriso, ma saili ma le faamaoni ina ia aoao ma faaleleia atili.
- Fesoasoani e atiina ae le Ekalesia (le uarota) ua tofia oe e te galue ai.
- Lapatai tagata i taunuuga o le agasala. Ia valaaulia i latou e faia ma tausia ia tautinoga.
- Aoao atu ma auauna atu i isi faifeautalai.
- Fai mea lelei ma auauna atu i tagata i soo se avanoa e maua, e tusa lava pe latou te talia lau savali pe leai foi.

Afai ua e faia le mea sili e te mafaia, atonu lava e te iloina lava ni tulaga e faanoanoa ai, ae o le a e le faanoanoa ai i totonu ia te oe. E mafai ona e lagonaina le mautinoa ua fialia le Alii ina ua e lagonaina le galue ai o le Agaga ia te oe.

Mau Suesueina

O a ni lagona o auauna a le Alii e uiga i le galuega? E faapefea ona faatosina mai e auauna a le Alii i latou o loo latou auauna i ai?

Mosaea 28:3

3 Nifae 28:4–10

MFF 68:2–6

Alema 8:14–15

Eteru 12:13–15

Helamana 10:3–5

MFF 15:4–6; 16:4–6

Faamatalaga

Gaoioiga: Suesuega Faaletagata Lava Ia

- Faitau le Helamana 10:1–5 ma le 3 Nifae 7:17–18. O le a se lagona na oo i le Alii i nei faifeautalai ma le latou auunaga?
- Mafaufau i taumafaiga faafaifeautalai a Apinati ma Amona (tagai i le Mosaea 11–18; Alema 17–20, 23–24). Aisea na faamanuiaina uma ai ia faifeautalai e ui lava sa eseese ia taunuuga o a la taumafaiga?
- Tusitusi i totonu o lau tusi talaaga o suesuega mea na e aoaoina.

Manatua le Mea Lenei

- O lou faamoemoega o le valaau atu lea i isi ina ia o mai ia Keriso e ala lea i le fesoasoani atu ia i latou e talia le talalelei toefuataiina, e ala i le faatuatua ia lesu Keriso ma Lana Togiola, salamo, papatiso, mauaina le meaalofa o le Agaga Paia, ma tumau e oo i le iuga.
- O le talalelei toefuataiina a lesu Keriso e na o le pau lea o le auala e mafai ai ona tatou maua le fiafia faavavau.
- O lou valaauga e tuuina atu ai ia te oe le pule; o le tausia o au feagaiga e tuuina atu ai ia te oe le mana.
- O le atoatoaga o le talalelei a lesu Keriso na toefuatai mai e ala mai i le Perofeta o Iosefa Samita. O le Tusi a Mamona o se faamaoniga lea o Iosefa Samita o se peroeta.
- E te fesoasoani i tagata e ola i le talalelei e ala lea i le valaauliaina o i latou e faia ma tausia ia tautinoga.
- E te faaali atu lou alofa mo le Alii ma le faafetai mo Lana Togiola e ala lea i le aumaia o agaga ia te la.
- E faamanuiaina oe pe a e usiusitai, ola amiotonu, ma e faia le mea sili i le fesoasoani atu i isi ia ola i le talalelei.

Galuega Faafaifeautalai

O nisi nei o saunoaga mai Peresitene o le Ekalesia i lenei tisipenisione.

Peresitene Iosefa Samita (1830–1844)

“A maea ona tautalagia mea uma lava, o le tiute sili ona maoae ma taua, o le talai atu lea o le Talalelei” (*Teachings of the Prophet Joseph Smith*, sel. Joseph Fielding Smith [1976], 113).

“Ia manatua e le Au Paia o mea silisili e faalagolago lea i a latou taumafaiga taitoatasi, ma ua valaauina i latou e avea ma tagata faigaluega faatasi ma i matou ma le Agaga Paia i le faataunuuna o le galuega silisili o aso amuli” (*Teachings of the Prophet Joseph Smith*, 178–79).

Peresitene Polika Iaga (1847–1877)

“E leai se alii po o se tamaitai i lenei Ekalesia e le o i ai i se misiona. O lena misiona o le a i ai pea i le umi latou te ola ai, o le faia lea o mea lelei, o le faalauiloaina o le amiotonu, ia aoao atu mataupu faavae o le upumoni, ma ia manumalo ia i latou lava ma tagata uma o loo siomia i latou i le ola ai i na mataupu faavae ina ia latou maua le ola faavavau” (*Discourses of Brigham Young*, sel. Ioane A. Widtsoe [1954], 322).

Peresitene Ioane Teila (1880–1887)

“O lo tatou tiute o le talai atu lea o le talalelei i tagata uma. . . O le mea lenei o loo faamoemoeina mai e le Atua ia i tatou” (*The Gospel Kingdom*, sel. G. Homer Durham [1943], 234–35).

Peresitene Uilifoti Uutilafu (1889–1898)

“Ua tatou o mai i lenei lalolagi i se misiona; . . . ina ia tatou maua le mana e agai ai i luma ma lapataiina malo o le lalolagi. . . I le avefa ai ma toeaina o Isaraelu, e toaititi lava nisi o i tatou ua malamalama lelei i lo tatou tulaga, o lo tatou valaauga, o lo tatou sootaga i le Atua, o lo tatou tiutetauave, po o le galuega o loo manaomia mai e le Alii mai ia i tatou” (*The Discourses of Wilford Woodruff*, sel. G. Homer Durham [1946], 124).

Peresitene Lorenzo Snow (1898–1901)

“E leai se tagata soifua e sili atu lona naunau i le tulaga manuia o se alii faifeautalai pe a ia talaiina atu le talalelei nai lo le Alii na auina atu o ia e talai atu i tagata, o fanau i latou a le Alii” (*The Teachings of Lorenzo Snow*, comp. Clyde J. Williams [1984], 70).

Peresitene Iosefa F. Samita (1901–1918)

“O loo i ai sa tatou misiona i le lalolagi: o alii uma, tamaitai uma, o fanau uma o e ua lava le malamalama pe ua oo atu foi i tausaga e faamasinoina ai, e ao . . . ona agavaa e talai atu le upumoni, ia molimau atu i le upumoni” (*Gospel Doctrine*, 13th ed. [1968], 251–52).

Peresitene Heber J. Grant (1918–1945)

“O i tatou o tagata o loo i ai se mea tupito e tasi e ao ona faia, o le valaau atu lea i le lalolagi ina ia salamo mai agasala, ma ia o mai i le Atua. Ma o lo tatou tiute e sili atu nai lo isi tagata uma le o atu ma folafola atu le talalelei a le Alii o Iesu Keriso, o le toefuataiina mai i le lalolagi o le ata o le ola ma le faaolataga. . . O loo ia i tatou le penina silisili ona taugata. O loo ia i tatou le mea e sili atu ona taugata nai lo le tamaoiga uma ma faamatalaga uma faasaaienisi o loo i ai i le lalolagi. O loo ia i tatou le ata o le ola ma le faaolataga. . . O le auala sili o loo i le lalolagi e faaali atu ai lo tatou alolofa i o tatou tuaoi o le o atu lea ma folafola atu le talalelei a le Alii o Iesu Keriso lea na ia tuuina mai ai ia i tatou se malamalama mautinoa e faatatau i lona paia” (i le Conference Report, Apr. 1927, 175–76).

Peresitene Siasia Alapati Samita (1945–1951)

“O la outou misiona lena, o’u uso e ma tuafafine o le Ekalesia, o lo outou tiutetauave lena. Na outou mauaina fua ma ua faamoemoe lo tatou Tama Faalelagi tou te fetufaai atu i Ona atalii ma afafine na fua o upumoni mamalu” (*Sharing the Gospel with Others*, sel. Preston Nibley [1948], 213).

“E na o le pau le tuutuuga o le a tatou maua ai le faaeaga i le Malo Selesitila o lo tatou fetufaai atu lea i isi fanau a lo tatou Tama o faamanuiaga o le Talalelei a Iesu Keriso ma tausia ia poloaiga ia o le a faamaoia ai o tatou olaga iinei ma le olaga a sau” (*Sharing the Gospel with Others*, 190).

Peresitene Tavita O. MaKei (1951–1970)

“O tagata uma lava o le Ekalesia . . . o ni faifeautalai!” (i le Conference Report, Apr. 1959, 122).

“O le faaKerisiano moni lava o le alofa lea e faatino. E leai se isi auala e sili atu e faaali atu ai lo tatou alolofa i le Atua nai lo le faaali atu o se alofa e le faapito i o tatou uso a tagata. O le agaga lea o le galuega faafaifeautalai” (*Gospel Ideals* [1954], 129).

Peresitene Iosefa Filitia Samita (1970–1972)

“Ua tatou faalogo o i tatou uma lava o faifeautalai. O tagata uma lava o le Ekalesia . . . o se faifeautalai pe ao foi ona avea ma se faifeautalai; . . . i le avea ai ma tagata o le Ekalesia, ua tatou folafola atu i tatou lava e faalauteleina le talalelei a Iesu Keriso ma ua avea ai i tatou ma faifeautalai. O le vaega lena o le tiutetauave a tagata uma o le Ekalesia” (*Take Heed to Yourselves* [1971], 27–28).

Peresitene Harold B. Lee (1972–1973)

“O le galuega faafaifeautalai o aoaoga lea i aiga ia i latou e le o avea nei ma tagata o le Ekalesia, ma o aoaoga i aiga e leai se mea e eseese ai ma le galuega faafaifeautalai i tagata o le Ekalesia” (*Improvement Era*, Tes. 1964, 1078).

Peresitene Spencer W. Kimball (1973–1985)

“O le taimi lenei i le faatulagaga a le Alii e momoli atu ai lana talalelei ia mamao atu nai lo le taimi muamua. . . . E toatele tagata i lenei lalolagi o loo fetagisi, i le iloa ma le le iloa, ‘O mai . . . ma fesoasoani mai ia i matou.’ Atonu o ia o lo tatou tuaoi. Atonu o ia o sau uo. Atonu o ia o sou aiga. Atonu o ia o se tasi na oulua faatoa feiloai ananafi. Ae o loo ia i tatou le mea o loo latou manaomia. Ia tatou ave se lototele fou mai a tatou suesuega ma tatalo, ma fai e pei ona faia e Peteru, ‘O lenei, le Alii e, . . . ia e foai mai i au auauna, ina ia latou matua tautala i lau afioga’ (Galuega 4:29)” (*Teachings of Spencer W. Kimball* [1982], 546).

Peresitene Ezra Taft Benson (1985–1994)

“E tatau ona tatou faasoa atu le talalelei i isi. O lo tatou tiutetauave lena—o tagata uma o le Ekalesia o se faifeautalai. O le mea lena o loo valaau mai perofeta a le Atua ia i tatou e fai. . . .

“. . . O le galuega faafaifeautalai a tagata o le Ekalesia o se tasi lea o ki sili ona taua i le faatupula'ia o o tatou tagata. O lo'u talitonuga maumaututu, o le galuega faafaifeautalai a tagata o le Ekalesia, o le a siitia ai le faaleagaga i soo se uarota lava e faatino ai” (*Teachings of Ezra Taft Benson*, 208–9).

Peresitene Howard W. Hunter (1994–1995)

“E mautinoa lava o le aveina atu o le talalelei i ituaiga uma, gagana uma, ma tagata uma o le tiutetauave tupito silisili lea ua tatou maua i le olaga faitino. . . . Ua tatou maua le avanoa e fananau mai ai i nei aso e gata ai, e pei ona teenaina e nisi o tisipenisione ua muamua atu, ina ia fesoasoani e avatu le talalelei i le lalolagi uma” (“Walls of the Mind,” *Ensign*, Sept. 1990, 10).

“O le a le mea a le Togiola e fai i le galuega faafaifeautalai? Soo se taimi lava tatou te iloaina ai faamanuiaga o le Togiola i o tatou olaga, e le mafai ona tatou taofiofia lo tatou manatu popole mo le tulaga manuia o isi. . . . O se faailoga sili lava o le liuaina mai o se tasi o le manao lea e faasoa atu le talalelei i isi.” (“The Atonement and Missionary Work,” seminar for new mission presidents, June 1994).

Peresitene Gordon B. Hinckley (1995–)

“Ua tatou i ai iinei e lagolagoina lo tatou Tama i Lana galuega ma Lona mamalu, ‘ia faataunuu le faaofuina o le tagata i le tino ola pea ma le ola faavavau’ (Mose 1:39). O lau galuega e taua tele i le tulaga o lou lava tiutetauave, e pei foi o la'u galuega i lo'u tulaga” (i le Conference Report, Ape. 1995, 94; po o le *Liahona*, Iulai 1995, 78).

“Ia faatupuina le silafia i loto uma o tagata o le ekalesia, lona lava agavaa e aumaia isi i se malamalama o le upumoni. Ia galueaiina e ia. Ia tatalo o ia ma le naunautai mo lea tulaga” (“Saili Tama'i Mamoe, Fafaga Mamoe,” *Liahona*, Iulai 1999, 120).

Manatu mo Suesuega ma le Faaogaina

Faamatalaga

Suesuega Faaletagata Lava Ia

- la saunia se tautalaga e lua minute e faatatau i se tasi o fesili o loo i le amataga o lenei mataupu. la saunia e faasoa atu lau tautalaga i lau soa po o isi faifeautalai i se fonotaga faaleitu.
- Fai i ni tagata e le'i leva ona liliu mai e faamatala atu a latou tala i lo latou liuaina. O le a se mea na fesoasoani ia i latou ina ia maua ai le "faatuatua e oo i le salamo" (Alema 34:17)? Aisea na latou filifili ai ina ia papatiso ma faamauina? Na faapefea le aveia o i latou ma tagata fou o le Ekalesia? E mafai faapefea e faifeautalai ona faaleleia atili le auauna atu ia te i latou?
- Mafaufau i le uiga o le tuuina atu o se leo o le lapataiga (tagai i le lakopo 3:12; MFF 1:4; 38:41; 63:57–58; 88:81; 112:5; Esekielu 3:17–21; 33:1–12). Tusi i ni au lava upu le uiga ae pe faapefea foi ona e alu ma faataunuu.
- Faitau le Mamona 8 ma le Moronae 1 ma le 10. A o e faitau, ia e fesili ifo ia te oe lava, "O le a se faamoemoega o Moronae mo o tatou aso? O le a le mea na ia manao ina ia tatou faia i le Tusi a Mamona? O le a sa'u tala e fai atu ia Moronae pe afai ou te maua se avanoa?" Tusi ou mafaufauga i totonu o lau tusi talaaga o suesuega.
- Mafaufau i mea tutupu i lou olaga lea na faamalosi ai lau molimau ia Iosefa Samita ma le Toefuataiga. Ona tusi lea o se tali i le fesili lenei: O le a se mea na fesoasoani ia te oe na e iloa ai na faaali atu le Tama Faalelagi ma Iesu Keriso ia Iosefa Samita?

Suesuega Faalesoa

- la faamatala atu i le isi au tali i fesili mai le "Manatunatu i le Mea Lenei" o loo i le amataga o le mataupu lenei.
- la faamatala atu i le isi ou faamoemoega ma naunautaiga sa i ai mo lau misiona ina ua e maua lou valaauga faamisiona. O le a se maualuga o lou aafiaga ua i ai e fua i ou faamoemoega? E mafai faapefea ona e matuai ausia atoatoa nei faamoemoega?
- Faitau ma talanoaina le "Minister" o loo i totonu o le Guide to the Scriptures.
- Filifili se tasi o faifeautalai maoae nei, ma faitau mau o loo i lalo. A o e faitauina, ia talanoaina pe na faapefea e lenei faifeau ona (1) malamalama ma tautino atu o ia lava i lona valaauga, (2) faaalua ona uiga ma lona naunautaiga mo le galuega, ma le (3) fesoasoani i isi ina ia talia le talalelei.
Alema (Mosaea 18) Nifae ma Liae (Helamana 5) Paulo (Galuega 16)
Arona (Alema 22; 23:1–6) Peteru (Galuega 2)
- I totonu o le tusipese, filifili ni viiga se lua o loo i lalo o le autu "Toefuataiga o le Talalelei" (tagai i le itulau 296). Faitau pe usu ia viiga. Ia talanoaina ia uiga o upu.
- Faitau faatasi ia le "Faith," "Repent, Repentance," "Baptism, Baptize," ma le "Holy Ghost" o loo i totonu o le Guide to the Scriptures. Faitau ma talanoaina ia mau uma o loo i ai mo upu taitasi.
- Faitau faatasi le "Dispensation" o loo i totonu o le Guide to the Scriptures. Ia faitau foi ma talanoaina le Mataupu Faavae ma Feagaiga 136:37.

Faamatalaga

Fonotaga Faaleitu ma Konafesi Faalesone

- la valaaulia ni tagata se toalua pe toatolu e le'i leva ona liliu mai e faamatala atu o latou aafiaga ina ua liua. O a ni o latou lagona sa i ai e uiga i faifeautalai? e uiga i mea na aoao atu e faifeautalai? e uiga i le tausia o poloaiga? O le a se mea na sili ona aafia ai lo latou liuaina?
- la valaaulia se taitai perisitua e talanoa atu i faifeautalai e uiga i avanoa ma tulaga faigata o loo i ai i le atiina ae o le Ekalesia i lo outou eria.
- Faitau le Alema 18 ma talanoaina ia fesili nei: O a ni lagona o Lamona e sa i ai i le amataga o le tala? Na faapefea ona suia? O a ni lagona e tatau ona i ai i se tagata ina ia maua ai faamanuiaga o le talalelei? Faitau le Alema 34:15–16, ma faatusatusa i le tala a Lamona. E mafai faapefea e le Togiola a Keriso ona tatou maua ai le alofa tunoa?
- la talanoaina le uiga o le avea ma se faifeautalai faamanuiaina. la valaaulia ia faifeautalai e tuu atu ni faataitaiga patino o le faamanuiaina.
- Vaevae faifeautalai i ni vaega se tolu. Tofi se vaega se tasi e faitau le Galuega 2:36–38 (Peteru), o le isi vaega e faitau le Galuega 16:25–33 (Paulo), ma le vaega mulimuli e faitau le Mosaea 18:8–11 (Alema). Fai atu i vaega taitasi e tali le fesili, “O le a le mea na faia e lenei faifeautalai na fesoasoani ai i isi ina ia faateleina le faatuatua ia Keriso, salamo, ma talia le papatisoga ma le faamauga?” la talanoaina mea na aoaoina mai e faifeautalai mai nei tala lea e mafai ona fesoasoani ia i latou e faaoga ai le faatuatua pe a valaaulia tagata ina ia salamo, ia papatisoina, ma talia le meaalofo o le Agaga Paia.
- I ni nai aso a o lumanai le fonotaga, ia tofi ni nai faifeautalai e mafaufau loloto i ni fesili e filifilia mai le “Manatunatu i le Mea Lenei” o loo i le amataga o le mataupu. Fai atu i faifeautalai taitoatasi e saunia se tautalaga mo le lua i le tolu minute e uiga i lana fesili ua tofi atu i ai. I le gasologa o le fonotaga faaleitu po o le konafesi faalesone, ia faataga faifeautalai e tuu atu a latou tautalaga. A maea ia tautalaga, ona talanoaina lea o mea na latou aoaoina ma le auala e mafai ona latou faaogaina ai ia latou galuega faafaifeautalai.
- Vaevae faifeautalai i ni vaega se fa. Fai atu i vaega taitasi e lisi mai ni upumoni, feagaiga, ma sauniga se tele e mafai ona latou lisiina, lea na toefuataiina ma faaalua mai e ala mai i le Perofeta o Iosefa Samita. Ia tuu atu i vaega taitasi e faasoa mai a latou sailiga. la valaaulia faifeautalai e faasoa atu pe na faapefea e soo se tasi o nei upumoni na faaalua mai e ala i le Toefuataiga, ona aafia ai o latou olaga.

Peresitene o le Misiona

- I le taimi o faatalanoaga, ia talosaga atu i faifeautalai mai lea taimi i lea taimi ina ia faamatala atu ia te oe:
 - A latou molimau ia lesu Keriso.
 - A latou molimau i le talalelei toefuataiina ma le misiona a Iosefa Samita.
 - A latou molimau i le Tusi a Mamona.
 - O latou mafaufauga e uiga i o latou faamoemoega i le avea ai ma se faifeautalai.
- la valaaulia faifeautalai e faaamau i totonu o a latou tusi talaaga o suesuega o latou lagona i le faamoemoega o a latou misiona. I le taimi o se faatalanoaga, ia fai atu ia i latou e faasoa atu mea na latou tusia.
- la auina atu se tusi faamalo i tagata fou.



E Faapefea Ona Matuai Lelei ma Aoga La'u Suesue ma Saunia e Aoao Atu?

Faamatalaga

Manatunatu i le Mea Lenei

- Aisea e taua ai le suesueina o le talalelei?
- O le a faapefea ona aafia i latou o te aoaoina i la'u suesuega?
- Aisea e moomia ai ona ou faaaauu pea ona faatauaina ia aoaoga faavae o le talalelei a Iesu Keriso?
- E mafai faapefea ona matuai lelei ona ou aoaoina ia aoaoga faavae o le talalelei toefuataiina a Iesu Keriso ma saunia e aoao atu isi?
- E mafai faapefea ona ou faaleleia a'u lava suesuega faapea ai ma suesuega ma la'u soa?

Na fetalai mai le Alii, "Aua le saili e tala'i atu la'u upu, a e mua'i saili ia maua la'u upu, ona matala ai lea o lou laulaufaiva; o lea afai e te manao ai, o le a e maua lo'u Agaga ma la'u upu, ioe, o le mana lea o le Atua i le faatalitonuina o tagata" (MFF 11:21). Ina ia lelei ona aoao atu, e moomia ona e maua le malamalama faaleagaga. Mo oe ina ia e tuputupu a'e i le talalelei ma tumau ai i le ala lea e tau atu i le ola faavavau, e moomia ona e atiina ae se amioga o le suesueina o le talalelei (tagai i le MFF 131:6). O lau amio faasuesuega e te atiina ae i le avea ai ma se faifeautalai, o le a faamanuiaina ai lava oe ma e fesoasoani ai foi ia i latou e te aoaoina ia tupu lo latou faatuatua i le Faaola.

O le matuai lelei lava o suesuega i aso taitasi e tatau pea lava ona amata i le tatalo. O le suesue o se aga lea o le faatuatua e moomia ai le faaoga o le saolotoga o le tagata lava ia.

Faamatalaga

E toatele faifeautalai o loo tauivi ina ia iloa pe faapefea ona matuai lelei ana suesuega. O nisi ua matuai faalagolago lava i isi po o le faalagolago foi i ni polokalama ua fuafuaina e ta’u atu ai ia i latou po o a mea e suesue, ae pe faapefea foi ona suesue. O le aoaoina mai se faiaoga lelei e taua tele, ae e sili atu ona taua mo oe lou mauaina e oe o ni ou lava aafiaga e te aoao mai ai. O le mauaina o ni taunuuga lelei mai au suesuega e faalagolago lea i le i ai o se naunautaiga malosi ina ia aoaoina, suesue ma le “manatu tonu” (Moronae 10:4), “fia ai ma fia inu i le amiotonu” (Mataio 5:6), ma saili mo tali i fesili ma atugaluga a au tagata sailiili.

Gaoioiga: Suesuega Faaletagata Lava Ia

Vaai i le ata o Iosefa Samita o loo le itulau na muamua atu. Faitau le Talafaasolopito o Iosefa Samita 2:11–13. Tali fesili nei i totonu o lau tusi talaaga o suesuega.

- Na faapefea ona taitaiina atu Iosefa Samita e lana faitau ma lona mafaufau loloto i le lakopo 1:5 ina ia maua ai le faaaliga?
- O le a se aafiaga o lana suesuega i augatupulaga i le lumanai?
- O le a se aafiaga i lou olaga o lana faaiuga ina ia suesue ma sailiili?
- O faapefea ona aafia lou olaga i lau suesuega o le talalelei?

Mau Suesueina

O le a le auala o loo finagalo le Alii ina ia tatou taulimaina ai le suesueina o le talalelei?

2 Nifae 4:15–16
2 Nifae 32:3

MFF 58:26–28

MFF 88:118

Aoaoina e ala i le Agaga Paia

O lau suesueina o le talalelei e sili atu ona aoga pe a aoaoina oe e le Agaga Paia. Ia amata i taimi uma lau suesuega o le talalelei i le tatalo mo le Agaga Paia ina ia fesoasoani ia te oe. O le a Ia aumaia le malamalama ma le talitonuga lea o le a faamanuiaina ai lou olaga ma mafai ai ona e faamanuiaina olaga o isi. O le a faateleina lou faatuatua ia Iesu Keriso. O le a faatupulaia lou manao ia salamo ma faaleleia atili.

O lenei ituaiga suesuega e saunia ai oe mo le auaina atu, tuuina atu o le faamafanafanaga, foia ai faafitauli, ma tuuina atu ai ia te oe le malosi e tumau ai e oo i le iuga. O le manuia o suesuega o le talalelei, e moomia ai le manao ma le faatino. “Aua o lē saili ma le filiga e iloa e ia, e faamatalaina mea lilo a le Atua ia te i latou, i le mana o le Agaga Paia, e tusa i ona aso nei ma aso anamua” (1 Nifae 10:19).

E pei lava o Enosa, a o e naunau ia iloa upu o le ola faavavau ma a o e faatagaina nei upu ina ia “[tua] ai [lou] loto” (Enosa 1:3), o le a fesoasoani le Agaga Paia ia tatalaina lou mafaufau ma lou loto i le malamalama ma le poto e sili atu.



O le aoaoina o le talalelei o se faagasologa lea o le mauaina o faaaliga (tagai i le Iakopo 4:8). Na fetalai atu le Alii ia Oliva Kaotui: “Faauta, e te le’i malamalama; fa te oe ou te tuuina atu ia te oe, i le na o lou ole mai a e te le’i mafaufau i ai. Ae peitai, faauta, ou te fai atu ia te oe, e ao ina e filifili mae’a ai i lou mafaufau; ona e ole mai lea ia te a’u po ua sa’o, afai ua sa’o ou te faia ia mu lou loto i totonu ia te oe; o lea la, o le a e lagona ai ua tonu” (MFF 9:7–8). A o e suesue, ia matuai taulai atu ma le toto’a i manatu na e oo mai i lou mafaufau ma lagona e oo mai i lou loto, aemaise lava e uiga i tagata o loo e aoaoina.

Mau Suesueina

O le a le matafaioi a le Agaga Paia e fesoasoani ai ia i tatou i le aoaoina o le talalelei?

2 Nifae 32:5	MFF 11:12–14	Ioane 16:13
Alema 5:45–46	MFF 39:5–6	1 Korinito 2:9–14
Moronae 10:5	Ioane 14:26	

Ola i Mea e te Aoaoina

A o e lagonaina le olioli lea e maua mai le malamalama i le talalelei, o le a e manao e faaoga mea na e aoaoina. Ia taumafai ina ia e ola e tusa ai ma lou malamalama. O le faia ai faapea o le a faamalosia ai lou faatuatua, malamalama, ma le molimau. O le galue e tusa ai ma mea na e aoaoina, o le a aumaia ai se malamalama faaopoopo ma le tumau (tagai i le Ioane 7:17).

A o e faatauaina ia upu o tusitusiga paia ma perofeta o aso e gata ai e ala i le suesue ma le faatuatua, o le a faateleina foi lou manao e fetufaai atu le talalelei. Ua folafola atu ia te oe faapea o le a fesoasoani le Agaga ina ia e iloa mea e te tautala ai pe a e aoao atu. Ua fetalai mai le Alii, “Aua ne’i popole muamua outou i mea o le a outou fai atu ai, a ia teu pea i o outou mafaufau upu o le ola, ma o le a tuuina atu ia te outou i lea lava itula lena vaega e tatau ai mo tagata taitoatasi” (MFF 84:85).

“O aoaoga faavae moni, e malamalama i ai, e suia ai uiga ma amioga. O le suesueina o aoaoga faavae o le talalelei o le a vave ai ona faaleleia le amio nai lo le suesue i amio faapea e faalele ai le amio.”

– PERESITENE BOYD K. PACKER
“FANAU ITI,” LIAHONA, IAN. 1987, 19

Mau Suesueina

O le a le mea o loo aoao mai e tusitusiga paia e uiga i le aoaoina o le talalelei?

1 Nifae 10:17–19	MFF 50:19–22	MFF 88:118
MFF 11:21–22		

Suesue ma le Saunia e Aoao Atu ia Lesona

O lesona (o loo maua i le mataupu e 3) o loo aofia ai fesili o le faatalanoaga mo le papatisoga, tautinoga, ma aoaoga faavae e ao ona e aoaoina atu. O le a e mauaina i totonu o lesona ia ni manatu aoga tele e aoao atu ai. Ae peitai, e le o ta’uina atu i lesona mea uma e te tautala atu ai—po o le auala foi e ta’u atu ai. Ae, ua nafa lava oe ma le matafaioi ina ia malamalama lelei ai i lesona ma aoao atu e ala i le Agaga i au lava upu.

Faamatalaga

Aoao atu ina ia faamalosia ai le faatuatua o isi ia Iesu Keriso, mananao ina ia salamo, ma osia feagaiga ma le Atua.

O faiaoga lelei tele e galulue pea lava ina ia faaleleia lo latou malamalama ma mea latou te gafatia. E ui lava o le a e le aoaoina atu mea uma e te iloa e uiga i le aoaoga faavae, ae o lou malamalama faateleina o le a fausia i luga o lau molimau, ma lou tomai e aoao atu ma le mana faaleagaga. O le a e iloaina ai o loo e faaogaina lesona e pei ona faamoemoeina pe a e:

- Saili ma mulimuli i le Agaga a o e saunia ma aoao atu lesona.
- Taumafai ina ia e aoaoina atu pea, faatauaina, ma faaoga aoaoga faavae i lou olaga.
- Galulue faatasi ma lau soa ina ia faia ni fuafuaga patino mo tagata taitoatasi o loo e aoaoina.
- Taulai atu i savali autu ma aoaoga faavae a o e aoao atu.
- Fetuunai le faatulagaga, o le uumi, ma le saosaoa o lesona ina ia ausia ai manaoga o i latou o loo e aoaoina.
- Aoao soo atu mai tusitusiga paia, ma le manino ma le talitonu i ai.
- Tuuina atu soo le molimau.
- Fesoasoani i isi ina ia faia ma tausia tautinoga ia e tau atu i le papatisoga ma le faamauga.

O le faia o nei mea o le a mafai ai e oe ona fesoasoani atu i isi ina ia maua se molimau o le talalelei toefuataiina a Iesu Keriso.

A o e amataina lau misiona, o le a e moomia ona aoaoina le faatulagaga o le savali ma maua ia tomai faafaiaoga e talafeagai. A e mauaina le malamalama, o le a e manao e faaloloto lou iloa ma faalatele ou tomai e aoao atu ai. A o e saunia mo ni feiloaiga e aoao atu ai, o le a e manao ina ia i ai se ata faataatia o le lesona lea e mafai ai ona e aoao atu e ala i le Agaga ma fesoasoani atu ai i isi ina ia faia ma tausia ia tautinoga. O taiala nei o loo i lalo o ni fautuaga ia e mafai ona e faaogaina i le taimi atoa o lau misiona. Ae peitai, aua ne'i e manatu faapea e tatau ona e faaogaina ia taiala taitasi i tulaga uma. Ae, ia faaoga nei taiala ina ia ausia ai ou manaoga ma a o taitaiina ai oe e le Agaga. Afai o loo e aoaoina se gagana fou, ia faaoga muamua taiala nei i lau lava gagana ona faatoa faaoga ai lea i le gagana a lau misiona.

- **Taulai i tautinoga ma fesili o le faatalanoaga mo le papatisoga.** Aoao atu ina ia faia e tagata ia tautinoga ma saunia mo le papatisoga ma le faamauga. Ia malamalama i fesili o le faatalanoaga mo le papatisoga ma tautinoga mo lesona taitasi. Aoao ia e iloa pe o a mea e tatau ona iloa, lagona, ma faia e se tagata ona o lau aoaoga. Galulue faatasi ma lau soa ina ia faamalalama atu i ai ma le manino ma le mana nei mataupu faavae, i ni au lava upu.
- **Aoao ma faaoga le aoaoga faavae.** O le aoaoga faavae o le fatu lea o le lesona. Ia suesue ma le agaga tatalo ia mau, lesona, tamaitusi, "Manatu e Aoao Atu Ai," ma le fatatusi a le faifeautalai ina ia maua ai se malamalama mautu i le aoaoga faavae. Saili mo mea e faaogaina na e lagolagoina ai le aoaoga faavae o lesona. Ia faamautu i le mafaufau le faasologa o mataupu faavae. Ia faaoga mea e te aoaoina. Ia faamaumau i totonu o lau tusi talaaga o suesuega ia mea na e aoaoina. Ia fetufaai atu mea na e aoaoina i isi faifeautalai.

- **Ia faatulaga ma fai se aotelega o mea e aoaoina atu.** Ina ia saunia e aoao atu ma le manino ia le aoaoga faavae ma le mana faaleagaga, ia faatulaga ma fai se aotelega o mea o le a e aoao atu i se ata faataatia o le lesona. Ia taulai atu i le aoaoga faavae, fesili o le faatalanoaga mo le papatisoga, ma tautinoga o le lesona. Ia faalautetele lau ata faataatia o le lesona i mau, fesili, ma faataitaiga. O nei mea e tatau ona fetuunai e tusa ai ma le umi o au feiloaiga e aoao atu ai. E le tatau ona e fausia se ata faataatia fou atoa o le lesona mo tagata sailiili taitoatasi, ae tatau ona e faaauau pea ona faaleleia au ata o lesona ma fetuunai ina ia ausia ai manaoga o i latou e te aoaoina. Afai e te faatoa fausia muamua se ata faataatia o se lesona, ia taumafai ina ia faigofie ma puupuu. Ia faalautetele au ata faataatitia o lesona pe a e maua le tomai ma le malamalama.
- **Taulai i mea o loo manaomia.** E ui lava o aoaoga faavae o le talalelei e faatatau i tagata uma, ae e tatau ona e fetuutuunai lau aoao atu ina ia ausia ai manaoga o i latou o loo e aoaoina. A o e susesueina le aoaoga faavae ma gaosia ia fuafuaga o lesona, ia iloa vaega e mafai ona fetuunai ai lau aoao ina ia ausia ai manaoga patino. Ia toe iloilo ma toe faaleleia nei fetuunaiga a o e saunia mo ni feiloaiga patino. Ia iloa valaaulia o le a e tuuina atu. Ia taulai atu i le sini autu o le fesoasoani atu ia i latou o loo e aoaoina, ina ia talia ai le talalelei toefuataina a Iesu Keriso e ala i le papatisoga ma le faamauga.
- **Saunia e tali fesili.** I le avea ai ma se faifeautalai, o le a e faalogo i le tele o fesili. Ia faamaumau nei fesili i totonu o lau tusi talaaga o susesuega. Saili i tusitusiga paia ma isi mea e faaaogaina mo tali. Tatalo mo le malamalama. Ia tusi tali i totonu o lau tusi talaaga o susesuega. Iloilo faatasi ma isi faifeau ia mea na e mauaina. Ia faaopoopo atu ni fesili e fai soo ma o latou tali i lau tusi talaaga o susesuega mo nisi tulaga mo le lumanai.
- **Aoao atu le lesona.** O le aoao atu o se avanoa mamana lea e faaleleia ai lou malamalama ma lou tomai. A o e aoaoina ia le aoaoga faavae ma faatulagaina ia ata faataatia o lesona, ia aoao atu i lau soa ma isi faifeautalai. Taumafai nisi faamalalamamaga, metotia, fesili, ma auala e valaaulia ai isi ina ia faia ia tautinoga. Talosaga atu mo manatu ma fautuaga.
- **Iloilo lau aoao atu.** A maea tulaga uma e aoao atu ai, ia iloilo pe o le a se lelei na oo i ai lau aoao atu. Pe na e taulai atu i le aoaoga faavae? Pe na e valaaulia ia tagata sailiili ina ia salamo ma faia ma tausua ia tautinoga? Pe na e galue ina ia saunia i latou mo le papatisoga ma le faamauga? Pe na e faaaogaina ni fesili aoga tele? Pe na e faasoa atu lau molimau? Pe na e fesili mo ni igoa e faailoa atu? Ia fetuunai ia ata faataatia o au lesona a o e agaigai pea i luma.

A o e aoaoina ia lesona, ia faaauau pea ona sailia se malamalama loloto e uiga i le aoaoga faavae. Ia matuai galue malosi ina ia aoao atu ma le mana tele. A o e susesue i le tatalo ma le faatuatua, o le a faatupulaia lou malamalama ma lau molimau. Ae peitai, aua e te taumafai e aoao atu mea uma ua e iloa. Aoao atu le savali i le manino, faigofie, ma faavae i manaoga o tagata taitoatasi, ma mulimuli i le Agaga ina ia aoao atu “lena vaega e tatau ai mo tagata taitoatasi” (MFF 84:85).



Faamatalaga

Faaugaga o Upu

O loo i ai sa tatou savali mamana faatasi ai ma ni upu e tulaga ese foi. E pei lava ona ese le talanoa atu a se fomai i totonu o le potu o se aiga nai lo totonu o le potu e fai ai taotoga, e faapea foi le tatau ona e aoao ina ia e talanoa atu, ina ia mafai e i latou e le masani i la tatou savali ona malamalama i mea o loo e aoaoina atu.

Ina ia saunia e fesoasoani i isi ia malamalama i upu e le masani ai, ia suesue le lisi o faaugaga autu ma faaupuga o loo i le vaega o "Manatu e Aoao Atu Ai" o lesona taitasi. Ia faamasani i faaugaga o loo tuuina atu ai. Faaaoga le *Faamaoni i le Faatuatua* ma le Guide to the Scriptures e saili ai uiga o isi upu. Tusi faaugaga nei i totonu o lau tusi talaaga o suesuega. Ia fetufaai atu i lau soa ma isi ia faaugaga ma vaai pe ua e malamalama i ai. Afai e le o manino ia faaugaga i isi, ia toe iloilo au faaugaga e faavae mai mea na e suesueina.

A o e aoao atu, ia taumafai ia e iloa pe fou i le tagata o loo e aoaoina ia se upu po o se mataupu faavae. Faaalu se taimi e faamalamalama atu ai ni upu e le masani ai po o ni mataupu faavae. Ia manatua ia aoao atu ina ia malamalama ina ia mafai e oe ma i latou o loo e aoaoina ona "faamanuiaina ma olioli faatasi" (MFF 50:22).

Gaoioiga: Suesuega Faaletagata Lava Ia

Su'e i le lesona "O Le Savali o le Toefuataiga o le Talalelei a Iesu Keriso" o loo maua i le mataupu e 3. Faitau le lisi o faaugaga autu o loo i le vaega o "Manatu e Aoao Atu Ai." Ia saili isi upu e tolu i loo i totonu o le lesona e te manao e faamatala ia uiga. Mulimuli i le fautuaga o loo i luga i le fausiaina o se uiga mo upu taitasi.

Manatu ma Fautuaga mo Suesuega

O manatu ma fautuaga taitasi o loo i totonu o le vaega lenei e mafai ona matuai tauia ma siitia ai faaleagaga lou taimi e te suesue ai. Mafaufau i vaega nei a o e fuafuaina lau suesuega:

- Ia amata i taimi uma i se tatalo.
- Fuafua ia gaoioiga e suesue ai o le a fausia ai lou faatuatua i le Faaola ma faaoga lelei ai lou taimi.
- Ia fuafua lau suesuega i tagata, o o latou manaoga, ma saunia i latou mo le papatisoga, faamauga, ma tumau e oo i le iuga. Ia tusia au fuafuaga e suesue ai i totonu o lau lisi o fuafuaga o aso taitasi.
- Fuafua lau suesuega i lou fesili ifo: O le a se mea o le a ou aoaoina atu i lenei aso? E mafai faapefea ona ou fuafuaina la'u suesuega ina ia matuai fesoasoani ai ia i latou o loo o'u aoaoina? O a ni manatu ma ni fautuaga mai le vaega lenei o le a ou tuuina i totonu o la'u suesuega?

A o e fuafuaina au gaoioiga mo suesuega, ia faamasani i nisi o manatu ma fautuaga o loo mulimuli mai po o ni manatu faapoopo foi e te aoaoina mai isi.

Faaaoga ma Ola i Mea E Te Aoaoina

- Ia "faatatau" mea e te aoaoina ia te oe lava (tagai i le 1 Nifae 19:23).
- Faatutu ni sini ina ia ola i mea ua e aoaoina.
- Ia tuu lou igoa i se fuaiupu o se mau ina ia tino mai ai o oe lea e faatatau i ai.

- Fesili ifo ia te oe lava, “E tatau faapefea ona ou suia ona o se taunuuga o mea na ou aoaoina?” Ia faatutu ni sini talafeagai.

Gaoioiga: Suesuega Faaletagata Lava Ia

Filifili se tasi o mau nei. A o e faitau ma mafaufau loloto i au fuaiupu na filifilia, ia vaai ni auala se lua pe tolu e mafai ona e faaaogaina i lou olaga.

- 2 Nifae 31
- Alema 32:26–43
- Moronae 7:32–48

Ia iloilo pe o le a se lelei o lou ola ai i mataupu faavae o loo e aoaoina atu. Filifili se auala se tasi e mafai ona e faaleleia, ma faia ni fuafuaga ina ia faia ai.

Saili, Mafaufau Loloto, ma Manatua

- Ia mataala. Faamalositino, taele, ma tatalo ae e te le'i suesue.
- Suesue i luga o se kesi po o se laulau e mafai ona e tusitusi ai ('aua ne'i taoto i lalo pe nofonofo i luga o lou moega), ia faatulaga mea e te faaaogaina e te suesue ai, ma ia mataala pea.
- Tatalo ma ole atu mo le malamalamaaga.
- Suesue e faaoga ai autu.
- Fesili ifo ia te oe lava, “O le a se mea o fai mai ai le tusitala? O le a se savali autu? E faapefea ona faatatau lenei mea ia te au?”
- Ia pu'e i lou mafaufau se ata o mea o le a e suesueina. Mo se faaitaiga, mafaufau pe na faapefea le taimi na tulai atu ai Amona i luma o le tupu o sa Lamana.
- Suesue afioga a perofeta soifua (i le fatatusi ua faatagaina a le faifeautalai ma mekasini a le Ekalesia).
- Tusi i totonu o lau tusi talaaga o suesuega ia fesili o loo ia te oe, ma faaoga ia tusitusiga paia, o afioga a perofeta o aso e gata ai, ma isi punaoa e suesue ai ina ia maua ai ia tali.
- O se fuaiupu se tasi o se mau e mafai ona aofia ai ni manatu eseese. Vase lalo ma faailoga ia upu po o fuaitau ina ia e iloa le eseese i le va o manatu o loo i totonu o se fuaiupu se tasi.
- Ia fetufaai atu mea ua e aoaoina, i isi faifeautalai. E tele mea e mafai ona e aoaoina e ala i le faamalamalamaina atu o se aoaoga faavae po o se mataupu faavae i se isi tagata.
- Faailoga au tusitusiga paia ma tusi ai ni faamatalaga i totonu. Ia tusi i autafa o fuaiupu ia mau e faamanino ai ia fuaiupu o loo e suesueina.
- Ia tauloto fuaiupu o mau o loo faamalamalama ma lagolagoina ai ia mataupu faavae e te aoaoina atu.

Faaoga Punaoa o Suesuega

- Faaoga ia fesoasoaniga mo suesuega o loo i totonu o lomiga o tusitusiga paia a le Au Paia o Aso e Gata Ai (ulutala o mataupu, faamatalaga i le pito i lalo, ma le Guide to the Scriptures).
- Faaoga lesona a le faifeautalai, o le fatatusi ua faamaonia a le faifeautalai, mekasini a le Ekalesia, ma le tusi lesona lenei.

Faamatalaga

- Iloilo ia ulutala o mataupu o loo i totonu o tusitusiga paia. O lenei iloiloga o le a tuuina atu ai ia te oe ni manatu e uiga i le mea o loo e sailia i totonu o le mataupu.
- Faaaoga lau tusi talaaga o suesuega e faamaumau ma faatulaga ai mea o loo e aoaoina. Ia iloilo ina soo ia manatu na e tusitusia. Faatulaga lau tusi talaaga ina ia faigofie ona e manatuaina ai mea na e aoaoina.
- Faaaoga le tusi lesona lenei e avea ma se tusi e galue ai. Faaaoga le avanoa mo faamatalaga e faamaumau ai lagona ma manatu.
- Suesue ia fuaitau o mau o loo lisiina i totonu o lenei tusi lesona. Ia tusia i totonu o lenei tusi lesona po o lau tusi talaaga o suesuega ia isi mau na e mauaina.

Vaai i le Ata Lapoa

- Ia maua se vaaiga lautele, a le o le faitauina faavave o le tusi, mataupu, po o le iloilo ina o ulutala. Taumafai ia malamalama i le aano ma le faatulagaga.
- Taumafai e tusi ia le manatu autu o le mau i se fuaiupu po o se parakalafa puupuu.
- Faaaoga ia faafanua o le talafaasolopito o le Tusi Paia ma le Ekalesia e aoao ai i siosiomaga, vavamamao, tau, ma lafanua.
- Iloilo le faasolopito o mea na tutupu ma le aganuu. Faitau le faamatalaga o le talafaasolopito o loo i totonu o le Guide to the Scriptures ma le aotelega o le mataupu ma le vaega.

Gaoioiga: Suesuega Faaletagata Lava Ia

Faitau le aotelega o mataupu o tusi o loo i lalo ma tusi se oototoga e faamatalaina ai le faatulagaga, o mea taua na tutupu, ma aoaoga faavae autu o tusi taitasi.

1 Nifae

Mose

Galuega

Vailili ia Faamatalaga

- Vaai mo upu autu ma ia mautinoa ua e malamalama i o latou uiga. Faaaoga ia faamatalaga i le pito i lalo, Guide to the Scriptures, po o se isi lolomifefiloi mo faauigaga. Ia iloilo upu po o fuaitau o loo taulalata i ai mo ni faamatalaga faaataata i le uiga o upu autu.
- Vaai mo upu e fesootai i ai, e pei o le *o lea la, ma lea foi, o lea, o le mea lea*, ma isi. Ona vaai lea pe faapefea ona fesootai ia fuaiupu na muamua i fuaiupu na mulimuli.
- Faaaoga le Guide to the Scriptures e vaai ai pe o faapefea ona faaaogaina le upu lava e tasi i isi tulaga, ma pe o faapefea foi ona faaaoga e isi perofeta le upu lava lea e tasi.
- Vaai mo ni upu po o ni fuaitau e le masani ai, ma ia mautinoa ua e malamalama lelei i ai.

Makaina o Tusitusiga Paia

O le makaina o au tusitusiga paia e mafai ona fesoasoani ia te oe ina ia mafaufau loloto ai e uiga i se fuaitau po o se aoaoga faavae o le talalelei. E tele auala e mafai ona e makaina ai au tusitusiga paia. Saili se auala e aoga lelei mo oe. O loo tuuina atu i lalo nisi o taiala mo le makaina o tusitusiga paia.

- Faaaoga penitala po o penivali. Aua le faaaogaina peni e ati i le pepa.
- Valivali, vasevase, puipui, pe li'o se vaega o se fuaiupu, se fuaiupu atoa, po o ni fuaiupu.

- Aua le soona makaina. O le a leai se aoga pe afai e le mafai ona e malamalama i mea na e makaina ona ua tele ni tusitusiga, laina, ma ni lanu ua e faia.
- Ia vase na o lalo o ni nai upu autu e faailoga ai se fuaiupu, vaega, po o se mataupu.
- Li’o pe vase na o lalo o upu autu, ona faaoga lea o laina sasa’o e sosoo ai upu e vavalalata.
- Afai e tutusa uma ia ni manatu i totonu o se fuaiupu po o se fuaitau, ia faanumera i autafa o fuaiupu ia manatu.
- Faaoga ia faamatalaga faaopoopo o loo i lalo [footnotes] e fai ma punaoa mo le makaina ma le faaliliuina o mau.
- Tuu se faailoga faigofie (e pei o se togi d) i autafa mo fuaiupu autu e te lagona e taua tele ona manatuaina.

O le makaina o au tusitusiga paia e tatau ona fesoasoani ia te oe ina ia e taulai atu ai i le faaogaina o mea na e aoaina faapea ma le aoaina o isi. Ia atiina ae se faiga e le fesuisui ai ma fesoasoani ai ia te oe ina ia ausia lou faamoemoega o le aveia ma se faifeautalai.

Gaoioiga: Suesuega Faaletagata Lava Ia

O a fautuaga e te le’i faataita’ia lava? Ia iloa se fautuaga se tasi mai “Manatu ma Fautuaga mo Suesuega” ina ia faataitai i le isi taimi o lau lava suesuega po o se suesuega faalesoa.

Manatua le Mea Lenei

- O le galueaiina o le manao ina ia aoao e taua tele i lou faaolataga ma le faamanuiaina i le aveia ai o oe ma se faifeautalai.
- E te aoaina le talalelei e ala i le suesue, faatuatua, ma le mana o le Agaga Paia.
- O le aoao o se fiafiaga ma e aumaia ai le tele o faamanuiaga.
- O suesuega faaletagata lava ia ma suesuega faalesoa i aso taitasi e faamalosi ai lou faatuatua ma lou tomai e aoao atu ai e ala i le Agaga.
- Faaoga ni metotia eseese o suesuega e maua ai se aafiaga aoga ma le fiafia.

Manatu mo Suesuega ma le Faaogaina

Suesuega Faaletagata Lava Ia

- Faatulaga lou lava tagata i vaega nei (1=e leai lava, 3=o nisi taimi, ma le 5=e toetoe lava o taimi uma).
 - Ou te mafaufau e uiga i tagata o loo o'u aoaoina pe a ou suesue.
 - I le gasologa o le aso atoa ou te mafaufau ai lava i mea sa ou suesueina i le taeao.
 - A o o'u suesue, e oo mai ni manatu i lo'u mafaufau e le'i ai muamua.
 - Ou te faamaumauina ni uunaiga ma ni manatu faaleagaga i se mea talafeagai.
 - Ou te tulemoe pe a ou suesue.
 - Ou te tulimatai atu lava i suesuega faaletagata lava ia.
 - Ou te tulimatai atu lava i suesuega faalesoa.

Iloilo au tali. O a mea o loo e lelei ai? Pe te moomoo maimau pe ana ese nisi o au tali? Faatu se sini se tasi pe lua o le a faaleleia ai le lelei o au suesuega.

- Iloilo fesili o loo i le “Manatunatu i le Mea Lenei” o loo i le amataga o le mataupu lenei. Pe faapefea ona aafia lau suesue i nei fesili?
- Iloilo ia “Manatu ma Fautuaga mo Suesuega.” Faailoga se fautuaga se tasi mai vaega taitasi e te le'i faaogaina, ma faataitai nei manatu i le taimi o lau lava suesuega.
- Faitau le Mataupu Faavae ma Feagaiga 138:1–11. A o e faitauina nei fuaiupu, ia tali i fesili nei:
 - O le a le mea na faia e Peresitene Samita ina ia tatalaina ai lona mafaufau?
 - O le a sona lagona e uiga i le aoaoga faavae sa ia mafaufau i ai?
- Faitau le faauigaga o le malamalama o loo i totonu o le Guide to the Scriptures faapea ma mau o loo lisi mai ai. Ia tusi i totonu o lau tusi talaaga o suesuega le tali i le fesili “O le a le malamalama e mafai ona fesoasoani ia te a'u ina ia auuuna atu ai ma le lelei atoatoa i le avefa'aula?”
- Filifili se aoaoga faavae mai le mataupu e 3 e te manao ina ia malamalama lelei i ai. Tusi i lau tusi talaaga o suesuega ia fesili e te fia tali i ai. Ia suesue ma le faaeteete i le aoaoga faavae mo se taimi (i ni nai aso), ma tatalo faapitoa mo le faateleina o le malamalama. Tusi mea na e aoaoina.
- Faitau le 1 Nifae 10:17; 11:1–6. A o e faitau i nei fuaiupu, tali le fesili Aisea na mafai ai e Nifae ona aoaoina mea na iloa e lona tama?”

Suesuega Faalesoa

- Faitau faatasi ia fuaiupu nei. Tali le fesili “Aisea e tatau ai ona tatou sailia le malamalama mai le lagi?”

MFF 11:11–14

Ioane 8:12

Salamo 119:105

MFF 84:43–47

Faamatalaga

- Faitau faatasi nisi o fuaiupu o loo i lalo, ma talanoaina ia faamanuiaga e oo mai i le suesueina o le afioga a le Atua. O a fuaiupu o le a sili ona fesoasoani ia i latou o loo e aoaina?

1 Nifae 10:19	Alema 37:44–46	Guide to the Scriptures,
2 Nifae 32:3	Alema 49:30	“Scriptures,” ulutala:
Mosaea 1:6–7	MFF 90:24	“Value of the
Alema 17:2–3	MFF 130:19	scriptures,” 221–22
Alema 32:42–43		

Fonotaga Faaleitu ma Konafesi Faalesone

- Filifili se autu mai se tasi o lesona a faifeautalai na e matuai suesueina ma le faaeteete. Ia fai mea nei:
 - la fetufaai atu ni manatu autu se lua pe tolu na e aoaina mai lau suesuega sa matuai fesoasoani tele i le aoaina atu o lena lesona.
 - la faamatala le auala na e faia ai lau suesuega lea na fesoasoani ai ia te oe i le mauaina o nei manatu (pe na faapefea ona e faitauina, o punaoa na e faaogaina, o fesili sa e sailiilia, ma isi mea faapena).
 - Faaali atu pe na faapefea ona e faamaumauina ma faatulagaina ia taunuuga o au suesuega.

Afai e lava le taimi, ia talosaga atu i isi faifeautalai ina ia faia foi le mea lea e tasi.

- O lenei gaioiga e mafai ona faia taitoatasi pe faia i ni vaega laiti. Faatonu faifeautalai e filifili se tasi o fesili nei (pe fai foi e oe lava ia ia nisi o au lava fesili). Tuu atu ia i latou e tusi i lalo ia le fesili.
 - Aisea e taua tele ai aiga i le fuafuaga a le Atua?
 - Aisea e oo ai faigata ma puapuaga i tagata?
 - O le a le matafaioi a le Agaga i le liuaina?

Ia faamalamalama atu i ai o le a tuuina atu le lima i le fitu minute e:

- Sue ai ni mau ia lē itiiti ifo i le lua e tali ai le fesili.
- Tusi se faaliliuga faigofie pe faapefea ona tali e mau na latou filifilia ia le fesili.
- Faamatala ia mea o le a latou faia ina ia manatua ai le tali.
- Faamatala mea o le a latou faia ina ia matuai vailili ai le fesili.

Ia valaaulia ni nai faifeautalai (po o vaega taitasi) e faasoa atu a latou tali. Ia talanoaina a latou tali.

- Fai atu i faifeautalai e tusi i lalo se fesili se tasi pe lua e uiga i mataupu faavae ma aoaoga faavae o le talalelei mai se tasi o lesona o loo i le mataupu e 3 lea latou te mananao e sue se tali. Ia valaaulia faifeautalai e fetufaai atu a latou fesili i le vaega. Mo fesili taitasi, ia talanoaina vaega nei:
 - O le a faapefea ona faamanuiaina le olaga o le faifeautalai i le taliina o lenei fesili?
 - O le a faapefea ona faamanuiaina ai olaga o tagata sailiili?
 - E mafai faapefea e se faifeautalai ona maua le tali?
- Fai atu i nisi o faifeautalai e faamatala atu se mataupu faavae o le talalelei na aoao atu e a latou soa ia i latou. Fai atu i ai e faamalamalama atu le mataupu faavae ma le auala na aoao atu ai e a latou soa ia i latou.

Faamatalaga

- Faatulaga faifeautalai i ni soa po o vaega laiti. Tofi ia vaega taitasi e faitau se mataupu se tasi mai le Tusi a Mamona. Tuu atu i vaega taitasi e filifili se manatu se tasi mai vaega uma e lima o loo i le vaega o “Manatu ma Fautuaga mo Suesuega.” Ia valaaulia ia vaega e faaoga ia fautuaga taitasi a o latou faitauina faatasi a latou mataupu. Ia faataga atu se 15 i le 20 minute e faitau ma talanoaina ai. Tuu atu i vaega taitasi e faamalamalama ia fautuaga na latou faaogaina, pe na faapefea ona aoga ia fautuaga, ma mea na latou aoaina.
- Ia valaaulia faifeautalai taitoatasi e mafaufau i se tala po o se mea na tupu i totonu o tusitusiga paia e i ai sona uiga ia te ia (e pei o le miti a Liae i le laau o le ola, o le lauga a le Tupu o Peniamina, o le Lauga i luga o le Mauga, po o le faaali atu o Keriso i sa Nifae). Ia valaaulia faifeautalai e tusi se ata pe faamatala sa latou vaai faalemafaufau i tala na latou filifilia. Ia valaaulia ni faifeautalai se toalua pe toatolu e faamatala atu mea na latou vaai faalemafaufau i ai. Fai atu i isi e faamatala ia tala ma faatusatusa i latou i aooga faavae o loo i ai i totonu o se tasi o lesona. Faitau le Moronae 10:3 ma talanoaina le taua o le mafaufau loloto e uiga i le malamalama faaleagaga.

Peresitene o le Misiona

- Ia valaaulia faifeautalai e aumai a latou tusi talaaga o suesuega i faatalanoaga. Ia valaaulia i latou e faamatala atu ia te oe se mea se tasi na latou tusia i totonu.
- I le taimi o faatalanoaga, ia tuu atu i ai nisi o fesili nei:
 - O a ni uunaiga na oo ia te oe i lau suesuega talu ai nei o tusitusiga paia?
 - O le a se mataupu faavae se tasi o le talalelei na aoao atu talu ai nei e lau soa ia te oe?
 - O le a le mataupu po o le vaega o lenei tusi lesona na sili ona fesoasoani ia te oe i le lua vaiaso na tuanai atu nei?
 - O le a lau mea o loo fai i au lava suesuega o loo sili ona fesoasoani e aoaina ai oe?
- I le taimi o konafesi faalesone, ia valaaulia faifeautalai e fetufaai atu ni aafiaga aoga na latou oo i ai i a latou suesuega faaletagata lava ia ma suesuega faalesoa.
- I le taimi o konafesi faalesone, ia faataga faifeautalai e faamatala atu ni auala o suesuega faaletagata lava ia.
- Ia faasoa atu i faifeautalai ni malamalamaaga na e maua i au lava suesuega. Ia faasoa atu ia ni mea na e tusitusia mai lau tusi talaaga o suesuega ma lau molimau i le taua o le suesueina o le talalelei.
- Afai e mafai, ia auai faatasi ma faifeautalai i a latou suesuega faalesoa.
- I le faagasologa o faatalanoaga, ia valaaulia faifeautalai e faamatala atu se tasi o a latou ata faataatia o lesona mai se tasi o lesona a faifeautalai. Fesili atu ia i latou po o le a le uiga o nei aooga faavae ia i latou.



O a Mea Ou Te Suesue i ai ma Aoa Atu?

Faamatalaga

Olesona o i lenei mataupu o loo i ai aoaga faavae, o mataupu autu, ma poloaiga e tatau ona e suesue i ai, talitonu i ai, alofa i ai, ola ai, ma aoa atu. O mea ia ua faatonuina oe e perofeta soifua ma aposetolo e aoa atu. Ua faatulagaina, ina ia mafai ai ona e fesoasoani atu i isi ia malamalama lelei i aoaga faavae a Keriso.

O lesona nei o loo i ai i le mataupu lenei:

- O Le Savali o le Toefuataiga o le Talalelei a Iesu Keriso
- O Le Ata o le Faolataga
- O Le Talalelei a Iesu Keriso
- O Poloaiga
- Tulafono ma Sauniga

Aoa atu lesona muamua e fa a o le'i faia le papatisoga. Ia mautinoa ua agavaa i latou e te aoaoina mo le papatisoga ma le faamauga e ala i le faia ma tausia o tautinoga uma i lesona nei:

E taulamua ia faifeautalai faamisiona i le aoaoina atu o lesona a o le'i faia papatisoga, ae fesoasoani i ai faifeautalai o uarota ma isi tagata o le au paia. A uma le papatisoga, ona toe aoaolea i uso fou o lesona muamua e fa, faapea foi ia "Tulafono ma Sauniga." E fuafua e taitai o le uarota pe tuu i faifeautalai o le uarota po o faifeautalai faamisiona le tiute ia mautinoa ai ua aoa atu nei lesona, ma pe o le a foi le umi e aafia ai ia faifeautalai faamisiona. Ia faamalosiua i uso fou taitoatasi, ina ia tausia uma tautinoga i lesona nei.

E tatau foi ona e faaogaina nei lesona i suesuega a le tagata lava ia, faapea foi suesuega faalesoa, o fonotaga a le itu, ma isi aoaga. A e suesueina tusitusiga paia ma teu i lou mafaufau aoaga faavae o i ai i nei lesona, o le a tuuina atu ia te oe e le Agaga i lena lava taimi ia upu e tatau ona e tautala atu ai ma le mea e tatau ona e faia e fesoasoani ai i isi, ina ia maua se molimau i le moni o aoaga.

I le avea ai o oe ma se faifeautalai, ua ia te oe se tiutetauave tele e aoa atu ai mai lou loto e ala i le Agaga. Ua ta'u mai e le Au Peresitene Sili ma le Korama a Aposetolo e

Faamatalaga

Toasefululua: “O lo tatou faamoemoega o le aoao atu lea o le savali o le talalelei toefuataiina i se auala e faatagaina ai le Agaga e taitaiina e le gata i faifeautalai ae faapea foi ia i latou o loo aoaoina. E taua tele le aoaoina o manatu [o lesona], ae o nei lesona e le tatau ona aoaoina atu faatauloto. E tatau ona lagona e le faifeautalai le tuusaolotoina o ia e faaoga ana lava upu e pei ona musuia ai e le Agaga. E le tatau ona ia tuuina atu se tauloto, ae ia tautala atu mai le loto i ana lava upu. E mafai ona ia aluese mai le faasologa o lesona, ma tuuina atu mea e pei ona musuia ai o ia, e tusa ai ma manaoga ma mea e fialia i ai le tagata sailiili. O le tautala atu i lona lava talitonuga maumaututu ma ana lava upu e tatau ai ona ia tuuina atu lana molimau i le moni o ana aoaoga” (“Faamatalaga i le Galuega Faafaifeautalai,” tusi a le Au Peresitene Sili, 11 Tesema, 2002). A oulua aoaoina ma lau soa nei lesona, ma sauniuni e aoao atu, ia faamautu i lou mafaufau nei faatonuga. Tautuanā ia e aoaoina atu aoaoga faavae uma o i nei lesona.

Sei vagana ua taitaiina ai oe e le Agaga, ae e tatau lava ona e tuuina atu mea uma o i ai i lesona taitasi muamua e tolu, i le faasologa ua tusia ai. E mafai foi ona aofia ai ma nisi o poloaiga pe a talafeagai, pe aoaoina foi o ni lesona e ese mai ai.

O lesona taitasi o loo ootoo atu ai fesili o le faatalanoaga mo papatisoga, o tautinoga, ma aoaoga faavae e tatau ona e aoaoina atu. Ia e iloa lelei aoaoga faavae. Ia taula’i atu e lē aunoa e fesoasoani ia i latou e te aoaoina, ia faia ma tausia ia tautinoga. Faaoga fesili o le faatalanoaga mo le papatisoga e sauniuni ai i latou e te aoaoina mo le papatisoga ma le faamauga. E i ai foi i lesona ni manatu e aoao atu ai. Faaoga nei fautuaga e faamalosia ai auala e te sauniuni ma aoao atu ai.

O Le Matafaioi o le Taulotoina

Ia tauloto mau e faaoga e te aoao atu ai. Ia e naunau e tauloto le faasologa o mea taitasi i aoaoga faavae o loo i ai i lesona taitasi a faifeautalai. O faifeautalai o loo aoaoina se isi gagana, e tatau ona taula’i atu a latou suesuega o le gagana i le saunia e aoao atu lesona a faifeautalai. E tatau ona latou taulotoina le vaogagana, o fasi fuaitau, o le faiga o fuaiupu, ma faamatalaga pupuu o aoaoga faavae o i ai i lesona, ae pe afai lena ua e matua malamalama lelei i uiga o nei upu ma fasi fuaitau. Aua le taulotoina atoa lesona.

Aoao Atu ma le Manino

I le faaiuga o lesona muamua e tolu, o loo i ai se lisi o upu atonu e lē masani ai i latou e te aoaoina. Aoao ia e iloa uiga faigofie o nei upu. A e aoao atu, ia e faia mea uma e te mafaia ina ia faigofie ai ona malamalama le savali.

Mau Suesueina**O a mea ua taitaiina oe e aoao atu?**

Mosaea 18:18–20

MFF 43:15–16

MFF 52:9

Aisea e tatau ai ona e suesue i aoaoga faavae o loo i lesona?

Alema 17:2–3

MFF 84:85

O Le Savali o le Toefuataiga o le Talalelei a Iesu Keriso

Faamatalaga



O Lou Faamoemoega

A o e aoao atu, sauniuni au tagata sailiili ia ausia tulaga e agavaa ai mo le papatisoga, ia o loo aoao mai i le Mataupu Faavae ma Feagaiga e 20:37 ma fesili mo faatalanoaga o papatisoga. E sili ona ausia lea tulaga i le valaauliaina lea o au tagata sailiili e faia ma tausia tautinoga o loo lisi atu i lalo.

Fesili o le Faatalanoaga mo le Papatisoga

- Pe e te talitonu o le Atua o lo tatou Tama Faavavau?
- Pe e te talitonu o Iesu Keriso o le Alo o le Atua, o le Faaola ma le Togiola o le lalolagi?
- Pe e te talitonu o le Ekalesia ma le talalelei a Iesu Keriso ua toefuatai mai e ala i le Perofeta o Iosefa Samita?
- Pe e te talitonu o le [Peresitene o i ai nei o le Ekalesia] o se perofeta a le Atua? O le a lona uiga ia te oe?

Tautinoga

- O le a e faitau la ma tatalo ia iloa o le Tusi a Mamona o le afioga a le Atua?
- O le a e tatalo la ia e iloa o Iosefa Samita o se perofeta?
- O le a tatou o la i le lotu i le Aso Sa nei?
- E mafai ona seti se taimi tatou te toe feiloai ai?
- O isi poloaiga mai le lesona e 4 ua e filifilia e aofia ai.

O Le Atua o Lo Tatou Tama Faalelagi Alofa

O le Atua o lo tatou Tama Faalelagi. O i tatou o Ana fanau. E i ai Lona tino o aano ma ivi ua faamamaluina ma ua atoatoa. E alofa o Ia ia te i tatou. E tagi o Ia faatasi ma i tatou pe a tatou puapuagatia, ma e olioli foi pe a tatou faia le mea sa'o. E fia fesootai mai o Ia ia te i tatou, ma e mafai foi ona tatou fesootai atu ia te Ia e ala i le tatalo ma le loto faamaoni.

Ua Ia tuuina mai ia te i tatou lenei aafiaga i le lalolagi, ina ia mafai ai ona tatou aoao ma tuputupu a'e. E mafai ona tatou faaalua lo tatou alolofa mo Ia e ala i a tatou filifiliga ma lo tatou usiusitai i Ana poloaiga.

Faamatalaga

Ua saunia e le Tama Faalelagi mo i tatou, o Ana fanau, se auala e faamanuiaina ai i lenei olaga ma toe foi atu e mau i Lona afioaga. Peitai, e tatau lava ona tatou atoatoa ma mama, e ala i le usiusitai ina ia mafai ai. O le lē usitai, e aveesea ai tatou mai ia te Ia. O le fatu o le fuafuaga a le Tama, o le Togiola a Iesu Keriso. O le Togiola e aofia ai Lona puapuagatia i le Faatoaga o Ketesemane, faapea foi Lona puapuagatia ma le maliu i luga o le satauro. O le Togiola ua mafai ai ona tatou saoloto mai le mamafa o a tatou agasala ma atiina ae ai le faatuatua ma le malosi e fetaia’i ai ma o tatou tofotofoga.

Talitonuga e uiga i le Atua

Vaai pe o a mea ua malamalama i ai tagata taitoatasi o loo e aoaoina e tusa ai ma talitonuga faaKerisiano i le Atua. E toatele tagata i le lalolagi i le taimi nei, e leai se iloa i le Atua, pe matua ese lava foi so latou malamalama i le Atua.

E toalua faifeautalai o le Tusi a Mamona, o Amona ma Arona, sa aoaoina tagata e le o ni Kerisiano. Sa la aoaoina atu nai upumoni faigofie, ma sa valaaulia a la’ua tagata sailiili ina ia tatalo. Sa liua Lamonae ma lona tama. Faitau le Alema 18:24–40 ma le 22:4–23, ma tali fesili o loo i lalo:

- O a mea na aoao atu e nei faifeautalai e uiga i le natura o le Atua?
- E mafai faapefea ona e mulimuli i a la’ua faataitaiga?

Mau Suesueina

O le a le natura o le Atua le Tama ma Iesu Keriso?

1 Nifae 17:36	3 Nifae 27:13–22	Ioane 3:16–17
2 Nifae 9:6	MFF 38:1–3	Galuega 17:27–29
Mosaea 4:9	MFF 130:22	Roma 8:16
3 Nifae 12:48	Mose 1:39	Eperu 12:9
3 Nifae 14:9–11	Mataio 5:48	1 Ioane 4:7–9

E Faamanuiaina Aiga e le Talalelei

O le talalelei toefuataiina e faamanuiaina ma fesoasoani i tane ma ava, o matua ma fanau a o latou taumafai e atiina ae ni sootaga malolosi atu, ma le malosi faaleagaga i o latou aiga. Ua avanoa nei na faamanuiaga faapea foi i le faavavau. E saunia e le talalelei a Iesu Keriso le fesoasoani mo popolega o i ai nei faapea foi luitau.

Talu ai ua faauuina aiga e le Atua, o i latou o le iunite aupito taua i le olaga nei ma le faavavau. Sa faatuina e le Atua ia aiga ina ia maua ai e Ana fanau le fialia, ia latou aoao ai mataupu faavae sa’o i se siosiomaga alofa, ma saunia ai i latou mo le ola faavavau. O le aiga o le nofoaga sili lea e aoao atu ai, e aoao mai ai, ma faaoga ai mataupu faavae o le talalelei a Iesu Keriso. O se aiga e faavae i mataupu faavae o le talalelei, o se nofoaga lea e sulufa’i i ai mo le saogalemua. O le a avea ma se nofoaga e mafai ona mau ai le Agaga o le Alii, e faamanuia ai tagata o aiga i le filemu, olioli, ma le fialia. Na faalia mai e le Atua Lana fuafuaga o le fialia mo tagata taitoatasi ma aiga, e ala mai i perofeta o augatupulaga uma, e aofia ai foi ma tatou.

E Faalia Mai e le Tama Faalelagi Lana Talalelei i Tisipenisione Uma

O se tasi auala taua ua faalia ai e le Atua Lona alofa mo i tatou, o le tofia lea o perofeta, ua tuuina atu i ai le perisitua—o le mana ma le pule ua tuuina mai i le tagata e galue ai i le suafa o le Atua mo le faaolataga o Ana fanau. E aoaoina e perofeta le talalelei a Iesu

Faamatalaga

Keriso e ala i faaaliga. Ona latou aoao mai ai lea o le talalelei i isi, ma molimau mai o Iesu Keriso o le Faaola ma le Togiola. O loo maua aoaoga a perofeta i tusi e paia ua ta'ua o tusitusiga paia.

O le fuafuaga a lo tatou Tama mo i tatou, ia tatou manuia i lenei olaga ma ia tatou toe foi atu e mau faatasi ma Ia, ua faaigoaina o le talalelei a Iesu Keriso, faatasi ai ma le Togiola a Iesu i le totonugalemu o lena fuafuaga. O le Togiola a Iesu Keriso, e mafai ai ona tatou maua le ola faavavau pe afai tatou te faatuatua ia Iesu Keriso, salamo, ma papatiso e ala i le faatofuina mo le faamagaloga o agasala, maua le meaalofo o le Agaga Paia, ma tumau e oo i le iuga. "O le ala lava lenei; e leai foi se isi ala po o se isi igoa i lalo o le lagi e mafai ona faolaina ai tagata i le malo o le Atua. O lenei foi, faauta, o le mataupu lenei a Keriso" (2 Nifae 31:21). Ua i ai i tagata uma le meaalofo o le saolotoga, e aofia ai le saolotoga e talia pe teena foi le talalelei e pei ona aoao mai e perofeta ma aposetolo. O i latou e filifili e usitai, e faamanuiaina, ae o i latou e lē amana'iaina, teena, pe faaseseina le talalelei, latou te le mauaina faamanuiaga a le Atua ua folafola mai.

Soo se taimi lava e filifili ai tagata e lafoai, lē usitai, pe faasese se mataupu po o se sauniga o le talalelei, soo se taimi foi latou te teena ai perofeta a le Alii, pe soo se taimi foi latou te le tumau ai i le faatuatua, ua latou faamamaeseina i latou lava mai le Atua ma amata ona ola ai i le pogisa faaleagaga. O lenei mea e i'u lava ina oo atu ai i se tulaga e ta'ua o le liliuese. Pe a oo ina sosolo tele le liliuese, ona aveesea lea e le Atua o Lana pule o le perisitua lea e aoao ai ma faia sauniga o le talalelei.

O loo tusia i le talafaasolopito faale-Tusi Paia le tele o taimi sa tulei mai ai le Atua i perofeta, ma o loo ta'u mai ai foi taimi o le liliuese. Ina ia faamutaina vaitau taitasi o le liliuese tele, sa faaalua ai foi e le Atua Lona alofa i Ana fanau e ala lea i le tofia o se isi perofeta ma tuuina atu ia te ia le pule o le perisitua ma toe aoao atu ai le talalelei a Iesu Keriso. O lona uiga, o le perofeta o se leoleo e vaaia le malo o le Atua i le fogaeleele. O na vaitau sa taitai ai e perofeta, e ta'ua o tisipenisione.



Sa faaalua e le Atua le talalelei a Iesu Keriso ia Atamu, ma tuuina atu ia te ia le pule o le perisitua. O Atamu o le uluai perofeta lea i le fogaeleele. O faaaliga, na aoaoina ai e Atamu le sootaga sa'o o le tagata ma le Atua le Tama, o Lona Alo o Iesu Keriso, ma le Agaga Paia, o le Togiola ma le Toetu o Iesu Keriso; faapea foi mataupu faavae muamua ma sauniga o le talalelei. Sa aoao e Atamu ma Eva a la'ua fanau i nei upumoni, ma uuna'ia ai i latou e atiina ae le faatuatua ma ia ola ai i le talalelei i soo se vaega o o latou olaga. Sa sosoo Atamu ma isi perofeta, ae na i ai se taimi na teena ai e fanau a Atamu le talalelei ma ua liliuese, ua latou filifili e fai le amioletonu.

O lea na amata ai le faiga o tisipenisione e ta'ita'ia e perofeta lea o loo mafuli i ai tusitusiga i le talafaasolopito o le Feagaiga Fou. Sa faaalua mai e le Tama Faalelagi Lana talalelei e ala mai i fesootaiga tuusa'o i perofeta e pei o Noa, Aperaamo, ma Mose. Sa tofia perofeta taitasi e le Atua e amata se tisipenisione fou o le talalelei. Sa tuuina atu e le Atua i nei perofeta taitoatasi le pule o le perisitua, ma faailoa atu i ai upumoni o le faavavau. O le mea e faanoanoa ai, o tisipenisione taitasi na faasolo lava ina faaoga e tagata lo latou saolotoga e filifili ai e teena le talalelei ma pauu atu ai i le liliuese.

Faamatalaga

Perofeta

Vaai pe o a mea ua malamalama ai tagata taitoatasi o loo e aoaoina e uiga i perofeta. I le tele lava o aganuu, e i ai tagata e talitonu o tagata paia po o tagata musuia, latou te maua ni taitaiga ma faatonuga mai le Atua. Ae peitai, e le o ni perofeta a le Atua tagata musuia uma taitoatasi, e pei ona faamanino mai i le talalelei toefuataiina. Ia faamalamalama lelei atu, o le Atua na faatuina Lona malo i le lalolagi e ala i le tofiaina o se perofeta, e faavae se tisipenisione fou. Na la tuuina atu i lenei perofeta le pule o le perisitua. Ona fesoasoani ai lea o le perofeta ia malamalama tagata i lo latou sootaga i le Atua, e aofia ai le auala e maua ai le ola faavavau e ala i le talalelei a Iesu Keriso.

Atonu o le a e taumanatunatu pe faapefea ona talafeagai ia tisipenisione o le talalelei pe a aoaoina tagata e le Kerisiano o latou aiga po o aganuu. Ae a e faamatala atu i ai sina talafaasolopito puupuu o tisipenisione o le talalelei, o le a mafai ona e fesoasoani i tagata ia malamalama e alofa le Atua i Ana fanau, ma e le liu lava o Ia o ananafi, o le asō, e oo lava i le faavavau.

Mau Suesueina

Perofeta

Iakopo 4:4, 6
Mosaea 8:13–18

Galuega 10:34–43

Amosa 3:7

Tisipenisione

MFF 136:36—38
Mose 5:4–12, 55–59

Mose 8:19–30

Guide to the Scriptures, “Dispensation”

O Le Galuega a le Faola i le Lalolagi

I le faitau fiaselau o tausaga a o le’i soifua mai Iesu Keriso, sa toe pauu atu ai tagata i le liliuese. Ae ina ua amata e le Faola Lana galuega i le lalolagi nei, sa Ia toe faatuina Lana Ekalesia i le fogaeleele.

Sa auina mai e le Tama Faalelagi Lona Alo i le lalolagi, e togiola mo agasala a tagata ma faatoilaloina ai le oti: “Aua ua faapea lava ona alofa mai o le Atua i le lalolagi, ua ia au mai ai lona Atalii e toatasi . . . ina ia faolaina le lalolagi ia te ia” (Ioane 3:16–17). Na auina mai e lo tatou Tama Faalelagi Lona Alo, o Iesu Keriso, ina ia tauave i Ona luga ia puapuaga, o agasala a i latou uma o e o le a ola i luga o lenei fogaeleele ma ia faatoilaloina le oti faaletino. Na faia e le Faola se taulaga togiola e le muta ina ia mafai ona tatou maua le faamagaloga o a tatou agasala ma ulu atu ai ma mulimuli i le ala lea o le a taitaiina atu ai i tatou i le ola faavavau i le afioaga o le Atua pe afai tatou te faatuatua ia te Ia, salamo ma papatisoina ma maua le Agaga Paia (tagai i le 2 Nifae 31:13–21).



I le taimi o Lana galuega i le lalolagi, sa aoao atu ai e le Faola Lana talalelei ma faataunuaina le tele o vavega. Sa ia valaauina alii e toasefululua e avea ma Ana Aposetolo ma tuu atu Ona aao i luga o o latou ulu ma tuuina atu ia i latou le pule o le perisitua. Na Ia faatuina Lana Ekalesia,

faataunuu valoaga, ma sa teenaina ma faasatauroina. O le mea sili ona taua, sa Ia faamaeaina le Togiola. Na faamaeaina e Iesu Keriso, le Alo o le Atua, ia mea uma lava na auina mai o Ia e Lona Tama Faalelagi e fai.

A o lumanai le maliu ma le Toetu o le Faaola, sa Ia tuuina atu i Ana Aposetolo le pule e aoao atu ai Lana talalelei, faataunuu sauniga o le faaolataga, ma faatuina Lana Ekalesia i le lalolagi.

Mau Suesueina

Mataupu Faavae o le Faatuatua 1:5
Mataio 10:1–10

Luka 6:13
Ioane 15:16

Eperu 5:4

O Le Liliuese Tele

Ina ua mavae le maliu o Iesu Keriso, sa sauaina e tagata amioleaga ia Aposetolo ma tagata o le Ekalesia ma fasiotia le toatele o i latou. Ona o le maliliu o Aposetolo, sa faapea loa ona aveesea mai le lalolagi ia ki o le perisitua ma le pule o le perisitua e pulefaamalumu ai. Sa tausia pea e Aposetolo le manino o aoaoga faavae o le talalelei ma tausia pea le faatulagaga ma tulaga faatonuina o le agavaa mo tagata o le Ekalesia. Ina ua leai ni Aposetolo, sa faasolo ina faaleagaina ia aoaoga faavae, ma sa faia ni suiga e le'i faatagaina i le faatulagaga o le Ekalesia faapea ia sauniga o le perisitua, e pei o le papatisoga ma le tuuina atu o le meaalofa o le Agaga Paia.

I le leai o ni faaaliga ma le pule o le perisitua, o lea sa faalagolago ai loa tagata i le atamai faaletagata e faaliliuina ai tusitusiga paia ma mataupu faavae ma sauniga o le talalelei a Iesu Keriso. Na aoaoina manatu sese o ni upumoni. O le tele o le malamalama i le uiga ma le natura moni o le Atua le Tama, o Lona Alo o Iesu Keriso, ma le Agaga Paia na leiloloa. O aoaoga faavae o le faatuatua ia Iesu Keriso, salamo, papatisoga, ma le meaalofa o le Agaga Paia sa faanenefu pe ua faagaloina. Sa le toe i ai i le lalolagi le pule o le perisitua lea na tuuina atu i Aposetolo a Keriso. O lenei liliuese na oo atu ai lava i le mapuna a'e o le tele o mau lotu.

Ina ua mavae ia senituri o le pogisa faaleagaga, sa tetee alii ma tamaitai sa sailia le upumoni i faiga faalelotu sa i ai. Sa latou iloaina o le tele o mataupu faavae ma sauniga o le talalelei ua suia pe ua leiloloa. Sa latou saili mo le malamalama faaleagaga sili atu, ma e toatele na talanoa i le moomia o se Toefuataiga o le upumoni. Ae peitai, latou te le'i faapea ane lava na valaauina i latou e le Atua e avea ma se perofeta. Nai lo lena, sa latou taumafai e toe faatulaga ia aoaoga ma faiga sa latou talitonu na suia pe faaleagaina. O a latou taumafaiga na tau atu ai i le faatuina o le tele o lotu Porotesano. O lenei Toefaatulagaina na taunuu atu ai i le faatupulaia o le faatauaina o le saolotoga i talitonuga faalelotu, lea na tatalaina ai le auala mo le Toefuataiga mulimuli.

Na mua'i ta'uina mai e Aposetolo a le Faaola lenei liliuese tele. Na latou mua'i ta'uina mai foi e faapea o le a toefuatai mai le talalelei a Iesu Keriso ma Lana Ekalesia i le lalolagi.

Mau Suesueina

1 Nifae 13
2 Nifae 26:20–21
2 Nifae 28
4 Nifae 1:27
MFF 86:1–3
Mataio 24:9–11
12:1–9

Galuega 3:19–21
Galuega 20:28–30
Kalatia 1:6–9
2 Tesalonia 2:1–12
(FIS fuaiupu 2, 3, 7–9)
1 Timoteo 4:1–3
2 Timoteo 4:3–4

2 Peteru 2:1–2
Amosa 8:11–12
Guide to the Scriptures, “Apostasy”
Faamaoni i le Faatuatua, itulau 13–14
Our Search for Happiness, itulau 23–32
Jesus the Christ, chapter 40, “The Mareko Long Night of Apostasy”

Faamatalaga

Faamatalaga

O Le Liliuese Tele

E tatau ona malamalama tagata sailiili sa tupu se liliuese i le lalolagi atoa ina ua mavae le maliu o Iesu Keriso ma Ana Aposetolo. Ana fai e leai se liliuese, semanu e le manaomia ona i ai se Toefuataiga. E pei ona faaaliga le iila o se taimane i luga o se veloveta uliuli, e faapena foi le susulu o le tu mai o le Toefuataiga i tua atu o le Liliuese Tele. E pei ona taitaiina ai oe e le Agaga, ia aoao tagata sailiili e uiga i le Liliuese Tele i se tulaga auiliili e talafeagai i o latou manaoga ma tulaga. O lou faamoemoe o le fesoasoani lea ia i latou ia malamalama i le manaomia o le Toefuataiga o le talalelei a Iesu Keriso.

Manatu Autu

- O le Ekalesia a Iesu Keriso o loo fausia i luga o le faavae o aposetolo ma perofeta (tagai i le Efeso 2:19–20; 4:11–14). O nei taitai o loo i ai le pule paia o le perisitua. O faaaliga latou te taitaia ai mataupu o le Ekalesia. Latou te faatumauina le manino o aoaoga faavae, faatagaina le faia o sauniga, ma valaauina ma tuuina atu i luga o isi le pule o le perisitua.
- Sa teena e tagata ma fasiotia ia Iesu Keriso ma Aposetolo (tagai i le Mataio 24:9; 1 Nifae 11:32–34; 2 Nifae 27:5). Faatasi ai ma le maliliu o Aposetolo, sa le toe i ai i le Ekalesia le pule o le perisitua e pulefaamalumu ai. O le mafuaaga lea, sa le toe maua ai le pule e tuu atu ai le Agaga Paia pe faatinoina ai isi sauniga faaola. Na motusia ia faaaliga, ma na faaleagaina foi ia aoaoga faavae.
- E oo lava i le taimi a o le'i maliliu ia Aposetolo, sa tele lava ni feteenaiga na alia'e e faatatau i aoaoga faavae. O le Malo o Roma, lea sa faasalaina muamua lava ia le au Kerisiano, sa taliaina mulimuli ane le faaKerisiano. O fesili taua i mataupu faalelotu sa foiaina e aufono. O aoaoga faavae faigofie ma sauniga sa aoaoina e le Faaola sa finauina ma suia ina ia ogatasi ma manatu faalelalolagi (tagai i le Isaia 24:5). Sa latou suia ia tusitusiga paia, ma aveesea mai ai aoaoga faavae matagofie ma le manino (1 Nifae 13:26–40). Sa latou fausia ia tulafono, po o faamatalaga o talitonuga, e faavae mai aoaoga sese ma ua suia (tagai i le Talafaasolopito—Iosefa Samita 2:19). Talu ai ona o le faamaualuga, sa naunau ai isi i tofiga o le fia sili (tagai i le 3 loane 1:9–10). Sa taliaina e tagata nei manatu sese ma avatu le faamamalu i faiaoga sese o e na aoaoina atu aoaoga e faafiafia ai nai lo le upumoni paia (tagai i le 2 Timoteo 4:3–4).
- I le gasologa mai o le talafaasolopito, e toatele tagata sa talitonu ma le faamaoni i faamatalaga ma aoaoga sese. Sa latou tapuai e tusa ai ma le malamalama sa ia i latou ma maua tali i a latou tatalo. Ae peitai sa “taofia i latou mai le upumoni ona ua latou le iloa le mea e maua mai ai” (MFF 123:12).
- O lea, sa moomia ai se Toefuataiga, ae le o se toefaatulagaina. E le'i faaauuina le pule o le perisitua i se laina motumotu mai le Aposetolo o Peteru. Ina ia toefaatulagaina o le suia lea o le mea ua i ai; o le toefuataiina o le toe aumaia lea o se mea sa i ai muamua. O lea la, o le toefuataiina o le pule o le perisitua e ala i avefeau mai le lagi sa na o le pau lea o le auala e faatoilaloina ai le Liliuese Tele.

O Le Toefuataiga o le Talalelei a Iesu Keriso e ala mai ia Iosefa Samita

Ina ua talafeagai ia tulaga, sa toe aapa mai le Tama Faalelagi i Ana fanau i le alofa. Na Ia valaauina se alii talavou e igoa ia Iosefa Samita e avea ma se perofeta. O ia na auala mai ai le toefuataiina mai o le atoatoaga o le talalelei a Iesu Keriso i le lalolagi.

Sa nofo Iosefa Samita i le Iunaite Setete, lea atonu sa na o le pau lea o le atunuu sa fiafia i le saolotoga o tapuaiga i lea taimi. O le taimi lea o le faateleina o le fiafia i talitonuga faalelotu i le itu i sasae o le Iunaite Setete. O tagata o lona aiga sa matuai toaaga lava i le lotu ma sa sailiili pea mo le upumoni. Ae sa toatele faifeau sa faapea mai o loo ia i latou le talalelei moni. Sa manao Iosefa ina ia “iloa po o le fea o lotu uma ua sa’o,” (Talafaasolopito—Iosefa Samita 2:18). O loo aoao mai le Tusi Paia e faapea e “tasi le Alii, e tasi le faatuatuga,

Faamatalaga

e tasi le papatisoga” (Efeso 4:5). Sa auai atu Iosefa i lotu eseese, ae sa tumau pea lona le mautonu po o le fea lotu e tatau ona auai atu i ai. Na ia tusia mulimuli ane:

“Ae ona o le faanunununu ma le fefinauai tele o lotu eseese, sa faigata ai i se tagata laitiiti e pei o au . . . ona maua se tonu po o ai ua sao a o ai ua sese. . . O le taulotoaiga o lea tauaiupuga ma le lasi o taofi, na ou faapea ifo ai ia te au lava: O le a se mea e ao ina ou faia? O ai o nei lotu uma ua sao; po ua sese i latou uma? Afai foi ua sao se tasi o i latou, o le fea, ma pe faapefea foi ona ou iloa?” (Talafaasolopito—Iosefa Samita 2:8, 10).

A o sailia e Iosefa le upumoni mai nei lotu eseese uma, sa ia liliu atu i le Tusi Paia mo le taitaiga. Sa ia faitau, “A e afai ua leai se potu i so outou ina ole atu ia i le Atua, o le foai tele mai i tagata uma ma le le toe ta’uta’ua; ona foaiina mai ai lea ia te ia” (Iakopo 1:5). Talu ai ona o leni fuaiupu, sa fuafua ai Iosefa e fesili atu i le Atua po o le a le mea e tatau ona ia faia. I le tautotogo o le 1820 na alu atu ai o ia i se togavao e latalata ane ma tootuli ai ma tatalo. Sa ia faamatalaina le mea na ia oo i ai:

“Na ou vaai ai i se malamalama faaniutu i luga ae tonu o lou ulu, e sili atu le pupula nai lo le la, ua alu ifo malie lava seia oo mai ia te au. . . Ina ua oo ifo le malamalama i ou luga, sa ou vaaia ni Tagata se toalua e le mafaamatalaina lo laua mamalu ma lo laua pupula, o tutu mai i ou luga ae i le ea. Sa fetalai mai le tasi o i laua ia te au, ma sa ia tau lou igoa ma fetalai mai a o tusi ane lona aao i le tasi—O Lou Atalii Pele Lenei. Faalogo ia te Ia!” (Talafaasolopito—Iosefa Samita 2:16–17).

I leni faaaliga vaaia, sa faaali atu ai le Atua le Tama ma Lona Alo, o Iesu Keriso ia Iosefa Samita. Na ta’u atu ai e le Faaola ia Iosefa e aua ne’i auai i soo se lotu, aua ua “sese uma lava” ma “o mataupu uma a ia lotu o ni mea inosia.” Na Ia fetalai, “Ua latou faalatalata mai ia te au i o latou laugutu, a o o latou loto ua taumamao mai ia te au, ua latou fai ma mataupu poloaiga a tagata, o e ua peiseai ua amioatua, a o le mana o i lea mea ua latou teena” (Talafaasolopito—Iosefa Samita 2:19). E ui lava sa toatele tagata lelei sa talitonu ia Keriso ma taumafai ia malamalama ma aoao atu Lana talalelei, ae latou te le’i maua le atoatoaga o le upumoni po o le pule o le perisitua e papatiso ai ma faia ai isi sauniga faaola. Sa latou ola mai i se tulaga o le liliuese e pei ona aafia ai augatupulaga uma i le mea na tuufaasolo mai e le isi augatupulaga ua mavae atu, e aofia ai le suia o aoaoga faavae faapea ma sauniga e pei o le papatisoga. E pei ona faia e le Atua ia Atamu, Noa, Aperaamo, Mose, ma isi perofeta, na Ia valaauina ai ia Iosefa Samita ina ia avea ma se perofeta e auala mai ai le toefuataiina mai o le atoatoaga o le talalelei i le lalolagi.



Ina ua mavae le faaali mai o le Tama ma le Alo, sa auina mai isi avefeau mai le lagi, po o agelu ia Iosefa Samita ma lana uo o Oliva Kaotui. Sa faaali mai Ioane le Papatiso ma tuuina atu i luga o Iosefa Samita ma Oliva Kaotui le Perisitua Arona, lea e aofia ai le pule e faia ai le sauniga o le papatisoga. Na faaali mai foi ia Peteru, Iakopo, ma Ioane (o le toatolu o uluai Aposetolo a Keriso) ma tuuina atu i luga o Iosefa Samita ma Oliva Kaotui le Perisitua Mekisateko, ua toefuatai atu i ai le pule lava lea e tasi sa tuuina atu i Aposetolo a Keriso anamua. Faatasi ai ma leni pule o le perisitua, sa poloaiina ai loa ia Iosefa Samita ina ia toe faatulagaina le Ekalesia a Iesu Keriso i le lalolagi. Na auala mai ia te ia, le valaauina e Iesu Keriso o Aposetolo e toasefululua.

Faamatalaga

O le taimi o loo tatou ola ai o le taimi lea o loo ta’ua e perofeta o le Tusi Paia o aso amuli, o aso e gata ai, po o le tisipenisione o le atoatoaga o taimi. O le vai taimi lea a o lumanai le Afio Faalua mai o Iesu Keriso. O le tisipenisione faaiu. O le mafuaaga lena ua ta’ua ai le Ekalesia O Le Ekalesia a Iesu Keriso o le Au Paia o Aso e Gata Ai.

O loo taitaia e se perofeta soifua le ekalesia i aso nei. O lenei perofeta, o le Peresitene lea O Le Ekalesia a Iesu Keriso o le Au Paia o Aso e Gata Ai, o le sui faamaoniaina lea o Iosefa Samita. O ia faatasi ai ma Aposetolo o loo i ai nei e tau atu le latou pule ia Iesu Keriso i se sootaga e le motusia o faauuga na auala mai ia Iosefa Samita.

Tauloto le Talafaasolopito—Iosefa Samita 2:16–17

Tauloto le faamatalaina o le vaaia e Iosefa Samita o le Tama ma le Alo (Talafaasolopito—Iosefa Samita 2:16–17), ma ia saunia i soo se taimi e faamatala le Uluai Faaaliga e faaoga ai ni au lava upu. Aua ne’i faatopetopea. Ia tuuina atu lau molimau faamaoni ua e iloa e moni. Aua e te faalotolotolua e faamalamalama atu pe na faapefea ona e iloa e moni. Ia valaaulia lau soa ina ia faia foi faapena.

Molimau Atu

O se vaega taua o le tiute a se faifeautalai o le molimau atu lea o le perofeta o loo i ai nei o le peresitene o le Ekalesia.

Mau Suesueina

2 Nifae 3
MFF 112:30
Efeso 1:10

Efeso 4:5
Iakopo 1:5

Tamaitusi, *O le Molimau a le Perofeta o Iosefa Samita*

O Le Tusi a Mamona: O Se Tasi Molimau ia Iesu Keriso

I le iloaina lea o le masalosalo, le talitonu, faapea ma faamatalaga sese o le a tumau pea i le mavae ai o senituri o le pouliuli, o lea na aumaia ai e lo tatou Tama Faalelagi alofa se tusi anamua o tusitusiga paia e faatusatusa i le Tusi Paia, lea o le a aofia ai le atoatoaga o le talalelei e faavavau a Iesu Keriso. O lenei tusi o tusitusiga paia o loo tuuina mai ai se faamaoniga o Iosefa Samita o se perofeta moni lava a le Atua. O lenei faamaumauga ua ta’ua o le Tusi a Mamona: O Se Tasi Molimau ia Iesu Keriso.



Na taitai atu Iosefa Samita e se avefeau mai le lagi e igoa ia Moronae i se mauga lea sa nanaina ai ia papatusi auro mo auga senituri. O nei papatusi auro sa aofia ai tusitusiga a perofeta o loo tuuina mai ai se tala i feutagaiga a le Atua ma nisi o tagata sa nonofo i Amerika anamua. Na faaliliu e Iosefa Samita mea sa i totonu o nei papatusi e ala i le mana o le Atua. Sa silafia e perofeta i totonu o le Tusi a Mamona ia le misiona a le Faaola ma aoao atu Lana talalelei. Ina ua mavae Lona Toetu, sa faali atu loa Keriso i nei tagata. Sa Ia aoaoina i latou i Lana talalelei ma faatuina Lana Ekalesia. O loo faamaonia e le Tusi a Mamona e “musuia tagata e le Atua ma valaauina i latou i lana galuega paia i nei ona

po ma lenei tupulaga, e pei ona faia i tupulaga anamua” (MFF 20:11). Ina ia iloa le moni o le Tusi a Mamona, e tatau i se tagata ona faitau i ai, mafaufau loloto i ai, ma tatalo e uiga i ai. O le tagata e saili ma le faamaoni i le upumoni o le a vave ona lagonaina o le Tusi a Mamona o le afioga a le Atua.

O le faitau, mafaufau loloto, ma le tatalo e uiga i le Tusi a Mamona e taua tele mo se liua e tumau. O i latou o e na amata ona faitauina le Tusi a Mamona mo le taimi muamua e uia ia laasaga taua i le agai atu lea ia iloa o Iosefa Samita o se perofeta a le Atua ma ua toefuataiina mai i le lalolagi le Ekalesia moni.

Faaoga le Tusi a Mamona e Faamautuina ai le Moni o le Toefuataiga

O se faaitaiga leni o sau faamatalaga e te ono tuuina atu e faailoa atu ai le Tusi a Mamona:

“E alofa le Atua i Lana fanau, o lea na la saunia ai se auala talitonuina e faamautuina ai le moni o mea ua ma fai atu ai. O le Tusi a Mamona. Faamolemole, e mafai ona e faitauina ia parakalafa mulimuli e lua o loo i le faatomuaga o le tusi?” Afai e le o aofia ai le faatomuaga i le faaliliuga o le Tusi a Mamona o loo i ai nei, ia faitau ia parakalafa mulimuli e lua o le faatomuaga o loo i totonu o le Tusi Mamona faaPeretania ma tuu atu se aotelega o parakalafa.

Ia faamalamalama atu i ai ma le faaeteete le uiga o manatu taitasi o loo i ai i parakalafa uma ma valaaulia le tagata sailiili ina ia tautino atu ina ia faitauina ia vaega o le Tusi a Mamona ma faaoga ia mataupu faavae o loo faamatalaina mai ai i nei parakalafa e lua.

Afai e faailoa atu i se tagata le Tusi a Mamona, e fesoasoani tele le faaali atu ia te ia o se kopi, ia iloiloina faapuupuu ia mea o loo i ai i totonu, ma faasoa atu i ai ni fuaitau se tasi pe lua e aoga tele ia te oe pe atonu foi e aoga tele ia te ia.

Mau Suesueina

Itulau Autu o le Tusi a Mamona
Introduction to the Book of
Mormon, paragraphs 1–7

MFF 1:17–23
MFF 20:5–12

Talafaasolopito—Iosefa Samita 2:27–64

Tatalo ia Iloa le Upumoni e ala i le Agaga Paia

O leni savali o le Toefuataiga, e moni po o le lē moni foi. E mafai ona tatou iloa e moni e ala i le Agaga Paia, e pei ona folafola mai i le Moronae 10:3–5. A maea ona faitau ma mafaufau loloto i ai i le savali o le Tusi a Mamona, soo se tasi e fia iloa le moni, e tatau ona ole atu i le tatalo i lo tatou Tama Faalelagi i le suafa o Iesu Keriso pe moni. Ina ia faia leni mea, tatou te faailoa atu i lo tatou Tama Faalelagi. Tatou te faafetai atu ia te Ia mo o tatou faamanuiga ma ole atu ina ia iloa pe moni le savali o le Tusi a Mamona. E leai se tasi e mafai ona malamalama i upumoni faaleagaga e aunoa ma le tatalo.

I le tali i a tatou tatalo, o le a aoaoina ai i tatou e le Agaga Paia i le upumoni e ala i o tatou lagona ma mafauauga. O lagona mai le Agaga Paia e malolosi, ae e masani foi ona

Tatalo

- Talanoa i lo tatou Tama Faalelagi (“Lo Matou Tama e o i le Lagi, . . .”).
- Faailoa atu lagona o lou loto (loto faafetai, fesili, talosaga ina ia faamautuina o le Tusi a Mamona e moni, ma isi mea).
- Faaiu (“I le suafa o Iesu Keriso, amene”).

Faamatalaga

Faamatalaga

malu ma filemu. A o amata ona tatou lagonaina o mea o loo tatou aoaoina e moni, o le a tatou mananao ai loa ina ia iloa mea uma tatou te mafaia e uiga i le Toefuataiga.

O le iloina o le moni o le Tusi a Mamona e tau atu ai i se malamalama o Iosefa Samita o se perofeta ma o le talalelei a Iesu Keriso na toefuataiina mai e auala mai ia te ia.

Tatalo

E ui lava o le tatalo e i ai sana matafaioi i le tele o talitonuga faalelotu ma aganuu, ae seasea lava ona manatunatu i le tatalo o se fesootaiga e lua ona itu i le va o le Atua ma le tagata. Fesoasoani ia i latou o loo e aoaoina ina ia malamalama e mafai ona latou faaleo atu lagona o o latou loto i le tatalo. Ia faaalua lea i le auala e te tatalo ai pe a amata pe faaiuina se lesona. Faaoga le gagana faigofie ina ia mafai foi ona latou faaoga pe a latou tatalo. Fesoasoani ia i latou ia malamalama o le a taliina mai e lo tatou Tama Faalelagi a latou tatalo, e patino lava lea i lagona o o latou loto ma mafaufauga a o latou mafaufau. Afai latou te faamaoni ma mananao moni ia iloa pe o i ai le Atua iina, o le a la tali maia a latou tatalo. Ia valaaulia le ulu o le aiga e faia se tatalo a o tootutuli i le faaiuga o le lesona.

Mau Suesueina

Alema 5:45–46
MFF 8:2–3

Ioane 14:26

Introduction to the Book of Mormon,
paragraphs 8–9

Valaaulia ina Ia Papatiso

I le gasologa o lenei lesona po o soo se isi lava lesona, aua le masalosalo i le valaauliaina o tagata ina ia papatiso ma faamau.

Ina ia saunia tagata mo se valaaulia ina ia papatiso ma faamau, ia molimau soo atu i le taua o le papatisoina o tagata uma e ala i le pule, o le mauaina o se faamagaloga o agasala, ma le meaalofo matagofie o le Agaga Paia. Atonu e te faapea atu, “A o taliina e le Alii au tatalo ma e lagonaina le moni o lenei savali, o le a e mulimuli la i le faataitaiga a Iesu Keriso e ala i le papatisoina?”

O le valaaulia ina ia papatiso ma faamauina e tatau ona ma’oti ma tuusa’o: “O le a e mulimuli la i le faataitaiga a Iesu Keriso e ala lea i le papatisoina e se tasi o loo umia le pule o le perisitua a le Atua? O le a faia se tatou sauniga o le papatisoga i le (aso). O le a e saunia la oe lava ia ina ia papatisoina i lena aso?”

Manatu e Aoao Atu Ai

O le vaega lenei o loo i ai manatu mo oe e te faaaogaina e saunia ma aoao atu ai lenei lesona. Ia mulimuli ma le agaga tatalo i le Agaga a o e fuafuaina pe faapefea ona faaaoga nei manatu. Ia faaopoopo manatu e te filifilia i lau ata o le lesona. Ia manatua o nei manatu o ni fautuaga—ae le o ni tulaga e manaomia—e fesoasoani ai ia te oe ia ausia manaoga o i latou o loo e aoaoina.

Ata o le Lesona e Na o se Taimi Puupuu e Faia Ai (3–5 minute)

Ina ua mavae auga senituri na leiloa ai, sa toefuataiina mai loa le talalelei a Iesu Keriso i le lalolagi e lo tatou Tama Faalelagi e auale mai i se perofeta soifua. O le Tusi a Mamona o le faamaoniga lea o lenei mea. E mafai ona e uuina i ou lima. E mafai ona e faitauina, mafaufau loloto i ai pe mafai faapefea e le savali o loo i totonu o le tusi ona faaleleia lou olaga, ma tatalo ina ia iloa o le savali o loo i ai o le afioga a le Atua.

- O Le Atua o lo Tatou Tama Faalelagi Alofa
- E Faamanuiaina Aiga e le Talalelei
- E Faaalia Mai e le Tama Faalelagi Lana Talalelei i Tisipenisione Uma
- O Le Galuega a le Faaola i le Lalolagi
- O Le Liliuese Tele
- O Le Toefuataiga o le Talalelei a Iesu Keriso e ala mai ia Iosefa Samita
- O Le Tusi a Mamona: O Se Tasi Molimau ia Iesu Keriso
- Tatalo ia Iloa le Upumoni e ala i le Agaga Paia

Tautinoga:

- O le a e faitau la ma tatalo ia iloa o le Tusi a Mamona o le afioga a le Atua?
- O le a e tatalo ia ia e iloa o Iosefa Samita o se perofeta?
- O le a tatou o la i le lotu i le Aso Sa nei?
- E mafai ona seti se taimi tatou te toe feiloai ai?
- Poloaiga mai le lesona 4 ua e filifilia e aofia ai.

Ata o le Lesona e le Umi se Taimi e Faia Ai (10–15 minute)

O la ma savali e ofoofogia ma faigofie. O le Atua o lo tatou Tama. O i tatou o Ana fanau. O i tatou o se vaega o Lona aiga. E alofa o la ia i tatou. Mai le amataga o le lalolagi, na la mulimuli ai i se faatulagaga o le alofa ma le manatu popole. O le tele o taimi sa la aapa mai ai i le alofa ina ia faaali mai le talalelei a Iesu Keriso ina ia mafai e Lana fanau ona iloa pe faapefea ona toe foi atu ia te la. Sa la faailoa atu i perofeta e pei o Atamu, Noa, Aperaamo, ma Mose. Ae sa filifili pea tagata e teena lena talalelei. I le luaafe tausaga talu ai, na aoao atu ai ma faavaeina e Iesu Keriso lava la Lana Ekalesia. Ae o le mea e maofa ai, sa teena lava e tagata ia Iesu. Soo se taimi lava e le amanaia ai pe faaseseina ai e tagata ia aoaoga faavae ma sauniga, e aveesea foi e le Atua le pule e taitaia ai le Ekalesia.

Faamatalaga

Faamatalaga

O le ma valaaulia ia te oe faapea tagata uma o le lalolagi, e faapoopo atu lea i upumoni ua uma ona e faatauaina. Mafaufau i le ma faamaoniga e faapea na toe aapa mai lo tatou Tama Faalelagi ma Lona Alo o Iesu Keriso i fanau a le Atua, i le alofa ma faaali mai le atoatoaga o le talalelei i se perofeta. O le igoa o lenei perofeta o Iosefa Samita. O le faamaoniga o lenei upumoni mamalu o loo maua lea i totonu o se tusi—le Tusi a Mamona—lea e mafai ona e faitauina, mafaufau loloto i ai, ma tatalo e uiga i ai. Afai e te tatalo ma se loto faamaoni, ma le faamoemoe tonu ma le faatuatua ia Iesu Keriso, o le a ta'u atu e le Atua ia te oe e ala i le mana o le Agaga Paia e moni.

Tautinoga:

- O le a e faitau la ma tatalo ia iloa o le Tusi a Mamona o le afioga a le Atua?
- O le a e tatalo la ia e iloa o Iosefa Samita o se perofeta?
- O le a tatou o la i le lotu i le Aso Sa nei?
- E mafai ona seti se taimi tatou te toe feiloai ai?
- Poloaiga mai le lesona 4 ua e filifilia e aofia ai.

Ata Atoa o le Lesona (30–45 minute)

- O le Atua o lo tatou Tama Faalelagi Alofa
 - O i tatou o fanau a le Atua (tagai i le Galuega 17:29).
 - E alofa le Atua ia i tatou ma o le a fesoasoani ia i tatou e faia filifiliga sa'o.
 - E mafai ona tatou toe mau faatasi ma le Atua e ala ia Iesu Keriso (tagai i le Ioane 3:16–17).
- E Faamanuiaina Aiga e le Talalelei
 - E fesoasoani le talalelei a Iesu Keriso ina ia atinaeina ni sootaga malolosi i aiga.
 - O aiga ua faauuina e le Atua; o le iunite sili lea ona taua i le olaga nei ma le faavavau (tagai i le MFF 49:15–16).
 - O le aiga o le nofoaga sili lea ona lelei e aoao atu ai, aoao mai ai, ma faaoga ai mataupu faavae o le talalelei (tagai i le MFF 68:25; Kenese 18:19; Teuteronome 6:7).
 - E mafai ona avea le aiga ma se nofoaga o le saogalemu, filemu, ma le olioli.
- Ua Faaalia Mai e le Tama Faalelagi Lana Talalelei i Tisipenisione Uma
 - E valaauina e le Atua ia perofeta e aoao atu Lana talalelei (tagai i le Amosa 3:7).
 - O le liliuese o lona uiga o le teenaina lea o aposetolo ma le talalelei.
 - O tisipenisione o vaiata ia sa aoao atu ai e perofeta le talalelei. O tisipenisione na muamua atu na faaiuina i le liliuese (tagai i le MFF 136:36–38).

Faamatalaga

- Sa aoao atu e Atamu, Noa, Aperaamo, Mose, ma isi perofeta uma anamua le talalelei (tagai i le Mose 5:4–12).
- O le Galuega a le Faaola i le Lalolagi
 - Sa toefuatai mai e le Alo o le Atua le talalelei ma faia le tele o vavega (tagai i le Guide to the Scriptures, “Miracle,” 165).
 - Sa la valaauina Aposetolo ma tuu atu ia i latou le pule o le perisitua e talai atu ai le talalelei ma faia sauniga faaola e pei o le papatisoga (tagai i le Ioane 15:16).
 - Sa faatuina e Keriso Lana Ekalesia.
 - Sa faasatauroina Keriso, ma sa teena ma fasiotia Ana Aposetolo (tagai i le Mataio 27:35; Mareko 15:25).
 - Na faataunuuna e Keriso le Togiola (tagai i le Guide to the Scriptures, “Atone, Atonement,” 22–23).
- O Le Liliuese Tele
 - A aunoa ma ni faaaliga e auala mai i se perofeta, o le a pauu atu tagata i le pogisa faaleagaga (tagai i le Amosa 8:11–12).
 - Na mua’i ta’u mai e perofeta ma Aposetolo le Liliuese Tele (tagai i le 2 Tesalonia 2:1–3).
- O Le Toefuataiga o le Talalelei a Iesu Keriso e Auala mai ia Iosefa Samita
 - Sa saili Iosefa mo le upumoni (tagai i le Talafaasolopito—Iosefa Samita 2:8, 10).
 - Sa faaali atu le Atua ma Iesu Keriso ia Iosefa Samita (tagai i le Talafaasolopito—Iosefa Samita 2:16–17).
 - E pei o perofeta i tisipenisione na muamua atu, sa valaauina foi Iosefa Samita e avea ma perofeta o Ienei tisipenisione mulimuli.
 - Na toefuatai mai e le Atua le atoatoaga o le talalelei e auala mai ia Iosefa Samita (tagai i le MFF 35:17; 135:3).
 - Na toefuatai mai e isi avefeau mai le lagi le perisitua, ma sa faavaeina le Ekalesia a Keriso (tagai i le MFF 13; 27:12).
 - O loo taitaia e se perofeta soifua le Ekalesia i le taimi nei.
- O le Tusi a Mamona: O Se Tasi Molimau ia Iesu Keriso
 - O le Tusi a Mamona o le faamaoniga mautinoa lea o Iosefa Samita o se perofeta.
 - Sa faaliliuina e Iosefa ia papatusi e ala i le mana o le Atua (tagai i le Introduction to the Book of Mormon, paragraph 5).
 - O le Tusi a Mamona o loo faamaonia ai o loo musuia e le Atua le perofeta i o tatou aso e pei ona la faia i tisipenisione uma (tagai i le MFF 20:5–12).
 - O le Tusi a Mamona o loo aofia ai le atoatoaga o le talalelei a Iesu Keriso (tagai i le MFF 20:8–9).

Faamatalaga

- Tatalo ina ia Iloa le Moni e ala i le Agaga Paia
 - E mafai ona e iloa e moni le Tusi a Mamona (tagai i le Moronae 10:3–5; Introduction to the Book of Mormon, paragraphs 1, 8–9).
 - O le a aoaoina oe e le Agaga Paia e ala i ou manatu ma lagona (tagai i le MFF 8:2–3).

Tautinoga:

- O le a e faitau la ma tatalo ia iloa o le Tusi a Mamona o le afioga a le Atua?
- O le a e tatalo la ia e iloa o Iosefa Samita o se perofeta?
- O le a tatou o la i le lotu i le Aso Sa nei?
- E mafai ona seti se taimi tatou te toe feiloai ai?
- Poloai mai le lesona 4 ua e filifilia e aofia ai.

O Fesili e Fai pe a uma le Lesona

- E i ai ni au fesili e uiga i mea sa ma aoao atu?
- Ana fai o i ai se perofeta i le lalolagi i le taimi nei, o le a se mea semanu e te fesili atu ai ia te ia?
- Pe e te lagona le faafogaina e le Atua o au tatalo? Aisea?
- Pe e te manao ia saili pe moni le Tusi a Mamona? Aisea?

Faaugaga Autu

- **Faaaliga:** O fesootaiga mai le Atua i Ana fanau i le lalolagi. O faaaliga e mafai ona auala mai le Malamalama o Keriso ma le Agaga Paia e ala i musumusuga, faaaliga vaaia, miti, po o asiasiga a agelu. O faaaliga vaaia e maua ai le taitaiga lea e mafai ona taitai atu ai e faamaoni i le faaolataga e faavavau i le malo Selesitila. Na faaali atu e le Alii Lana galuega i Ana perofeta ma faamautuina atu i e na talitonu e faapea o faaaliga e tuuina atu i perofeta e moni (tagai i le Amosa 3:7). O faaaliga e tuu mai ai e le Alii le taitaiga i tagata taitoatasi mo soo se tasi lava e saili i ai ma o loo i ai le faatuatua, salamo, ma o loo usiusitai i le talalelei a Iesu Keriso.
- **Liliuese:** O se liliuese o tagata taitoatasi, o le Ekalesia, po o atunuu uma, mai le mea moni. E aofia ai le tetee i le ua pule ma le teenaina o perofeta. O le faamaoniga o le liliuese e aofia ai le solia o tulafono a le Atua, suia o sauniga o le talalelei, ma le solia o feagaiga (tagai i le Isaia 24:5).
- **Perisitua:** O le pule ma le mana lea a le Atua ua tuuina atu i le tagata e galue ai i le suafa o Iesu Keriso i mea uma lava mo le faaolataga o le tagata.
- **Perofeta:** O se alii ua valaauina ma tautala mo le Atua. I le avea ai ma se avefeau a le Atua, e maua e se perofeta le pule o le perisitua, o poloaiga, valoaga, ma faaaliga mai le Atua. O lona tiutetauave o le faailoa atu lea o le finagalo ma le uiga moni o le Atua i tagata ma faailoa atu le uiga o Ana feutagaiga ma i latou. E fetuuina e se perofeta le agasala ma mua'i ta'u mai ona taunuuga. O ia o se failauga o le amiotonu. O nisi taimi, e mafai ona musuia ai se perofeta e mua'i ta'u mai le lumanai mo le manuia o tagata. Ae peitai, o lona tiutetauave muamua lava, o le molimau atu lea ia Keriso.
- **Saolotoga:** O le mafaia lea ma le aia ua tuu mai e le Atua i tagata e filifili ai ma faia ai mea mo i latou lava.

Faamatalaga

- **Tisipenisione:** O se vaitau lea e i ai se auauna faauuina e le itiiti ifo ma le toatasi i le lalolagi o le na te tauaveina ia ki o le perisitua paia. E faaopoopo atu ia lesu Keriso, o perofeta e pei o Atamu, Enoka, Noa, Aperaamo, Mose, ma Iosefa Samita na amataina uma lava se tisipenisione fou o le talalelei. Afai e faavaeina e le Alii se tisipenisione, e faaalua mai foi se faafouina o le talalelei ina ia aua ne'i faalagolago tagata o lona tisipenisione i tisipenisione ua mavae mo le malamalama i le ata o le faaolataga. O le tisipenisione lea na amataina e Iosefa Samita ua lauiloa o le "tisipenisione o le atoatoaga o taimi."
- **Toefaatulagaina:** O le toefaatulagaina o le faia lea o ni suiga ina ia faaleleia ai. O le upu *tagata na toefaatulagaina* e faataua lea i alii ma tamaitai na (e pei o Matini Luteru, Ioane Kalavini, Viliamu Tinetali, ma Ioane Uikilifi) o e na tetee i faiga a le ekalesia sa i ai, lea sa latou lagonaina le moomia ona toefaatulagaina.
- **Toefuataiga:** Ina ia toefuatai o lona uiga o le toe foi lea i se mea sa i ai muamua, po o le toe aumaia. O le Toefuataiga, e pei ona faaoga ai e le Au Paia o Aso e Gata Ai, o lona uiga o le toe aumaia lea o le Ekalesia moni a lesu Keriso e pei ona sa uluai i ai ina ua faatulagaina e lesu Keriso, lea na leiloa ona o le liliuese. E le pei la o le Toefaatulagaina, o le Toefuataiga sa faia i le pule paia e ala i faaaliga.
- **Togiola:** O lesu Keriso o le togiola sili lea o tagata aua o Ia, ma Lana Togiola, na totogi ai le tau o agasala a tagata ma mafai ai ona maua le toetutu o tagata uma. O le togiolaina o le aveese mai lea, po o le faatauina, po o le fai ma sui, e pei o le faasaolotoina o se tagata mai le pologa e ala lea i le totogiina o se tau. O le togiola e faataua lea i le Togiola a lesu Keriso ma ia aveeseina ai mai le agasala. O le Togiola a Keriso ua togiolaina uma ai tagata mai le oti faaletino. O Lana Togiola, lea e aofia ai Lona puapugatia i Ketesemane ma luga o le satauro e faapea foi i Lona Toetu, ua togiolaina ai i latou o e faatuatua ia te Ia ma e ua salamo mai le oti faaleagaga.

O Isi Faaupuga Atonu e Moomia Ai se isi Faauigaga mo i Latou o loo e Aoaina

- | | | |
|---|---------------------------|------------------------------------|
| • Aposetolo | • Sauniga o le faaolataga | • Toe foi atu e mau i Lona afioaga |
| • Agasala | • Tausimea | • Tumau e oo i le iuga |
| • Usiusitai ma le le usiusitai i poloaiga | • Talalelei | • Tusi Paia |
| • Faaola | • Tatalo | • Tusitusiga Paia |
| • Meaalofa o le Agaga Paia | | |

Tagata na Toefaatulagaina ma Taitai Faalelotu o le Lalolagi

O manatu nei o ni faamatalaga e faamalalama ai e ao ona faatoa faaogaina pe a manaomia.

Ioane Uikilifi: Na fanau i le senituri 14 i Egelani. O se tagata atamai i mataupu silisili i le lunivesite o Oxford. Sa aoao atu faapea e le'i i ai i le Lotu Katoliko ia ki o le perisitua, ma o le Sakalameta Paia (po o le faamanatuga) e le o le tino tonu lea o Keriso, ma e le tataua i le ekalesia ona faaogaina le pulega o faiga faaupufai i tagata. Na faaliliuina le Tusi Paia i le gagana faaPeretania. Na maliu i le aso 31 o Tesema 1384.

Matini Luteru: Na fanau i le aso 10 Novema 1483, i Siamani. Sa aoga i le lunivesite o Erfurt ma Wittenberg. Na tutuiina ni aoaoga se 95 i le faitotoa o le Falesa o le Maota o le Tupu e tetee atu ai i le tele o aoaoga

Faamatalaga

sa i ai a le Ekalesia Katoliko Roma, e aofia ai le faiga sa faia o le totojiina lea e tagata o tupe ina ia faamagalo ai a latou agasala. Na maliu i le aso 18 o Fepuari 1546.

Viliamu Tinetali: Na fanau i Uelese i le 1494. Sa aoga i Oxford ma Cambridge. Na faaliliuina le Feagaiga Fou i le faaPeretania. Na tuuina atu tusitusiga paia i tagata e faailoa atu ai aoaoga sese ma le pepelo a taitai faalelotu. Sa fasiotia o ia i le aso 6 o Oketopa 1536.

Ioane Kalavini: Na fanau i le aso 10 Iulai 1509, i Farani. Sa aoga i Pale ina ia avea ma se faifeau. O se taitai autu i gaioiga ina ia toefaatulagaina le Lotu Katoliko. O le tele o lona olaga sa nofo ai i Suiselani. Sa ia aoao atu faapea o le natura lava o le tagata ia e eleelea ae na o le alofa tunoa o le Atua e mafai ona faasaoina ai i latou. Na tusia le tele o tusi e faamalamalama ai le Tusi Paia. Na maliu i le aso 27 Me 1564.

Mo nisi faamatalaga e uiga i tagata na toefaatulagaina, tagai i punaao nei i le fatatusi a le faifeautalai: James E. Talmage, *Jesus the Christ*, 692–703; M. Russell Ballard, *Our Search for Happiness*, 26–32.

E pei lava ona faamanuiaina le lalolagi Kerisiano i le lototetele ma le faautaga mamao a tagata na toefaatulagaina, e tele foi isi malo ma aganuu ua faamanuiaina e i latou o e na tuuina atu i ai lena vaega “ua silafia e [le Atua] ua tatau ia te i latou” (Alema 29:8). O aoaoga a taitai o isi lotu ua fesoasoani ai i le toatele o tagata ina ia avea ma ni tagata malamalama ma amio sa’o.

Putā (Kotama): Na fanau i le 563 T.L.M. i se taitai Initu i Nepal. Sa popole i mafatiaga sa ia vaai i ai. Na solaese mai le maota matagofie o lona tama, na ia tuuese le lalolagi, ae ola i le mativa. Sa sailia le malamalama, sa ia mauaina ai le mea ua ta’ua o le “ala o le laveaiina.” Na faapea na ia taunuu atu i Nirvana, o se tulaga e galo ai mea e popole i ai, o tiga, po o mea moni o loo i fafo. Sa avea ma se faiaoga mo se nuu o le au puta.

Konefasia: Na fanau i le 551 T.L.M. Na matuaoti a o laitiiti. O le uluai faiaoga polofesa a Saina. O se tagata Saina sili ona atamai ma mataala. E tau leai ni ana faamatalaga e uiga i tagata faaleagaga po o mana faalelagi. Sa talitonu na tuu atu e le lagi ia te ia se misiona paia e avea ai ma siamupini o mea lelei ma le moni.

Moameta: Na fanau i le 570 T.A. i Meka. Na matuaoti a o laitiiti. Sa ola i se olaga mativa. Na iloga o ia o se faatupu filemu faatuatuaaina. Sa faaipoipo i le 25 o tausaga. I le 610 sa tatalo ai ma mafaufau loloto i luga o le Mauga o Hira. Na fai mai sa faaali atu le agelu o Kaperielu ma tuuina atu se savali mai ia Ala (Atua). Na fai mai sa ia maua ni fesoataiga mai le Atua e ala mai ia Kaperielu mai le 620 e oo i le 632. O nei fesoataiga, lea na ia faamatalaina atu i ona soo, na tusia mulimuli ane i totonu o le Kora, o se tusi paia faalsalama.

O Le Ata o le Faaolataga



Faamatalaga

O Lou Faamoemoega

A o e aoao atu, ia saunia au tagata sailiili ina ia ausia tulaga agavaa mo le papatisoga o loo aoaoina atu i totonu o le Mataupu Faavae ma Feagaiga e 20:37 faapea ia fesili o le faatalanoaga mo le papatisoga. E sili atu ona ausia le vaega lenei e ala lea i lou valaauliaina o au tagata sailiili ina ia faia ma tausia tautinoga o loo lisiina atu i lalo.

Fesili o le Faatalanoaga mo le Papatisoga

- Pe e te talitonu o le Atua o lo tatou Tama e Faavavau?
- Pe e te talitonu o Iesu Keriso o le Alo o le Atua, o le Faaola ma le Togiola o le lalolagi?
- Pe e te naunau la e tausi le aso Sapati ia paia, e aofia ai le taumafa i vaiaso taitasi i le faamanatuga ma tuuina atu le auunaga i ou uso a tagata o le ekalesia?

Tautinoga

- O le a e tatalo la ia e iloa e moni mea sa ma aoao atu?
- O le a e salamo la i au agasala?
- O le a tatou o la i le lotu i le Aso Sa nei?
- O le a e mulimuli la i le faaitaiga a le Faaola ma e papatiso i le (aso)?
- E mafai ona seti se taimi tatou te toe feiloai ai?
- Poloai mai le lesona 4 ua e filifilia e aofia ai.

Fesoasoani i Isi ia Aoao e uiga ia Iesu Keriso

E ao i faifeautalai ona molimau atu ia Iesu Keriso ma valaaulia tagata uma ina ia o mai ia te la ina ia mafai ona faasoina i latou. O le tuuina atu o aoaoga patino e uiga i le Faaola e taua tele mo i latou o e le lava po o le leai foi o se malamalama e uiga ia te la. O le Tusi a Mamona: O Se Tasi Molimau ia Iesu Keriso ua fuafuaina e fesoasoani ai i tagata uma ia iloa o “Iesu o le Keriso, . . . o loo faaali mai o la i atunuu uma lava” (itulau autu o le Tusi a Mamona). O se tasi o auala sili ona lelei e aoao atu ma molimau atu ai i le Faaola o le faitau faatasi lea mai le Tusi a Mamona. O fuaiupu mai isi tusi faavae e mafai foi ona fesoasoani i ai.

Manatunatu i fautuaga o loo i lalo. E mafai ona faia le tulaga lenei e avea ma se vaega o lenei lesona po o isi lesona pe avea foi ma se lesona na o ia lava. Afai e fesoasoani tele, ia toe fai soo lenei gaoioiga a o le'i faia le papatisoga ma le faamauga ma le maea o le papatisoga ma le faamauga.

Faamatalaga

Itulau autu ma le faatomuaga	O loo faamanino mai ai le faamoemoega o le tusi.
1 Nifae 10–11	O loo molimau atu Liae ma Nifae i le Faaola.
1 Nifae 19	O loo faamatalaina e Nifae ia valoaga i le galuega ma le Togiola a le Faaola.
2 Nifae 2	O loo molimau atu Liae i le avea o le Faaola ma Togiola.
2 Nifae 9	O loo molimau atu lakopo e uiga i le Togiola.
2 Nifae 31–33	O loo aoao atu e Nifae le mataupu a Keriso.
Enosa	Ua iloa e Enosa le mana o le Togiola.
Mosaea 2–5	O loo aoao atu le Tupu o Peniamina e uiga i le Faaola.
Mosaea 12–16	Ua tuu atu e Apinati lona ola i le molimau atu ia lesu Keriso.
Alema 5, 7	O loo molimau atu Alema e uiga i le Faaola.
Alema 17–22	Ua maua e Sa Lamana le molimau ia lesu Keriso.
Alema 34	Ua molimau atu Amoleka e uiga i le Togiola.
Alema 36	Ua iloa e Alema le mana o le Togiola a lesu Keriso.
Alema 40–42	O loo molimau atu Alema e uiga i le toetu ma le Togiola.
Helamana 5	O Nifae ma Liae o ni tufuga aao a le Atua e molimau atu e uiga i le Faaola.
3 Nifae 9–10	O loo valaaulia e le Faaola tagata ina ia o mai ia te la.
3 Nifae 11–18	O loo aoaoina e le Faaola ia Sa Nifae e uiga i le Tama ma Lana mataupu.
3 Nifae 27	O loo aoao atu e le Faaola Lana talalelei.
Eteru 3	Ua vaai le uso o lareto i le Faaola.
Eteru 12	O loo molimau atu Eteru ma Moronae e uiga i le Faaola ma le mana o Lana Togiola.
Moronae 7–8	O loo aoao atu e Mamona le alofa mama o Keriso ma Lana Togiola.
Moronae 10	Ua valaaulia e Moronae tagata uma ina ia o mai ia Keriso ma ia faaatoatoaina ia te la.
“O Le Keriso Soifua”	O loo molimau mai perofeta ma aposetolo e uiga i le Faaola.

Mua’i Olaga: O Le Faamoemoega ma le Fuafuaga a le Atua mo i Tatou

E toatele tagata e manatunatu, “O fea na tatou o mai ai? Aisea ua tatou i ai iinei? O fea tatou te o i ai?” O le ata o le faaolataga ua tuuina mai ai ia i tatou ia tali i nei fesili.

O le Atua o le Tama o o tatou agaga. O i tatou moni lava o Ana fanau, ma e alofa o Ia ia i tatou. Sa tatou ola o ni fanau agaga a lo tatou Tama o i le Lagi ae tatou te le’i fananau mai i lenei lalolagi. Ae peitai, e le pei i tatou o lo tatou Tama Faalelagi, e le mafai foi lava ona avea i tatou e faapei o Ia ma olioli i faamanuiaga uma o loo Ia olioli ai e aunoa ma le malamalama i le ola ai i le olaga faitino ma se tino faaletino.

O le faamoemoega atoa lava o le Atua—Lana galuega ma Lona mamalu—ina ia mafai e i tatou ona olioli i Ana faamanuiaga uma. Ua Ia saunia se fuafuaga atoatoa ina ia faaunuunuina ai Lona faamoemoega. Sa tatou malamalama ma taliaina lenei fuafuaga ae tatou te le’i o mai i le lalolagi. O loo ta’ua i totonu o tusitusiga paia le fuafuaga a le Atua o se fuafuaga o le alofa mutimutivale, o le fuafuaga o le fiefia, o le fuafuaga o le togiola, ma o le ata o le faaolataga.

O Iesu Keriso o le autu lea o le fuafuaga a le Atua. O Lana Togiola, na faataunuu ai e Iesu Keriso le faamoemoega o Lona Tama ma mafai ai e i tatou taitoatasi ona olioli i se tino ola pea ma le ola faavavau. O Satani, po o le tiapolo, o se fili lea i le fuafuaga a le Atua.

O le saolotoga, po o le mafai ona filifili, o se tasi lea o meaalofo sili a le Atua i Lana fanau. O lo tatou alualu i luma e faavavau e faalagolago lea pe faapefea ona tatou faaaoga leni meaalofo. E tatau ona tatou filifili pe mulimuli ia Iesu Keriso pe mulimuli ia Satani.

O loo vavaeeseina mai i tatou i le faaletino mai le Atua i le vaitaimi o le olaga i le lalolagi, ae e finagalo o Ia i Ana fanau uma taitoatasi ina ia maua le filemu i leni olaga ma olioli atoatoa i Lona afioaga pe a mavae leni olaga. E finagalo o Ia ina ia tatou faapei o Ia.

Mau Suesueina

Fanau a le Atua

MFF 93:29

Galuega 17:29

Eperu 12:9

Faamoemoega o le Atua

Mose 1:39

Ioane 17:3

Mua'i Olaga

MFF 138:53–56

Mose 3:5

Aperaamo 3:22–26

Ieremia 1:5

Guide to the Scriptures,
“Premortal Life”

O Le Fofoaga

I lalo o le taitaiga a le Tama, na fofoaina ai e Iesu Keriso le lalolagi e avea ma se nofoaga mo i tatou e nonofo ai ma maua ai le malamalama. Ina ia mafai ona alualu i luma ma avea faapei o le Atua, e ao ia i tatou uma taitoatasi ona maua se tino ma ia tofotofoina i se vaitaimi faaitaitai i le lalolagi. O lo tatou i ai i le lalolagi ua faapea ai ona tatou o ese mai le afioaga o le Atua. Tatou te le manatuaina lo tatou mua'i olaga. E tatau ona tatou savavali i le faatuatua nai lo le na o le vaai.

Mau Suesueina

1 Nifae 17:36

Alema 30:44

MFF 88:41–47

Mose 2:1

Mose 6:63

Aperaamo 3:24–25

FIS, Ioane 1:1–3

2 Korinito 5:6–7

Saolotoga ma le Pau o Atamu ma Eva

O Atamu ma Eva o uluai fanau ia a le Atua na o mai i le lalolagi. Na faia e le Atua ia Atamu ma Eva ma tuu i la'ua i le Faatoaga o Etena. Na faia Atamu ma Eva i le faatusa o le Atua, faatasi ai ma ni tino o aano ma ivi. A o i ai Atamu ma Eva i le faatoaga, sa i ai pea i la'ua i le afioaga o le Atua ma semanu e mafai lava ona ola ai e faavavau. Sa la'ua ola mama ai, ma sa tausia e le Atua o la manaoga.

Na tuuina atu e le Atua ia Atamu ma Eva i totonu o le Faatoaga o Etena lo la saolotoga. Na Ia poloaia i la'ua e 'aua ne'i aai i le fua o le laau na faasaina, po o le fua o le laau e iloa ai le lelei ma le leaga. O le usitaia o leni poloaiga o lona uiga semanu la te tumau ai pea i le faatoaga, ae le mafai ona alualu i luma e ala lea i le iloaina o mea faafeagai i le olaga faitino. Semanu la te le mafai ona iloa le olioli aua la te le mafai ona iloa le faanoanoa ma le tiga.

Sa faaosoosoina e Satani ia Atamu ma Eva ina ia aai i le fua ua faasaina, ma sa la filifili ai e 'ai. O se vaega leni o le fuafuaga a le Atua. Talu ai ona o leni filifiliga, na tuliese ai i

Faamatalaga

Faamatalaga

la'ua mai le faatoaga ma o ese ai mai le afioaga o le Atua. E ta'ua lenei mea na tupu o le Pau. O le vavaeeseina mai ma le afioaga o le Atua o le oti faaleagaga lea. Na avea Atamu ma Eva ma tagata faitino—ua oo i ai le oti faaletino, po o le tuueseeseina lea o le tino ma le agaga. Ua mafai nei ona la iloaina ia ma'i ma ituaiga mafatiaga eseese uma. Sa ia i la'ua le saolotoga o amioga po o le mafaia lea ona filifili i le va o le lelei ma le leaga. Ua mafai e lenei mea ona la aoao ai ma alualu ai i luma. Ua mafai ai foi e i la'ua ona faia filifiliga sese ma agasala. E faaopoopo atu i ai, ua mafai nei ona maua ni a la fanau, ina ia mafai e fanau agaga uma a le Atua ona o mai i le lalolagi, maua ni tino faaletino, ma ia tofotofoina. E na o le pau lea o le auala e mafai ai e fanau a le Atua ona agai i luma ma avea faapei o Ia.

Aoao Atu e uiga i le Pau

Afai e aoao atu lenei mataupu i le taimi muamua, 'aua e te aoaoina atu mea uma ua e iloa e uiga i ai. Ia faafaigofie ona faamalamalama atu faapea na filifilia e le Atua nisi e toalua o Ana fanau, o Atamu ma Eva, e avea ma uluai matua i le lalolagi. Ina ua mavae la la'ua solitulafono sa oo loa i la'ua i le agasala faapea ma le oti. E le mafai ona toe foi atu na o i la'ua e mau faatasi ma le Tama Faalelagi. Na fetalai atu le Alii ia Atamu ma aoaoina o ia i le ata o le faaolataga ma le togioala e ala mai i le Alii o Iesu Keriso. O le mulimuli i lena fuafuaga, e mafai ai e Atamu ma lona aiga ona maua le olioli i lenei olaga ma toe foi atu ma mau faatasi ma le Atua (tagai i le Alema 18:36; 22:12–14).

Mau Suesueina

I le Faatoaga

2 Nifae 2	Mose 3:15–17	Kenese 1:26–31
Mose 2:26–31	Mose 5:11	Kenese 2:15–17

O Le Pau

2 Nifae 2:25	Mose 4	Kenese 3
Alema 12:22–34	Mose 5:10–12	

O Lo Tatou Olaga i le Lalolagi

O le olaga i le lalolagi o se avanoa ma se faamanuiaga. O lo tatou faamoemoega i lenei olaga o le maua lea o le olioli ma saunia e toe foi atu i le afioaga o le Atua. Tatou te nonofo i le olaga faitino i se tulaga lea tatou te oo atu ai i le oti faaletino ma le oti faaleagaga. O loo i ai i le Atua se tino o aano ma ivi e atoatoa, mamalu, ma ola pea. Ina ia avea faapei o le Atua ma toe foi atu i Lona afioaga, e tatau foi ia i tatou ona tatou maua se tino o aano ma ivi e atoatoa, ma ola pea. Ae peitai, talu ai ona o le Pau o Atamu ma Eva, o lea ua oo ai i tagata uma se tino le atoatoa, o se tino faitino lea e oo lava i le oti. Ana leai se Faaola o Iesu Keriso, semanu e muta i le oti ia faamoemoega mo se olaga faatasi ma le Tama Faalelagi i le lumanai.

Faatasi ai ma le oti faaletino, o le agasala o se puniala sili lea e taofia ai i tatou mai le avea faapei o lo tatou Tama o i le Lagi ma le toe foi atu i Lona afioaga. I lo tatou tulaga faitino e masani ai ona tatou gauai atu i faaosoosoga, solia poloaiga a le Atua, ma agasala. I le taimi o lo tatou olaga i le lalolagi e faia ai e i tatou uma taitoatasi ia mea sese. E ui lava o nisi taimi e na ona faafoliga mai ai, ae o le agasala e tau atu lava pea i le le fiafia. O le agasala e tutupu ai lagona o le ta'usalaina ma le maasiasi. Talu ai ona o a tatou agasala, ua le mafai ai ona tatou toe foi atu e mau faatasi ma le Tama Faalelagi sei vagana ua faamagaloina ma faamamaina muamua i tatou.

A o tatou i ai i le olaga faitino, e i ai aafiaga tatou te oo i ai lea e aumaia ai le fiafia ia i tatou. E i ai foi o tatou aafiaga e oo mai ai le tiga ma le faanoanoa ia i tatou, o nisi e

mafua mai i gaioioiga leaga a isi. O nei aafiaga e maua ai e i tatou ia avanoa e aoao ai ma ia tuputupuae ai, ia iloaina le lelei mai le leaga, ma ia faia ia filifiliga. E uunaia i tatou e le Atua ina ia faia le lelei; e faaosoosoina i tatou e Satani ina ia faia le agasala. E pei ona i ai le oti faaletino, e le mafai ona tatou faatoilaloina na o i tatou ia aafiaga o le agasala. E leai ma so tatou fesoasoani pe ana le seanoa le Togiola a Iesu Keriso.

Mau Suesueina

Vaitaimi e Tofotofo pe Faataitai Ai

2 Nifae 2:21

Alema 12:21–24

Aperaamo 3:25–26

2 Nifae 9:27

Alema 34:31–35

Mosaea 3:19

Alema 42:2–10

Filifiliga

2 Nifae 2:26–29

Iosua 24:15

Mo le Malosi o le Autalavou, “Tomai e Filifili Ai ma Lau Matafaioi e te Tali Atu Ai Mo Oe Lava”

Lelei ma le Leaga

Moronae 7:12–19

Agasala

Roma 3:23

1 Ioane 1:8–10

1 Ioane 3:4

E le Mafai e se Mea Elelea ona faatasi ma le Atua

1 Nifae 10:20–21

3 Nifae 27:19

Mose 6:57

Alema 41:10–11

O Le Togiola

A o le'i faavaeina le lalolagi, na filifilia ai e lo tatou Tama Faalelagi ia Iesu Keriso e avea ma o tatou Faaola ma Togiola. O le taulaga togiola a Iesu Keriso ua mafai ai e i tatou ona faatoilaloina ia aafiaga o le Pau. O perofeta uma lava talu le amataga o le lalolagi sa molimau mai e uiga ia Iesu Keriso i le avea ai ma o tatou Togiola.

O le a tatou mafatia uma lava i le oti faaletino, ae na faatoilaloina e Iesu Keriso le puniala o le oti faaletino mo i tatou. Ina ua Ia maliu i luga o le satauro, na tuueseeseina Lona agaga mai Lona tino. O le aso tolu, na toetuufaatasia ai Lona agaga ma Lona tino e faavavau, e le toe tuueseeseina lava. Sa Ia faali atu

i le toatele o tagata, ma faali atu ia i latou faapea e i ai Sona tino e ola pea o aano ma ivi. O le toetuufaatasia o le tino ma le agaga e ta'ua lea o le toetu ma o se meaalofo ua folafolaina mai ia i tatou uma taitoatasi. Talu ai ona o le Toetu o Iesu Keriso, o le a tatou toetutu uma lava e tusa lava pe na lelei pe leaga mea na tatou faia i lenei olaga. O le a tatou maua se tino o aano ma ivi e atoatoa, ma ola pea lea o le a le toe oo i ni ma'i, tiga, po o le oti. O le toetu e mafai ai ona toe foi atu i le afioaga o le Atua ina ia faamasinoina ae le faapea o le a faamautu ai o le a mafai ona tatou mau ai i Lona afioaga. Ina ia mauaina lena faamanuiaga, e tatau foi ona faamamaina i tatou mai le agasala.

Na auina mai e le Atua Lona Alo Pele o Iesu Keriso, ina ia faatoilaloina le puniala o le agasala e faapoopo atu i le puniala o le oti faaletino. E le nafa i tatou ma le Pau o Atamu



Faamatalaga

Faamatalaga

ma Eva, ae nafa i tatou ma a tatou lava agasala. E le mafai e le Atua ona silasila atu i le agasala ma faatagaina ai sina mea itiiti o i ai, ma o le agasala e taofia ai i tatou mai le mau ai i Lona afioaga. E na o le alofa tunoa ma le alofa mutimutivale lava o le Faaola e mafai ona faamamaina ai i tatou mai le agasala ina ia mafai ona tatou toe mau faatasi ma le Atua. E mafaia lenei mea e ala lea i le faatuatua ia Iesu Keriso, salamo, papatiso, mauaina le meaalofo o le Agaga Paia, ma tumau e oo i le iuga.

Ina ia faaunuunuina le ata o le faaolataga, sa totogiina e Keriso le sala mo a tatou agasala. Sa na o Ia lava na mafai ona faia lena mea. Na valaauina ma sauniaina o Ia i le mua'i olaga. O Ia moni lava o le Alo o le Atua i la le tino. Sa leai Sana agasala ma sa matuai usiusitai atoatoa i Lona Tama. E ui na faaosoosoina, ae le'i gaua'i atu o Ia i faaosoosoga. Ina ua fetalai atu le Tama i Lona Alo Pele e totogi le tau o agasala a le lalolagi, sa saunia ma naunau Iesu e fai. O le Togiola e aofia ai Lona puapuagatia i le Faatoaga o Ketesemane ma Lona puapuagatia ma le maluu i luga o le satauro, ma na faamutaina i Lona Toetu. E ui sa puapuagatia o Ia e sili atu nai lo le mea e manatu i ai—lea na puna mai ai le toto mai pu ninii uma o Lona tino ma ole atu pe mafai ona aveese lenei avega mai ia te Ia—ae sa Ia usiusitai i le finagalo o Lona Tama i se faailoga silisili o le alofa mo Lona Tama ma i tatou. O lenei manumalo o Iesu Keriso i le oti faaleagaga e ala i Lona puapuaga ma le manumalo i le oti faaletino e ala i Lona Toetu e ta'ua lea o le Togiola.

Ua folafola mai e Keriso le faamagaloina o a tatou agasala pe afai tatou te taliaina o Ia e ala i le faatuatua ia te Ia, salamo, mauaina le papatisoga e ala i le faatofuina, ma le faaee atu o lima mo le meaalofo o le Agaga Paia, ma tauivi ma le faamaoni e tausia Ana poloaiga e oo i le iuga o o tatou olaga. O le faaauuina pea o le salamo, e mafai ai ona tatou maua le faamagaloga ma ia faamamaina ai mai a tatou agasala e ala i le mana o le Agaga Paia. E tuumamaina lo tatou ta'usalaina ma le maasiasi, ma o Iesu Keriso e maua ai lo tatou agavaa e toe foi atu i le afioaga o le Atua.

A o tatou faalagolago atu i le Togiola a Iesu Keriso, e mafai ona Ia fesoasoani ia i tatou ina ia tatou onosa'ia o tatou faigata, ma'i, ma tiga. E mafai ona faatumulia i tatou i le olioli, filemu, ma le mafanafana. O mea uma e le talafeagai e uiga i le olaga e mafai ona faasa'oina e ala i le Togiola a Iesu Keriso.

Ae peitai, i le totogiina o le tau mo a tatou agasala, e le'i aveeseina ai e Iesu lo tatou lava tiutetauave. E tataua ona tatou faaali atu ua tatou taliaina o Ia ma o le a tatou mulimuli i Ana poloaiga. E na o le meaalofo o le Togiola e mafai ai ona tatou toe foi atu ma mau faatasi ma le Atua.

Mau Suesueina

Toetu

2 Nifae 9:6–7	MFF 88:27–32	FIS, 1 Korinito 15:40
Alema 11:42–45	Luka 24:1–10, 36–39	Guide to the Scriptures, “Death, Physical,”
Alema 40:23	1 Korinito 15:20–23	“Death, Spiritual,” “Resurrection”
Helamana 14:15–19	1 Korinito 15:41–42	

Togiola

2 Nifae 2:6–8	MFF 19:15–19	1 Ioane 1:7
Alema 7:11–13	MFF 45:3–5	Guide to the Scriptures, “Atone, Atonement”
Alema 34:8–10	Ioane 3:16–17	

O Le Talalelei—O Le Auala

2 Nifae 9:1–24	Alema 11:40	3 Nifae 27
2 Nifae 31	3 Nifae 11:31–41	Morona'e 7:27–28

O Le Lalolagi o Agaga

E ui lava sa faatoilaloina e Keriso le oti faaletino, e tatau lava ona oti tagata uma, aua o le oti o se vaega lea o le faagasologa e liua ai i tatou mai le tino faitino i le tino ola pea. A tatou oti e o atu o tatou agaga i le lalolagi o agaga. E le suia e le oti o tatou uiga poo o tatou manaoga mo le lelei po o le leaga. O i latou o e filifili e usiusitai i le Atua i lenei olaga e ola i latou i se tulaga o le fiafia, filemu, ma le malolo mai faafitauli ma popolega. O i latou o e filifili e le usiusitai i lenei olaga ma e le'i salamo, e ola i se tulaga o le le fiafia. E talaiina atu le talalelei i le lalolagi o agaga ia i latou o e le usiusitai i le talalelei pe le'i maua foi le avanoa e faalogo i ai a o i ai i le lalolagi. Tatou te tumau ai pea i le lalolagi o agaga seia oo ina tatou toetutu.

Mau Suesueina

Sa Talaiina Atu le Talalelei i e ua Oti

MFF 138

1 Peteru 3:19–20

1 Peteru 4:6

Oti ma le Lalolagi o Agaga

Alema 34:34

Alema 40:11–14

Failauga 12:7

O Le Toetu, Faamasinoga, ma le Tino Ola Pea

Afai e toe faatasia o tatou tino ma agaga i le toetutu, o le a avatu i tatou i le afioaga o le Atua ina ia faamasinoina ai. O le a tatou manatuaina lelei ai lo tatou amiotonu ma lo tatou ta'usalaina. Afai sa tatou salamo, o le a tatou maua le alofa tunoa. O le a tauia i tatou e tusa ma a tatou galuega ma o tatou manaoga.

O le toetutu o le a avea uma ai tagata ma tagata tino ola pea—o le a latou ola e faavavau. O le tino ola pea o se meaalofo foai fua atu lea i tagata uma, e tusa lava pe sa latou amiotonu pe amioleaga. Ae peitai, o le ola faavavau, e le tutusa ma le tino ola pea. O le ola faavavau o se meaalofo lea a le Atua e tuuina atu mo na o i latou o e usiusitai i Lana talalelei. O le tulaga sili lea ona maualuga e mafai ona tatou ausia. E oo mai ia i latou o e saoloto mai le agasala ma puapuaga e ala i le Togiola a Keriso. O le faaeaina lea, o lona uiga o le mau faatasi e faavavau ma le Atua o ni aiga e faavavau. O le iloaina lea o le Atua ma Iesu Keriso ma iloa le olaga o loo la olioli ai.

Toetu ma le Toefanauina

O nisi tagata e mafai ona fenumiai i le aoaoga faavae o le toetu ma le manatu lea o le toefanauina. O le manatu o le toefanauina e aofia ai le toe fanauina i le lalolagi i se tulaga ese mai ma o se aoaoga faavae sese lea. O le aoaoga faavae o le toetu e aofia ai le mauaina o se tau faavavau o se tino ola pea o aano ma ivi. O le aoaoga faavae moni lea. Ia mautinoa o loo malamalama lelei i latou o loo e aoaoina i le aoaoga faavae o le toetu.

Malo o le Mamalu

I le taimi o o tatou olaga faitino tatou te faia ai filifiliga i le lelei ma le leaga. E tauia e le Atua i tatou e tusa ma a tatou galuega ma manaoga. Talu ai ona e tauia e le Atua tagata uma e tusa ma a latou galuega na faia i le tino, o loo i ai malo eseese o le mamalu lea e mafai ona tofia i ai i tatou pe a mavae le Faamasinoga. O i latou o e na salamo i a latou agasala ma mauaina sauniga o le talalelei ma tausia ia feagaiga o loo i ai o le a faamamaina

Faamatalaga

Faamatalaga

e ala i le Togiola a Keriso. O le a latou maua le faaeaga i le malo sili ona maualuga, lea ua lauiloo o le malo Selesitila. O le a latou mau i le afioaga o le Atua, avefaapei o Ia, ma maua se atoatoaga o le olioli. O le a latou nonofo faatasi ai mo le faavavau faatasi ma o latou aiga o e agavaa. O loo faatusaina lenei malo i totonu o tusitusiga paia i le mamalu po o le pupula o le la.

O tagata o e le taliaina le atoatoaga o le talalelei a Iesu Keriso ae sa ola i ni olaga mamalu o le a mauaina se nofoaga i le malo Terasitila. O lenei malo ua faatusaina lea i le mamalu o le masina.

O i latou o e faaauau pea i a latou agasala ma e le'i salamo i lenei olaga o le a maua lo latou tau i le malo sili ona maualalo, lea ua ta'ua o le malo Telesitila. O lenei malo ua faatusaina lea i le mamalu o fetu.

Mau Suesueina

Toetu ma le Toefuataiga

2 Nifae 9:14–15 Iakopo 6:8–9 Alema 42:13–15, 22–23

Faamasinoga

2 Nifae 28:23 Alema 5:15–21 MFF 132:12; 137:9
Mosaea 3:23–25 Alema 12:12–14 Ioane 5:22

Malo o le Mamalu

3 Nifae 28:10 MFF 137 Mataio 5:48
MFF 76: Introduction FIS, 1 Korinito 15:40
MFF 76 1 Korinito 15:41–42

Ola Faavavau

2 Nifae 31:17–21 MFF 45:8 Ioane 3:16
MFF 14:7 MFF 93:19 Ioane 17:3
MFF 29:43–44

Ata o le Faaolataga



O le Togiola a Iesu Keriso ua mafai ai ona maua le faaolataga.

Valaaulia ina ia Papatiso

O le valaaulia ina ia papatiso ma faamauiina e tatau ona tuusao ma ma'oti: "O le a e mulimuli la i le faataitaiga a Iesu Keriso e ala i le papatisoina e se tasi o loo umia le pule o le perisitua a le Atua? O le a faia le tatou sauniga o le papatisoaga i le [aso]. O le a e saunia la oe lava ia ina ia papatisoina i lena aso?"

Manatu e Aoao Atu Ai

O le vaega lenei o loo i ai manatu mo oe e te faaaogaina e saunia ma aoao atu ai lenei lesona. Ia mulimuli ma le agaga tatalo i le Agaga a o e fuafuaina pe faapefea ona faaoga nei manatu. Ia faaopoopo atu manatu e te filifilia i le ata o lau lesona. Ia teu i lou mafaufau o nei manatu o ni fautuaga—ae le o ni tulaga e manaomia—ina ia fesoasoani ai ia te oe e ausia manaoga o i latou o loo e aoaoina.

Ata o le Lesona e na o se Taimi Puupuu e Faia Ai (3–5 minute)

O le ata o le faaolataga o loo aoaoina ai i tatou po o fea na tatou o mai ai, aisea ua tatou i ai iinei i le lalolagi, ae po o fea tatou te o i ai pe a uma lenei olaga. E taialaina ai la tatou faigamalaga e faavavau e ui atu i le mua'i olaga, olaga faitino, oti, toetu, ma o tatou olaga i le faavavau. O loo faamalamalama mai ai foi i le ata le mea ua faia e lo tatou Tama Faalelagi alofa ina ia fesoasoani ai ia i tatou ina ia faamanuiaina lenei faigamalaga ina ia mafai ona tatou toe foi atu i Lona afioaga ma ave faapei o la. O loo taulai atu foi le ata i le misiona ma le Togiola a lesu Keriso i le faatoilaloina lea o aafiaga o le Pau ma mafua ai ona avanoa le ola faavavau mo i tatou. Ma te valaauliaina oe ina ia e mafaufau loloto ma tatalo e uiga i lenei savali.

- Mua'i Olaga: O le Faamoemoega ma le Fuafuaga a le Atua mo i Tatou
- O Le Fofoaga
- Saolotoga ma le Pau o Atamu ma Eva
- O Lo Tatou Olaga i le Lalolagi
- O Le Togiola
- O Le Lalolagi o Agaga
- O Le Toetu, Faamasinoga, ma le Tino Ola Pea
- Malo o le Mamalu

Tautinoga

- O le a e tatalo la ia e iloa e moni mea sa ma aoao atu?
- O le a e salamo la i au agasala?
- O le a tatou o la i le lotu i le Aso Sa nei?
- O le a e mulimuli la i le faataitaiga a le Faaola ma e papatiso i le (aso)?
- E mafai ona seti se taimi tatou te toe feiloai ai?
- Poloaiga mai le lesona 4 ua e filifilia e aofia ai.

Ata o le Lesona e le Umi se Taimi e Faia Ai (10–15 minute)

O la ma savali e fesoasoani lea ina ia tatou malamalama i le faamoemoega o le olaga ae po o ai foi i tatou. E maua ai e i tatou le faamoemoe ma fesoasoani ina ia tatou maua ai le filemu, olioli, ma le fiafia. E ta'u mai ai ia i tatou po o fea na tatou o mai ai, aisea ua tatou i ai iinei i le lalolagi, ae po o fea foi o le a tatou o atu i ai pe a mavae lenei olaga. O le Atua o lo tatou Tama, ma e alofa o la ia i tatou. O i tatou o Ana fanau. O i tatou o se vaega o Lona aiga, ma sa tatou ola faatasi muamua ma la ae tatou

Faamatalaga

Faamatalaga

te le'i fananau mai i lenei lalolagi. O loo i ai sana fuafuaga o le fiafia lea e mafai ai e i tatou ona toe foi atu i Lona afioaga pe a mavae lenei olaga. O lo tatou alualu i luma e faalagolago lea i le auala tatou te faaaogaina ai lo tatou saolotoga na tuuina mai e le Atua, po o le mafaia lea ona filifili. O se vaega o lena fuafuaga, na mafai ai e le Pau o Atamu ona tatou o mai i lenei lalolagi, maua se tino faaletino, maua le malamalama, ma maua ni o tatou lava aiga. Ae o le Pau foi na oo mai ai le oti faaletino, o le tuueseeseina lea o le agaga mai le tino, faapea ma le oti faaleagaga, o le tuueseeseina lea mai le Atua.

O Iesu Keriso o le autu lea o le fuafuaga a le Atua. O le taulaga togiola a Keriso na faatoilaloina ai aafiaga o le oti faaletino ma le oti faaleagaga. O le a tatou toetutu uma lava ma o le a ola ai e faavavau faatasi ai ma ni tino faaletino ua saoloto mai tiga ma ma'i. O Keriso foi na mafai ai ona faatoilaloina le oti faaleagaga. A o tatou ola ai i Lana talalelei o le a ia faamagaloina ma le alofa a tatou agasala. O le a la faamaloloina i tatou ma suia le ta'usalaina ma le maasiasi i le filemu ma le fiafia i lenei olaga.

O se vaega o le fuafuaga alofa a le Atua, o le a tatou mafatia uma ai lava i le oti faaletino. O le a tuueseeseina o tatou agaga mai o tatou tino ma o le a ola ai mo sina vaitaimi i le lalolagi o agaga. Ona tatou toetutu lea ma se tino ola pea, o se tuufaatasiga lea e faavavau o o tatou tino ma agaga. O le a faamasinoina i tatou e tusa ai ma a tatou galuega ma manaoga. O i latou o e na ola i le talalelei o le a mauaina le meaalofo silisili a lo tatou Tama Faalelagi, o le meaalofo lea o le ola e faavavau i Lona afioaga.

Ua toe aapa mai lo tatou Tama Faalelagi i Ana fanau i le alofa ina ia faaali mai i ai Lana fuafuaga o le fiafia. Tatou te aoao e uiga i lenei fuafuaga matagofie i totonu o le Tusi a Mamona, lea e mafai ona e faitauina, mafaufau loloto i ai, ma tatalo e uiga i ai. Ma te valaaulia oe ina ia e auai atu i le lotu ma tatou tapuai faatasi ai.

Tautinoga:

- O le a e tatalo la ia e iloa e moni mea sa ma aoao atu?
- O le a e salamo la i au agasala?
- O le a tatou o la i le lotu i le Aso Sa nei?
- O le a e mulimuli la i le faataitaiga a le Faola ma e papatiso i le (aso)?
- E mafai ona seti se taimi tatou te toe feiloai ai?
- Poloaiga mai le lesona 4 ua e filifilia e aofia ai.

Ata Atoa o le Lesona (30–45 minute)

- Mua'i Olaga: O le Faamoemoega ma le Fuafuaga a le Atua mo i Tatou
 - O le Atua o lo tatou Tama Faalelagi, ma o i tatou o Ana fanau (tagai i le Galuega 17:16–34; Eperu 12:9).
 - E i ai se fuafuaga a le Atua mo lo tatou fiafia. O Iesu Keriso o le autu lea o lena fuafuaga.

Faamatalaga

- O le fuafuaga o le fiafia a le Atua ua mafai ai ona toe foi atu i Lona afioaga (tagai i le Mose 1:39).
- O lo tatou alualu i luma e faavavau e faalagolago lea pe faapefea ona tatou faaoga lo tatou saolotoga (tagai i le 2 Nifae 2:27–29).
- O Le Fofoaga
 - Na fofoaina e Iesu Keriso le lalolagi i lalo o le taitaiga a le Tama (tagai i le Eperu 1:1–3).
- Saolotoga ma le Pau o Atamu ma Eva
 - Na faia Atamu ma Eva i le faatusa o le Atua (tagai i le Kenese 1:26–27).
 - Sa mama i la'ua i le Faatoaga o Etena ma sa ola i le afioaga o le Atua.
 - Talu ai ona sa la aai i le fua o le laau sa faasaina, o lea na tulieseai ai i la'ua mai le faatoaga (tagai i le Mose 4:19–31). E ta'ua lea o le Pau.
 - Sa avea i la'ua ma tagata faaletino, sa mafai ona maua ni a la fanau, ma sa oo foi i la'ua i le agasala ma le oti (tagai i le 2 Nifae 2:22–25; Mose 5:11).
- O Lo Tatou Olaga i le Lalolagi
 - O lo tatou faamoemoega i le olaga o le sailia lea o le filemu tumau, olioli, ma le fiafia o ni aiga ma ia saunia e toe foi atu e ola faatasi ma le Atua.
 - Na tatou o mai i le lalolagi ina ia faataitai ai (tagai i le Aperamo 3:24–25).
 - Ua tatou maua se tino o aano ma ivi, ae tatou te oo lava i le oti faaletino.
 - E tuuina mai e le Atua ia poloaiga. Afai tatou te usiusitai, e faamanuiaina i tatou. Afai tatou te le usiusitai, tatou te agasala ma mauaina ia taunuuga.
 - O agasala uma e tatau ona totogiina, a le totogiina e i tatou o le a totogi e Keriso (tagai i le MFF 19:15–20).
 - Tatou te faia ia filifiliga, ma e tatou te agasala uma lava (tagai i le Roma 3:23).
 - E i ai mea tatou te oo i ai ia e aumaia ai ia i tatou le fiafia faapea foi le faanoanoa.
 - E le mafai ona tatou faatoilaloina le oti faaletino po o le oti faaleagaga e aunoa ma Keriso.
- O Le Togiola
 - Talu ai ona ua faatoilaloina e Iesu Keriso le oti faaletino, o lea o le a tatou toetutu uma ai lava (tagai i le Alema 11:41–43).
 - O le Togiola a Keriso e mafai ai ona faamamaina i tatou mai agasala ina ia mafai ona tatou toe foi atu ai i le afioaga o le Atua (tagai i le 2 Nifae 9:8–9).

Faamatalaga

- O le a faamagaloina e Keriso a tatou agasala pe a tatou faatuatua ia te la, salamo, talia le papatisoga ma le meaalofa o le Agaga Paia, ma tumau e oo i le iuga.
- O Le Lalolagi o Agaga
 - E tatau ona oti tagata uma.
 - E o atu o tatou agaga i le lalolagi o agaga pe a oti.
 - Tatou te ola a le o se tulaga o le faanoanoa ia po o se tulaga o le filemu ma le malologa, e faalagolago i le auala sa tatou ola ai i lenei olaga.
- O Le Toetu, Faamasinoga, ma le Tino Ola Pea
 - O le a toe tuufaatasia o tatou agaga ma tino i le toetutu (tagai i le Alema 11:42–45; 40:23).
 - O le a tatou toe foi atu i le afioaga o le Atua ina ia faamasinoina ai e tusa ma a tatou galuega ma manaoga.
 - Afai sa tatou salamo, o le a tatou maua le alofa tunoa.
 - O le ola e faavavau o se meaalofa a le Atua ua tuuina mai ia i latou o e usiusitai atoatoa i le talalelei a Iesu Keriso (tagai i le MFF 14:7).
- Malo o le Mamalu (tagai i le MFF 76; 137; 1 Korinito 15:40–42).
 - Tatou te maua tau e tusa ai ma a tatou galuega ma manaoga (tagai i le MFF 137:9).
 - O i latou o e na taliaina le talalelei ma ola ai ma le lototoa i o latou olaga atoa o le a mauaina le malo selesitila (tagai i le MFF 76:50–70).
 - O tagata amiotonu o e na “faatauasoina i faiga faa’ole’ole a tagata” ma i latou o e “na le loto totoa i le molimau ia Iesu [Keriso]” e mauaina le malo terasitila (tagai i le MFF 76:76, 79).
 - O i latou o e na agasala ae le’i salamo o le a mauaina le mamalu telesitila pe a mavae ona latou puapuagatia ma totogi a latou agasala.

Tautinoga

- O le a e tatalo la ia e iloa e moni mea sa ma aoao atu?
- O le a e salamo la i au agasala?
- O le a tatou o la i le lotu i le Aso Sa nei?
- O le a e mulimuli la i le faataitaiga a le Faola ma e papatiso i le (aso)?
- E mafai ona seti se taimi tatou te toe feiloai ai?
- Poloai mai le lesona 4 ua e filifilia e aofia ai.

O Fesili e Fai pe a Uma le Lesona

- E i ai ni au fesili e uiga i mea sa ma aoao atu?
- O le a sou malamalama i ai e uiga i le fuafuaga a le Atua mo oe ma lou aiga?
- Mai mea na ma aoaoina atu ia te oe, o le a sou malamalama ua i ai e uiga i le matafaioi a Iesu Keriso? O le a se uiga o lena mea ia te oe?

Faamatalaga

Faaugaga Autu

O nisi nei o upu e masani ona le malamalama i ai. Ia mautinoa ua e faamaninoina atu ia i latou ma saili pe ua malamalama i latou o loo e aoaoina.

- **Olaga faaletino:** O le taimi mai le fanau mai seia oo i le oti faaletino.
- **Oti faaleagaga:** O le tuueseeseina lea mai le Atua ma Ana uunaiga; o le oti lea mai mea o le amiotonu. Na oo mai le oti faaletino i le lalolagi ona o le pau o Atamu (tagai i le Alema 42:6–7). O tagata e i ai mafaufauga leaga, upu, ma galuega leaga e oti faaleagaga i latou e ui lava o loo feola pea i le lalolagi (tagai i le 2 Nifae 9:39). E mafai e alii ma tamaitai, e ala i le Togiola a Iesu Keriso ma le usiusitai i mataupu ma sauniga o le talalelei, ona faamamaina mai le agasala ma faatoilaloina le oti faaleagaga.
- **Oti faaletino:** O le tuueseeseina o o tatou agaga, lea e ola e faavavau ma e le mafai ona oti, mai o tatou tino faaletino.
- **Faaeaga:** O le ola faavavau i le afioaga o le Atua; ia avea faapei o lo tatou Tama o i le Lagi ma ola i Lona afioaga. O le meaalofo sili lea o meaalofo uma a le Atua. O le faaeaga e oo mai e ala i le Togiola a Keriso faapea ma le usiusitai i tulafono ma sauniga o le talalelei.
- **Faaolataga:** Ina ia faaolaina mai le oti faaletino ma le faaleagaga. O tagata uma lava o le a faasaoina mai le oti faaletino e ala i le alofa tunoa o le Atua, e ala i le maliu ma le Toetu o Iesu Keriso. E mafai foi ona faasaoina tagata uma taitoatasi mai le oti faaleagaga i le alofa tunoa foi o le Atua, e ala lea i le faatuatua ia Iesu Keriso. O lenei faatuatua e faaalua lea i se olaga usiusitai i tulafono ma sauniga o le talalelei ma le auauna atu ia Keriso.
- **Faamasinoga:** O le a faamasinoina i tatou taitoatasi e le Atua, e ala ia Iesu Keriso e fuafua ai ia mamalu e faavavau o le a tatou mauaina. O lenei faamasinoga o le a fuafua lea i lo tatou usiusitai i poloaiga a le Atua, e aofia ai lo tatou taliaina o le taulaga togiola a Iesu Keriso. O le a tatou maua o tatou tau e faavavau e fuafua lea pe na lelei pe na leaga a tatou galuega ma o tatou manaoga.
- **Mua'i olaga (uluai olaga; olaga e muamua atu i le olaga faalelalolagi):** I le avea ai ma fanau agaga a lo tatou Tama o i le Lagi, sa tatou ola ai i Lona afioaga ae tatou te le'i fananau mai i le lalolagi. Sa leai ni o tatou tino faaletino i le mua'i olaga.
- **Pau (o Atamu ma Eva):** Ina ua 'ai e Atamu ma Eva le fua o le laau na faasaina, sa avea i laua ma ni tagata faaletino—o lona uiga, ua oo i ai le agasala ma le oti. Na avea Atamu ma "uluai tagata" i le fogaeleele (Mose 3:7). O faaaliga o aso e gata ai o loo matuai manino mai ai o le Pau o se faamanuiaga ma e tatau ona faamamaluina ia Atamu ma Eva i le avea ai ma uluai matua o tagata ola uma.
- **Tino ola pea:** O le tulaga o le ola pea lava i se tulaga toetu, e le oo i ai le oti faaletino.
- **Toetu:** O le toe tuufaatasia lea o le tino agaga ma le tino faaletino o aano ma ivi pe a mavae le oti. A mavae le toetu, o le a le toe tuueseeseina lava le agaga ma le tino, ma o le a ola pea lava le tagata. O tagata uma lava e fananau mai i le lalolagi o le a toetutu aua na faatoilaloina e Iesu Keriso le oti.
- **Togiola:** E pei ona faaaogaina ai i tusitusiga paia, o le togiola o le puapuagatia lea i le tau mo se agasala, ina ia aveesea ai aafiaga o le agasala mai tagata agasala e salamo ma faatagaina ai i latou ina ia toe lelei ma le Atua. Na puapuagatia Iesu Keriso i Ketesemane ma luga o le satauro. Sa na o la lava sa mafai ona faia se Togiola atoatoa mo tagata ola uma. Na puapuagatia o la ona o le tau o a tatou agasala i Ketesemane ma maliu i luga o le satauro. Na la tauave i Ona luga ia tiga, o ma'i, faaosoosoga, mafatiaga, ma ni le atoatoa o i tatou uma (tagai i le Alema 7:11–12).

Faamatalaga

- **Togiola:** Ina ia aveeseina mai, ia faatauina, po o le togiina o le tau mai le nofo pologa. O le togiola e faatatau lea i le Togiola a Iesu Keriso ma le aveeseina mai le agasala. O le Togiola a Iesu na togiolaina ai tagata uma mai le oti faaletino. O Lana Togiola, o le a togiolaina ai i latou o e faatuatua ia te la ma salamo mai le oti faaleagaga.

O Isi Faaupuga E Ono Moomia ai Se isi Faaugaga mo i Latou e te Aoaina

- | | | |
|----------------------------|---------------------------------------|------------------------------------|
| • Agasala | • Faamamaina [mai le agasala] | • Lalolagi o agaga |
| • Alualu i luma e faavavau | • Faataitai | • Malo o le mamalu |
| • Ata o le faaolataga | • Faatoaga o Etena | • Papatisoga e ala i le faatofuina |
| • Ola faavavau | • Faatuatua | • Salamo |
| • Oti faaletino | • Fofoaga | • Selesitila |
| • Faafeagai | • Fua o le laau ua faasaina | • Telesitila |
| • Faamagaloina [o agasala] | • Laau e iloa ai le lelei ma le leaga | • Terasitila |

O Le Talalelei a Iesu Keriso



Faamatalaga

O Lou Faamoemoega

A o e aoao atu, ia saunua au tagata sailiili ina ia ausia tulaga agavaa mo le papatisoga o loo aoaoina mai i le Mataupu Faavae ma Feagaiga e 20:37 faapea ma fesili o le faatalanoaga mo le papatisoga. E sili atu ona faataunuuna le vaega lena e ala i lou valaauliaina o au tagata sailiili ina ia faia ma tausia ia tautinoga o loo lisiina atu i lalo.

Fesili o le Faatalanoaga mo le Papatisoga

- Pe e te talitonu o le Atua o lo tatou Tama e Faavavau?
- Pe e te talitonu o Iesu Keriso o le Alo o le Atua, o le Faaola ma le Togiola o le lalolagi?
- Pe e te talitonu o le Ekalesia ma le talalelei a Iesu Keriso ua toefuatai mai e ala i le Perofeta o Iosefa Samita?

Tautinoga

- O le a faaauau pea la ona atinae lou faatuatua ia Iesu Keriso e ala i lou aoao pea e uiga i Lana talalelei?
- O le a e salamo la ma tatalo mo le faamagaloina o agasala?
- O le a papatiso la oe ia avea ai ma se tasi O le Ekalesia a Iesu Keriso o le Au Paia o Aso e Gata Ai i le (aso)? O le a faamauina la oe ma talia le meaalofo o le Agaga Paia?
- O le a tatou o la i le lotu i le Aso Sa nei?
- E mafai ona seti se taimi tatou te toe feiloai ai?
- Poloaga mai le lesona 4 ua e filifilia e aofia ai.

E Mafai Ona Faamamaina i Tatou mai Agasala e Ala ia Keriso

Na auina mai e le Atua Lona Alo Pele o Iesu Keriso i le lalolagi ina ia maua e fanau uma a le Atua le avanoa e toe foi atu ai e mau i Lona afioaga pe a mavae lo latou oti. E na o le alofa tunoa ma le alofa mutimutivale lava o le Faaola e mafai ona faamamaina ai i tatou mai le agasala ina ia mafai ona tatou mau ai i le afioaga o lo tatou Tama Faalelagi. O le faamamaina mai le agasala o le faamaloloina lea faaleagaga (tagai i le 3 Nifae 9:13; 18:32).

Faamatalaga

Talu ai ona o le Togiola ma le Toetu o Keriso, o le a toe aumai uma ai tagata i le afioaga o le Alii ina ia faamasinoina e tusa ma a latou galuega ma o latou manaoga (tagai i le 2 Nifae 9:10–16; Helamana 14:15–18; 3 Nifae 27:14–22; MFF 137:9). O le a faamasinoina i tatou e tusa ai ma tulafono o le faamasinoga tonu ma le alofa tunoa.

O le faamasinoga tonu o le tulafono e le fesuiaia lea e oo mai ai taunuuga o mea na tatou faia—o faamanuiaga mo le usiusitai i poloaiga a le Atua ma faasalaga mo le le usiusitai. Tatou te agasala uma lava. O le agasala e faaeleeleaina ai i tatou, ma e leai se mea eleelea e mafai ona nofo i le afioaga o le Atua (tagai i le 1 Nifae 10:21; 3 Nifae 27:19; Mose 6:57).

Na faamalieina e le Faaola ia poloaiga a le faamasinoga tonu mo i latou o e salamo i a latou agasala ma taumafai e tausia uma Ana poloaiga ina ua Ia tulai e sui i tatou ma puapuagatia mo le tau o a tatou agasala. O lea faiga ua ta’ua o le Togiola. Talu ai ona o lena faiga le manatu faapito, o lea e mafai ai e Keriso ona ole atu i le Tama mo i tatou. E mafai e le Tama Faalelagi ona faaoga le alofa mutimutivale e aveese ai le faasalaga mai ia i tatou, ma faafeiloai atu i tatou i Lona afioaga. E faaali mai e lo tatou Tama Faalelagi le alofa mutimutivale pe a Ia faamagaloina i tatou mai a tatou agasala ma fesoasoani ia i tatou ina ia toe foi atu e mau i Lona afioaga.

Ae peitai, e le’i aveeseina e Iesu lo tatou lava tiutetauave. Na te faamagaloina a tatou agasala pe a tatou taliaina o Ia, salamo, ma usiusitai i Ana poloaiga. O le Togiola ma le ola ai i le talalelei tatou te agavaa ai e ulufale atu ma mau ai i le afioaga o lo tatou Tama Faalelagi. E tatau ona tatou faaali atu ua tatou taliaina Keriso ma o loo i ai lo tatou faatuatua ia te Ia e ala i le tausia o Ana poloaiga ma usiusitai i uluai mataupu faavae ma sauniga o le talalelei.

Agasala

E eseese lava manatu i le uiga o le “agasala” i aganuu eseese. O nisi aganuu e tali tutusa lava ma le manatu faapea o le solia o le tulafono. O isi e faatatau lea i le na o le mauaina o se tasi o faia se mea sese ma ua aumaia ai le maasiasi i se aiga po o le nuu. O le faamaninoina e faapea, o le agasala o le le usiusitai lea i poloaiga a le Atua ma taunuu atu ai i le tuueseeseina mai le Atua. E silafia e le Atua mea uma tatou te faia ma mafaufau i ai, ma e tatou te faatiga ia te Ia pe a tatou agasala. ‘Aua ne’i talanoaina au solitulafono ua mavae. Ia ‘aua ne’i uunaia pe ‘aua fo’i ne’i fai atu i tagata sailiili e talanoaina a latou solitulafono.

Mau Suesueina

Na Auina Mai e le Atua Lona Alo

Alema 11:40 Ioane 3:16–17

Faaoataga e ala mai ia Keriso

2 Nifae 2:6–8 2 Nifae 9:21–24
Alema 34:8–9, 14–16

O Keriso o lo Tatou Fautua

MFF 45:3–5

Alofa Mutimutivale ma le Faamasinoga Tonu

Mosaea 15:9 Alema 42:22–25

Faatuatua ia Iesu Keriso

O le uluai mataupu faavae o le talalelei o le faatuatua lea i le Alii o Iesu Keriso. O le maua o le faatuatua ia Keriso e aofia ai se talitonuga maumaututu faapea o Ia lava le Alo Pele e Toatasi o le Atua ma o le Faaola ma le Togiola o le lalolagi. Ua tatou iloaina e mafai ona tatou toe foi atu e ola faatasi ma lo tatou Tama Faalelagi i le na o le faalagolago lea i le alofa tunoa ma le alofa mutimutivale o Lona Alo. Afai tatou te faatuatua ia Keriso, ua tatou taliaina ma faaogaina Lana Togiola ma Ana aoaoga. Tatou te faatuatua ina o Ia ma

mea e fetalai i ai o Ia. Ua tatou iloa o loo ia te ia le mana e tausia ai Ana folafolaga. E faamanuiaina e le Tama Faalelagi i latou o e i ai le faatuatua e usiusitai ai i Lona Alo.

O le faatuatua ia Keriso e tau atu ai i galuega. E tau atu ai i le salamo faamaoni ma tumau. O le i ai o le faatuatua e uunaia ai i tatou ina ia taumafai malosi i le mea tatou te mafaia ina ia aoao e uiga i le Faaola ma avea atili e faapei o Ia. Tatou te mananao ia aoao po o a Ana poloaiga ona usiusitai lea i ai. E ui lava o le a tatou faia lava ni sese, ae tatou te faaali atu lava lo tatou alolofa ia te Ia e ala lea i le taumafai pea e tausia Ana poloaiga ma aloese mai le agasala.

Tatou te talitonu ia Keriso, ma e tatou te talitonu e finagalo o Ia ina ia tatou tausia uma Ana poloaiga. Tatou te mananao e faaali atu lo tatou faatuatua e ala i le usiusitai ia te Ia. Tatou te tatalo i le faatuatua mo le malosi e faatoilaloina ai faasoosoga. E mafai foi ona tatou atinaeina le faatuatua i se mataupu faavae patino, e pei o le Upu o le Poto po o le sefuluai, e ala lea i le matuai lava ma malosi le talitonu muamua lea ia Iesu Keriso ina ia usitaia Ana poloaiga. A o tatou ola ai i se poloaiga patino, tatou te aoaoina ai le moni e ala i le ola ai (tagai i le Ioane 7:17). E tuputupu ae foi lo tatou faatuatua e ala i le faalogo i afioga a le Atua (tagai i le Roma 10:17) ma le faitau i le afioga a le Atua (tagai i le Helamana 15:7–8).

A tatou usiusitai i le Atua, Na te faamanuiaina i tatou. Na te tuuina mai le mana ia i tatou e faafetaia'ia ai luitau o le olaga. E fesoasoani o Ia ia i tatou ina ia suia manaoga o o tatou loto. O lo tatou faatuatua ia Iesu Keriso, e mafai ai ona Ia faamaloloina i tatou, i le faaletino faapea foi ma le faaleagaga.



Faamatalaga

Mau Suesueina

Faatuatua, Mana, ma le Faolataga

1 Nifae 7:12 Moronae 7:33—
34 Moronae 10:7
2 Nifae 9:23 2 Nifae 25:23

O Le Mataupu o le Faatuatua

Alema 32 Efeso 2:8
Bible Dictionary, "Faith"

Faaitaiga o le Faatuatua

Eteru 12 Eperu 11

Galuega ma le Usiusitai

1 Nifae 3:7 MFF 130:20–21
Iakopo 2:17–26

Faatuatua e oo i le Salamo

Alema 34

Salamo

O le mataupu faavae lona lua o le talalelei o le salamo. O lo tatou faatuatua ia Keriso ma lo tatou alofa ia te Ia e taitai atu ai i tatou i le salamo, po o le suia lea o o tatou manatu, talitonuga, ma amioga ia e le ogatasi ma Lona finagalo. O le salamo e aofia ai le faatupuina o se vaaiga fou i le Atua, o o tatou lava tagata, faapea ma le lalolagi. Afai tatou te salamo, tatou te lagonaina le faanoanoa faaleatua, ona tatou tuu ai lea o mea e sese ae faaaauu pea mea e tonu ma sa'o. O le aumaia o o tatou olaga ina ia ogatasi ma le finagalo o le Atua e ala i le salamo o le faamoemoega autu lena o o tatou olaga. E na o le alofa tunoa lava o Keriso e mafai ona tatou toe foi atu ai e ola faatasi ma le Atua le Tama, ma e na o le salamo lava e mafai ai ona tatou maua le alofa tunoa o Keriso.

Faamatalaga

Ina ia salamo, tatou te iloina a tatou agasala ma lagona ai le faanoanoa, po o le faanoanoa faaleatua. Tatou te ta'uta'u atu a tatou agasala i le Atua. Tatou te ta'uta'u atu foi agasala sili ona matuia i taitai o le Ekalesia ua faatagaina e le Atua, o e e mafai ona fesoasoani ia i tatou ia salamo. E mafai ona tatou ole atu i le Atua i le tatalo ina ia faamagalō i tatou. Tatou te faia mea uma tatou te mafaia ina ia faasa'o ai ia faafitauli e ono tulai mai; e ta'ua lea o le toe totogi atu. A o tatou salamo, o le a suia le tatou vaai ia i tatou lava faapea ma le tatou vaai atu i le lalolagi. A o suia i tatou, o le a tatou iloa ai o i tatou o fanau a le Atua ma e le moomia ona tatou faaauau pea ona faia ia le mea sese lava e tasi. Afai tatou te salamo faamaoni, tatou te liliuese mai a tatou agasala ma 'aua lava ne'i toe faia. Tatou te teenaina soo se manao e solia le agasala. O le a faamalōsia ma faateleina lo tatou manao e mulimuli i le Atua.

O le salamo faamaoni e aumaia ai nisi o taunuuga. Tatou te lagonaina le faamagalōga a le Atua ma Lona filemu i o tatou olaga. E tafieseā lo tatou tausālaina ma le faanoanoa. Tatou te lagonaina le matuai faateleina o le Agaga. Ma afai tatou te te'a ese atu ma lenei olaga, o le a tatou matuai saunia lava e ola faatasi ma lo tatou Tama Faalelagi ma Lona Alo.

E tusa lava pe ua uma ona tatou taliaina Keriso ma salamo mai a tatou agasala, o le a tatou pauu ma toe agasala. E tatau ona tatou faaauau pea ona taumafai e faasa'o nei solitulafono. E le gata i lea, e tatau ona faaauau pea ona tatou faaleleia—ia atiina ae uiga faaKeriso, ia alualu i luma i le malamalama, ma ia saga lelei atili lo tatou auaua atu. A o tatou aoao atili e uiga i mea o loo faamoemoeina mai e le Faaola mai ia i tatou, o le a tatou mananao ai e faaali atu lo tatou alolofa e ala i le usiusitai ia te Ia. O lea, a o tatou salamo ai i aso taitasi, o le a tatou iloina ai o le a suia ma faaleleia o tatou olaga. O o tatou loto ma amioga o le a avea atili e faapei o Keriso. O le a tatou lagonaina le olioli sili i le salamo i aso taitasi.

Mau Suesueina

Tatou te Agasala Uma Lava

Roma 3:23 1 Ioane 1:7–8

Salamo

Alema 34:8–17 2 Korinito 7:9–10
MFF 58:42–43 Guide to the Scriptures,
MFF 61:2 “Repent, Repentance”

Togiolaina ma le Faamagaloina

Helamana 5:10–11

O Le Alofa Tunoa ua Mau ai le Tagata Salamo

Alema 12:32–35 Alema 42:13, 21–24
MFF 18:10–13

O Le Papatīsoga, O La Tatou Uluai Feagaiga

O le faatuatua ia Iesu Keriso ma le salamo e saunia ai i tatou mo sauniga o le papatisoga ma le faamauga. O se sauniga o se faatinoga po o se aganuu paia lea e faalia ai ua tatou ulufale atu i se feagaiga ma le Atua.

E moomia lava e le Atua Lana fanau ina ia osia ia feagaiga. O se feagaiga o se noataga ma se maliliega paia lea i le va o le Atua ma le tagata. Ua folafola mai le Atua e faamanuia i tatou, ma ua tatou folafola atu e usiusitai ia te Ia. Ua faatuina e le Atua ia aiaiga o feagaiga o le talalelei, lea tatou te taliaina pe teenaina. O le tausia o feagaiga e aumaia ai faamanuiaga i lenei olaga faapea ma le faaeaga i le olaga a sau.

O feagaiga e tuu atu ai i tatou i lalo o se tiute ina ia faamamaluina a tatou tautinoga i le Atua. Ina ia tausia a tatou feagaiga, e tatau ona tatou tuuese ia gaoioiga po o mea e fiafia i ai ia e taofia ai i tatou mai le faamamaluina o na feagaiga. Mo se faataitaiga, tatou te tuuese ia faatauga ma mea faafiafia i le Aso Sa ina ia mafai ona tatou tausia le aso Sapati ia paia. E tatau ona tatou naunau e taliaina ma le agavaa ia feagaiga ua ofoina mai e le Atua ia i tatou ona tauivi lea e tausii. O a tatou feagaiga e faamanatu mai ai ia i tatou ina ia salamo i aso uma o o tatou olaga. O le tausii o feagaiga ma le auuuna atu i isi tatou te maua ai le faamagaloina ma faatumau ai pea le faamagaloina o a tatou agasala.

O feagaiga e masani lava ona faia e ala i sauniga paia e pei o le papatisoga. O nei sauniga e faia i le pule a le perisitua. Mo se faataitaiga, o le sauniga o le papatisoga, tatou te osi feagaiga ai e ave i o tatou luga le suafa o Iesu Keriso, ia manatua pea o Ia, ma tausii Ana poloaiga. A o tatou tausii la tatou vaega o le feagaiga, ua folafola mai e le Atua le mafutaga faifaipea a le Agaga Paia, o se faamagaloina o a tatou agasala, ma le toe fanaufouina.

O sauniga paia, e pei o le papatisoga ma le faamauga, tatou te aoao ai ma malamalama ai e uiga i le mana o le Atua (tagai i le MFF 84:20). Na aoao mai Iesu e faapea e tatau ona papatisoina i tatou e ala i le faatofuina mo le aveeseina, po o le faamagaloina o a tatou agasala. O le papatisoga o se sauniga taua o le faaolataga. E leai se tagata e mafai ona ulufale atu i le malo o le Atua e aunoa ma le papatisoina. Na faatuina e Keriso le faataitaiga mo i tatou e ala lea i le papatisoina.

O le papatisoga e ala i le faatofuina o se faatusa lea o le oti, falelauasiga, ma le toetu o le Faaola. O se auala foi faapena, e faatusa i ai le faamutaina o lo tatou olaga tuai ma se tautinoga e ola i se olaga fou i le avea ai ma se soo o Keriso. Na aoao mai le Faaola e faapea o le papatisoga o se toe fanaufouina. Afai tatou te papatiso ua tatou amataina se faagasologa o le toe fanaufouina ma avea ma ni atalii ma ni afafine faaleagaga o Keriso (tagai i le Mosaea 5:7–8; Roma 8:14–17).

E tatau ona papatisoina i tatou ina ia avea ai ma tagata o le Ekalesia toefuataiina, O Le Ekalesia a Iesu Keriso o le Au Paia o Aso e Gata Ai, seia oo atu ai lava ina ulufale atu i le malo o le lagi. O lenei sauniga o se tulafono a le Atua ma e tatau ona faia e ala i Lana pule. E tatau i se epikopo po o le peresitene o le misiona ona tuuina atu i se tasi ua umia le perisitua le faatagaga e faia ai se papatisoga po o se faamauga.

E le manaomia ona papatisoina ia tamaiti laiti ma ua togiolaina i latou e ala i le alofa tunoa o Iesu Keriso (tagai i le Moronae 8:4–24). E le papatisoina i latou seiloga e oo i tausaga e tali atu ai i latou mo mea na latou faia, o le valu lea o tausaga (tagai i le MFF 68:27).

A o le'i faia le papatisoga tatou te faaali atu lo tatou naunautai e ulu atu i se feagaiga ina ia tausii uma poloaiga i o tatou olaga atoa. A maea le papatisoga tatou te faaali atu lo tatou faatuatua e ala i le tausii o a tatou feagaiga. Tatou te faafouina foi e le aunoa ia feagaiga na tatou osia ina ua papatiso e ala i le taumamafa i le faamanatuga. O le taumafa i le faamanatuga i vaiaso taitasi o se poloaiga. E fesoasoani ia i tatou ina ia agavaa pea i taimi uma mo le mafutaga a le Agaga. O se faamanatu i vaiaso taitasi i a tatou feagaiga. O Iesu Keriso na faailoa atu lenei sauniga i Ana Aposetolo a o lumanai Lana Togiola. Na Ia toefuataiina mai e ala mai i le Perofeta o Iosefa Samita. Na poloai mai le Faaola e



Faamatalaga

Faamatalaga

faapea e tatau i e umia le perisitua ona faia le faamanatuga e faamanatu ai Lona tino ma Lona toto, lea sa faamaligiina mo i tatou. O le taumafa ma le agavaa i le faamanatuga tatou te folafola atu ai pea lava ina ia manatua Lana taulaga, tatou te faafouina a tatou folafologa, ma tatou te maua ai se isi folafologa o le a faatasi pea le Agaga ma i tatou.

A o Le'i Faia le Papisoga

“E tatau ona mautinoa ua atiina ae e [tagata sailiili] le faatuatua ia Keriso, salamo mai solitulafono, ma ua lava ni suiga ua faia i o latou olaga ina ia agavaa ai e pei ona poloaiina ai i le Mataupu Faavae ma Feagaiga e 20:37. E tatau i tagata sailiili ona ola i mataupu faavae o amioga mama, o le Upu o le Poto, ma tautino e totogi le sefuluai. Afai e lagona e faifeautalai e moomia nisi tapenaga faaopoopo, e tatau ona latou tolopoina le papisoga seiloga e ausia e le tagata sailiili le tulaga faatonuina.

Ao le'i faia le papisoga, e tatau i tagata sailiili taitoatasi ona mauaina uma [lesona] a faifeautalai, ia feiloai atu i le epikopo po o le peresitene o le paranesi, ma auai i ni sauniga faamanatuga“ (“Faamatalaga i le Galuega Faafaifeautalai,” tusi a le Au Peresitene Sili, 11 Tes. 2002).

Mau Suesueina

Faataitaiga a Keriso

2 Nifae 31:4–18 Mataio 3:13–17

O Le Feagaiga o le Papisoga

Mosaea 5:8–10 MFF 20:37
Mosaea 18:8–10

Tulaga Agavaa mo le Papisoga

2 Nifae 9:23 Moronae 6:1–4
Mosaea 18:8–10 MFF 20:37
Alema 7:14–15 Galuega 2:37–39
3 Nifae 11:23–27

Na Faavaeina e le Alii le Faamanatuga

3 Nifae 18:1–18 Luka 22:15–20

Faamanuiaga Folafolaina o le Papisoga

Mosaea 4:11–12, 26 Ioane 3:5
Moronae 8:25–26 Roma 6:4

O Tatalo o le Faamanatuga

Moronae 4 ma le 5 MFF 20:75–79

Taumafa i le Faamanatuga

MFF 27:2 1 Korinito 11:23–29

Faatulagaga Moomia mo le Pule

MFF 22 Eperu 5:4

O Le Meaalofa o le Agaga Paia

Na aoao mai Iesu e tatau ona papisoina i tatou i le vai ma le Agaga. O le papisoga i le vai e sosoo mai ai ma le papisoga i le Agaga aua a leai e le atoatoa. Vagana lava ua tatou mauaina le papisoga ma le meaalofa o le Agaga Paia ona faatoa mafai lea ona maua se faamagaloga o a tatou agasala ma faatoa atoatoa ai ona toe fanaufouina faaleagaga. Ona tatou amataina ai lea o se olaga fou faaleagaga i le aveai ai ma soo o Keriso.

A maea ona papisoina se tagata i le vai, e toatasi pe sili atu foi nisi ua umia le perisitua ua faatagaina e faaee o latou lima i luga o le ulu o le tagata ma faamauina le tagata, o se tagata O Le Ekalesia a Iesu Keriso o le Au Paia o Aso e Gata Ai. Ona latou tuuina atu lea o le meaalofa o le Agaga Paia.

O i latou o e mauaina le meaalofa o le Agaga Paia ma tumau ai pea i le agavaa e mafai ona latou olioli i Lana mafutaga i o latou olaga atoa. E i ai se aafiaga faapaiaina, ma faamamaina a le Agaga Paia i o tatou luga. E molimau mai le Agaga Paia ia Keriso ma e fesoasoani ia i tatou ia iloa le upumoni. Na te tuuina mai le malosi faaleagaga ma fesoasoani ia i tatou ia faia le mea e sa’o. Na te faamafanafanaina i tatou i taimi o faigata

ma faanoanoaga. Na te lapataina i tatou i tulaga matautia faaleagaga pe faaletino. O le Agaga Paia e tuuina mai le mana lea tatou te aoao atu ai ma aoaoina ai. O le meaalofo o le Agaga Paia o se tasi lea o meaalofo sili ona taua a lo tatou Tama Faalelagi. O le mana o le Agaga Paia e mafai ai ona tatou lagonaina le alofa ma le taitaiga a le Atua mo i tatou. O leni meaalofo o se mua'i tofo lea i le olioli e faavavau ma se folafolaga o le ola e faavavau.

O le pule o le perisitua e moomia ai ona faataunuuna leni sauniga, lea na leiloa i auga senituri ua mavae ona o le liliuese, sa toefuatai mai e ala i le Perofeta o Iosefa Samita. E na o le pau le auala e mafai ai e se tasi ona maua le meaalofo o le Agaga Paia, o le avea lea ma se tagata o le Ekalesia. O leni pule ua ese mai ai leni Ekalesia mai soo se talitonuga faalelotu lava i le lalolagi. O le Alii lava ia na folafola mai, o le "ekalesia ola [leni] e tasi ma le faamaoni ua i luga o le fogaeleele" (MFF 1:30).

Taitaiga mai le Agaga Paia

Ia faamalamalama atu ia i latou o loo e aoaoina faapea e tete Satani i le Atua ma faasoosoina tagata e fai le agasala. Ina ia faatumauina ia lagona lelei sa latou maua a o feiloai ai ma faifeautalai, e tatau ona latou faitauina le Tusi a Mamona, tatalo, auai i le lotu, ma usiusitai i poloaiga. Ia faamalamalama atu faapea o le mauaina o le taitaiga faifaiepa a le Agaga Paia o se tasi lea o faamanuiaga o le papatisoina ma faamauina.

Mau Suesueina

Natura o le Agaga Paia

MFF 130:22–23
loane 3:1–8

Kalatia 5:22–23

Guide to the Scriptures, "Holy Ghost"

Faamanuiaga ma Aafiaga mai le Agaga Paia

2 Nifae 32:1–5
2 Nifae 33:1–2

Mose 6:61
loane 14:26

Guide to the Scriptures, "Holy Ghost"

Taua o le Meaalofo o le Agaga Paia

2 Nifae 31:11–12, 18, 21
3 Nifae 18:36–37
3 Nifae 19:13

3 Nifae 27:19–20
MFF 19:31

MFF 33:15
Galuega 19:1–6

Tumau e oo i le luga

O le taimi lava tatou te ulu atu ai i le ala sa'o ma le vaapiapi e ala i lo tatou faatuatua ia Iesu Keriso, salamo, ma sauniga o le papatisoga ma le faamauga, e tatau loa ona tatou tuu atu taumafaiga uma ina ia tumau ai i luga o lena ala. E faapea ona tatou faia e ala lea i le faaauau pea ona faatinoina le faatuatua ia Iesu Keriso, salamo, faia tautinoga, ma mulimuli i le Agaga.

O le taimi lava e faamagaloina ai a tatou agasala, e tatau loa ona tatou taumafai i aso uma ina ia tumau ona saoloto mai agasala ina ia mafai pea ona tatou maua le Agaga Paia e faatasi ma i tatou. I le feagaiga o le papatisoga, tatou te folafola atu ai i lo tatou Tama o i le Lagi o le a tatou usiusitai i Ana poloaiga i o tatou olaga atoa. Afai tatou te pauu, e tatau ona tatou salamo ina ia faatumauina ai ia faamanuiaga o le feagaiga. Tatou te folafola atu e faia galuega lelei, auauna atu i isi, ma mulimuli i faaitaiga a le Faola. E ta'ua leni tautinoga i le olaga atoa i totonu o tusitusiga paia o le "tumau e oo i le iuga."

Faamatalaga

Faamatalaga

O le mulimuli i le ala o le talalelei, e mafai ai ona tatou latalata atu i le Atua, faatoilaloina faaososoga ma agasala, ma saga olioli i le meaalofa o le Agaga Paia. A o tatou mulimuli ma le onosai, faamaoni, ma le tutumau ai i lenei ala i o tatou olaga atoa, o le a tatou agavaa mo le ola faavavau.

O le faatuatua ia Keriso; salamo; osia, faafouina, ma le tausia o feagaiga; ma le faamamaina e ala i le Agaga o le a avea ma se faatulagaga o le olaga. O a tatou gaoioiga i aso uma e faafofigaina ma puleaina e nei mataupu faavae. O le filemu ma le olioli e maua mai le mulimuli ai i lenei auala, ma e tuputupu malie a’e lava o tatou uiga faaKeriso. A o tatou mulimuli ai i lenei ala, o le a iu ai ina tatou “fetaomi atu i luma ma le faamaoni ia Keriso . . . ma tumau lava e oo i le iuga,” ma ua folafola mai ia i tatou, “Tou te maua le ola faavavau” (2 Nifae 31:20).

Mau Suesueina

Tumau e oo i le luga

2 Nifae 9:24

3 Nifae 27:16–17

Mataio 10:22

2 Nifae 31:14–20

Faamanuiaga mo i Latou o e Tumau

1 Nifae 13:37

3 Nifae 15:9

MFF 14:7

Valaaulia Ina ia Papatiso

O le valaaulia ina ia papatiso ma faamauina e tatau ona tuusao ma ma’oti: “O le a e mulimuli la i le faataitaiga a Iesu Keriso e ala i le papatisoina e se tasi o loo umia le pule o le perisitua a le Atua? O le a faia le tatou sauniga o le papatisoga i le [aso]. O le a e saunia la oe lava ia ina ia papatisoina i lena aso?”

Manatu e Aoao Atu Ai

O le vaega lenei o loo i ai manatu mo oe e te faaaogaina e saunia ma aoao atu ai lenei lesona. Ia mulimuli ma le agaga tatalo i le Agaga a o e fuafuaina pe faapefea ona faaoga nei manatu. Ia faaopoopo atu manatu e te filifilia i lau fuafuaga o le lesona. Ia teu i lou mafaufau o nei manatu o ni fautuaga—ae le o ni tulaga e manaomia—ina ia fesoasoani ai ia te oe e ausia manaoga o i latou o loo e aoaina.

Ata o le Lesona e na o se Taimi Puupuu e Faia Ai (3–5 minute)

O le talalelei a Iesu Keriso e na o le pau lea o le ala i le ola faavavau. O uluai mataupu faavae ma sauniga o Lana talalelei o le faatuatua ia Iesu Keriso, salamo, papatisoina e ala i le faatofuina mo le faamagaloina o agasala, ma le meaalofo o le Agaga Paia. Ona tatau lea ona tatou tumau e oo i le luga. O le faaaogaina o nei mataupu faavae i o tatou olaga atoa, ua tatou mulimuli ai i le faaitaiga a le Faaola, aoao e ala i Ana poloaiga, ma atinae uiga faaKeriso. E mafai ona faamagaloina i tatou i a tatou agasala, ma o le a mafai ona tatou toe foi atu e mau i le afioaga o lo tatou Tama o i le Lagi.

- E Mafai Ona Faamamaina i Tatou mai Agasala e Ala ia Keriso
- Faatuatua ia Iesu Keriso
- Salamo
- O Le Papatisoga, O La Tatou Uluai Feagaiga
- O Le Meaalofa o le Agaga Paia
- Tumau e Oo i le luga

Tautinoga

- O le a faaauau pea la ona atinae lou faatuatua ia Iesu Keriso e ala i lou aoao pea e uiga i Lana talalelei?
- O le a e salamo la ma tatalo mo le faamagaloga o agasala?
- O le a papatiso la oe ia ave ma se tasi O Le Ekalesia a Iesu Keriso o le Au Paia o Aso e Gata Ai i le (aso)? O le a faamauina la oe ma talia le meaalofo o le Agaga Paia?
- O le a tatou o la i le lotu i le Aso Sa nei?
- E mafai ona seti se taimi tatou te toe feiloai ai?
- Poloaiga mai le lesona 4 ua e filifilia e aofia ai.

Ata o le Lesona e le Umi se Taimi e Faia Ai (10–15 minute)

O la tatou savali o se savali o le faatuatua ma le faamoemoe. Tatou te alolofa ma tapuai ia Iesu Keriso. O la o le autu o le fuafuaga a le Atua mo lo tatou fiafia. O le taulaga togiola a Keriso ua mafai ai e i tatou ona maua le ola faavavau i le afioaga o le Atua. A o tatou ola ai i Lana talalelei, o le a la faamagaloina ma le alofa mutimutivale a tatou agasala. O le a la faamaloloina i tatou ma suia lo tatou tausalaina ma le maasiasi i le filemu ma le fiafia i lenei olaga.

Faamatalaga

Faamatalaga

O le talalelei a Iesu Keriso e faigofie. E amata i le faatuatua ia Keriso. Tatou te talitonu ia te ia, faatuatua ia te Ia, ma faalagolago ia te Ia. O lea faatuatua e tau atu ai i le salamo—ia tuu le faia o mea sese ae faaauau pea le faia o mea e sa'o. O lo tatou faatuatua ia te Ia e faaosofia ai foi i tatou ina ia faaali atu lo tatou alolofa e ala lea i le tausia o Ana poloaiga, e aofia ai le papatisoga. A mavae le papatisoga, ua la folafola mai e tuu mai ia i tatou le meaalofo o le Agaga Paia. O le Agaga Paia o le a taitaia i tatou, faamafanafanaina i tatou, ma fesoasoani ia i tatou ia iloa le upumoni. E mafai ona tatou iloa i o tatou loto ma o tatou mafaufau le taimi e faatasi ai le Agaga Paia ma i tatou. O le a tatou maua lagona o le filemu, alofa, ma le olioli. O le a tatou mananao e auaina atu i isi. O le a tatou taumafai i o tatou olaga atoa e faafiafia i le Alii.

Na toefuatai mai e Iesu Keriso Lana talalelei e ala mai i se perofeta o aso e gata ai. E mafai ona tatou aoao e uiga i le talalelei i totonu o le Tusi a Mamona, lea e mafai ona e faitau i ai, mafaufau loloto, ma tatalo e uiga i ai. O le a ta'u atu e le Atua ia te oe e ala i le mana o le Agaga Paia e moni lena mea. A o e iloina lona moni, o le a e manao ina ia salamo ma ia papatisoina ina ia mafai ona e mauaina se faamagaloga o au agasala ma maua le meaalofo o le Agaga Paia.

Tautinoga

- O le a faaauau pea la ona atinae lou faatuatua ia Iesu Keriso e ala i lou aoao pea e uiga i Lana talalelei?
- O le a e salamo la ma tatalo mo le faamagaloga o agasala?
- O le a papatiso la oe ia avea ma se tasi O Le Ekalesia a Iesu Keriso o le Au Paia o Aso e Gata Ai i le (aso)? O le a faamauina la oe ma talia le meaalofo o le Agaga Paia?
- O le a tatou o Ia i le lotu i le Aso Sa nei?
- E mafai ona seti se taimi tatou te toe feiloai ai?
- Poloaiga mai le lesona 4 ua e filifilia e aofia ai.

Ata Atoa o le Lesona (30–45 minute)

- E Mafai Ona Faamamaina i Tatou mai Agasala e Ala ia Keriso
 - Na auina mai e le Atua Lona Alo Pele, o Iesu Keriso, i le lalolagi (tagai i le Ioane 3:16–17).
 - E na o le alofa tunoa ma le alofa mutimutivale o Keriso e mafai ona faamamaina ai i tatou mai le agasala (tagai i le 2 Nifae 2:6–8).
 - E nafa i tatou ma le taliaina o Keriso, salamo, ma usiusitai.
- Faatuatua ia Iesu Keriso
 - E ao ona tatou talitonu o Keriso o le Faaola o le lalolagi.
 - E finagalo o Ia ina ia tatou talia ma mulimuli i Ana aoaoga.
 - Tatou te maua faamanuiaga pe a tatou usiusitai (tagai i le MFF 130:20–21).

Faamatalaga

- Salamo
 - O le faatuatua ia Keriso e tau atu lea i le salamo (tagai i le Alema 34).
 - Tatou te lagonaina le faanoanoa faaleatua (tagai i le 2 Korinito 7:9–10).
 - Tatou te tuu le faia o mea sese ae faaauau pea ona faia mea e tonu ma sa’o.
 - Tatou te ta’uta’u atu a tatou agasala, ma e tatou te ta’uta’u atu agasala matuia i taitai o le Ekalesia, o e e mafai ona fesoasoani ia i tatou ina ia salamo (tagai i le MFF 58:43).
 - Tatou te maua le faamagaloga; o le filemu e suia ai le ta’usalaina ma le faanoanoa (tagai i le Alema 36:17–21).
- O Le Papatisoa, o La Tatou Uluai Feagaiga
 - O se sauniga o se faatinoga paia lea tatou te osi feagaiga ai ma le Atua.
 - O se feagaiga o se maliliega paia lea i le va o le Atua ma Ana fanau.
 - O feagaiga e aumaia ai faamanuiaga.
 - E papatisoina i tatou e ala i le faatofuina mo le faamagaloina o agasala (tagai i le Mataupu Faavae o le Faatuatua 1:4).
 - Afai e papatisoina i tatou, ua tatou amataina se olaga fou ua tuuina atu atoatoa ia Keriso (tagai i le Roma 6:3–8).
 - O le papatisoga e tatau ona faia e se tasi o loo umia le pule o le perisitua.
 - Tatou te faafouina a tatou feagaiga e ala lea i le taumamafa i le faamanatuga i vaiaso taitasi (MFF 20:77, 79).
- O Le Meaalofa o le Agaga Paia
 - O le papatisoga e ala i le faatofuina e sosoo mai ai ma le papatisoga a le Agaga; e le mafai ona tuueseese mea ia e lua.
 - E tuuina atu e i latou o loo umia le perisitua ia le meaalofa o le Agaga Paia e ala i le faaee atu o lima.
 - O le Agaga Paia e aoaoina i tatou, faamamaina i tatou, faamafanafanaina i tatou, molimau mai i le upumoni, lapataiina i tatou, ma taitaiina i tatou (tagai i le 2 Nifae 32:1–5; Mosaea 5:1–6; Moronae 10:5; MFF 36:2).
- Tumau e oo i le luga
 - E tatau ona tatou faaauau pea i luga o le ala i le taimi lava e papatisoina ai i tatou ma faamauina.
 - Tatou te faia le mea sili ina ia tumau ai pea ona saoloto mai agasala ina ia mafai ai ona tatou olioli i le meaalofa o le Agaga Paia.
 - O le mulimuli ma le faamaoni i le ala o le talalelei e i ai le faatuatua, salamo, osia ma le tausia o feagaiga, ma le mauaina o le Agaga Paia, e mafai ona agavaa ai i tatou mo le ola faavavau (tagai i le 2 Nifae 31:14–20).
 - E tatau ona faaauau pea ona tatou salamo i o tatou olaga atoa (tagai i le MFF 19:15–20).

Faamatalaga

Tautinoga

- O le a faaauau pea la ona atinae lou faatuatua ia Iesu Keriso e ala i lou aoao atili e uiga i Lana talalelei?
- O le a e salamo la ma tatalo mo le faamagaloga o agasala?
- O le a papatiso la oe ia avea ma se tasi O Le Ekalesia a Iesu Keriso o le Au Paia o Aso e Gata Ai i le (aso)? O le a faamauina la oe ma talia le meaalofa o le Agaga Paia?
- O le a tatou o la i le lotu i le Aso Sa nei?
- E mafai ona seti se taimi tatou te toe feiloai ai?
- Poloai mai le lesona 4 ua e filifilia e aofia ai.

O Fesili e Fai pe a Uma le Lesona

- E i ai ni au fesili e uiga i mea sa ma aoao atu?
- O le a le uiga o le salamo?
- Aisea ua avea ai le meaalofa o le Agaga Paia ma se vaega taua o le talalelei?
- Aisea e taua ai ia te oe ona papatisoina ma maua le meaalofa o le Agaga Paia?
- Pe sa i ai se mea e uiga i a matou sauniga o le Ekalesia e te le'i malamalama i ai?
- O le a se mea sa e fiafia ai i a matou sauniga o le Ekalesia?

Faaugaga Autu

- **Alofa mutimutivale:** O le agaga lea o le manatu alofa, agalelei, ma le faamagaloga atu. O le alofa mutimutivale o se tasi lea o uiga o le Atua. Ua tuuina mai e Iesu Keriso le alofa tunoa ia i tatou uma e ala i Lana taulaga togiola e faalagolago i tulaga o le salamo.
- **Alofa tunoa:** O le mana mai ia Iesu Keriso e faataga ai ona tatou maua faamanuiaga i le olaga lenei ma maua ai le ola faavavau ma le faaeaga pe a mavae ona faatinoina lo tatou faatuatua, salamo, ma tuuina atu a tatou taumafaiga sili i le tausiga o poloai. O lea fesoasoani po o le malosi faalelagi e tuuina mai lea e ala i le alofa mutimutivale ma le alofa o Iesu Keriso. Tatou te manaomia uma lava le alofa tunoa ona o le Pau o Atamu faapea foi i o tatou lava vaivaiga.
- **Ola faavavau:** Ina ia ola e faavavau o ni aiga i le afioaga o le Atua (tagai i le MFF 132:19–20). O le ola faavavau o le meaalofa sili lea a le Atua i le tagata.
- **Faamau:** O le faae atu o lima o i latou o loo umia le Perisitua Mekisateko ina ia avea ai ma se tagata o le Ekalesia ma tuu atu i ai le meaalofa o le Agaga Paia.
- **Feagaiga:** O se maliliega i le va o le Atua ma Ana fanau. Tatou te le tutusa uma i le maliliega. E tuu mai e le Atua ia aiaiga mo le feagaiga, ma e tatou te malilie atu i ai ina ia faia le mea ua la poloaiina i tatou e fai. Ona folafola mai lea e le Atua ni faamanuiaga ma'oti mo lo tatou usiusitai. Tatou te maua ia sauniga e ala i feagaiga. Afai tatou te osia na feagaiga, tatou te folafola atu o le a tatou faamamaluina. Mo se faaitaiga, e osi feagaiga tagata o le Ekalesia ma le Alii i le papatisoga ma faafouina na feagaiga e ala i le taumamafa i le faamanatuga. Tatou te osia nisi feagaiga i totonu o le malumalu. O le nuu o le Alii o ni tagata osi feagaiga. E matuai faamanuiaina lava i tatou a o tatou tausia a tatou feagaiga ma le Alii.

- **Talalelei:** O le fuafuaga a le Atua o le faaolataga, na mafai ona faia ona o le Togiola a Iesu Keriso. O le talalelei o loo aofia ai upumoni po o tulafono e faavavau, o feagaiga, ma sauniga e moomia e tagata ina ia toe foi atu ai i le afioaga o le Atua.
- **Toe totogi:** O le toe faafoi atu lea o se mea na aveeseina pe na leiloa.
- **Tumau e oo i le luga:** Ina ia tumau faamaoni i poloaiga a le Atua e ui lava i faaososoga, o mea faafeagai, ma faigata i le olaga atoa.

O Isi Faaupuga Atonu e Moomia Nisi Faauigaga mo i Latou o loo e Aoaoina

- Ala sa'o ma le vaapiapi
- Faaososoga
- Faamagaloga
- Faamama mai le agasala
- Faamanatuga
- Ta'uta'u atu
- Tatalo

Faamatalaga

O Poloaiga

Sauniaina mo le Papatisoga ma le Faamauga



Aooina Atu o Lenei Lesona

E tele auala e aoao atu ai ia poloaiga o loo maua i le lesona lenei. Mo se faataitaiga, e mafai ona e aooina atu ni nai poloaiga mai le lesona lenei e avea ma vaega o lesona muamua e tolu, pe atonu foi e te aooina atu ni nai poloaiga e avea o se lesona se tasi. O le mea e te faia e tatau ona fuafua e ala i manaoga o tagata sailiili faapea le taitaiga mai le Agaga.

Ia Saunia e Aoo Atu

O lou faamoemoega i le aooina atu o poloaiga o le fesoasoani lea i tagata ina ia ola i le talalelei e ala lea i le faatinoina o le faatutua ia Iesu Keriso ma salamo a o latou saunia mo le papatisoga ma le faamauga. O le ususitai i poloaiga, o le a tuputupua'e ai tagata i a latou molimau o le talalelei, e faaalua mai ai ua ia te i latou ia ni "loto momomo ma le agaga salamo," ma amata ona salamo mai a latou agasala uma (tagai i le Moronae 6:1-4; MFF 20:37).

O lenei lesona e ese lona faatulagaina mai lesona muamua e tolu. O lesona muamua e tolu o loo faamalamalamaina atu ai ia mataupu faavae mo le talalelei a Iesu Keriso. O lenei lesona o loo faamalamalamaina atu ai ia poloaiga patino ua tuuina mai e le Atua ia e fesoasoani ai ia i tatou ina ia faaogaina mataupu faavae o le talalelei i o tatou olaga.

E tele auala e aoao atu ai lenei lesona. O le auala e te faaogaina e tatau ona fuafua lea i manaoga o tagata sailiili faapea ma le taitaiga mai le Agaga. Ia mafau fau pea ma tatalo pe faapefea ona fesoasoani atu i tagata sailiili ina ia ola i le talalelei. O manatu e aofia ai:

- Aoao atu se poloaiga se tasi po o le sili atu foi e avea o se vaega o lesona muamua e tolu. Afai e faaoga lea, ia mafau fau i le mataupu faavae o loo aoao mai i le Alema 12:32: "O le mea lea na aumai ai e le Atua o poloaiga ia te i latou, *ina ua uma* ona ia faaali ia te i latou le ala o le togiola" (faapoopo le faatusilima). O poloaiga manino, e pei o le tatalo ma le suesueina o tusitusiga paia, atonu e sili atu ona aooina e avea ma vaega o lesona muamua e tolu. O isi poloaiga atonu e sili atu ona lelei le aooina atu pe a maea ona e faataatia ia mataupu faavae o le talalelei o loo maua i lesona muamua e tolu.

Faamatalaga

- Aoao atu ni poloaiga se lua pe tolu e avea o se lesona se tasi.
- Aoao atu se poloaiga se tasi e avea ma se lesona.
- Aoao atu ia poloaiga i le agaga o le talalelei. Ia iloiloina faapuupuu le lesona e uiga i le talalelei a Iesu Keriso a o le'i aoaoina atu se poloaiga se tasi po o le sili atu foi. Afai e te faia faapea, o le a mafai ona e fesoasoani i tagata sailiili ia iloa pe faapefea ona fetau i poloaiga i le ata tele o le faatinoina o le faatuatua i le Faaola ma salamo i le sauniuni atu mo le papatisoga ma le faamauga. E mafai ona faamanuiaina o latou olaga a o latou vaai atu i le talalelei a Iesu Keriso o se faatulagaga mo le olaga.

Atonu e mafai ona e aoaoina nisi tagata sailiili i ni nai feiloaiga; o isi atonu e moomia ni feiloaiga se tele atu. E fetuutuunai lava e oe le aoaoina atu o lesona i soo se auala e sili ona fesoasoani ai i tagata ina ia saunia lelei mo o latou papatisoga ma faamauga. O lou faamoemoega e le gata o le aoaoina o lesona ua saunia; ae ia fesoasoani atu foi i isi ina ia o mai ia Keriso e ala i le faatuatua ia Iesu Keriso, salamo, papatisoga, mauaina o le meaalofa o le Agaga Paia, ma le tumau e oo i le iuga.

E toetoe lava e leai se lesona e sili atu ma le 45 minute. O le a mafai ona e iloaina ia o lena taimi o le a na o ni feiloaiga pupuu e fai ai lesona. O le tulaga la lea, atonu e te moomia ai le faifaisoo o ni feiloaiga pupuu e fai ai lesona e talanoaina ai ni vaega laiti o lesona e aoaoina.

E tele auala e mafai ona aoaoina atu ai lenei lesona. O le a sili atu ona fuafuaina po o le a le poloaiga e te aoaoina atu, o le taimi e te aoaoina atu ai, faapea ma le tele o le taimi e te aoaoina atu ai e ala lea i manaoga o tagata sailiili faapea le taitaiga a le Agaga.

Aoao e uiga i Poloaiga ma Tautinoga

A o e suesueina lenei lesona, ia mulimuli i faatulagaga o loo i lalo:

- Suesue le vaega lena o loo sili ona faamatalaina mai ai le poloaiga ma tusi se ata faigofie o le lesona faatasi ai ma ni manatu autu se lua e oo i le lima.
- Aoao atu i lau soa se vaega o lau lesona mo le lua i le tolu minute. Faataitai le auala o le a e tuuina atu ai le valaaulia mo tautinoga taitasi ma le auala o le a e foiaina ai ni popolega.
- Ia talanoaina ni auala lelei e fesoasoani ai i tagata sailiili ina ia tausisia a latou tautinoga sa faia.

Usiusitai

Ua tuuina mai e le Atua poloaiga ia i tatou mo lo tatou manuia. O ni faatonuga mai se Tama oi le Lagi alofa e fesoasoani ai ia i tatou ina ia maua ni olaga fiafia. Ua Ia tuuina mai foi ia i tatou le saolotoga, po o le mafaia lea faapea ma le avanoa e filifili ai i le va o le lelei ma le leaga. Afai tatou te usiusitai i le Atua, tatou te mulimuli i uunaiga a le Agaga ma filifili ina ia gauai atu i Lona finagalo. O le usiusitai i poloaiga e aumaia ai le filemu ia i tatou i lenei olaga ma le ola faavavau i le lalolagi a sau. O le usiusitai e faali atu ai lo tatou alofa mo le Atua. O le le usiusitai e aumaia ai le faanoanoa ia i tatou.

Ua silafia e le Tama Faalelagi o tatou vaivaiga ma e onosai lava ia i tatou. Na te faamanuiaina i tatou a o tatou tauivi e usiusitai i Ana poloaiga. Na te faamoemoaina i tatou ina ia usiusitai ia te Ia ina ia mafai ona Ia faamanuiaina i tatou.

Faamatalaga

Mau Suesueina

Saolotoga

2 Nifae 2:26–29
Alema 12:31

MFF 58:26–29
MFF 82:8–10

Guide to the Scriptures, “Agency”

Usiusitai

MFF 130:20–21

Ioane 14:15, 21

Failauga 12:13

Tautinoga

- O le a e usiusitai la i tulafono a le Atua?

Tatalo Soo

Ua poloaaina i tatou e le Atua ina ia tatalo atu ia te Ia. E mafai ona e tatalo i soo se taimi i soo se tulaga. Ua aoaoina i tatou e le Alii ina ia tootutuli ma tatalo i le taeao ma le afiafi, tatalo taitoatasi ma tatalo faatasi foi ma o tatou aiga. E faafogaina ma tali mai e lo tatou Tama Faalelagi a tatou tatalo. O le tatalo i aso taitasi tatou te maua ai le taitaiga mai le lagi faapea ma faamanuiaga. E tatau ona tatou tatalo faamaoni. E tatau foi ona tatou tatalo ma le “faamoemoega tonu,” o lona uiga ua tatou tautino atu e faia e tusa ma le tali tatou te mauaina.

Tatou te tatalo atu ma le faatuatua i lo tatou Tama o i le Lagi i le suafa o Iesu Keriso (tagai i le Mose 5:8). Talu ai ona o Ia o lo tatou Tama ma o i tatou o Ana fanau, o le a Ia tali mai ai a tatou tatalo. E amata a tatou tatalo i le ta’u o lo tatou Tama o i le Lagi. E faauma a tatou tatalo i le faapea atu, “I le suafa o Iesu Keriso, amene.”

O le tatalo tatou te talanoa atu ai ma le manino ma faamaoni i lo tatou Tama o i le Lagi alofa. Tatou te faailoa atu ai lo tatou faafetai ma le talisapaia o o tatou faamanuiaga. E mafai ona tatou faailoa atu ai lo tatou alolofa mo Ia. Tatou te ole atu ai foi mo le fesoasoani, puipuiga, ma le taitaiga e tusa ai ma o tatou manaoga.

A tatou tatalo ma le faatuatua, faamaoni, ma le faamoemoega tonu, o le a tatou vaaia ia uunaiga a le Atua i o tatou olaga. O le a Ia taitaiina i tatou i o tatou olaga i aso taitasi ma fesoasoani ina ia tatou faia ni faaiuga lelei. O le a Ia faamanuiaina i tatou i lagona lelei o le mafanafana ma le filemu. O le a Ia lapataiina i tatou i mea matautia ma faamalositia i tatou e tetee atu i faaososoga. O le a Ia faamagaloina a tatou agasala. O le a tatou lagonaina lo tatou latalata atu ia te Ia. E tatau ona tatou aoao ina ia iloa Lona faatasi mai i o tatou olaga. E tatau ona tatou aoao ina ia faalogo atu i le leo malu, ma le itiiti o le Agaga.

E mafai ona tatou iloaina le taimi e aoaoina ai i tatou e le Agaga Paia i le upumoni. O le a faatumulia o tatou mafaufau i manatu musuia ma faagaetia. O le a faamalalamaina i tatou, po o le tuuina mai foi o se malamalama fou. O le a maua e o tatou loto ia lagona o le filemu, olioli, ma le alofa. O le a tatou mananao e faia mea lelei ma fesoasoani atu i isi. O nei lagona e faigata ona faamatalaina ae e mafai ona iloaina a o tatou masani i ai.

Mau Suesueina

2 Nifae 32:8–9
Enosa 1:1–12
Alema 34:17–28
Moronae 10:3–5

MFF 6:22–23
MFF 8:2–3
MFF 9:7–9

MFF 19:28
1 Tupu 19:11–12
Guide to the Scriptures, “Prayer”

Tautinoga

- O le a e tootuli la ma tatalo i aso taitasi e le gata na o oe ae faapea foi o se aiga?

Suesueina o Tusitusiga Paia

O tusitusiga paia o ni faamaumauga tusitusia ia o feutagaiga a le Atua ma Ana fanau e pei ona tusia ai e perofeta e ala i uunaiga a le Agaga Paia. E faaalua lo tatou faatuatua e ala i le suesueina, ma le usiusitai i afioga faaalua a le Atua. Tatou te suesueina ma le maelega ia tusitusiga paia ina ia malamalama ai i le upumoni. Tatou te fiafia i ai aua latou te tatalaina ai le faitotoa i faaaliga ma faaali mai ia i tatou mea e moomia ona tatou faia ma ituaiga tagata e tataua ona tatou oo i ai. Tatou te sailia ia tusitusiga paia ina ia aoao ai e uiga ia Iesu Keriso ma Lana talalelei. O le faatuatua ia Iesu Keriso o se meaalofo lea mai le Atua ma e oo mai e ala i le suesueina ma le ola ai i Ana afioga ma Lana talalelei. O tusitusiga paia faamaoniaina o le Ekalesia, e ta'ua foi o tusitusiga faavae, e aofia ai le Tusi Paia, o le Tusi a Mamona, o le Mataupu Faavae ma Feagaiga, ma le Penina Tautele. E tataua ona tatou suesueina nei tusi paia i aso taitasi.

Mau Suesueina

1 Nifae 19:22–23	2 Nifae 31:19–20	Ioane 20:31
2 Nifae 9:50–51	2 Nifae 32:3–5	2 Timoteo 3:14–17
2 Nifae 25:26	Alema 32:28–30	2 Peteru 1:20–21
2 Nifae 29:1–13	Ioane 5:39	

Tautinoga

- O le a e faitauina la tusitusiga paia i aso taitasi e le gata na o oe ae faapea foi o se aiga?

Tausi le Aso Sapati ia Paia

O a tatou amioga i le aso Sapati o se atagia lea o la tatou tautinoga e faamamalu ma tapuai i le Atua. O le tausia o le aso Sapati ia paia, e faaali atu ai i le Atua lo tatou naunautai e tausia a tatou feagaiga. O aso Sapati taitasi uma tatou te o atu ai i le maota o le Alii e tapuai atu ia te Ia. A o i ai iina tatou te taumamafa ai i le faamanatuga e manatua ai Iesu Keriso ma Lana Togiola. Tatou te faafou ai a tatou feagaiga ma faaali atu ai lo tatou naunau e salamo mai a tatou agasala ma mea sese.

O le aso leni, tatou te fiafia ai e malolo mai a tatou galuega. A o tatou auai atu i sauniga o le Ekalesia ma tapuai faatasi, tatou te fefaamalosia'i ai. E faamalolosia ai i tatou e ala i a tatou fegalegaleaiga ma a tatou uo ma aiga. E faamalolosia ai lo tatou faatuatua a o tatou suesueina ia tusitusiga paia ma aoao atili ai e uiga i le talalelei toefuataiina.

Afai e faatupulaia le faatalale o se nuu po o se malo i ana gaoioiga i le Sapati, o le a leaga lona olaga faalelotu ma o le a matuai leaga se aafiaga o vaega uma o le olaga. O faamanuiaga e o faatasi ma le tausia o le aso Sapati ia paia ua le toe maua. E tataua ona tatou taofi le faatau i le Sapati ma 'aua ne'i auai i isi gaoioiga o fefaatauaiga ma taaloga lea ua taatele nei ona faaleagaina ai le Sapati.

E tataua i le Au Paia o Aso e Gata Ai ona faatulagaese leni aso paia mai gaoioiga o le lalolagi e ala lea i le ulufale atu ma se agaga o le tapuai, faafetai, auauna atu, faapea ma gaoioiga talafeagai e faaautu i le aiga i le Sapati. A o taumafai ai tagata o le Ekalesia ina ia

Faamatalaga

Faamatalaga

faia a latou gaioiga o le Sapati ina ia ogatasi ma le faamoemoe ma le Agaga o le Alii, o le a faatumulia o latou olaga i le olioli ma le filemu.

Mau Suesueina

3 Nifae 18:1–25
MFF 59:9–15

Esoto 20:8–11
Esoto 31:12–17

Isaia 58:13–14

Nonofo faatasi ma Tagata Sailiili po o Tagata o le Ekalesia i le Lotu

Afai e auai atu i sauniga faamanatuga po o konafesi a le siteki, e tatau i soa faifeautalai ona nonofo faatasi ma tagata sailiili, tagata faatoa liliu mai, po o tagata o le Ekalesia. E le tatau ona nonofo faatasi na o i latou ma isi faifeautalai.

Tautinoga

- O le a e tausia la le aso Sapati ia paia?
- O le a e saunia la oe lava ia ina ia taumafa ma le agavaa i le faamanatuga?

Fesili o le Faatalanoaga mo le Papatisoga e Faatatau I Ai

- O le a sou malamalama i le aso Sapati, e aofia ai le taumafa i le faamanatuga i vaiaso taitasi ma tuuina atu le auunaga i isi? O e naunau e te usitai i lenei tulafono [a o le'i papatisoina oe]?

Papatisoga ma le Faamauga

O le auala e faaali atu ai lo tatou mananao e mulimuli i le auala a le Atua e ala lea i le papatisoga ma le faamauga. Afai tatou te papatiso ma faamauina, ua tatou ulu atu i se feagaiga faatasi ma le Atua e faapea o le a tatou tauave i o tatou luga le suafa o Iesu Keriso ma o le a tatou manatua pea o Ia ma tausi i Ana poloaiga. Tatou te folafola atu foi o le a tatou laulaututu e avea ma molimau o le Atua i taimi uma ma fesoasoani ia i latou o loo moomia le fesoasoani (tagai i le Mosaea 18:8–9). O le tau, ua folafola mai e le Atua le mafutaga faifaipea a le Agaga Paia, o le faamagaloina o a tatou agasala, ma le toe fanaufouina.

Tautinoga

- O le a papatiso la ma faamauina oe?
- O le a e valaaulia la ia ni tagata sailiili e auai i se sauniga o le papatisoga?
- Afai e mafai, ia valaaulia tagata sailiili i se sauniga faamanatuga lea e faamauina ai se tasi.

Fesili o le Faatalanoaga mo le Papatisoga e Faatatau I Ai

- O fesili uma lava o le faatalanoaga mo le papatisoga.

Valaaulia Ina ia Papatiso

O le valaaulia ina ia papatiso ma faamau e tatau ona ma'oti ma tuusa'o: "O le a e mulimuli la i le faataitaiga a Iesu Keriso e ala lea i le papatisoina e se tasi ua umia le pule o le perisitua a le Atua? O le a faia sa tatou sauniga o le papatisoga i le [aso]. O le a e saunia la oe ina ia papatisoina i le aso lena?"

Mulimuli i le Perofeta

O le upumoni o se malamalama lea o mea e pei ona i ai, sa i ai, ma o le a i ai. E le fesuiaia ona o tulaga po o le taimi. O le upumoni e tutusa lava i augatupulaga uma ma aganuu uma. O le Atua o le puna lea o upumoni uma. E mafai ona tatou faatuatua ia te Ia aua ua tatou iloa e na o le upumoni o le a Ia aoaoina ai i tatou. E finagalo le Atua i Ana fanau uma ina ia iloa le upumoni. O lea la, ua Ia faaali mai ai upumoni e moomia mo le faaolataga e ala mai i perofeta ma aposetolo. Na te faaali mai le upumoni ia i tatou e ala mai i tusitusiga paia ma faaaliga i le tagata lava ia.

E valaauina se perofeta ma filifilia e le Atua ma o se tagata amiotonu ma tele le faatuatua. E faaali mai e le Alii ia te ia le upumoni e ala mai i le Agaga Paia. Na te poloaiina Lana perofeta ina ia aoao atu le upumoni i tagata uma. O i latou o e talitonu i afioga a le Atua e pei ona faaalia mai i Lana perofeta e faamanuiaina.

O le Ekalesia a Keriso o loo fausia i luga o le faavae o aposetolo ma perofeta, o e o loo taitaia le Ekalesia e ala i faaaliga. Na valaauina e le Alii ia Iosefa Samita e avea ma uluai perofeta ma ulu o lenei tisipenisione mulimuli. O e na sosoo mai ma ia na taitaia le Ekalesia a Iesu Keriso o le Au Paia o Aso e Gata Ai i aso nei e ta'ua foi o perofeta ma aposetolo. O le Peresitene o le Ekalesia i le taimi nei o se perofeta soifua. E ao ona i ai lo tatou faatuatua i perofeta filifilia a le Atua, ia maua le talitonuga i lona valaauga paia, ma mulimuli i ana aoaoga.

E masani ona tatou maua ia avanoa e lagolagoina ai faalauaitele ia taitai o le Ekalesia. O le *lagolagoina* o lona uiga ia sapaapaia. E ao ona tatou saunia i tatou lava ina ia mafai e le Agaga Paia ona faamautuina mai upumoni e aoao mai e perofeta ma aposetolo ia i tatou pe a latou saunoa mai, ona mafai lea ona tatou fuafua e mulimuli i le fautuaga ua latou tuuina mai ia i tatou.

O i latou o e faalogo ma mulimuli i le fautuaga a perofeta ma aposetolo soifua o le a le sese ese lava. O aoaoga a perofeta soifua e maua ai se taula o upumoni faavavau i totonu o se lalolagi o loo fesuaii tulaga e faatauaina ma fesoasoani ai ia i tatou ina ia aloese mai le lotovaivai ma le faanoanoa. O le fenumiai ma le feteenai o le lalolagi o le a le faapopoleina ai i tatou, ma e mafai ona tatou olioli i le mautinoa lea o loo tatou ogatasi ma le finagalo o le Atua.

Mau Suesueina

Mosaea 15:11–12	MFF 21:1–7	Efeso 2:19–20
Alema 13:1–16	MFF 136:37–38	Efeso 4:11–14
3 Nifae 12:1–2	Ioane 15:16	Eperu 5:4
MFF 1:37–38	Galuega 10:34–44	Amosa 3:7

Tautinoga

- O le a e feiloai la i le epikopo?
- O le a e lagolagoina la ma mulimuli i fautuaga a taitai o le Ekalesia?

Fesili o le Faatalanoaga mo le Papatisoga e Faatatau I Ai

- E te talitonu o le [Peresitene o i ai nei o le Ekalesia] o se perofeta a le Atua? O le a lona uiga ia te oe?

Faamatalaga

Faamatalaga

Tausi Tulafono e Sefulu

Ua tuuina mai e le Tama Faalelagi ia i tatou ia tulafono ina ia tatou iloa ai le mea e fai ma mea e aloese mai ai ina ia mafai ona maua ai faamanuiaga o loo Ia finagalo e tuuina mai ia i tatou (olioli, filemu o le mafaufau, fiafia tumau). Na faaali atu e le Atua ia Mose ia Tulafono e Sefulu e taitaiina ai Lona nuu:

- “Aua ne’i e fai mo oe ni atua ese i o’u luma” (Esoto 20:3). O “atua” ese e mafai ona aofia ai meatotino, pule, po o le lauiloa.
- “Aua e te fai mo oe se tupua ua ta” (Esoto 20:4).
- “Aua e te ta’u fua le suafa o Ieova lou Atua” (Esoto 20:7).
- “Ia e manatua le aso sapatu e te faapaiaina” (Esoto 20:8).
- “Ia e ava i lou tama ma lou tina” (Esoto 20:12).
- “Aua e te fasioti tagata” (Esoto 20:13).
- “Aua e te mulilua” (Esoto 20:14).
- “Aua e te gaoi” (Esoto 20:15).
- “Aua e te molimau pepelo i le lua te tuaoi” (Esoto 20:16).
- “Aua e te manao” (Esoto 20:17).

O Tulafono e Sefulu o loo aoga pea i aso nei. Latou te aoaoina i tatou ina ia tapuai ma faaali atu le faaaloalo i le Atua. Latou te aoaoina foi i tatou i le auala tatou te faia ai i isi.

Aua Ne’i i ai ni Atua Ese

E umia pe avatu e tagata i le tele o aganuu ia le faaaloalo i mea faitino e faamanatu atu ai ia i latou le Silisiliese po o augatuaa. O nisi taimi o na mea faitino, e pei o faatagata, faatusa faalelotu, po o ni tamai nofoaga paia, e mafai foi ona avea ma taulaiga o a latou tapuaiga. Fesoasoani ia i latou ina ia malamalama ua poloai mai le Alii ia i tatou e aua ne’i tapuai i tupua. Ia uunaia i latou e aveese mai o latou fale soo se mea faitino lava o loo latou tapuai i ai pe o tatalo atu foi i ai. Fesoasoani ia i latou ina ia taulai atu lo latou faatuatua ma tapuaiga i lo latou Tama Faalelagi ma Iesu Keriso. Aoao i latou o le talalelei toefuataiina a Iesu Keriso o loo taulai atu i le Keriso soifua. I totonu o le talalelei toefuataiina ua aoaoina ai i tatou e le Alii i le auala tatou te manatuaina ai o Ia. Tatou te manatuaina o Ia e ala i le tatalo, o le faamanatuga, ma le tapuai i le malumalu. O le a tuuina atu e lau peresitene o le misiona le taitaiga i eria patino.

Mau Suesueina

Mosaea 13
MFF 59:5–6

Mataio 22:36–40
Esoto 20:1–17

Teuteronomie 5:6–21

Tautinoga

- O le a e tausia Ia Tulafono e Sefulu?

Ola i le Tulafono o le Legavia

E fiafia le Atua i le legavia ae inoino i agasala o feusuaiga. O le legavia e aofia ai le matuai teenaina lava o soo se sootaga i feusuaiga a o le’i faaipoipo ma le matuai faamaoni atoatoa o se tasi i lona toalua pe a mavae le faaipoipoga. O i latou o e ola ai i le

tulafono o le legavia e olioli i le malosi lea e maua mai le puleaina o le tagata lava ia. Latou te olioli i le mautinoa ma le faatuatuaia i a latou sootaga faaleaiga. E mafai ona sili atu ona latou matuai olioli i le aafiaga a le Agaga Paia i o latou olaga. O i latou o e solia lenei tulafono o le a oo i latou i se lagona e tumau pea o le maasiasi ma le ta'usalaina lea e avea ma avega mamafa i o latou olaga.

O le legavia e moomia ai le faamaoni i manatu ma mea e fai. E tatau ona tatou tausia o tatou mafauaiga ia mama ma ia tauagafau o tatou laei, gagana, ma mea e fai. E tatau ona tatou aloese mai tusi ma ata mataga i soo se ituaiga. E tatau ona tatou tausia ia paia le mana o le foafoaga ua tuuina mai le Atua faapea ma o tatou tino. O tagata ua saunia mo le papatisoga e ao ona ola i le tulafono o le legavia, lea e faasaina ai soo se ituaiga sootaga o feusuaiga i fafo atu o se faaiipoipoga faatulafonoina i le va o se alii ma se tamaitai. E le tatau ona latou auai i ni sootaga o le faapa'u pepe po o le toe nonofo o le alii ma le alii po o le tamaitai ma le tamaitai. O i latou o e ua faia agasala o feusuaiga e mafai ona salamo ma faamagaloina.

O Ulugalii e Nonofo Faatasi

O alii ma tamaitai o e o loo nonofo faatasi ae le'i faaiipoipoina e le mafai ona papatisoina e aunoa ma le faaiipoipoina muamua, po o le tetea foi. O i latou o e ua sili atu ma le toatasi se tagata ua faaiipoipo atu i ai, e le mafai ona papatisoina. Saili ia fautuaga mai lau peresitene o le misiona, o le a ia tuuina atu se taitaiga patino i ia tulaga taitasi.

Mau Suesueina

Iakopo 2:28	3 Nifae 12:27–30	Mataio 5:27–28
Mosaea 13:22	MFF 42:22–24	Roma 1:26–32
Alema 39:3–5	MFF 63:16	Efeso 5:3–5

Tautinoga

- O le a e ola la i le tulafono o le legavia?

Fesili o le Faatalanoaga mo le Papatisoga e Faataua I Ai

- O le a sou malamalama i le tulafono o le legavia, lea e faasaina ai soo se sootaga feusuai i fafo atu o noataga o se faaiipoipoga faatulafonoina i le va o se alii ma se tamaitai? O e naunau la e te usitaia lenei tulafono [a o le'i faia lou papatisoga]?
- Sa e auai i le faapa'uina o se pepe? Se sootaga o le feusuai o le tane ma le tane po o le tamaitai ma le tamaitai? [Faaliga: O se tagata e tali mai i le ioe i se tasi o nei fesili e tatau ona faatalanoaina e le peresitene o le misiona a o le'i papatisoina.]

Usitai i le Upu o le Poto

Na faaali mai e le Alii i le Perofeta o Iosefa Samita se tulafono o le soifua maloloina ua ta'ua o le Upu o le Poto. O lenei tulafono o loo aoaoina ai i tatou i meaai ma mea e tatau ona faaaogaina ma mea e le tatau ona faaaogaina ina ia faatumauina ai pea le maloloina o o tatou tino ma ia tausia ai i tatou ia saoloto mai aafiaga leaga. Ua folafola mai e le Alii ia faamanuiaga o le ola maloloina, malosi, puipuiga mai le tiapolo, ma le faateleina o le naunau i upumoni faaleagaga.

Ia manatua o o tatou tino e paia. E tatau ona tatou tausia i le faaaloalo ma le migao. O le Upu o le Poto o loo aoaoina ai i tatou ina ia tatou aai i meaai maloloina. O loo matuai patino

Faamatalaga

Faamatalaga

lava ona aoaoina ai i tatou ina ia tatou aloese mai mea oona, e aofia ai le ava malosi, tapaa, lauti, ma le kofe. E tatau foi ona tatou aloese mai soo se ituaiga fualaaui oona. Ina ia papatisoina ma faamauiina, e ao ia i latou o loo e aoaoina ona tuuese nei mea. O tagata e usiusitai i le Upu o le Poto e sili atu ona naunau i upumoni faaleagaga.

O le a taliina e lau peresitene o le misiona ia fesili e faatatau lea pe aofia ai nisi o mea o loo i lau aganuu i totonu o le Upu o le Poto.

Faatoilaloina o Mea ua Fai ma Masani

E sili atu ona mafai ona e fesoasoani ia i latou o e o loo tauivi ina ia faatoilaloina le ulaula, ava malosi, ma isi mea ua amioa'i e ala i le mulimuli i nei mataupu faavae. O fautuaga o loo i lalo e patino lava le faatatauina i le Upu o le Poto ae e mafai foi ona fetuunai mo isi foi mea ua fai ma masani.

1. Fesoasoani i tagata ina ia seti ni sini po o afea ae pe o le a faapefea foi ona latou ola i le Upu o le Poto.
2. Tatalo mo i latou i au lava tatalo e fai ma ia faapena foi pe a outou faatasi ma i latou.
3. Ia fesoasoani atu ma lagolago i ai—e tusa lava pe latou te faavaivai.
4. Ia faaauau pea ona aoaoina atu le talalelei ia i latou. Ia aoao i latou i le auala e faaoga ai le tatalo ma le faatuatua e avea o ni puna o le malosi.
5. Fesoasoani ia i latou ina ia auai soo i le lotu ma atinaeina ia faauooga ma tagata o e o loo ola i le Upu o le Poto ma ua latou faatoilaloina foi ia nei mea sa fai ma mausa.
6. Afai e talafeagai ai, ia ofo atu e tuuina atu ia i latou ni faamanuiaga faaperisitua.
7. Ia uunaiina i latou e aveese ni mea oona mai o latou fale.

Tagai i le mataupu 10 mo nisi faatonuga i le fesoasoani atu i tagata e faatoilaloina mea ua fai ma mausa.

Mau Suesueina

MFF 89

1 Korinito 3:16–17

1 Korinito 6:19–20

Tautinoga

- O le a e ola la i le Upu o le Poto?

Fesili o le Faatalanoaga mo le Papatisoga e Faatatau I Ai

- O le a sou malamalama i le Upu o le Poto? O e naunau la e te usitai i lenei tulafono [ae te le'i papatiso]?

Tausia o le Tulafono o le Sefuluai

O se tasi o faamanuiaga silisili o le avea ma tagata O Le Ekalesia a Iesu Keriso o le Au Paia o Aso e Gata Ai o le avanoa lea e tuuina atu ai se sao i le alualu i luma o le malo o le Atua e ala i le totogiina o le sefuluai. O le sefuluai o se tulafono faalelagi ua leva. Mo se faaitaiga, na totogi sefuluai a Aperaamo le perofeta o le Feagaiga Tuai mai mea uma sa ia maua (tagai i le Alema 13:15).

Mo i latou o e totogi sefuluai, ua folafola mai le Alii e faapea o le a Ia “toina . . . pupuni o le lagi, ma sasaa . . . atu le manuia mo outou, seia silisili ona tele” (Malaki 3:10). O nei faamanuiaga e mafai ona faaletino pe faaleagaga, ae o le a oo mai lava ia i latou o e usiusitai i lenei tulafono faalelagi.

Faamatalaga

O le sefuluai o lona uiga o le tasivaesefulu, ma ua poloaiina i tatou e le Alii ina ia tuuina atu le tasivaesefulu o mea tatou te maua, lea ua malamalama i ai o lona uiga o le tologi, ia e mafai ona faamanuiaina ai i tatou. O le tulafono o le sefuluai e tuuina mai ai ia i tatou le avanoa e fesoasoani ai e fausia Lona malo. O a tatou sefuluai e paia i le Alii, ma tatou te faamamaluina o Ia e ala i le tologi o sefuluai. Ua folafola mai le Atua o le a ia matuai faamanuiaina lava i latou o e tologi se sefuluai faamaoni. O i latou o e le tologiina ia sefuluai ua latou faoa mea a le Atua (tagai i le Malaki 3:8). Ua latou tuuina mo i latou se mea e ao ona ave ia te Ia. E tatau ona tatou saili muamua le malo o le Atua, ma o le sefuluai o se auala taua lea e faia ai lena mea. O le tologiina o le sefuluai o se faailoga lea o lo tatou faatuatua. O se faailoga lea i fafo o lo tatou talitonuga i le Atua ma Lana galuega.

O tupe o le sefuluai e faaaoga e lagolago ai gaoioiga faifaiepa a le Ekalesia, e pei o le fausia ma le tausia o malumalu ma falelotu, e momoli atu ai le talalelei i le lalolagi atoa, e faia ai galuega faalemalumalu ma talafaasolopito o le aiga, ma le tele o isi gaoioiga i le lalolagi atoa. O le sefuluai e le tologia ai taitai o le Ekalesia o le lotoifale, o e o loo auuuna atu e aunoa ma se tologi o soo se ituaiga.

O taitai o le Ekalesia i le lotoifale e auina atu sao ia sefuluai e maua i vaiaso taitasi i le laumua o le Ekalesia. O se aufono o loo aofia ai le Au Peresitene Sili, o le Korama a le Toasefululua, ma le Au Epikopo Pulefaamalumalu e fuafuaina ia ni auala patino e faaaoga ai tupe paia o le sefuluai.

Mau Suesueina

Sefuluai

MFF 119

Eperu 7:1–2

Levitiko 27:30–33

MFF 120

Kenese 14:18–20

Malaki 3:7–12

Faatuatua

3 Nifae 13:33

Eteru 12:6

Tautinoga

- O le a e ola ai la i le tulafono o le sefuluai pe a e papatiso?

Fesili o le Faatalanoaga mo le Papatisoga e Faatatau I Ai

- O le a sou malamalama i le tulafono o le sefuluai? O e naunau la e te usitai i lenei tulafono?

Tausia o le Tulafono o le Anapogi

O loo avanoa faamanuiaga silisili mo i latou o e usiusitai i le poloaiga a le Atua ina ia anapogi. O le anapogi o lona uiga o le le faaaogaina lea o meaai ma vaiinu mo se taimi. E masani lava o le Aso Sa muamua o masina taitasi e tuuese e avea ma se aso faapitoa e anapogi ai mo taumafataga sosoo e lua, e tatalo ai ma tuu atu ai molimau. E o faatasi le anapogi ma le tatalo. Afai tatou te anapopogi ma tatalo ma le faatuatua, o le a sili atu ona tatou mananao ina ia maua tali i a tatou talosaga ma faamanuiaga mai le Alii. Ua Ia folafola mai ia i tatou o le a Ia taitaiina pea i tatou. E tatau ona tatou anapopogi ma tatalo mo ni faamoemoega patino. O le anapogi o se mea e le faalauaiteleina ma e faaleagaga, ma e le tatau ona tatou faalauiloaina atu faapea o loo tatou anapopogi.

O talitonuga moni faalelotu e aofia ai le tausia o e matitiva. E ao ona tatou fesoasoani atu ia i latou ina ia ausia o latou manaoga faaletino ma faaleagaga. Afai tatou te anapopogi, tatou te foai atu tupe i le Ekalesia mo le tausia o e matitiva ma le le tagolima. Tatou te

Faamatalaga

ta'ua lea o se taulaga anapogi. Tatou te tuuina atu e le itiiti ifo ma le aofaiga o tupe na tatou faasaoina mai taumafataga e lua. Ae peitai, e le moomia ona faatapulaaina la tatou foai i le na o le tau o taumafataga e lua. Ua uunaiina i tatou ina ia tatou loto foai pe a tusa ai ma mea ua tatou maua. O le tausia o e matitiva, o le a tatou faataunuu ai a tatou feagaiga o le papatisoga ma faatumauina ai se faamagaloga o a tatou agasala.

Mau Suesueina

Anapogi

Ominae 1:26	Alema 17:2-3	MFF 88:76	Alema 5:45-46
Morona'e 6:5	Mataio 6:1-4, 16-18	Alema 6:6	MFF 59:12-16
58:6-11			Isaia

Tausia o e Matitiva

Mosaea 4:16-27	Alema 4:12-13	Iakopo 1:27	Mosaea 18:8-10
Mataio 25:34-46	Isaia 58:3-12		

Tautinoga

- O le a e anapogi la ma tatalo i le isi Aso Sa anapogi e sosoo ai mo ni manaoga faapitoa?
- O le a e foai atu la se taulaga anapogi ma le matamau [pe a uma ona e papatiso]?

E Faapefea Ona Foai Atu Sefuluai ma Taulaga

O sefuluai ma taulaga e totogiina i le lotofuatiaifo ma e le faalauaiteleina. E mafai e tagata o le ekalesia ona totogi atu sefuluai ma taulaga i soo se taimi, ae e sili atu lava ona totogiina le sefuluai pe a maua le totogi faapea ma taulaga anapogi i le aso o le anapogi. E faia e tagata o le ekalesia ia foai e ala lea i le faatumuina o se lisiti, lea e maua mai le au epikopo. E teu e le tagata le kopi samasama ae tuu le kopi paepae faatasi ma le foai i totonu o se teutusi ua saunia. E tuuina atu le teutusi i se tasi o le au epikopo. E i ai le manatu o nei foai e paia ma e a le Alii ia. E tausia e se sui o le au epikopo ma se failautusi se faamaumauga e le faalauaiteleina o foai uma.

E auai atu tagata o le ekalesia i le faatalanoaga o le sefuluai faatasi ma le epikopo i le faaiuga o tausaga taitasi e faailoa atu ai lo latou faamaoni i le sefuluai. I lenei fonotaga e le faalauaiteleina, e maua ai e tagata o le ekalesia se lipoti o le faaiuga o le tausaga o a latou foai uma lava. O faamatalaga uma lava tau tupe e matuai le faalauaiteleina lava.

Aoa Atu Pe Faapefea Ona Foai Atu ia Sefuluai ma Taulaga

Faaali atu se lisiti foai ma faamalamalama atu pe faapefea ona faaoga. A maea ona papatiso ia tagata liliu mai, atonu e moomia ona e fesoasoani atu ia i latou i le faatumuina o le lisiti.

Usitai ma Faamamalu le Tulafono

E talitonu le Au Paia o Aso e Gata Ai i soo se mea i le usiusitai i tulafono a le atunuu o loo latou nonofo ai. Ua fautuaina tagata o le ekalesia ina ia avea ma tagatanuu lelei, ia auai i faiga faaupufai ma faigamalo, ma ia tuuina atu le auunaga i le nuu. Ae peitai, latou te faia ona o ni tagatanuu manatunatu, ae le o ni sui o le Ekalesia.

Mau SuesueinaMFF 58:21
MFF 98:5MFF 130:20–21
MFF 134

Mataupu Faavae o le Faatuatua 1:12

Tautinoga

- O le a e usiusitai la i tulafono a le atunuu o loo e nofo ai?

Fesili o le Faatalanoaga mo le Papatisoga e Faatatau I Ai

- Pe na e faia ea se solitulafono matuia? Afai o lea, o e faanofo vaavaaia nei pe ua e palola?
[Faaaliga: O se tagata e tali mai i le ioe i soo se tasi o nei fesili e tataua ona faatalanoaina e le peresitene o le misiona a o le'i papatisoina.]

Gaoioiga

Mo poloaiga taitasi o loo i totonu o lenei lesona, ia lisi ia folafolaga faatusipaia na faia e le Alii mo i latou o e tausia le poloaiga. Ia tusi i totonu o lau tusi o talaaga ia folafolaga na faataunuaina i lou olaga.

Faamatalaga

Tulafono ma Sauniga

Pe a Uma le Papatísoga ma le Faamauga



© 1996 Del Parson. Aua nei kopina.

Ia Saunia e Aoo Atu

A uma ona papatisoina ma faamauina ia tagata liliu mai, e fuafuaina e taitai o le uarota pe taulamua ia faifeautalai o le uarota po o faifeautalai faamisiona i le aoaoga ae po o le a le umi e aafia ai faifeautalai faamisiona. O lenei lesona e tatau ona aoaoina atu i tagata fou i le taimi lava e maea ai ona papatiso ma faamau. E mafai ona e amata ona aoaoina i latou i nei tulafono ma sauniga i le va o lo latou papatisoga ma le faamauga po o le aoaoina atu foi a o le'i papatisoina. O tagata ua saunia mo le papatisoga e tatau ona malamalama i nei tulafono ma sauniga a o le 'i papatisoina.

O lenei lesona e talitutusa lava ma le lesona 4. O le auala e te faaogaina e tatau ona fuafuaina i manaoga o tagata fou faatoa liliu mai faapea ma le taitaiga mai le Agaga. Ia mafafau pea ma tatalo pe faapefea ona fesoasoani i tagata faatoa liliu mai ina ia ola i le talalelei. O manatu e aofia ai:

- Aoo atu i le tagata fou ia tulafono ma sauniga uma taitasi mai le lesona lenei a o iloilo ina ia lesona o le "Savali o le Toefuataiga," "O le Ata o le Faaolataga," ma le "O le Talalelei a Iesu Keriso." Mo se faataitaiga, a o iloilo ina le savali o le Toefuataiga atonu e te manao e aoo atu e uiga i le perisitua ma le galuega faafaifeautalai; a o iloilo ina le ata o le faaolataga atonu e te aoo atu e uiga i le faaiipoipoga e faavavau, malumalu ma le talafaasolopito o le aiga, ma le aoo atu ma le aoaoina i totonu o le Ekalesia. Afai e iloilo ina le talalelei a Iesu Keriso atonu e te manao e aoo atu e uiga i le ala sa'o ma le vaapiapi ma le auauna atu i totonu o le Ekalesia.
- Aoaoina atu o ni tulafono ma sauniga se lua pe tolu e avea o se lesona e tasi.
- Aoaoina atu o se lesona po o se sauniga se tasi e avea ma se lesona.

Ia galulue faatasi ma tagata o le ekalesia ina ia fesoasoani i tagata fou e talia ma amata ona ola ai i nei tulafono ma sauniga. Fesoasoani i tagata fou ia iloa o le tausua o tulafono a le Atua, o le a faatumauina ai le faamagaloina o a latou agasala ma tumau ai i luga o le ala e tau atu i le ola faavavau. O le a latou maua le filemu ma le olioli sili. O le a latou maua tali i fesili o le olaga faapea ma le saogalemu i le iloaina lea ua latou auai i le Ekalesia moni a Iesu Keriso. O tulafono ma sauniga ua avea ma taiala mo le olaga fiafia, faatasi ai

ma le faatuatua ia Iesu Keriso ma se faamoemoe mausali i le mauaina o le ola faavavau faatasi ma lo tatou Tama o i le Lagi.

Aoa e uiga i Tulafono, Sauniga, ma Tautinoga

A o e suesueina ia “Tulafono ma Sauniga,” e fesoasoani tele le mulimuli ai i le faatulagaga o loo i lalo.

- Suesue le vaega lena o loo faamatalaina ai le mataupu autu, ma tusi se ata o se lesona faigofie e tolu i le lima ni manatu autu.
- Aoa atu i lau soa se vaega o lau lesona mo le lua i le tolu minute. Faataitai le auala o le a e tuuina atu ai le valaaulia mo tautinoga taitasi ma le auala o le a e foiaina ai ni popolega.
- Ia talanoaina ni auala lelei e fesoasoani ai i tagata faatoa liliu mai ina ia tausisia a latou tautinoga sa faia.

Perisitua ma Ausilali

O le perisitua o le mana ma le pule lea ua tuuina atu i le tagata e galue ai i le suafa o le Atua mo le faaolataga o Lana fanau. O le perisitua tatou te maua ai sauniga o le faaolataga, e faapea foi i faamanuiaga o le faamalologa, faamafanafanaga, ma fautuaga.

O loo taitaia e Iesu Keriso le Ekalesia a Iesu Keriso o le Au Paia o Aso e Gata Ai e ala i aposetolo ma perofeta. O nei tagata amiotonu o e ua valaauina e le Atua ua tuuina atu i ai le perisitua. Na faauuina e Keriso anamua Ana Aposetolo ma tuu atu ia i latou le perisitua. O lena pule na leiloa ina ua teena e tagata le talalelei ma fasiotia Keriso ma Aposetolo.

Na toefuatai mai le pule o le perisitua i le 1829 ina ua faaali atu Ioane le Papatiso i le Perofeta o Iosefa Samita ma Oliva Kaotui. Na faaee ona lima i luga o o la’ua ulu ma tuu atu i o la luga le Perisitua Arona (tagai i le MFF 13). I se taimi puupuu mulimuli ane na faaee ai foi lima o Peteru, Iakopo, ma Ioane o uluai Aposetolo e Toasefululua i luga o Iosefa Samita ma Oliva Kaotui ma tuuina atu i o la luga le Perisitua Mekisateko, lea sa mauaina e Peteru, Iakopo, ma Ioane ma ia Iesu Keriso (tagai i le MFF 27:12–13).

E faatoa mafai e se alii ona maua le pule o le perisitua i le faauuina sa’o lea e ala i le faaee atu o lima o se tasi o loo i ai le pule. O se alii e mauaina le perisitua e tuuina atu i ai se avanoa ofoofogia. E ulu atu o ia i se feagaiga ina ia faataunuuna ia tiute paia, auauna atu i isi, ma fesoasoani e fausia le Ekalesia. E tatau ona i a te ia le manao e auauna atu i le Atua ma ia tatau ona faauuina i lenei mana (tagai i le MFF 4:3; 63:57). E taua foi mo i latou e umia le perisitua ona faia sauniga paia, e pei o le papatisoga ma le faamauga. Afai e faaoga le pule o le perisitua ma le agavaa, o le a faaalia le mana o le Atua. O le mana o le perisitua e faatoa mafai ona faaogaina i le amiotonu, alofa, ma le onosai.

O perisitua uma lava e mai le Atua. E lua perisitua o loo i ai i le Ekalesia: o le Perisitua Arona ma le Perisitua Mekisateko. O le Perisitua Arona e faia ai sauniga e pei o le papatisoga ma le faamanatuga. O alii agavaa ua 12 tausaga ma sili atu e mauaina le Perisitua Arona i le taimi lava e maea ai ona papatisoina ma faamauina.

O alii matutua e agavaa o le a oo ina latou mauaina le Mekisateko, po o le Perisitua maualuga. E maua e tagata o le Ekalesia le tele o faamanuiaga faaletino ma faaleagaga e ala i le mana o lenei perisitua. O tagata e umia le Perisitua Mekisateko ma le agavaa e mafai ona tuuina atu le meaalofa o le Agaga Paia, faauuina isi i le perisitua pe a tofiaina ai, faauu i e mama’i i le suauu paia, ma tuuina atu faamanuiaga o le faamalologa ma le faamafanafanaga. O tane ma tama agavaa e umia le Perisitua Mekisateko e mafai ona

Faamatalaga

Faamatalaga

tuuina atu i o latou taitoalua, fanau, ma isi tagata o le aiga ia ni faamanuiaga faapitoo. O faiaoga o aiga e asiasi atu i aiga o tagata o le Ekalesia ma tausia na tagata ma aiga. O epikopo ma peresitene o siteki o faamasino i totonu o le Ekalesia. Ua ia i latou le pule e fesoasoani ai i le Au Paia o e ua agasala ina ia salamo ma olioli i le atoatoaga o faamanuiaga o le auai i le Ekalesia. Latou te faatalanoaina tagata ina ia mautinoa ai lo latou agavaa e ulu atu i le malumalu.

I lalo o le taitaiga a le perisitua, e fesoasoani ai faalapotopotoga a ausilali i le faamalolosia o tagata. O i latou o se puna malosi i le galuega faafaifeautalai a o latou fesoasoani i le sailia ma le aoaoina o tagata sailiili ma faaumea tagata fou liliu mai. O tamaitai e 18 tausaga ma matutua atu o sui o le Aualofa, lea e aapa atu i le auuina atu i aiga, tagata taitoatasi, ma nuu. O tamaitai talavou mai le 12 e oo i le 18 tausaga o sui ia o le polokalama a Tamaitai Talavou. O tama e i vaitausaga faapea e auai foi i le polokalama a Alii Talavou. O tamaiti uma mai le 3 e oo i le 11 tausaga o i latou ia o le vaega a le faalapotopotoga a le Peraimeri. O tagata uma lava e 12 tausaga ma sili atu e tusia o latou igoa i vasega o le Aoga Sa.

Mau Suesueina

Mosaea 18:17	MFF 84:19–20	Luka 9:1–6
Alema 13:1–19	MFF 107	Ioane 15:16
MFF 20:38–65	MFF 121:34–46	Iakopo 5:14–15

Tautinoga

- O le a e saunia la e maua le Perisitua Arona (o alii ua 12 tausaga ma sili atu ua talafeagai ma agavaa)?
- O le a e saunia la e maua le Perisitua Mekisateko (o alii matutua uma ua talafeagai ma agavaa)?
- O le a e auai la ma toaga i le ausilali talafeagai?

Galuega Faafaifeautalai

O tagata o le ekalesia o e faasoa atu le talalelei ua iloaina le olioli ma maua atili le Agaga o le Alii. A o tatou faasoa atu le talalelei, tatou te talisapaia lona matagofie ma le aoga ia i tatou, ma e tatou te lagonaina se alofa tele mo le Atua ma isi. Ua poloai mai le Alii i Ona soo ina ia talai atu le talalelei i le lalolagi uma, ua tuu atu ai i tagata uma le avanoa e talia pe teena ai. Afai e papatisoina tagata, latou te osia se feagaiga ina ia laulaututu pea e avea ma molimau o le Atua. Ua poloaiina i latou ina ia faasoa atu le talalelei ia i latou e le'i mauaina. A o latou ola ai ma le faamaoni i le talalelei, o le a latou faia se faataitaiga, ma faaali atu i tagata o o latou aiga ma uo ia faamanuiaga silisili e maua mai le ola ai i le talalelei. E tatau foi ona latou faaoga tatau ia avanoa e tali ai i fesili, ia faasoa atu tusi po o fesoasoaniga vaaia, ma valaaulia isi ina ia aoao atili e uiga i le savali o le talalelei toefuataiina. E tatau i tagata o le ekalesia ona tatalo mo i latou e le o ni tagata o le Ekalesia. E tatau ona latou tatalo mo ni avanoa faafaifeautalai—e auuina atu ai ia i latou e le auai i la tatou faatuatuaga ma faasoa atu i ai mea ua latou talitonu i ai. Ua folafola mai le Alii e fesoasoani atu i tagata o le ekalesia ina ia iloa le upu e fai ma mea e fai a o latou faasoa atu le talalelei.

Mau Suesueina

Iakopo 5:70–75	MFF 19:29	MFF 84:74–76, 88
Mosaea 28:3	MFF 33:8–11	MFF 88:81
MFF 18:10–16	MFF 38:40–42	MFF 100:5–8

Tautinoga

- O le a e saunia la e valaaulia ia uo ma aiga e le auai i le Ekalesia ina ia feiloai ma faifeautalai ina ia aoaoina i le talalelei?
- O le a e tatalo la mo faifeautalai ma ni avanoa e faasoa atu ai le talalelei?
- O le a e saunia la e ave se misiona?

Faaipoipoga e Faavavau

O le iunite faavae lava o le Ekalesia o le aiga lea. O totonu o le aiga, e maua ai e tagata le tele o fiafiaga silisili ma faanoanoaga o le olaga. O le faaipoipoga i le va o se alii ma se tamaitai ua faauuina e le Atua ma e totonugalemu i le fuafuaga faavavau a le Atua mo le faaolataga o Ana fanau. O le auala e foafoaina ai le ola faaletino ma na tofia mai le lagi ma ua malupuipua e le faaipoipoga. O le fuafuaga paia o le fiafia e mafai ai e sootaga faaleaiga ona tumau e oo i tala atu o le tuugamau. Ae peitai, o le faaipoipoga e faatoa mafai ona faavavau pe afai e faataunuuna e i latou o loo umia le perisitua ua faatagaina le sauniga o le faamauga i totonu o malumalu paia ma pe afai foi o le a tausia e tane ma ava ua faamauina faatasi ia feagaiga na la osia. O tane ma ava e ao ona alofa le tasi i le isi. A o la tausia ia poloaiga ma ola i mataupu faavae o le talalelei, ua la faamamaluina a la feagaiga o le faaipoipoga i le faamaoni atoatoa (tagai i le “O le Aiga: O Se Folafolaga i le Lalolagi,” *Liahona*, Ian. 1996, 123; tagai foi i le MFF 42:22).

O le fiafia i le olaga faaleaiga e foliga mai e sili atu ona ausia pe a faavae i aoaoga a Iesu Keriso ma pe afai e avea e matua lo la aiga ma faamuamua sili ona maua. “I le fuafuaga paia, e tatau ona pulefaamalumu tama i o latou aiga i le alofa ma le amiotonu ma o i latou e tuuina atu mea e manaomia o le olaga ma le puipuiga mo o latou aiga. O le uluai matafaioi a tina o le faafaileleina lea o a latou fanau. O nei matafaioi paia, e ao i tama ma tina ona fesoasoani le tasi i le isi o se paaga tutusa” (*Liahona*, Ian. 1996, 123). E ao i matua ona aoaoina faatasi le la fanau i le talalelei a Iesu Keriso ma fesoasoani ia i latou ia ola ai.

O loo faia e Satani se osofaiga e faasagatonu lava i aiga. O tausaga ua mavae na faataatiaese ai e taitai o le Ekalesia ia le afiafi o le Aso Gafua e avea ma se taimi mo afiafi faaleaiga. E tatau i matua ona faaoga le taimi lena e aoa ai a latou fanau i le talalelei, faamalolosia a latou sootaga ma i latou, ma fiafia faatasi. O isi auala e faamalolosia ai le aiga e aofia ai tatalo faaleaiga i aso taitasi faapea ma le suesueina o tusitusiga paia, tapuai faatasi i le lotu o se aiga, ma le auauna atu i isi. O le lagi o se faaauuina lea o se aiga moni. O sauniga o le perisitua ma le ola amiotonu e mafai ai ona tatou ola pea e faavavau o ni aiga i le afioaga o le Atua.

Faamatalaga

Faamatalaga

Mau Suesueina

Faaiipoipoga

MFF 42:22

MFF 49:15

MFF 131:1–4

MFF 132:7

Kenese 2:24

Efeso 5:25

“O Le Aiga: O Se Folafolaga
i le Lalolagi”

Aiga

Mosaea 4:14–15

3 Nifae 18:21

MFF 130:2

1 Timoteo 5:8

“O Le Aiga: O Se Folafolaga
i le Lalolagi”

Aoa le Fanau

Alema 56:47

Alema 57:21

MFF 68:25–30

Mose 6:55–62

Efeso 6:4

Faataoto 22:6

Tautinoga

- O le a e faia la se afaifi faleaiga i vaiaso taitasi, tatalo faaleaiga i aso taitasi, suesueina o tusitusiga paia i aso uma e le aiga, faapea isi gaioiga faaleaiga?
- O le a e saunia la e ulu atu i le malumalu ina ia (1) maua ou lava faaeega paia? (2) ia faaiipoipoina mo le olaga nei ma le faavavau? (3) ina ia faamauina mo le faavavau o se tane ma se ava pe afai ua faaiipoipo? ma le (4) ia faamauina lau lava fanau ia te oe?
- O le a outou tapuai la o se aiga i le Sapati?
- O le a e auaua atu la i isi?

Malumalu ma Talafaasolopito o le Aiga

Ua poloaia e le Atua Ona tagata ina ia fausia malumalu. O totonu o le malumalu tatou te osia ai feagaiga paia ma faia ai faaeega paia, po o le tuuina mai lea o le mana ma le malamalama mai luga. O le mana leni e fesoasoani ai ia i tatou i o tatou olaga i aso taitasi ina ia fausia le malo o le Atua. O totonu o le malumalu e mafai ai foi ona tatou faaiipoipo mo le olaga nei ma le faavavau, ina ia mafai ai e aiga ona faatasia e faavavau i le afioaga o le Atua. A mavae le tausaga e tasi talu ona auai i le ekalesia, e mafai e tagata matutua ua agavaa ona maua mai o latou epikopo se pepa faataga e maua ai o latou lava faaeega paia. A maea ona maua ia faaeega paia, e mafai ona faamauina pe faaiipoipoina ai foi ulugalii mo le faavavau.

E alofa le Faaola i tagata uma ma finagalo i lo latou faaolataga. Ae peitai e faitau miliona tagata na maliliu e le'i mauaina se avanoa e faalogo ai i le savali o le talalelei toefuataiina a Iesu Keriso po o le mauaina foi o sauniga faaola. O Lona alofa tunoa ma le alofa mutimutivale ua mafaia ai e le Alii ona saunia le faaolataga mo tagata uma e le'i maua le avanoa e maua ai, malamalama i ai, ma usiusitai ai i le talalelei i le taimi o latou olaga faaletino. O loo talaiina atu le talalelei i nei tagata ua maliliu i le lalolagi o agaga. O tagata o le Ekalesia o loo i le lalolagi e faatinoina ia sauniga faaola mo o latou augatuaa ma isi ua maliliu. O tagata ua maliliu o loo nonofo i le lalolagi o agaga e maua le avanoa e talia pe teena ai le talalelei ma sauniga ua faatinoina mo i latou.

O le mafuaaga lea e sailia ai e tagata o le Ekalesia ia faamatalaga e uiga i o latou tuua. Latou te faatumuina ia pepa o le faasologa o gafa ma pepa o ulugalii ma fanau ona auina atu lea o igoa o aiga ua maliliu o e o loo moomia le faataunuuna o sauniga faaola mo i latou i totonu o malumalu paia. O le galuega lea o talafaasolopito o le aiga. O tagata agavaa o le ekalesia ua 12 tausaga ma sili atu, e aofia ai tagata fou, e mafai ona latou maua mai o latou epikopo se pepa faataga e faia ai papatisoga mo e ua maliliu.

Talafaasolopito o le Aiga

la valaaulia ni tagata fou o le ekalesia ina ia feiloai ma se tagata o le ekalesia po o le o atu foi i se nofoaga autu o talafaasolopito o aiga (i vaega o loo maua ai) mo se faamalamalama i le galuega o talafaasolopito o le aiga faapea ma puna'oa o loo avanoa mo i latou. Ia tuu atu ia i latou se kopi o mea e faaogaina i talafaasolopito o le aiga.

Mau Suesueina

MFF 43:16	MFF 131	1 Peteru 3:18–21
MFF 95:8–9	MFF 132	1 Korinito 15:29
MFF 124:22–42	MFF 138	Brochure, <i>Welcome to the Family History Center</i>
MFF 128	Salamo 65:4	<i>[Afio Maia i le Ofisa Autu o Talafaasolopito o le Aiga]</i>

Tautinoga

- O le a e saunia la e maua ia sauniga o le malumalu? (O le taimi lava e uma ai le papatisoga ma le faamauga, ona mafai loa lea e tagata agavaa o le ekalesia ua 12 tausaga ma sili atu ona maua se pepa faataga e alu atu ai i le malumalu ma faia ia papatisoga mo e ua maliliu.)
- O le a e auai la i le galuega o le talafaasolopito o le aiga ma tuuina atu igoa o tuua ina ia maua sauniga e fai ai nisi ma sui mo i latou i totonu o le malumalu?

Auauna Atu

O se tasi o faamanuiaga silisili o le auai i le Ekalesia o le avanoa lea e auauna atu ai. Afai tatou te tuuina atu se auaunaga alofa i isi, ua tatou auauna atu lena i le Atua. Ina ua papatisoina i tatou, ua tatou osi feagaiga e tuuina atu lea auaunaga (tagai i le Mosaea 18:8–10). E ao ona tatou malamalama i manaoga faaletino ma faaleagaga o isi. Ona tatou tuuina atu lea o o tatou taimi, taleni, ma mea ua maua e fesoasoani ai ina ia ausia manaoga o i latou. Tatou te mulimuli i le faataitaga a le Faaola, o le na afio mai e auauna atu i isi. E ao ona tatou faia le mea na faia e Iesu ma ia avea faapei o Ia.

O le taimi lava e maea ai le papatisoga e maua ai e tagata fou o le ekalesia mai taitai perisitua le faamanuiaga o se tiutetauave e fesoasoani atu ai i totonu o le Ekalesia. E ta'ua lenei mea o se valaauga. O galuega uma i totonu o le Ekalesia e le totogia. E leai se tasi e totogiina mo lea auaunaga. Afai tatou te taliaina ia valaauga, e lagolagoina faalauaitetele i tatou i se sauniga a le Ekalesia ina ia mafai ai e isi tagata ona malamalama i o tatou valaauga ma tuuina mai le lagolago. E faamanuiaina foi i tatou e se taitai perisitua ma tuuina mai ia faamanuiaga faapitoa ia i tatou e fesoasoani ai i o tatou valaauga. E moomia e le Ekalesia ia taleni ma malosia o tagata uma ina ia faatumuina ai valaauga eseese. O valaauga uma lava e taua ma e fesoasoani atu ai i le fausiaina o le malo o le Atua. E ao ona tatou taliaina ia valaauga faapena ma galulue ma le maelega ina ia aoa ma faataunuu o tatou tiute. A tatou faia faapea, tatou te tuputupu a'e i le faatuatua ma faateleina ai lo tatou tomai e auauna atu, ma maua le anoanoai o isi faamanuiaga.

Mau Suesueina**Alofa Mama**

Morona'e 7:43–48	MFF 88:125	Mataio 22:36–40	1 Korinito 13:1–8
------------------	------------	-----------------	-------------------

Tausia o e Matitiva

Mosaea 4:26	Alema 34:28–29	MFF 52:40	Mataio 25:40
-------------	----------------	-----------	--------------

E Ao Ona Tatou Auauna Atu

Mosaea 2:17	Mosaea 18:8–10	MFF 42:29	MFF 107:99–100
-------------	----------------	-----------	----------------

Faamatalaga

Tautinoga

- O le a e taliaina la ma faataunuu ia tiute o se valaauga (e aofia ai se tofiga o le avea ma se faiaoga o aiga po o se faiaoga asiasi)?
- O le a e lagolagoina la isi i o latou valaauga?

Aoao Atu ma le Aoaina i totonu o le Ekalesia

Ua faatulagaina le Ekalesia ina ia faaatoatoa ma faamanuiaina olaga o tagata. E tuuina mai ai ia i tatou avanoa e aoao ai le tasi i le tasi i le talalelei, faaumea ma auauna atu le tasi i le tasi, ma lagolago e le tasi ia le tasi i la tatou sailiga mo le faaolataga. I totonu o le aiga ma le Ekalesia, e aoaina ai tagata uma taitoatasi o le ekalesia i mataupu o le talalelei. Afai e valaauina tagata i tofiga faiaoga, e tuuina atu ia i latou mea e faaogaina ma fesoasoani ia i latou ina ia faamanuiaina.

Mau Suesueina

MFF 88:77–79

Efeso 4:11–14

Tautinoga

- O le a e auai la i le lotu?

Tumau e oo i le luga

A o tatou faaauau ai ona ola i le talalelei, o le a tatou ola latalata atu i lo tatou Tama Faalelagi. Tatou te saga olioli ma taliaina atili le Togiola a le Faaola. O le a vavalalata o tatou aiga. Tatou te lagonaina ia faalogona silisili o le alofa, olioli, ma le filemu lea e maua mai le Togiola. E suia o tatou loto, ma tatou te maua le saogalemu i le ola ai i le talalelei toefuataiina.

A o tatou faaauau pea ona faatinoina le faatuatua ia Keriso, salamo, ma faafouina a tatou feagaiga, o le a faaauau pea ona tatou 'ae'ae i le taitaiga mai le Agaga Paia. Afai tatou te tumau pea e oo i le iuga o o tatou olaga e ala i le faamaoni i a tatou feagaiga, o le a tatou maua le ola faavavau.

E i ai ni nai tagata o le ekalesia e le tumau pe le atoatoa foi ona toaaga. Ae peitai, o le tumau e oo i le iuga o se tiutetauave a le tagata lava ia. Tatou te “galulue a’ia’i ina ia faaolaina i [tatou]” (Filipi 2:12), ma tatou auauna ma alolofa atu ia i latou o e ua vaivai lo latou faatuatua e ala i le toaga.

Mau Suesueina

2 Nifae 31:20–21
Moronae 6:4

MFF 20:37
Mataupu Faavae
o le Faatuatua 1:3

Ioane 14:15, 21
Filipi 2:12
Efeso 4:11–14

Tautinoga

- O le a faaauau lava la ona e ola i le talalelei e ala i le tausia o feagaiga o le papatisoga i lou olaga atoa?



E Faapefea Ona Ou Iloa ma Malamalama i le Agaga?

Faamatalaga

Manatunatu i le Mea Lenei

- Aisea ou te moomia ai ona maua faaaliga mo au lava ia?
- O ai le Agaga Paia ae faapefea ona galue o la?
- Aisea e tatau ai ona ou tatalo ma le faatuatua?
- O le a le matafaioi a le Agaga i le galuega faafaifeautalai?
- E mafai faapefea ona ou iloina musumusuga a le Agaga?

Faaaliga Faaletagata Lava Ia

Na saunoa Iosefa Samita, “E le mafai ona oo mai le faaolataga e aunoa ma faaaliga; e fai fua le galuega a se tasi e aunoa ma faaaliga” (*History of the Church*, 3:389). O le a faamanuiaina oe i lau galuega pe a e aoao e talia ma mulimuli i faaaliga. Na aoao mai foi Iosefa Samita o faaaliga e taua tele mo lau galuega i aso taitasi: “O le mataupu faavae leni o loo taitai ai le malo o le lagi—e ala i faaaliga o loo fetuuna’i i tulaga o loo tuu i ai fanau o le malo” (*History of the Church*, 5:135).

E alofa le Atua ia te oe faapea Ana fanau uma. E finagalo o Ia e lagolagoina oe i ou lu’itau patino e tula’i mai. Ua folafola atu ia te oe ia musumusuga ina ia e iloa ai le mea e fai ma ua tuuina atu le mana e faia ai (tagai i le MFF 43:15–16). O le a Ia fesoasoani ia te oe a o e taumafai e iloa ma malamalama i le Agaga e ala i le suesue ma le maelega i tusitusiga paia. O le a Ia taitai atu oe i tagata o le a taliaina le savali o le Toefuataiga. O le a Ia tuuina atu ia te oe le mana e momoli atu ai le savali ma molimau atu ia Keriso ma Lana talalelei. O le a Ia liligi ifo Ana faamanuiaga i ou luga e ala i le meaalofa o le Agaga Paia. Ua Ia poloai mai ina ia tumau pea lou agavaa mo leni meaalofa ma ia e ole atu, saili, ma tuitui atu (tagai i le MFF 4:7; Mataio 7:7–8).

Faamatalaga

O loo tatou ola i vaitaimi na valoia e perofeta o le Tusi a Mamona—o se vaitaimi o le a “fefinaua’i ai [tagata], latou te aoao atu lo latou lava poto, ma faafitia le Agaga Paia, o lē foai mai le upu” (2 Nifae 28:4; tagai foi 3 Nifae 29:6; Mamona 9:7–8). Ae e toatele foi tagata o loo naunau atu o latou loto i mea faaleagaga. A o e aoao e tali faaaliga faaletagata po o faaaliga mo oe lava ia, o le a e aoao atu i le mana ma le pule (tagai i le Alema 17:3) aua o le Agaga Paia e tuuina atu ia te oe le mana e tautala ai (tagai i le 1 Nifae 10:22).

E tatau ona e sailia ma tali faaaliga faaletagata e ala i le Agaga Paia a o e fesoasoani i tagata ina ia papatiso ma faamauina. Ia e faatuatua o le a e maua ia faaaliga faaletagata e taitaiina ai oe mai lea aso i lea aso. O le a fesoasoani le Agaga Paia ia te oe i vaega uma o lau galuega.

Gaoioiga: Suesuega Faaletagata Lava Ia

I le molimau faaiu a Moronae, na ia tusia ai “ni nai upu e fai ma apoapoiga” (Moronae 10:2). Faitau le Moronae 10 ma tusi i lalo i ni au lava upu le mea na apoapoai mai ai Moronae e fai e tagata e faitauina le Tusi a Mamona. (O le *apoapoai* o lona uiga o le matuai faamalosiua po o le uunaia o se tasi e fai se mea.)

O Le Malamalama o Keriso

E mafai e se tagata ona maua le taitaiga faaleagaga a o le’i papatiso ma faamauina. O lenei aafiaga faaleagaga e amata i le Malamalama o Keriso, lea e “foaiina atu i tagata uma ina ia iloa ai e i latou le lelei mai le leaga” (Moronae 7:16; tagai foi i fuaiupu e 14–19).

O le Malamalama o Keriso o le “malosiaga faalelagi, mana, po o le faatosinaga lea e sau mai le Atua e ala mai ia Keriso, ma tuuina atu ai le ola ma le malamalama i mea uma. O le tulafono lea e pulea ai mea uma i le lagi ma le lalolagi. E fesoasoani ai foi i tagata ia malamalama i upumoni o le talalelei ma fesoasoani e tuu i latou i luga o lena ala o le talalelei lea e tau atu i le faolataga.

“O le malamalama o Keriso e le tatau ona fenumia’ia ma le Agaga Paia. O le malamalama o Keriso e le o se tagata. O se uunaiga mai le Atua ma e saunia ai se tagata e talia le Agaga Paia. O se uunaiga mo le lelei i olaga o tagata uma.

“O se tasi faaaliga o le malamalama o Keriso o le mafaufau manino lea, lea e fesoasoani ai i se tagata e filifili i le va o le lelei ma le leaga. A aoao atili tagata e uiga i le talalelei, o le a faateleina le mataala o o latou mafaufau. O tagata e gauai atu i le malamalama o Keriso e taitaiina atu i le talalelei a Iesu Keriso” (The Guide to the Scriptures, “Light, Light of Christ;” tagai foi i le MFF 84:46–47).

Na saunoa mai Peresitene Boyd K. Packer, “E taua tele mo se . . . faifeautalai . . . ona iloa e mafai e le Agaga Paia ona galue e auala mai i le Malamalama o Keriso. E le totoina e se faiaoga o upumoni o le talalelei se mea e ese po o se mea fou i totonu o se tagata matua po o se tamaitiiti. Ae, e fesootai le faifeautalai po o le faiaoga ma le Agaga o Keriso lea ua i ai iina. O le a pei le talalelei o se leo ua latou masani i ai.” (“The Light of Christ,” address delivered at the seminar for new mission presidents, 22 June 2004, 2).

O Le Agaga Paia

O le peresona o le Agaga Paia. O le Agaga Paia o le sui lona tolu lea o le Aiga Atua. O Ia o se peresona o le agaga, ma e leai se tino o aano ma ivi (tagai i le MFF 130:22). O Ia o le Fesoasoani, lea na folafola atu e le Faaola i Ona soo o le a faamanatuina atu ia i latou mea uma na Ia aoao atu ia te i latou (tagai i le Ioane 14:26).

O le mana o le Agaga Paia. O le molimau lea e oo mai i tagata sailiili faamaoni a o le'i papatisoina, e sau mai le mana o le Agaga Paia. "E mafai ona oo mai le mana o le Agaga Paia i luga o se tasi a o le'i papatisoina ma molimau atu i ai e moni le talalelei" (The Guide to the Scriptures, "Holy Ghost"). E tuuina atu ai i se tasi se molimau ia Iesu Keriso ma lana galuega faapea le galuega a ana auauna i luga o le fogaeleele. E molimau atu le Agaga Paia e uiga i le upumoni. O mea uma e mafai e tagata ona iloa i le moni o le Tusi a Mamona, e ala mai lea i le mana o le Agaga Paia. "O le mana foi o le Agaga Paia tou te iloa ai le tonu i mea uma lava" (Moronae 10:5).

O le meaalofo o le Agaga Paia. O tagata sailiili o e mauaina se molimau, latou te le'i maua le folafolaga o le mafutaga faifai pea ma le Agaga Paia. Na saunoa Iosefa Samita: "E i ai se eseesega i le va o le Agaga Paia ma le meaalofo o le Agaga Paia. Na maua e Konelio le Agaga Paia a o le'i papatisoina o ia, o le mana lea o le Atua e faatalitonu ai o ia i le moni o le Talalelei, ae le'i mafai ona ia maua le meaalofo o le Agaga Paia seia uma ona papatisoina o ia. A na fai na te le taliaina lenei faailoga po o le sauniga i ona luga, semanu e toe alu ese le Agaga Paia lea na faatalitonuina o ia i le upumoni a le Atua" (History of the Church, 4:555).

". . . o le āiā tatau e maua ai le mafutaga faifaipea ma le Agaga Paia, pe afai e agavaa se tasi, o se meaalofo e na o le faaee atu o lima o se tasi o i ai le Perisitua Mekisateko pe a mae'a le papatisoga ua faatagaina i le Ekalesia moni a Iesu Keriso, e mafai ona maua ai. (The Guide to the Scriptures, "Holy Ghost").

I le ave'a ai ma se tagata o le Ekalesia, ua e maua le meaalofo o le Agaga Paia e ala i le pule o le perisitua. O lenei meaalofo e mafai ai e oe ona maua le mafutaga faifai pea ma le Agaga Paia pe a e tumau ai i le agavaa mo le mauaina. Tatalo mo le taitaiga a le Agaga, ma ia mulimuli ma le lototoa i musumusuga e te maua.

O Le Agaga Paia o le Folafolaga. O le Agaga Paia e faatatau foi lea i le Agaga Paia o le Folafolaga (tagai i le MFF 88:3). Ina ia faamaufaailoga e le Agaga Paia o le Folafolaga o lona uiga, o le faamautuina lea e le Agaga Paia e faapea o galuega amiotonu, sauniga, ma feagaiga e taliaina e le Atua. O le Agaga Paia o le Folafolaga e molimau atu i le Tama faapea o sauniga faaola na sa'o ona faatinoina, ma sa tausia foi feagaiga e o faatasi ma ia sauniga. O i latou o e faamaufaailogaina e le Agaga Paia o le Folafolaga e mauaina mea uma o i le Tama (tagai i le MFF 76:51-60; Efeso 1:13-14). O feagaiga ma faatinoga uma e tatau ona faamaufaailogaina e le Agaga Paia o le Folafolaga, ina ia aoga pe a uma lenei olaga (tagai i le MFF 132:7, 18-19, 26). O le solia o feagaiga e mafai ona aveeseina ai le faamaufaailoga.

Meaalofo a le Agaga. O meaalofo a le Agaga o ni faamanuiaga faaleagaga faapitoa ia e tuuina atu e le Alii i tagata agavaa ina ia manuia ai lava i latou, ma lo latou faaogaina e faamanuiaina ai foi isi. Mo se faataitaiga, o faifeautalai o ē e tatau ona aoaoina se gagana fou, e mafai ona latou maua le meaalofo o le tautala i gagana latou te maua ai le fesoasoani mai le lagi, e aoaoina ai se gagana. O nisi meaalofo a le Agaga o loo

"E oo mai le meaalofo o le Agaga Paia pe a maea ona salamo se tasi ma ua agavaa. . . . O le Agaga Paia e molimau mai i le upumoni ma e matuai faagaetia le agaga i le moni o le Atua le Tama ma le Alo o Iesu Keriso, lea e leai se mana po o se pule faalelalolagi e mafai ona vavaeeseina o ia mai lena malamalama."

— PERESITENE JAMES E. FAUST
"O LE MEAALOFO O LE AGAGA PAIA—O SE TAPASA MAUTINOA," LIAHONA, APE. 1996, 4

Faamatalaga

faamatalaina i le Moronae 10:8–18; Mataupu Faavae ma Feagaiga 46:11–33; ma le 1 Korinito 12:1–12. O nisi nei o faataitaiga o le anoanoai o meaalofa a le Agaga. E mafai e le Alii ona faamanuiaina oe i isi auala, ae faalagolago i lou faamaoni, o ou manaoga, ma manaoga o i latou o loo e auauna i ai. E tatau ona e manao i meaalofa faaleagaga ma saili ma le faamaoni i ai (tagai i le MFF 46:8; 1 Korinito 12:31; 14:1, 12). O nei meaalofa e oo mai e ala i le tatalo, faatuatua, ma galuega, e tusa ma le finagalo o le Atua (tagai i le MFF 63:9–12; 84:64–73).

Gaoiiga: Suesuega Faaletagata Lava la po o Suesuega Faalesoa

Faitau faamatalaga nei o loo i lalo:

- The Guide to the Scriptures, “Holy Ghost,” “Light, Light of Christ,” and “Spirit.”
- *Our Search for Happiness*, 84–86, 91–92.
- *Faamaoni i le Faatuatua*, 81–84, 165–67.

Tusi se faamatalaga i le natura ma le matafaioi a le Agaga Paia.

Faitau le Galuega 4:23–33.

- Na faapefea ona sailia e Peteru ma loane meaalofa faaleagaga?
- Na faapefea ona tali mai le Alii ia la’ua tatalo?
- O le a se mea e mafai ona e aoaina mai i lenei aafiaga e uiga i lau lava galuega?

O Le Mana o le Agaga i le Liuaina

O le mana o le Agaga Paia o le autu lea o le liuaina. Taumafai malosi ina ia malamalama i le aoaoga faavae o le liuaina faapea foi ma le aafiaga o le liuaina. Na faamalamalama mai e Elder Boyd K. Packer le matafaioi autu a le Agaga i le liuaina:

“Afai e tupu le liuaina, e auala mai lea i le mana o le Agaga. Ina ia faamanuiaina i le galuega faafaifeautalai, o mea nei e tolu e tatau ona tupu:

“E tatau ona tatou malamalama i lagona e tatau ona oo i se tagata sailiili ina ia liua ai.

“E tatau ona tatou malamalama i lagona e tatau ona oo i se faifeautalai ina ia mafai ai ona aoao atu ma le mana o le Agaga e faaliliuina mai ai.

“Ona tatau lea ona tatou malamalama i lagona e tatau ona oo i se tagata o le ekalesia, ina ia manuia ai i lea aafiaga o le liuaina ” (mission presidents’ conference, 3 Ape. 1985).

O lou malamalama lelei i lagona e oo i tagata sailiili, faifeautalai, ma tagata o le ekalesia pe a latou maua le molimau a le Agaga, o le lelei foi lena o lou malamalama i lau lava matafaioi, o le:

- Ia faateleina lou faaleagaga, ma ia faamalamalamaina lou mafaufau a o e sailiili i tusitusiga paia ma aoao atu le aoaoga faavae.
- Ia faatupuina se siosiomaga lea a e aoao atu, e mafai e le Agaga Paia ona molimau atu ai. E te faia lenei mea e ala i lou aoao atu ma molimau atu i le savali o le Toefuataiga. Aoao atu e pei ona



taitaiina ai e le Agaga, ma molimau atu ua e iloa e ala i le mana o le Agaga Paia, e moni mea ua e aoao atu.

- Mulimuli i le taitaiga a le Agaga i le fetuuna'ia o le savali e fuafua i mea o manaomia e tagata taitoatasi.
- Ia valaaulia tagata ina ia galulue. O le a tupu lo latou faatuatua pe a salamo, usiusitai i poloaiga, ma osia ma tausia feagaiga.

Na saunoa Elder M. Russell Ballard e faatatau i le mana o le Agaga: “O le liua moni e oo mai e ala i le mana o le Agaga. Pe a pa’i mai le agaga i le loto, ona suia ai lea o loto. Pe a lagonaina e tagata taitoatasi . . . le galue o le Agaga ia i latou, pe a latou vaaia foi se faamaoniga o le alofa ma le alofa mutimutivale o le Alii o latou olaga, o le a faamalamalamaina i latou ma faamalosia faaleagaga, ma o le a faateleina lo latou faatuatua ia te Ia. O nei aafiaga i le Agaga e oo mai lava pe a naunau se tagata e taliaina le upu. O le auala lea tatou te *lagonaina* ai le moni o le talalelei” (“O Le Taimi Lenei,” *Liahona*, Ian. 2001, 89).

E galue le Agaga Paia i loto o tagata ina ia oo mai ai nei suiga. A o filifili tagata e tausia a latou tautinoga, o le a latou lagonaina le faateleina o le malosi o le mana o le Agaga Paia ma o le a atiina ae ai le faatuatua e usiusitai ia Keriso. O lea, e tatau ai ona e fesoasoani i tagata o loo outou galulue ina ia atiina ae le faatuatua e ala lea i le valaauliaina o i latou ina ia salamo ma faia ma tausia ia tautinoga.

Gaoioiga: Suesuega Faaletagata Lava Ia

- Faitau se mau se tasi pe lua o mau nei, ma mafaufau loloto i lagona e tatau i se tagata sailiili ona mau ina ia liua ai. Tusitusi ou lagona ma manatu i totonu o lau tusi talaaga o suesuega. Ia talanoaina faatasi ma isi faifeautalai ma tagata o le ekalesia ou manatu.
2 Nifae 4:16–35; Enosa 1; Mosaea 4–5; 18:7–14; 27–28; Alema 5; 17–22; 32; 36; 38
- Faitau se mau se tasi pe lua mai mau nei ma mafaufau loloto i lagona e tatau ona oo ia te oe o se faifeautalai ma se tagata o le ekalesia, i lou aoao atu faatasi ma le mana e faaliliu mai ai. Tusitusi ou lagona ma manatu i lau tusi talaaga o suesuega. Ia talanoaina faatasi ma isi faifeautalai ma tagata o le ekalesia ou manatu.
1 Nifae 8:11–12; Mosaea 28:1–4; Alema 26; 29; 31:26–38; 32; Moronae 7:43–48; MFF 4; 18:10–16; 50:21–22

Mau Suesueina

O le a se mea o loo aoaoina mai e nei mau e uiga i le mana o le Agaga i lau galuega?

2 Nifae 33:1–2	MFF 50:13–22	1 Korinito 2:11–14
MFF 42:11–17	Galuega 2:37–38	Guide to the Scriptures, “Conversion, Convert”

O le a se mea e mafai ona e faia ina ia olioli ai i le mana o le Agaga i lau galuega?

Alema 32:27–28	MFF 42:14	Ioane 7:17
----------------	-----------	------------

Aisea e taua ai le aoao atu o mea ua e iloa ma talitonu i ai?

Alema 5:43–47	MFF 52:9	MFF 80:4
---------------	----------	----------

Tatalo ma le Faatuatua


E na o le mana lava o le Agaga e mafai ona e aoao atu ai i le ala a le Alii, ma e te maua le Agaga e ala lea i le tatalo o le faatuatua. Na fetalai mai le Alii, “o le a tuuina atu foi le Agaga ia te outou i le tatalo i le faatuatua; a e afai tou te le maua le Agaga ‘aua tou te aoao atu” (MFF 42:14). A e tatalo mo le fesoasoani i lau aoao atu, o le a molioo atu e le mana o le Agaga Paia au aoaoga i “loto o le fanauga a tagata” (2 Nifae 33:1).

Na tuuina mai e Peresitene Gordon B. Hinckley se faataitaiga o lenei mataupu faavae e ala lea i lona faamatalaina mai o se aafiaga na oo i ai i lana misiona:

“Ou te manatua pea ni alii talavou se toalua sa galulue i le misiona sa ou i ai. O le tasi sa matuai maoae lava. Sa lelei ana a’oga. E atamai. E vave tele. Ae sa fai si faamaualuga. O le isi alii o se tagata tusi igoa. Na sau o ia mai se fale faigaluega e tusi ai igoa ma e le lava sona aoaoga, ae sa ia malamalama i mea e vaivai ai, ma sa ia faalagolago i le Alii. Afai e tatalo o ia, e te iloa lava o loo talanoa o ia ma le Alii. E le o se mea sa tauloto, ae o se talanoaga [ma le Alii] ma sa ausia e lena alii talavou mea ofoofogia, ae o le isi alii talavou sa fai lona lava malamalama. Sa matua iloagofie le i ai o le mana i le tasi ma le leai o se mana i le isi. Valaau atu i le Alii. Ua Ia tuu mai le valaaulia, ma o le a Ia tali mai foi” (*Teachings of Gordon B. Hinckley* [1997], 469).

Taumafai e tatalo ma le faamaoni, ma le loto i ai ma le “malosi uma o le loto” (Moronae 7:48). O tatalo moni e moomia ai taumafaiga silisili (tagai i le Moronae 10:3–4; MFF 8:10; 9:7). Ia matuai mafaufau mamafa i ou uiga ma upu e te faaoga. Mafaufau i mea nei pe a e tatalo:

- Faaoga le gagana o le tatalo, lea e faaali atu ai e te alofa ma e faaloalo i le Tama Faalelagi. Faaoga le gagana talafeagai ma faaloalo i soo se gagana lava e te tautala ai. Mo se faataitaiga, i le faaPeretania ia faaoga sui nauna faatusipaia e pei o le *Afio*, ma le *Afioga*.
- Ia faailoa atu e lē aunoa lau faafetai mo ou faamanuiaga. O se taumafaiga ma le loto i ai ina ia e maua le loto faafetai, o le a fesoasoani e te iloa ai le alofa mutimutivale tele o le Alii i lou olaga.
- Ia patino ona tatalo mo le taitaiga ma le fesoasoaniga a le Agaga Paia. Ia faaali atu lou faatauaaina o lenei faamanuiaga e ala i le vave ona e lagona ma iloa musumusuga faaleagaga. Ona mulimuli lea ma le lototele i na musumusuga.



- Tatalo ma le alofa ma le alofa mama. Tatalo mo tagata i o latou igoa. Ole atu mo musumusuga ina ia fesoasoani e te malamalama ma taulima ai o latou manaoga. Tatalo mo le soifua manuia o tagata e faafesootai, o tagata sailiili, o tagata faatoa liliu mai, ma tagata o le ekalesia ua le toe toaaga mai. Tatalo mo tagata o le ekalesia ma taitai o le perisitua ma ausilali i lau eria. Tatalo mo lou aiga o loo faamuli mai. Tatalo mo lau soa, o isi faifeautalai, ma lou peresitene o le misiona. Tatalo ina ia iloa ai pe mafai faapefea ona e fesoasoani atu i isi, ona e naunau lea e te ositaulaga mo i latou.
- Tatalo ina ia faali atu ia te oe le mea e te alu i ai ma le mea e te faia. Tatalo ina ia taitai oe ia i latou o e ua saunia e talia le savali o le Toefuataiga. Tatalo ina ia e iloaina i latou.
- Ia e iloa e sili le silafia o lou Tama Faalelagi o mea o loo e moomia nai lo oe. Ia faalagolago i le Agaga ina ia iloa le mea e te tatalo atu ai (tagai i le 3 Nifae 19:24; MFF 46:28, 30).
- I au tatalo i le po, ia tuu atu i le Alii se faamatalaga o au galuega o le aso. Ona iloiloia lea faatasi ma Ia lau fuafuaga mo le isi aso. Faalogo mo musumusuga a le Agaga.
- Tatalo ina ia faatoilalo ia faaososoga. O le gauai atu i faaososoga e faalavelavea ai le Agaga.
- Tatalo, ma afai e talafeagai ai, ia anapogi mo ni faamanuiaga faapitoa.
- Tatalo e uiga i tusitusiga paia ma mafaufau loloto i ai. O tusitusiga paia e tatalaina ai le faitotoa i faaliga.
- Ia talitonu o le a tali mai le Atua i au tatalo. Ia iloa o manatu o le Atua e le o ou manatu ia (tagai i le Isaia 55:8–9), ma faatuatua i le Atua e tali mai au tatalo i Lana lava ala ma Lona lava taimi.

“O taeao uma lava . . . , e tatau ai i faifeautalai ona o ifo i o latou tulivae ma ole atu i le Alii ina ia tatalaina o latou laulaufaiva ma fetalai mai e auala mai ia i latou ia faamanuiaga o i latou o le a latou aoaoina. Afai o le a latou faia lenei mea, o le a oo mai se malamalama fou i o latou olaga. O le a faateleina le maelega mo le galuega. O le a latou iloa moni lava, o i latou o auuuna a le Alii o loo tautatala atu mo Ia. O le a latou mauaina se tali e ese mai ai mai ia i latou o loo latou aoaoina. A o latou faapea ona faia e ala i le Agaga, o le a tali mai foi a latou tagata sailiili i lea lava Agaga e tasi.”

—PERESITENE GORDON B. HINCKLEY
 “GALUEGA FAAFAIFEAUTALAI,” ULLUAI FONOTAGA FAALEAOAOGA A TAITAI I LE
 LALOLAGI ATOA, 11 IAN. 2003, 22


Gaoioiga: Suesuega Faaletagata Lava Ia

Mafaufau loloto i saunoaga nei e faatatau i le tatalo faamaoni:

“O le faafitauli i le tele o a tatou tatalo, tatou te faia e pei lava o loo tatou siina i luga le telefoni ma fai a tatou oka o oloa—a uma ona fai a tatou oka ona toe tuu lea i lalo. E moomia ona tatou manatunatu loloto, mafaufau lelei, ma manatunatu i lē o loo tatou tatalo atu ai ona talanoa atu lea i le Alii e pei lava o loo talanoa atu le tasi tagata i le isi tagata” (Gordon B. Hinckley, *Teachings of Gordon B. Hinckley*, 469).

“Afai o le tatalo e na o se tagi puupuu i taimi o faigata, o lona uiga ua na o se taumemumemu manatu faapito, ma tatou te manatu o le Atua o se tagata e lipeaina ni mea e leaga po o se auaunaga e fesoasoani ia i tatou mo na o taimi o faalavelave faafuasei. E tatau ona tatou manatuaina le Silisili Ese i le ao ma le po—i taimi uma—ae le na o taimi e le tali mai ai isi fesoasoaniga uma ma ua tatou matuai moomia ai le fesoasoani” (Howard W. Hunter, *The Teachings of Howard W. Hunter*, ed. Clyde J. Williams [1997], 39).

I le faaaogaina o le fua lenei, ia iloilo lava na o oe au tatalo. Ia tusi i totonu o lau tusi talaaga o suesuega ia tali i fesili e pei o nei: O fea o luga o le fua lenei e te tuuina oe i ai? O fea e te manao e te i ai i luga o lenei fua? O le a faapefea ona e suia?



Mau Suesueina

Aisea e tatau ai ona e tatalo mo le Agaga?

2 Nifae 32:8–9

MFF 42:14

MFF 50:13–22

O a mea e tatau ona e tatalo atu ai?

Alema 6:6

Alema 37:36–37

MFF 50:29–30

Alema 13:28

3 Nifae 18:20

Guide to the Scriptures, “Prayer”

Alema 34:17–27

3 Nifae 19:9

Aoao ia Iloa Musumusuga a le Agaga

E avanoa pea le Agaga e taitai ma faatonutonu oe. Ae peitai, e lemu lava le talanoa mai a le Agaga, e ala mai i ou lagona e faapea foi i lou mafaufau. O se tasi luitau mo oe faapea i latou o loo outou galulue faatasi, o le iloaina lea o uunaiga filemu, ma le malu a le Agaga Paia.

Na aoao mai Elder Boyd K. Packer: “O le leo o le Agaga o loo faamatalaina i tusitusiga paia faapea e lē ‘leotele’ e lē ‘saa.’ E le o se ‘leo o le faititili, po o le . . . leo o le pisapisao tele.’ Ae, o ‘se leo itiiti ma le filemu, o loo musumusuu atu,’ ma e mafai ona ‘ati i mea uma’ ma e ‘mafua ai ona pei e mu [le loto].’ (3 Nifae 11:3; Helamana 5:30; MFF 85:6–7.) Manatua, na iloa e Elia e le’i i ai le siufofoga o le Alii i le matagi, e le’i i ai i le mafuie, e le’i i ai i le afi, ae o se ‘leo filemu ma le itiiti.’ (1 Tupu 19:12.)

“E le faailoa mai le Agaga ia i tatou e ala lea i le tauvalaau mai pe luluina i tatou i se lima malosi. Ae musumusuu mai. E malu lona pa’i mai, lea e le mafai ona tatou lagonaina pe afai o loo tatou popole i nisi mea. (E leitioa a faaali mai le Upu o le Poto ia i tatou, aua pe mafai faapefea e se tagata ‘onā po o le tagata ua ma’i valea ona lagonaina lea ituaiga leo?)

“E i ai nisi taimi o le a matuai uunai mai ai i tatou ina ia tatou faalogo atu. Ae o le tele lava o taimi, afai tatou te lē gaua’i atu i le lagona malu, o le a alu ese le Agaga ma faatalitali seia tatou toe saili atu ma faalogo atu ma tatou faapea atu e pei o Samuelu anamua, ‘Fetalai maia le [Alii e], aua o loo faalogologo atu lau auauna.’ (1 Sam. 3:10.)” (“The Candle of the Lord,” *Ensign*, Ian. 1983, 53).

E tele leo o loo i le lalolagi o loo tauva ina ia tatou faalogo atu i ai, ma e faigofie lava ona latou taomia i lalo ia uunaiga faaleagaga pe afai e te le faaeteete.

Gaoioga: Suesuega Faaletagata Lava Ia po o Suesuega Faalesoa

Suesue le siata lenei. Mafaufau i taimi e te maua ai ni lagona, manatu, po o ni uunaiga e pei ona faamatalaina mai fuaitau o loo i lalo. A o e suesueina ma maua le malamalama, ia faaopoopo i ai isi fuaitau i lenei lisi. Mafaufau pe faapefea ona e faaogaina nei mataupu faavae e fesoasoani ai i isi ia lagona ma iloa le Agaga.

MFF 6:23; 11:12–14; Roma 15:13; Kalatia 5:22–23	E tuu mai ai lagona o le alofa, olioli, filemu, onosai, agamalu, agalelei, faatuatua, ma le faamoemoe.
MFF 8:2–3	E tuu mai ai manatu i le mafaufau, ma lagona i le loto.
MFF 128:1	E faatumuina le mafaufau ma uunai mai ai lagona.
Talafaasolopito—Iosefa Samita 2:11–12	E fesoasoani i tusitusiga paia ia malosi se aafiaga.
MFF 9:8–9	E tuu mai ai lagona lelei e aoao ai pe moni se mea.
Alema 32:28; MFF 6:14–15; 1 Korinito 2:9–11	E faamalamalamaina ai le mafaufau.
Alema 19:6	E suia ai le pouliuli i le malamalama.
Mosaea 5:2–5	E faamalosia ai le manao ina ia aloese mai le leaga ae usiusitai i poloaiga.
Ioane 14:26	Aoao atu le upumoni ma faamanatu mai ai.
Ioane 14:27	E tuuina mai ai lagona o le filemu ma le mafanafana.
Ioane 16:13	E taitaiina atu ai i le upumoni ma faaali mai mea o le a oo mai.
Morona 10:5	E faaalia maia le upumoni.
MFF 45:57	E taitaia ma puipuia mai i le faaseseina.
2 Nifae 31:18; MFF 20:27; Ioane 16:14	E faamamaluina ma molimau atu i le Atua le Tama ma Iesu Keriso.
MFF 42:16; 84:85; 100:5–8; Luka 12:11–12	E taitaiina upu a faiaoga lotomaulalo.
Ioane 16:8	E iloa ma faasa’o le agasala.

Faamatalaga

Moronae 10:8–17; MFF 46:8–26; 1 Korinito 12	E tuuina atu meaalofoa a le Agaga.
Alema 10:17; 12:3; 18:16, 20, 32, 35; MFF 63:41	E fesoasoani ina ia malamalama pe iloatino ai mafauauga o isi.
MFF 46:30; 50:29–30	E ta'uina atu le mea e tatalo atu ai.
2 Nifae 32:1–5; MFF 28:15	E ta'u atu le mea e fai.
1 Nifae 10:22; Alema 18:35	E fesoasoani i e amiotonu ina ia tautala atu ma le mana ma le pule.
MFF 21:9; 100:8; loane 15:26	E molimau mai i le upumoni.
2 Nifae 31:17; Alema 13:12; 3 Nifae 27:20	E faapaiaina ma aumaia le faamagaloga o agasala.
1 Nifae 2:16–17; 2 Nifae 33:1; Alema 24:8	E moliooina atu le upumoni i le loto o le tagata faalogologo.
1 Nifae 1:1–3; Esoto 31:3–5	E faalauteleina ia tomai ma mea e gafatia.
1 Nifae 7:15; 2 Nifae 28:1; 32:7; Alema 14:11; Mamona 3:16; Eteru 12:2	E uunai (tulei i luma) pe taofiofia (taofiofi mai i tua).
MFF 50:13–22	E faamalalamaina le faiaoga ma tamaiti aoga.
MFF 88:3; loane 14:26	E tuuina mai le faamafanafanaga.

I le tali i le fesili, “Pe faapefea ona tatou iloa musumusuga a le Agaga?” Na faitau e Peresitene Gordon B. Hinckley le Moronae 7:13, 16–17 ona saunoa mai lea: “O se tofotofoga lena, pe a maea ona tautalagia ma faia mea uma. Pe o faatauanauiua ea se tasi ina ia faia mea lelei, ia tulai i luga, ia tu maualuga ae, ia faia le mea sa’o, ia agalelei, ia lotofoai? O le Agaga lena o le Atua. . . .

“Afai na te valaaulia oe e faia mea lelei, e mai le Atua. Afai e valaaulia oe e fai le leaga, e mai le tiapolo ia. . . . Ma afai o loo e faia le mea sa’o ma afai o loo e ola i le ala sa’o, o le a e iloa i lou loto le mea o loo fai atu ai le Agaga ia te oe.

“E te iloina musumusuga a le Agaga e ala i fua o le Agaga—lea e faamalalamaina ai, lea e atiina ae ai, lea e lelei ma mausali ma faagaetia ai ma taitaiina atu ai i tatou i manatu lelei ma upu lelei ma galuega sili atu ona lelei, e mai le Agaga o le Atua ia” (*Teachings of Gordon B. Hinckley*, 260–61).

E tali mai le Atua i au tatalo e ala i musumusuga ma faaaliga faaletagata. E auala mai i le Agaga Paia o le a Ia taialaina oe i au taumafaiga e saili, a o e aoaoina atu le talalelei toefuataiina, ma a o e faamalasia tagata o le ekalesia ua le toe toaaga mai ma tagata fou liliu mai. O lau galuega o le ola agavaa lea, ia tatalo faatauanaui, ma aoao ia iloa ma mulimuli ma le lototele i le taitaiga a le Agaga.

Faalagolago i le Agaga

I le avea ai ma auauna a le Alii, e ao ona e faia Lana galuega i Lana ala ma Lona mana. O nisi faifeautalai ua lagona le mautinoa faapea ua latou iloa le auala e avea ai ma se faifeautalai faamanuiaina. O isi e le o i ai lena mautinoa. Ae peitai, ia manatua, o lou mautinoa ma lou faatuatua e tatau ona ia Keriso lea, ae le o oe lava. Faalagolago i le Agaga nai lo le faalagolago i au lava taleni ma mea e te gafatia. Faalagolago i le Agaga e taitaiina oe i vaega uma o lau galuega. Na aoao mai le Perofeta o Iosefa Samita e faapea o le Agaga o le faavae lea o le aoao atu ma le talai atu:

“E leai se tagata e mafai ona folafola atu le Talalelei e aunoa ma le Agaga Paia” (*History of the Church*, 2:477).

“E toaitiiti nisi o e ua valaauina ma faauuina e ala i le Agaga o faaaliga ma valoaga, ma amata ona folafola atu e pei ona tuuina atu e le Agaga upu e tautatala ai, ma e ui ina vaivai, ae sa faamalolosia i latou e le mana o le Atua” (*History of the Church*, 4:538).

“Na faaaauu ona tuuina atu e [Iosefa Samita] ia faatonuga i Toeaina e tusa ai ma le talaiga o le Talalelei, ma uunaia i latou e tatau ona mauaina le Agaga, ina ia mafai ona latou folafola atu ma le Agaga Paia na auina mai le lagi” (*History of the Church*, 4:13).

I le gasologa o le fuafuaina o au sauniuniga o le vaiaso ma aso taitasi, o le a e moomia ai ona fesiligia nisi o fesili masani i aso taitasi—e tusa lava pe faafia i le aso e tasi (tagai i le pusa o Mau e Suesueina lea o loo mulimuli mai ai faataitaiga o fesili). Saili mo musumusuga e tali ai nei fesili i se auala e ausia ai tulaga taitasi. Ona tatau lea ona faaoga tali i au fuafuaga. Ae e tatau foi ona e naunau e mulimuli i le Agaga ma sui au fuafuaga pe a tulai mai ni avanoa e le'i iloina muamua.

Suesue ia mau nei ma mafaufau pe faapefea ona latou taliina ia nei fesili taua ia e tatau ona e fesili ai i aso taitasi. Mafaufau i le uiga o nei fuaitau mo au taumafaiga e saili, fuafuaina o feiloaiga, ma Suesuega Faaletagata Lava Ia ma suesuega faalesoa. Ia mafaufau foi i o latou uiga a o e aoaoina atu ia lesona, ia valaaulia tagata e faia ni tautinoga, toe siaki ia tautinoga, faamalolosi tagata fou ma tagata o le ekalesia ua le toe toaaga mai, ma galulue faatasi ma tagata o le ekalesia.

Mau Suesueina

O fea e tatau ona ou alu i ai?

Helamana 10:17 MFF 75:26–27 MFF 31:11 MFF 79:1–2

O le a le mea e tatau ona ou fai?

1 Nifae 4:6 MFF 28:15 2 Nifae 32:2–5 MFF 52:3–4

O le a le mea e tatau ona ou tautala atu ai?

2 Nifae 33:1 MFF 33:8–10 Mataio 10:19–20
 Alema 5:43–46 MFF 50:13–22 Mareko 13:11
 Alema 11:22 MFF 68:1–4 1 Korinito 2:4–5, 12–13
 Helamana 5:18 MFF 75:3–11 Esoto 4:10–12
 Helamana 13:3–5 MFF 100:5–8

E faapefea ona ou fetuunaia la'u aoao atu ina ia fetai ma manaoga o a'u tagata sailiili?

Alema 12:7 3 Nifae 17:2–3 MFF 84:85
 Alema 41:1 MFF 71:1

O a mau e tatau ona ou faaogaina ae pe tatau faapefea ona ou faaogaina?

Mosaea 18:19–20 MFF 32:4 MFF 71:1
 Mosaea 27:35 MFF 42:11–17 MFF 80:4
 MFF 18:32–36 MFF 68:1–4 Luka 24:13–32

O Se Upu Lapatai

A o e tatalo mo musumusuga, e tatau foi ona e faamautuina ou lagona. Mo se faataitaiga, ia faatusatusa au faaiuga i tusitusiga paia ma aoaoga a perofeta soifua. Ia mauiina o loo ogatasi ia lagona ma le galuega faatino o loo e faia; mo se faataitaiga, e te le mauaina se faaaliga e ta'u atu ai i le epikopo o le uarota le auala e tatau ona ia faatino ai lona valaauga. Ia talanoaina au filifiliga ma faaiuga ma lau soa, lou taitai o le itu, po o lou peresitene o le misiona pe a talafeagai ai.

Faamatalaga

Na tuuina mai e Peresitene Howard W. Hunter le fautuaga lenei: “Ou te fia tuuina atu se upu lapatai. . . . Ou te manatu afai tatou te le faaeteete . . . , e ono mafai ona tatou amata taumafai e faasese le faatosinaga moni a le Agaga o le Alii e ala lea i faiga lē mama ma le taufaasese. Ou te popole lava pe a foliga mai o lagona malolosi ma loimata maligi fua, ua faatusatusa lena i le i ai o le Agaga. E mautinoa lava e mafai e le Agaga o le Alii ona aumaia faalogona malolosi, e aofia ai loimata, ae o lena faaaliga mai i fafo e ao ona le fenumia’ia ma le i ai o le Agaga lava ia” (*The Teachings of Howard W. Hunter*, 184). O le Agaga lava ia o le Alii e faamalamalamaina ai.

O faaaliga ma aafiaga faaletagata e paia tele. E tatau ona lē faalaua’iteleina ma ia na o tulaga talafeagai lava e talanoaina. I le aveai ai ma se faifeautalai, atonu ua sili atu ona e malamalama i aafiaga faaleagaga nai lo le taimi muamua o lou olaga. Ia tetee atu i faosoosoga e talanoaina faalaua’itele nei aafiaga.

Na fautua mai Elder Boyd K. Packer: “Ua ou aoaoina e faapea, o aafiaga malolosi faaleagaga e le oo soo mai ia i tatou. Ae afai e oo mai, e matele lava ina faamalamalama ai i tatou, aoaoina ai, pe faasa’o ai foi. Sei vagana ua valaauina i tatou i le pule tatau e faia ai, ae e lē tuuina atu ai i tatou i se tulaga e fautuaina pe faasa’oina ai isi.

“Ua ou talitonu foi e le o se tulaga atamai le talatalanoa pea i ni aafiaga faaleagaga tulaga ese. E ao ona tausia ma le faaeteete ma e faatoa faamatala lava pe a uunaia ai e le Agaga lava ia ina ia faaaoga e faamanuia ai isi” (*Ensign*, Ian. 1983, 53).

“Afai e agavaa, ua ia te i tatou le aia tatau e maua ai faaaliga mo i tatou lava, o matua mo a latou fanau, ma tagata o le Ekalesia mo o latou valaauga. Peitai, o le aia tatau mo faaaliga mo isi tagata, e le sopo atu mai a tatou matafaioi po o mea o i lalo o la tatou vaavaaiga.”

– PERESITENE JAMES E. FAUST
 “FESOOTAI MA LE AGAGA PAIA,” *LIAHONA*, MAT. 2002, 4

Mau Suesueina

O le faalagolago i le Agaga e matuai taua lava, lea ua matuai lapatai malosi mai ai le Alii ia i tatou ina ia aua nei faafitia pe teenaina le Agaga. O le a se mea e te aoaoina mai nei mau?

Iakopo 6:8–9
 3 Nifae 29:5–6

Mamona 9:7–9
 Moronae 10:7–8

MFF 11:25–26
 1 Tesalonia 5:19–20

Manatua le Mea Lenei

- Tatalo ma le faatuatua o le a tali mai au tatalo.
- Aoao ina ia malamalama, iloa, ma mulimuli i musumusuga a le Agaga.
- Aoao e faalagolago i le Agaga ina ia faaali atu le mea e te alu i ai, o le mea e te faia, ma le mea e te tautala atu ai.
- Aoao isi i le auala e iloa ai le Agaga.

Manatu mo Suesuega ma le Faaogaina

Faamatalaga

Suesuega Faaletagata Lava Ia

- la tusitusi i lau tusi talaaga ou aafiaga faaleagaga. Mo se faaitaiga, tali ia fesili e pei o le: Pe ua sili atu ea lo'u malamalama i se mea a o u' suesueina ia tusitusiga paia? Pe na ou maua ea ni avanoa e le masani ai e feiloai ai ma tagata o e e mafai ona ou faasoa atu i ai se savali? Pe sa tuuina mai ea ia te a'u ia upu ou te fai atu ai i le taimi na ou moomia ai? Pe sa ou maua ea ni lagona malolosi o le alofa mo tagata sa ou feiloai i ai? Na faapefea ona tali mai a'u tatalo?
- Vase ni koluma se lua i se itulau. Faaigoa le isi koluma "O Le Mea na Fai e le Alii" ae o le isi koluma "O le Mea na Fai e Liae po o Nifae." Faitau le tala i le Liahona ma le aufana na gau (1 Nifae 16:9–30) po o le tala i le fauina e Nifae o se vaa (1 Nifae 17:7–16; 18:1–6). A o e faitau, ia lisi mea na tutupu mai le tala i totonu o koluma talafeagai. Mafaufau po o le a se mea e mafai ona aoao atu e le tala ia te oe e uiga i le natura o musumusuga.
- Vaavaai i lau tusi talaaga ma saili ai ni mea na taitaiina ai oe e le Agaga pe na e iloa ai foi ni faaliga po o se isi meaalofo a le Agaga. Mafaufau po o le a le taimi, ae o fea, ae aisea foi e tutupu ai nei aafiaga. Pe na e faia se mea patino ina ia saunia ai oe lava ia mo lea aafiaga? Na faapefea ona faaaliga le aao o le Alii i lea aafiaga? O le a sou lagona na i ai? O le a se mea e mafai ona e faia ina ia maua ai nisi aafiaga faapena? O le manatuina o nei aafiaga e mafai ona fesoasoani ia te oe ia toe iloa ma talia le Agaga.
- O le tusi a Galuega i totonu o le Tusi Paia ua taua o le "Tusi o Galuega a le Agaga Paia i le Au Aposetolo." Faitau ia ulu mataupu o le tusi o Galuega ma faamatala pe aisea ua talafeagai ai lea ulutala. Saili ni faamaoniga e faamaonia ai lau faamalamalamaga.
- Suesue ma mafaufau loloto i le fautuaga lenei. E faapefea ona faatatau i au gaioiga talai i aso taitasi?

"Ia ta'u atu i le au uso ina ia lotomaulalo ma faatuatua ma ia mautinoa e tausia le Agaga o le Alii, ma o le a taitaiina ai i latou e faia le mea tonu. Ia faaeteete ne'i teena le leo ititi ma le filemu; o le a aoaina ai i latou i le mea e fai ma le mea e agai atu i ai; o le a gauai atu i fua o le malo. Ta'u atu i le au uso ina ia faaavanoaina o latou loto ina ia atiina ae ai le talitonuga maumaututu, ina ia oo mai le Agaga Paia ia i latou, a ua saunia o latou loto e taliaina. E mafai ona latou iloa le Agaga o le Alii mai isi agaga uma—na te musumusuina atu le filemu ma le olioli i o latou loto; na te aveesea le loto matau'a, inoino, femisaa'i ma mea leaga uma mai o latou loto, ma o lo latou naunautaiaga atoa o le faia lea o mea lelei" (sii mai le *Juvenile Instructor*, 19 Iulai 1873, 114).

Na tuu atu e le Perofeta o Iosefa Samita lenei fautuaga ia Polika laga i se miti i le toetiiti lea tolu tausaga talu ona mavae le maliu o Iosefa Samita. Ana fai sa e i ai i le tulaga o Polika laga ma mauaina lenei fautuaga, o le a se mea semanu e te faia?

- Suesue le Alema 33:1–12; 34:17–29, 38. O a fesili o loo tali e Alema? (Iloilo le Alema 33:1–2.) Na faapefea ona tali e Alema nei fesili? O a faamautinoaga na ia tuuina atu e faafogaina ma tali e le Atua ia tatalo?
- Na folafola mai e le Alii faapea o le a taitaiina i tatou e le Agaga i le tele o auala taua. A o e faitauina ia fuaiupu nei, ia vaai po o a vaega o lau galuega e moomia ai le taitaiga a le Agaga. O le a se uiga o poloaiga ma folafolaga o loo aofia ai i mau nei mo au Suesuega Faaletagata Lava Ia ma suesuega faalesoa? mo fonotaga faaleitu, konafesi faalesone, sauniga o papatisoga, ma isi fonotaga?

Tatalo

3 Nifae 19:24 MFF 50:30
MFF 46:30 Roma 8:26

Faamatalaga

Taita'ia o fonotaga

Moronae 6:9 MFF 20:45 MFF 46:2

Tusitusi

MFF 9:9 MFF 47:4 MFF 124:4
MFF 24:6 MFF 104:81 Mose 6:6

- Faitau mau nei (e aofia ai ulu mataupu o vaega nei).

MFF 60:1–5 MFF 61:1–4, 21–22 MFF 62:4–8

I le tala lenei, o le a le mea sa sili ona taua i le Alii?

O le a se mea e le'i afaina i le Alii?

Manatunatu i le saunoaga lenei mai ia Elder Dallin H. Oaks:

“[E mafai ona i ai se tagata] se manaoga malosi ina ia taitaiina e le Agaga o le Alii ae . . . ua ia faateleina e aunoa ma se faautautaga poto lena manaoga i le tulaga ua mana'o ai ina ia taitaiina i *mea uma lava*. O se manaoga e taitaiina e le Alii o se malosiaga, ae e tatau ona faia ma le malamalama ua tuuina mai e le Tama Faalelagi le tele o faaiuga mo a tatou lava filifiliga faaletagata. O le faia o filifiliga faaletagata o se tasi lea o punavai o le tuputupu ae e tatau ona tatou faia i le olaga lenei. O tagata e taumafai e tuu uma le faiga o faaiuga i le Alii ma aoi atu mo faaaliga i filifiliga uma, o le a le pine ae fetai ai ma tulaga ia na latou talosia ai taitaiga ae latou te le maua. Mo se faataitaiga, e ono tulai mai i le anoanoai o tulaga e le taua tele ai filifiliga po o le fetai ai foi o soo se filifiliga.

“E tatau ona tatou suesueina lelei mea i o tatou mafauau, ia faaoga ai mana e iloilo ai na tuuina i totonu o i tatou e Le na faia i tatou. Ona tatau lea ona tatou tatalo mo taitaiga ma tatou faia ai e pei ona tatou maua mai. Afai tatou te le maua mai se taitaiga, e tatau ona tatou faia le mea sili e tusa ai ma la tatou faamasinoga. O i latou o e tumau pea le saili atu mo le taitaiga e ala mai i faaaliga i ni mataupu e le'i filifilia e le Alii e taitaiina ai i tatou, e ono fauina mai i o latou lava manatunatuga po o faatosinaga a se vaega, pe atonu foi latou te mauaina mai se tasi e ala mai i se auala o faaaliga taufaasese” (“E Mafai Ona Avea o Tatou Malosiaga ma o Tatou Toilalo,” *Liahona*, Me. 1995, 15).

O le a le sootaga i le va o le mulimuli i lau lava faaiuga ma le faalagolago atu i le Agaga?

Suesuega Faalesoa

- Talanoa i tatalo e te lua faia o se soa. Pe o taitaiina ea e le Agaga Paia? Pe ua lua mauaina ea tali i a oulua tatalo? Pe a oulua tatalo o se soa, e te lua:
 - Talitonu o le a tuuina atu e le Atua mea e te lua ole atu ai i le amiotonu?
 - Faailoa atu ma tuu atu le faafetai mo tali i a oulua tatalo?
 - Tatalo mo tagata i o latou igoa ma manatunatu i o latou manaoga?
 - Tatalo ea le tasi mo le isi faapea le Agaga ina ia taitaiina oulua?
 - Mauaina tali i a oulua tatalo?

Ia talanoaina o se soa pe o le a faapefea ona oulua matuai sailia ma le faamaoni le Agaga.

- Ia talanoaina auala eseese e faamatalaina ai e tagata ia aafiaga a le Agaga Paia. Ia tusi i lalo ia faamatalaga a tagata sailiili e uiga i o latou aafiaga ma le Agaga i le aoaoina o le talalelei ma le taumafai e tausia tautinoga. E mafai faapefea ona e fesoasoani i isi ina ia iloa lenei aafiaga paia? E mafai faapefea ona e aloese mai le taufaasese a o faapea ona e faia?

Faamatalaga

- Mafaufau ma talanoaina pe faapefea ona faatatau le fautuaga leni ia te oe: “E le mafai ona e faia faamalosi mea faaleagaga. O upu e pei o le *faatonu*, *faamalosi*, *fa’au*, *uuna’i*, *poloai malosi*, e le faamatalaina ai a tatou aia i le Agaga. E le mafai ona sili atu lau faamalosi i le Agaga ina ia tali mai nai lo lou mafai ona faamalosi le fatupi e fotu mai, po o se fuamoia ina ia fofoa mai ae le’i oo i lona taimi. E mafai ona e faatupuina se siosiomaga e tapu’e ai le tuputupu a’e, faafailleina, ma le puipuia; ae le mafai ona e faamalosi pe uunaia: e tatau ona e faatalitali i le tuputupu a’e” (Boyd K. Packer, “The Candle of the Lord,” *Ensign*, Ian. 1983, 53).

- Ia talanoaina saunoaga nei ma le auala e mafai ai e nei mataupu faavae ona suia a oulua tatalo faapea foi la oulua galuega. E mafai faapefea e a oulua tatalo ona aafia ai a oulua fuafuaga, faatutuina o sini, galuega, ma gaoiiga o aso taitasi?

“O a tatou mea e fai, i le tele lava o tulaga, o taunuuga ia o a tatou tatalo. A uma ona tatalo, ona tatou gaoiioi lea; o a tatou olega tonu e i ai aafiaga i le tapasaina o se ala amiotonu o a tatou amioga” (Bruce R. McConkie, “Why the Lord Ordained Prayer,” *Ensign*, Ian. 1976, 12).

“O le tatalo faamaoni e atagia ai pe afai tatou te ole atu mo soo se faamanuiaga po o se uiga mama, e tatau ona tatou galulue mo le faamanuiaga ma galueaiina le uiga mama” (David O. McKay, *Secrets of a Happy Life*, 114–15).

“Ole atu i le [Atua] ina ia tuu oe i le mea e finagalo o ia e te i ai, ma ta’u atu ia te oe mea e finagalo o ia e te faia, ma ia e lagonaina ua e saunia e faia” (Brigham Young, *Discourses of Brigham Young*, sel. John A. Widtsoe [1954], 46).

Fonotaga Faaleitu ma Konafesi Faalesone

- Ia tuuina atu se lesona i le faaagaina o le gagana sa’o ma le faaaloalo i le tatalo.
- Pe a talafeagai ai, ia tuu atu i faifeautalai e faamatala se tala po o se aafiaga na latou faalogo i ai i se sauniga molimau e le’i mamao atu, se aafiaga a o aoao atu, po o se isi tulaga. O tala ma aafiaga faaleagaga e faamatalaina e isi tagata, e mafai ona fesoasoani ia te oe e atiina ae ai le faatuatua ma iloa ai o aafiaga o le Agaga, e taatele ma e molimauina i le tele o taimi.
- Ia faailoa atu le loto faafetai mo le faaaliga o le aao o le Alii i lau galuega (tagai i le MFF 59:21). Ia talanoaina pe faapefea ona fesoasoani le faailoa atu o le loto faafetai e te iloa ai nai tamai auala laiti ae e matuai taua lava, ua faamanuiaina ai oe e le Alii (tagai i le Eteru 3:5).
- Fai i faifeautalai e tuu atu ni tautalaga e uiga i le misiona ma le mana o le Agaga Paia.
- Fai atu i se tagata e le’i leva ona liliu mai e talanoa e uiga i le taimi na aafia ai o ia i le Agaga a o avea ma se tagata sailiili.

Peresitene o le Misiona

- Mai lea taimi i lea taimi, ia talosagaina ia faifeautalai ina ia tusi mai ai i a latou tusi faalevaiaso e auina atu ia te oe, ia ni aafiaga faaleagaga talafeagai.
- I faatalanoaga, ia fesili atu i faifeautalai mai lea taimi i lea taimi e uiga i a latou tatalo i le taeao ma le afiafi. Fesili atu i ai pe latou te lagona e i ai se uiga o a latou tatalo.
- Fesili atu i faifeautalai pe faapefea ona latou fesoasoani i tagata sailiili ia lagona ma iloa le Agaga.
- Pe a talafeagai ai, ia faamatala i faifeautalai le auala e te maua ai faaaliga mo siitaga, o faifeautalai ua le usiusitai, pe o moomia foi le fesoasoani, ma aoaoga faavae e aoaoina atu.



O le a le Matafaioi a le Tusi a Mamona?

Faamatalaga

Manatunatu i le Mea Lenei


- E faapefea ona avea le Tusi a Mamona ma maa 'au'au o lo tatou talitonuga?
- E faapefea ona tali e le Tusi a Mamona ia fesili aupito sili o le agaga?
- Aisea ua avea ai le Tusi a Mamona ma vaega sili ona mamana i le faagasologa o le liuaina?
- E tatau faapefea ona ou faaogaina le Tusi a Mamona e atiina ae ai le faatuatua ma fesoasoani i isi ina ia latalata atu i le Atua?
- Aisea ua tutotonu ai le lolafolaga o loo i le Moronae 10:3–5 i le galuega faafaifeautalai?

O le Tusi a Mamona o le faamaoniga mamana lea o le paia o Keriso. O le faamaoniga foi i le Toefuataiga na auala mai i le Perofeta o Iosefa Samita. O se vaega taua o le liuaina o le mauaina lea o se molimau mai le Agaga Paia faapea e moni le Tusi a Mamona. I le avea ai ma se faifeautalai, e tatau ona e mauaina muamua lava se molimau e moni le Tusi a Mamona. O lenei molimau e mafai ona tau atu i se faatuatua loloto ma le mausali i le mana o le Tusi a Mamona i le taimi o le faagasologa o le liuaina. Ia maua le lagona mautinoa faapea o le a molimau atu le Agaga Paia i soo se tasi e faitau ma mafaufau loloto i le Tusi a Mamona ma ole atu i le Atua i se loto faamaoni, manatu tonu, ma le faatuatua ia Keriso, pe moni. O lenei molimau o le Agaga Paia e tatau ona avea ma vaega tonu e taulai atu i ai lau aoaoga.

O Le Tusi a Mamona o le Maa 'Au'au o lo Tatou Talitonuga

Na aoao mai le Perofeta o Iosefa Samita e faapea o le Tusi a Mamona o le “maa 'au'au lea o lo tatou talitonuga” (faatomuaga i le Tusi a Mamona). Na ia saunoa mai i se tasi taimi: “A aveese le Tusi a Mamona ma faaaliga, o fea la e i ai lo tatou talitonuga? Ua leai se mea ia i tatou” (*History of the Church*, 2:52).

O se faitotoa faaofuofu, o se fausaga malosi e fausia mai i ni maa e pei e tafatolu o latou foliga lea e faalagolago le tasi i le isi.



O le fasi tafatolu e i le ogatotonu, o le maa ‘au’au lea, e masani lava ona lapoa atu nai lo isi fasi tafatolu ma e lokaina uma ai isi maa ina ia mau. Ina ua ta’ua e Iosefa Samita le Tusi a Mamona “o le maa ‘au’au o lo tatou talitonuga faalelotu,” na ia aoao mai faapea o le Tusi a Mamona o loo fusia faatasi lo tatou talitonuga. Na saunoa ia Peresitene Ezra Taft Benson e faapea o le Tusi a Mamona o le maa ‘au’au i ni vaega se tolu:

Molimau ia Keriso. “O le Tusi a Mamona o le maa ‘au’au lea o la tatou molimau ia Iesu Keriso, o Ia lava o le maa tulimanu o mea uma tatou te faia. O loo tauaveina ai le molimau mamana ma le manino i Lona moni.”

Atoatoaga o le aoaoga faavae. “O le Alii lava Ia na fetalai mai faapea o le Tusi a Mamona o loo aofia ai le ‘atoatoa o le talalelei a Iesu Keriso.’ (MFF 20:9) . . . O totonu o le Tusi a Mamona tatou te maua ai le atoatoa o na aoaoga faavae e moomia mo lo tatou faaolataga. Ma o loo matuai manino ma faigofie le aoaoina mai lea e oo lava i fanau e mafai ona aoaoina auala o le faaolataga ma le faaeaga.”



Faavae o le molimau. “E pei lava ona solofa i lalo se faitotoa faaofuofu pe a aveese le maa ‘au’au, e faapea foi ona faalagolago le tu po o le pau o le Ekalesia ato i le moni o le Tusi a Mamona. Ua malamalama lelei lava i ai fili o le Ekalesia i lenei mea. O le mafuaaga lea sa latou matuai taumafai ai lava ina ia fai se faiga e faaseseina ai le Tusi a Mamona, aua afai e mafai ona faaleagaina le Tusi a Mamona, e faapena foi i le Perofeta o Iosefa Samita. E faapena foi lo tatou aia i ki o le perisitua, ma faaaliga, ma le Ekalesia toefuataiina. Ae i le tulaga lava lea e tasi, afai e moni le Tusi a Mamona—ma ua fia miliona nei tagata ua tautino mai faapea na latou maua le molimau a le Agaga e moni

lava—ona tataua lea i se tasi ona taliaina ia aia o le Toefuataiga ma mea uma lava o loo aofia ai” (*A Witness and a Warning* [1988], 18–19).

O le Tusi a Mamona, a tuufaatasi ma le Agaga, o lau punaoa sili lea ona malosi i le liuaina mai. O le tusi sili lea ona sa’o i soo se tusi lava o i ai i le lalolagi (tagai i le faatomuaga i le Tusi a Mamona). O loo aoao mai ai ma le manino ia le aoaoga faavae a Keriso, aemaise lava i lesona e te aoaoina atu i tagata sailiili. Ia faaaoaga e ave ma au punaoa autu mo le aoaoina atu o le talalelei toefuataiina. O faaitaiga nei o upumoni o loo manino le aoaoina i totonu o le Tusi a Mamona lea o le a e aoaoina atu i tagata sailiili.

Lesona a le Faifeautalai	Aoaoga Faavae	Mau
O Le Savali o le Toefuataiga o le Talalelei a Iesu Keriso	Liliuese, Toefuataiga, Iosefa Samita, pule o le perisitua	1 Nifae 12–14 2 Nifae 3; 26–29 Mosaea 18
O Le Ata o le Faaolataga	O le “fuafuaga sili a le Atua faavavau,” e aofia ai le Pau o Atamu, o le Togiola, o le Toetu, ma le Faamasinoga	2 Nifae 2; 9 Mosaea 3; 15 Alema 12; 40–42
O Le Talalelei a Iesu Keriso	Faatuata ia Keriso, salamo, papatisoga, o le meaalofa o le Agaga Paia, ma le tumau e oo i le iuga	2 Nifae 31–32 3 Nifae 11; 27
O Poloaga; Tulafono ma Sauniga	Sauniga e pei o le papatisoga, faamauga, faauuga i le perisitua, ma le faamanatuga	3 Nifae 11:22–28; 18 Moronae 2–6

Gaoioiga: Suesuega Faaletagata Lava Ia

Tusi i totonu o lau tusi talaaga o suesuega ia tali i fesili nei:

- Na faapefea ona aafia lau molimau ia Iesu Keriso i lou suesueina o le Tusi a Mamona?
- E mafai faapefea ona e faaoga le Tusi a Mamona e fesoasoani ai e faamalosi ia molimau a isi?

Mau Suesueina**O le a le fetalaiga a le Faola e uiga i le Tusi a Mamona?**

MFF 1:29	MFF 19:26–27	MFF 42:12
MFF 3:19–20	MFF 20:5–16	Mose 7:62
MFF 17:6	MFF 33:16	



O le ata na tuuina mai i faaletagata a le C. Harrison Conroy Co., Inc. Aua na'i loppina.

O Le Tusi a Mamona o loo Molimau mai ia Keriso

O se faamoemoega autu o le Tusi a Mamona o le faatalitonu lea o tagata uma o Iesu o le Keriso (tagai i le itulau faaulutala o le Tusi a Mamona). E molimau mai ia Keriso e ala lea i le faamautuina o le moni o Lona soifuaga, misiona, ma le mana. O loo aoao mai ai le aoaoga faavae moni e faatatau i le Togiola—o le faavae mo le ata o le faaolataga. O nisi o i latou e ona tusitusiga o loo teuina i totonu o le Tusi a Mamona, sa vaaitino lava ia Keriso. O le uso o Iareto, Nifae, ma Iakopo na vaai i le Keriso i le muai olaga. Na vaai Mamona ma Moronae i le Keriso toetu. E le gata i lea, na auai le motu o tagata i le galuega puupuu ma le mamana a le Faola i tagata o sa Nifae (tagai i le 3 Nifae 11–28). O i latou

e laitiiti se mea e iloa po o le leai foi o se mea e iloa e uiga i le Faola, o le a iloina o Ia e ala i le faitau, mafaufau loloto, ma tatalo e uiga i le Tusi a Mamona.

O le molimau a le Tusi a Mamona e faamautuina ai le molimau a le Tusi Paia faapea o Iesu o le Alo e Toatasi na Fanaua e le Atua, ma le Faola o le lalolagi. A o e aoaoina atu le atoatoa o le talalelei a Iesu Keriso, o le a e molimau soo atu e uiga i le Faola ma le Togiola o le lalolagi. O le mana o le Agaga Paia, o le a e faaopoopo atu ai lau molimau ola i le moni o lenei savali.

Mau Suesueina**O a mafuaaga na tuuina mai e perofeta o le Tusi a Mamona na tusia ai a latou tusi?**

1 Nifae 6:4–6	2 Nifae 33:13–15	Upu a Mamona 1:3–8
1 Nifae 9:3–5	Iakopo 1:4–7	Alema 37:2, 14
2 Nifae 4:15–16	Iakopo 4:1–6, 12	3 Nifae 5:14–15
2 Nifae 25:23–29	Enosa 1:13	Mamona 8:35
2 Nifae 26:15–16	Iaroma 1:2	MFF 3:16–20
2 Nifae 29:11–14	Ominae 1:25–26	MFF 10:46–48

O Le Tusi a Mamona ma le Tusi Paia e Lagolago e le Tasi le Isi

O talitonuga o tagata e uiga i le Tusi Paia e matuai eseese lava. O nisi e talitonu faapea o le Tusi Paia ua matuai sa’o atoatoa, e aunoa ma se sese, ma e na o le pau lena o le mea tatou te manaomia ina ia faaolaina ai. O isi e manatu faapea o le Tusi Paia o se tusitusiga e aoga ona susesue i ai, ae latou te teena le avea ma se faamaoniga o le paia o Keriso ma vavega po o faaaliga tuusao mai le Atua. O nisi ua filifili e le amanaiaina le Tusi Paia, ae o isi e le’i vaai lava i le Tusi Paia pe maua foi se avanoa e faitau ai.

O le Au Paia o Aso e Gata Ai e “talitonu o le Tusi Paia o le afioga a le Atua i mea uma ua tonu ona faaliliuina” (Mataupu Faavae o le Faatuatua 1:8). E matuai le fia tauva lava i le Tusi Paia, ae e lagolagoina e le Tusi a Mamona, e uunaiina i tatou ina ia faitau i ai, ma molimau atu i le moni o lana savali. E tatau ona e faaaogaina le Tusi a Mamona ma le Tusi Paia e lagolagoina ai e le tasi le isi.

O le Tusi a Mamona o loo tautala i feagaiga anamua a le Atua na osia ma Ana fanau; o le Tusi Paia o loo faamatala mai ai ia perofeta maoae o e na mauaina foi nei feagaiga e ala i le faatuatua. O le Tusi a Mamona o loo molimau mai ia Keriso ma Lana Togiola; o le Tusi Paia o loo tuuina mai ai tala i Lona fanau mai, o Lana galuega, maliu, Togiola, ma le Toetu. O lea, e femolimaua’i ai le Tusi Paia ma le Tusi a Mamona ma lagolagoina e le tasi le isi.

O le lomiga faaPeretania a le AAG o le King James Version o le Tusi Paia ma le Tusi a Mamona, o loo i ai ia mau e fefaamalamalamaa’i ai ma ni fesoasoaniga mo susesuega lea e avea ai le laau a Iuta (le Tusi Paia) ma le laau a Iosefa (le Tusi a Mamona) ma laau e tasi i o tatou lima (tagai i le Esekielu 37:15–17; tagai foi i le 1 Nifae 13:34–41; 2 Nifae 3:12; 29:8). Ia ave le faamuamua i fuaitau o le Tusi a Mamona pe a e aoao atu, ae ia faaali atu foi le auala e taufai aoao atu uma ai e le Tusi a Mamona ma le Tusi Paia ia mataupu faavae e tasi.

Faaaoga le Tusi a Mamona e faamanino ma faamalamalama ai ia fuaitau o loo i le Tusi Paia. Mo se faataitaiga, o loo faapea mai le Feagaiga Fou na papatisoina Keriso ina ia “faataunuu ai mea tonu uma” (Mataio 3:14–15). O le Tusi a Mamona o loo faamalamalama mai ai le uiga o le faataunuu o mea tonu uma (tagai i le 2 Nifae 31:5–9).

A o e faaaogaina le Tusi a Mamona ma le Tusi Paia e avea ma se soa o tusitusiga paia, o le a la faatoilaloina ia feeseeseaiga ma faasa’o ai aoaoga faavae sese (tagai i le 2 Nifae 3:12).

O loo aoao mai le Tusi Paia i mea nei e uiga i le tulafono o molimau: “E mautu upu uma i le mau a le toalua po o le toatolu” (2 Korinito 13:1). Ina ia ogatasi ai ma lenei tulafono, o loo molimau uma mai le Tusi a Mamona ma le Tusi Paia ia Iesu Keriso.

Gaoioiga: Susesuega Faaletagata Lava Ia po o Susesuega Faalesoa

Ia sue mau e faamaonia ai ia autu nei i totonu o le Tusi a Mamona ma le Tusi Paia. O faataitaiga o loo tuuina atu i totonu o puipui pe a uma ia autu taitasi. Ia faaopoopo i ai ni au fuaitau ma ni au lava autu.

- Perofeta (Amosa 3:7 ma le Iakopo 4:4–6)
- Liliuese (2 Timoteo 4:3–4 ma le 2 Nifae 28)
- Toefuataiga (Galuega 3:19–21 ma le 1 Nifae 13:34–42)
- Fanau a le Atua (Galuega 17:29 ma le 1 Nifae 17:36)

Mau Suesueina**O le a le mea o loo fai mai ai le Tusi Paia e uiga i le Tusi a Mamona?**

Ioane 10:16 Esekiele 37:15–17 Guide to the Scriptures, “Ephraim,”
Isaia 29:4, 11–18 subheading: *The Stick of Ephraim or Joseph*

O le a le mea o loo fai mai ai le Tusi a Mamona e uiga i le Tusi Paia?

1 Nifae 13:20–29, 40–41 3 Nifae 23:1 Mamona 7:8–9
2 Nifae 29:3–14

O a ni auala ua avea uma ai ia tusi ma ni molimau ia Keriso?

2 Nifae 29:8 Ioane 20:31 Galuega 10:43

O Le Tusi a Mamona e Taliina Ai Fesili a le Agaga

Na saunoa Peresitene Ezra Taft Benson e faapea, o faifeautalai e “tatau ona silafia le ala e faaoga ai le [Tusi a Mamona] e tali ai fesili taua o le olaga” (“Faalilofia le Lalolagi i le Tusi a Mamona,” *Liahona*, Ian. 1989, 5).

“O fesili taua o le olaga” e mafai ona aofia ai fesili e pei o nei: Pe i ai moni ea se Atua? Pe sa ou ola muamua ae ou te le’i fanau mai? Pe ou te ola ea pe a mavae lo’u oti? O le a le faamoemoega o le olaga? Pe o Iesu moni ea o le Faaola?

O isi fesili e mafai ona sili atu le taulai i manaoga faaletino: E mafai faapefea ona ou faalelei le ma sootaga ma lo’u toalua? E mafai faapefea ona ou fesoasoani i a’u talavou ia aloese mai fualaau oona ma le ola lē mama? E mafai faapefea ona ou maua se galuega e tausi ai lo’u aiga?

E fesoasoani le talalelei a Iesu Keriso ia i tatou e taliina uma na ituaiga fesili. A tatou maua le faatuatua e moni le Tusi a Mamona, e mafai ona tatou amata taliina ia fesili e uiga i le faamoemoega o le olaga ma le faamoemoe mo le ola faavavau. O loo faamatalaina e le Tusi a Mamona le fuafuaga o le fiafia, lea o loo tuuina mai ai le uiga ma le vaaiga i le olaga. O tali i fesili faapena e pei o nei o loo matuai manino ona aoaoina mai i totonu o le Tusi a Mamona.



- Pe i ai ea se Atua? (Alema 22)
- O le a le mea o loo finagalo ai Iesu Keriso ia te au? (2 Nifae 9)
- E mafai faapefea e se talitonuga ia Iesu Keriso ona fesoasoani ia te au? (Alema 36)
- Pe i ai ea se olaga pe a mavae le oti? (Alema 40)
- O le a le faamoemoega o le olaga? (Alema 34)
- Aisea e faatagaina ai e le Atua ia mea leaga ma mafatiaga e oo mai? (2 Nifae 2; Alema 14:9–11; 60:13)
- Pe tatau ona papatiso la’u tamaitiiti? (Moronae 8)
- Pe silafia a’u e le Atua? (Alema 5:38, 58)

Faamatalaga

- Pe tali mai ea le Atua i tatalo? (Enosa 1)
- E mafai faapefea ona ou maua le filemu ma le olioli? (Mosaea 2, 4)
- E mafai faapefea ona fialia lo'u aiga ma sili atu ona lotogatasi? (Mosaea 2)
- E mafai faapefea ona ou faapaleni lo'u aiga ma la'u galuega? (3 Nifae 13)
- E mafai faapefea ona ou faamalosia le ma mafutaga ma lo'u toalua? (3 Nifae 14)
- E mafai faapefea ona ou aloese mai mea leaga o loo faamata'uina lo'u aiga? (Alema 39)
- E mafai faapefea ona ou aloese mai le agasala? (Helamana 5)

A o tatou faitau i le Tusi a Mamona faatasi ma le taitaiga a le Agaga, o le a fesoasoani ia i tatou e tali ia fesili e patino i le tagata lava ia. O loo aoao mai ai faapea o le tatalo ma faaaliga o le ki lea i le fofoina o ni faafitauli patino. E fesoasoani ia i tatou ia maua le faatuatua, o le a tali mai le Atua i a tatou tatalo.

E fesoasoani foi le Tusi a Mamona ia i tatou ina ia malamalama o poloaiga a le Atua e le o se lisi o mea e faasa ma mea e fai, ae o ni faasinoala i se olaga fialia ma le manuia. A o amata ona tatou malamalama o uluai mataupu faavae ma sauniga o le talalelei o le aualea i se olaga faatamaoigaina, o lo tatou talisapaiaina o nei mataupu faavae e fesoasoani lea e tali ai soo se fesili ma faamalieina ai soo se manaoga. Mo se faataitaiga, ua tatou malamalama o le salamo, faamagaloga, ma le feagaiga e auaua atu i isi e taua lea i le faaleleia o sootaga ma o tatou taitoalua. Ua tatou iloa o le faatuatua ia Keriso, taliaina ma le tausua o feagaiga, ma le mulimuli i uunaiga a le Agaga e mafai ona fesoasoani ai i talavou ina ia aloese mai faaosoosoga malolosi o loo siomia ai i latou.

E toetoe lava o soo se fesili po o soo se manaoga e mafai ona taliina e le talalelei. O le mafuaaga lea e ao ai ona e "aoao atu mataupu faavae o la'u talalelei, o i ai i le Tusi Paia ma le Tusi a Mamona, e i ai le atoatoa o le talalelei" (MFF 42:12).

Gaoioiga: Suesuega Faaletagata Lava Ia po o Suesuega Faalesoa

Fai se lisi o "fesili maoae o le olaga" na fesiligia e tagata sailiili. Sue ia fuaiupu i totonu o le Tusi a Mamona e taliina ai nei fesili. Tusi tali i totonu o lau tusi talaaga o suesuega, ma faaoga a o e aoao atu.

"I totonu o se lalolagi ua sili atu le matautia . . . o le Tusi a Mamona: O Se Tasi Molimau ia Iesu Keriso o loo i ai le mana e faamalolo ai agaga fia aai o le lalolagi."

– PERESITENE BOYD K. PACKER
"O LE TUSI A MAMONA: O SE TASI MOLIMAU IA IESU KERISO," *LIAHONA*, IAN. 2002, 73

O Le Tusi a Mamona e Faalatalata Atu Ai Tagata i le Atua

E tusa ai ma le Tusi a Mamona, na saunoa le Perofeta o Iosefa Samita e faapea "o le a latalata atu se tagata i le Atua e ala i le usitaia o ona mataupu, nai lo soo se isi lava tusi" (faatomuaga i le Tusi a Mamona). O le Tusi a Mamona o se mea lea e tupu ai le molimau ma faaaliga faaletagata. Faaoga le Tusi a Mamona e fesoasoani ai i tagata ia maua ni aafiaga faaleagaga, aemaise lava se molimau mai le Agaga Paia e faapea o le tusi lava ia e moni. O le tausisia pea o le valaauliaina o tagata ina ia ola i mataupu faavae o loo maua

i totonu o le Tusi a Mamona, e te fesoasoani ai ia i latou e atiina ae le faatuatua ia Iesu Keriso ma faalatalata atu i le Atua.

Na folafola mai e Peresitene Gordon B. Hinckley: “O i latou o e ua faitauina [le Tusi a Mamona] ma le agaga tatalo, pe mauoa pe matitiva, pe atamamai pe leai, ua tuputupu ae i latou i lona mana. . . . E aunoa ma so’u masalosalo ou te folafola atu faapea afai o le a e faitau ma le agaga tatalo le Tusi a Mamona, e tusa lava pe na faafia ona outou faitauina muamua, o le a oo mai lava i o outou loto . . . le Agaga o le Alii. O le a oo mai se faaiuga malosi ina ia savali i le usiusitai i ana poloaiga, ma o le a oo mai se molimau malosi i le moni o le soifua ai o le Alo o le Atua” (“The Power of the Book of Mormon,” *Ensign*, Iuni 1988, 6).

Faaoga le Tusi a Mamona e Tali Atu Ai i Tete

E toatele tagata o le a le talitonu i mea uma e te aoaoina atu. Na aoa mai e Peresitene Ezra Taft Benson le auala e mafai ai e le Tusi a Mamona ona avea ma punavai autu i le tali atu i tulaga faapena:

“E ao ona tatou faaaogaina le Tusi a Mamona e taulima ai tete i le Ekalesia. . . .

“ . . . O tete uma lava, pe o le faapau pepe, tele o faaipoipoga, tapuaiga i le aso fitu, ma isi, e faavae uma lava lea i le sailia pe o Iosefa Samita ma e na suitulaga atu ia te ia o ni perofeta a le Atua na maua ni faaaliga mai le lagi. . . .

“ . . . E na o le pau le faafitauli e ao i le tagata tete on ia fuafuaina e ia lava, o le sailia lea pe moni le Tusi a Mamona. Aua afai e moni le Tusi a Mamona, o lona uiga o Iesu o le Keriso, o Iosefa Samita o lana perofeta, O Le Ekalesia a Iesu Keriso o le Au Paia o Aso e Gata Ai e moni, ma o loo taitaia i aso nei e se perofeta o loo taliina ia faaaliga.

“O lo tatou faamoemoega autu o le folafola atu lea o le talalelei ma ia faia ma le lelei atoatoa. E le o faamalositia i tatou e tali atu i tete uma. O tagata uma lava e iu ina toe tau lava i le faatuatua, ma o iina e tatau ona fuafuaina ai lona tulaga” (*A Witness and a Warning*, 4–5).

Mo se faataitaiga, atonu e tete tagata sailiili i mea na e aoaoina atu e uiga i le Upu o le Poto. Fesoasoani ia i latou ina ia latou iloa o le latou fesili moni lava, o le fesiligia lea pe o Iosefa Samita sa talanoa mai o se perofeta a le Atua ina ua toe faafouina mai lenei poloaiga i lenei tisipenisione. Atonu e te faapea atu: “O le i ai o le faatuatua e talia ai lenei aoaoga o le a moomia ai le mautinoa o lenei poloaiga na oo mai ia i tatou e ala mai i faaaliga mai le Atua i le Perofeta o Iosefa Samita.

O le auala e iloa ai o Iosefa Samita o se perofeta a le Atua, o le faitau lea ma tatalo e uiga i le Tusi a Mamona.”

E tatau i tagata sailiili ona foia e i latou lava o latou atugaluga ma tete. E mafai ona e fesoasoani atu a o e faavaai i latou i le mea o le a faamalositia ai lo latou faatuatua ia Iesu Keriso—faitau ma tatalo e uiga i le Tusi a Mamona. Afai latou te faamalositia a latou molimau i le Toefuataiga, o le a latou maua foi le malosi e faatoilalo ai a latou tete ma atugaluga.



O La'u Aua'ina o Iosefa © 2004 e Liz Lemon Swindle. O lenei ata na loo glosia i le faalagaga a le Foundation Arts, American Fork, Iuta 84003.

Faamatalaga

A o e tali atu i atugaluga, ia manatua o lo tatou malamalamaaga e sau mai perofeta o ona po nei—o Iosefa Samita ma i latou na suitulaga atu ia te ia—o e na maua ia faaaliga tuusao mai le Atua. O lea la, o le fesili muamua lava e tali e se tagata sailiili, pe o Iosefa Samita o se perofeta a le Atua, ma e mafai e ia ona tali lenei fesili e ala lea i le faitau ma tatalo e uiga i le Tusi a Mamona.

Iosefa Samita ma le Tusi a Mamona

O le tasi auala e iloa ai o Iosefa Samita o se perofeta a le Atua o le faitau lea ma tatalo e uiga i le Tusi a Mamona.

Gaoioiga: Suesuega Faaletagata Lava Ia

I totonu o lau tusi talaaga o suesuega, ia tusi ai pe faapefea ona e faaoga ia Iosefa Samita ma le Tusi a Mamona e tali atu ai ni tetee po o atugaluga e pei o nei:

- “Ou te le talitonu na toe fetalai mai le Atua i tagata.”
- “Ou te talitonu e mafai ona ou tapuai atu i le Atua i la’u lava auala nai lo le auala atu i ni talitonuga faalelotu e faavaeina.”
- “Aisea e tatau ai ona ou lē toe inuina se uaina pe a ou ‘ai, pe afai ou te auai i le ekalesia?”
- “Aisea ou te moomia ai fua se talitonuga faalelotu?”

E Tatau Faapefea Ona e Faaogaina le Tusi a Mamona?

O le toatele lava o tagata sailiili e le faitau i le Tusi a Mamona po o le le malamalama foi i mea latou te faitauina. O i latou o e le faitauina pe le malamalama i le Tusi a Mamona, o le a faigata lava ona maua se molimau i lona moni.

Faitau faatasi ma Au Tagata Sailiili le Tusi a Mamona

A’o outou faitau faatasi, ia tatalo ina ia molimau atu le Agaga Paia i tagata sailiili, e moni le Tusi a Mamona.



E mafai ona e fesoasoani i tagata sailiili e ala lea i le faitauina faatasi ma i latou o le Tusi a Mamona. Tatalo mo le fesoasoani a o e filifilia ia fuaitau e tali atu ai i o latou popolega ma faafitauli. E mafai ona outou faitau faatasi ma i latou e avea o se vaega o se aoaoga po o se feiloaiga foi e toe siaki ai. E mafai foi ona e faatulagaina ni tagata o le ekalesia e faitau faatasi ma tagata sailiili.

O nisi fuaitau e patino lava le taua lea e aofia ai le itulau faaulutala, o le faatomuaga (aemaise lava i parakalafa mulimuli e lua), ma le Moronae 10:3–5. O nei fuaitau e fesoasoani ai i tagata sailiili ia malamalama i le auala e maua ai se molimau i le Tusi a Mamona. Ia uunaiina i latou ina ia faitau le Tusi a Mamona mai le amataga, e aofia ai ia mau a molimau e toatolu ma molimau e tovalu ma le molimau a le Perofeta o Iosefa Samita.

Faitau ma talanoaina ia fuaiupu pupuu (e pei o le 1 Nifae 3:7 po o le Mosaea 2:17) ma fuaiupu uumi po o mataupu ato (e pei o le 2 Nifae 31, Alema 7, po o le 3 Nifae 18).

Afai tou te faitau faatasi ma tagata sailiili, ia fai ma taofi ae talanoaina mea na outou faitauina. Ia faailoa atu savali autu po o aoaoga faavae taua e saili i ai a o outou faitau faatasi ma i latou. Ia fetufaai atu lou malamalama, lagona, molimau, ma aafiaga faaletagata talafeagai. Fesoasoani i isi ina ia lagona le mana faaleagaga o le Tusi a Mamona. O le auala lea e mafai ai ona e aoao sa’o atu ia i latou ia aoaoga faavae moni mai le Tusi a Mamona. Faaauau pea le faiga lenei i isi feiloaiga e sosoo ai, ina ia mafai e tagata o loo e aoaoina ona atiina ae le malosi ma le tomai e faitau ma tatalo ai na o i latou lava.

Ia aoao atu mataupu faavae ma aoaoga faavae e faaoga ai upu ma fuaitau a perofeta o le Tusi a Mamona. Ia faamalamalama atu le aotelega ma le aano o se fuaitau. Ia faamalamalama atu ni upu ma ni fuaitau e le masani ai.

Ia “faatatau” ia te oe ma au tagata sailiili ia mea na outou faitauina e ala lea i le sailia o ni vaega e faaoga ai e talafeagai lelei ia te oe lava ia faapea i au tagata sailiili (tagai i le 1 Nifae 19:23). O le “faatatau” o le fausia lea o se sootaga faalemafaua i le va o le malamalama i le aoaoga faavae ma le ola ai i le aoaoga faavae. O le faitau faamaoni, ma le manatu i ai, e tatau ai ia oe ma i latou o loo e aoaoina ona naunau e ola ai i le aoaoga faavae, ia tuu i totonu o lou olaga i aso taitasi, ma afai e talafeagai ai, ia salamo. O le ola ai i le aoaoga faavae, o le a e maua ai se faamautinoaga e moni. Mo se faaitaiga, atonu e te faapea atu i se tagata sailiili:

- “O Nifae, sa pei o oe, sa feagai ma se luitau faigata. Ae a o ia faaogaina le faatuatua e ‘alu atu ai ma fai’ le mea na poloaiina ai o ia e le Alii, sa mafai ona faamanuiaina o ia. (Faitau le 1 Nifae 3:7.) Ou te iloa o le a saunia e le Atua se ala mo oe e te ola ai i le Upu o le Poto.”
- “Ioane, e lelei tele lou manao ina ia e saoloto mai le lagona ta’usalaina lena o loo e lagonaina. E pei lava ona folafola atu e le Faaola i sa Nifae, afai e te salamo, ma papatisoina, ma talia le Agaga Paia, o le a ‘ta’uamiotonuina oe i luma [o le] Tama.’ ” (Faitau le 3 Nifae 27:16.)

Faalagolago i le folafolaga o loo i le Moronae 10:3–5. O tagata uma lava e faitau ma tatalo ma le faamaoni e uiga i lenei tusi e mafai ona iloa ma le mautinoa lona moni e ala i le mana o le Agaga Paia. Ia fai mea uma e te mafaia e fesoasoani ai i tagata sailiili:

- Faitau le Tusi a Mamona ma mafauafau loloto i lona savali e faatatau ia Iesu Keriso.
- Tatalo i le Atua ma le faatuatua ia Iesu Keriso ina ia maua se molimau e moni le Tusi a Mamona, ma o Iosefa Samita o le perofeta o le Toefuataiga.
- Tatalo faamaoni ma le manatu tonu i ai, o lona uiga ia latou faamoemoe e galulue e tusa ai ma le tali na latou maua mai le Atua.

“Faamolemole, aua ne’i manatu faaususili i le Tusi a Mamona. Tatalo mo se malamalama i le auala e mafai ona matuai faaoga lelei ai le Tusi a Mamona i lau misiona. Ou te folafola atu afai e te faapea ona fai, o le a faapupulaina lou mafauafau i le auala e tatau ona e uia.”

– ELDER JOSEPH B. WIRTHLIN
SEMINA MO PERESITENE FOU O MISIONA, 23 IUNI 1999

Faamatalaga

E tatau foi ona e faaaogaina lenei folafolaga i taimi uma ina ia faamalosia ma faafouina ai lau lava molimau i le Tusi a Mamona. O lenei molimau faafouina o le a fesoasoani e faamautuina ai se lagona mautinoa e faapea o soo se tasi lava e faaaogaina lenei folafolaga o le a mauaina le tali.

Faaaoga le Tusi a Mamona i Vaega Uma o Lau Galuega

O le Tusi a Mamona o se punaoa mamana i le liuaina mai. Ia faaaoga e avea ma au punavai autu o le aoaoina atu o le upumoni.

Manatua le Mea Lenei:

- O le Tusi a Mamona o le maa 'au'au o la tatou molimau ia Keriso, o la tatou aoaoga faavae, ma a tatou molimau.
- O le Tusi a Mamona o loo manino ona aoao mai ai ia aoaoga faavae o loo maua i lesona a faifeautalai.
- Faaaoga le Tusi a Mamona e tali ai fesili o le agaga ma tali atu ai i tetee i le Ekalesia.
- Ia faitau faatasi e le aunoa ma au tagata sailiili ma tagata fou faatoa liliu mai, i le Tusi a Mamona. Ia fai mea uma e te mafaia e fesoasoani ai ia i latou ia faitau na o i latou lava i aso uma ma faaaoga mea na latou aoaoina i o latou olaga.
- Faalagolago i le folafolaga a le Alii e faapea o tagata uma lava o e faitau ma le faamaoni ma tatato e uiga i le Tusi a Mamona, o le a iloa lona moni e ala i le mana o le Agaga Paia.

Manatu mo Suesuega ma le Faaogaina

Faamatalaga

Suesuega Faaletagata Lava Ia

- Faitau le 2 Nifae 2, 9, 30, 31, 32, faailoga vaega uma lava e faatatau ia lesu Keriso. Ia fai se lisi o igoa po o suafa eseese mo Keriso o loo faaogaina i nei mataupu. Ia vasevase lalo o upu na fetalai ai Keriso. Ia faailoga Ona uiga ma Ana mea na fai. Atonu e te manao e faaauau lenei faataitaiga i le Tusi Mamona atoa.
- Tusi i totonu o lau tusi talaaga o suesuega ou lagona ina ua e faatoa mauaina se molimau faaleagaga i le moni o le Tusi a Mamona.
- O le MFF 20:17 o loo faaoga ai le fuaitau “ona o nei mea matou te mautinoa” e faailoa mai ai aoaoga faavae o loo aoaoina ma faamaninoina mai e le Tusi a Mamona. Faitau le MFF 20:15–35 ma fai se lisi o aoaoga faavae o loo ta’ua mai ai. Filifili se aoaoga faavae se tasi mai nei aoaoga faavae ma faaoga le Guide to the Scriptures e faatusatusa ai lau lisi i mea o loo aoao mai e le Tusi Paia e uiga i aoaoga faavae.
- Faatusatusa le Lauga i luga o le Mauga o loo i le Mataio 5–7 ma le lauga a Keriso i le malumalu o loo i le 3 Nifae 12–14. Fai se lisi o upumoni manino ma le matagofie na toefuatai mai e ala mai i le Tusi a Mamona.
- Fai se lisi o fesili na tuuina atu e tagata sailiili. Sue ia fuaiupu o le Tusi a Mamona e tali ai na fesili, ma faaoga pe a manaomia ai i lau aoao atu i aso taitasi.
- Sue se mau o le Tusi a Mamona na suia ai lou olaga. Ia tusitusi ou lagona e uiga i lenei mau i totonu o lau tusi talaaga o suesuega.
- Ia saili ia faataitaiga taitasi i totonu o le Tusi a Mamona lea o loo tusia ai ia upu o le tatalo a se tasi. Ia tusi i totonu o lau tusi talaaga o suesuega ia vaega masani o nei tatalo.
- Faitau le 2 Nifae 33:10–15 ma le Moronae 10:27–29, 34. O le a se mea o le a e ta’u atu ia Nifae ma Moronae i luma o le faamasinoga e uiga i lou faaogaina o le Tusi a Mamona? Tusi lau tali ma faatutu ni sini ina ia faaleleia.
- Mai ulutala o mataupu o le Mosaea 11–16, tusi se aotelega o mea na aoao atu e Apinati. Faitau nei mataupu ma faalatele lau aotelega.
- Mai ulutala o mataupu o le Mosaea 2–5, tusi se aotelega o mea na aoao atu e le Tupu o Peniamina. Faitau mataupu nei ma faalatele lau aotelega.
- A o e faitau i aso taitasi mai le Tusi a Mamona, ia tusi i totonu o lau tusi talaaga o suesuega ia fuaitau na faagaetia ai oe. Ia tusi pe o le a faapefea ona e faaogaina i lou olaga.

Suesuega Faalesoa

- Faitau faatasi ia fuaitau o le Tusi a Mamona. Ia fetufaa’i mea na oulua aoaoina ma lagonaina. Ia faailoa atu foi le molimau a le tasi i le isi.
- O ai le perofeta po o le faifeautalai o le Tusi a Mamona e te fia soo i ai ae aisea? Ia faamatala atu lau tali i lau soa.
- Faitau e le lua soa le Alema 26 ma le 29. Ia faamatala atu po o a ni ou lagona i lau misiona. Tusi ou lagona i totonu o lau tusi talaaga o suesuega.
- Faitau le Alema 37:9 ma talanoaina po o le a se taua o tusitusiga paia ia Amona ma ona uso faifeautalai. Saili ia mau o loo faamatalaina ai le auala na latou faaoga ai ia tusitusiga paia.

Faamatalaga

- Faitau faatasi ma lau soa le Alema 11–14, ia ave e le tasi le matafaioti a Alema po o Amoleka ae o le isi e fai ma taufaaleaga. Ia matauina le auala na tali atu ai nei faifeautalai i fesili faigata.
- Faitau le tala moni lenei ma talanoaina mea na e aoaoina e tusa ai o le taua ma le mana o le Tusi a Mamona (ua suia ia igoa).

“Ina ua ma valaaulia le aiga o Sinaita ina ia papatiso ma faamauiina, sa saunia ia Tuafafine Sinaita, ae sa faapea mai ia Uso Sinaita, ‘Aua ne’i oulua soona faamoemoe [faapea ou te papatiso], alii faifeau. Ou te le iloa pe mafai ona ou faia lenei meal’ E ui lava sa taliaina e Uso Sinaita mea na ma aoaoina atu ma sa agalelei o ia ma faauo, ae sa matuai popole lava o ia i ni uiga o le a faaali atu e lona aiga ia te ia i lona auai atu i se isi lotu.

“Ina ua mavae ni nai vaiaso o matauina pea ia tauiviga sa feagai ma Uso Sinaita, sa ma lagonaina ma la’u soa le faagaetia e toe faitau faatasi ma le aiga o Sinaita le 3 Nifae 11. O le a le galo lava ia te a’u le mea na tupu i lena po. A o matou susueina le Tusi a Mamona, sa faamalalama atu e la’u soa e faapea, ‘O lenei mataupu, e pei ona outou manatuaina, o loo faamatala mai ai le asiasi atu o le Faaola i tagata o loo i totonu o le Tusi a Mamona. O i lea tatou te faitau ai i le alofa o le Faaola mo nei tagata ma mea na la aoao atu ia i latou.’ Na matou feauauai i le faitauina o fuaiupu taitasi pe tailua. Ina ua maea ona faitau le fuaiupu e 5, sa faalavelave mai la’u soa ma faapea mai, ‘Ou te lagona pea lava le maofa i le faamatalaga lea o loo tuuina mai i le fuaiupu lea i le leo na latou faalogoina. E le o se leo saua, e le leotele, ma e ui lava o se leo itiiti, ae na matuai tuia ai lava i latou. O lenei leo sa le gata na lagona i taliga, ae sa tautala atu foi i o latou loto.’ Sa ou mata’ia le aiga o Sinaita a o latou faalogo atu ma le toto’a i la’u soa.

“Ina ua mavae sina talatalanoaga e uiga i le tatalo ma le faalogo atu i le Agaga, sa oo atu loa le faasologa ia Uso Sinaita e faitau ai: ‘Faauta foi, o le atu tolu ua malamalama ai ia te i latou le leo na latou faalogoina, ma ua fetalai mai ia te i latou: Faauta, o lo’u Atalii pele, ua ou fiafia ia te ia, ua ou faamamaluina lo’u igoa—ia outou faalogologo ia te ia.’ Sa taofi ia Uso Sinaita, ma pulato’a i lana Tusi a Mamona. Ona ia vaai mai lea ia te a’u ma faapea mai, ‘Sa matuai fiafia lava le Tama Faalelagi i Lona Atalii, a ea?’ ‘Ioe,’ sa ou fai atu ai. Sa toe vaavaai ia Uso Sinaita i lana tusi ma toe pulato’a i itulau o loo matala e pei o loo mafaufau loloto. Na iu ina ua fai mai, ‘Ou te manao i le Tama Faalelagi ina ia fiafia foi ia te a’u. Ou te le iloa pe o le a faapefea ona ia faailoa mai a’u. Ou te matea, afai ou te . . . , afai ou te manao ia te la ina ia fiafia ia te a’u, e sili la ona ou faia le mea o loo la finagalo ou te faia.’ ‘Ioe, ou te manatu o le a taua lena,’ sa ou tali atu ai. ‘Ia,’ sa faaauau ai le faamatalaga a Uso Sinaita. ‘Ou te manatu sa ou popole tele i manatu o isi tagata ae le o le mea o loo finagalo i ai le Atua.’ Ina ua mavae sina taimi puupuu na taofi ai, sa luelue le ulu o Uso Sinaita faatasi ma se vaaiga naunautai i ona foliga ma faapea mai, ‘Ou te manatu e sili pe a ou papatiso.’ O lana tali e le’i faamoemoeina, lea na mafua ai ona ma sioa atu i ai ma la’u soa. Na iu ina ua faapea atu la’u soa, ‘Ioe, o le mea sa’o lena e fai. O le mea moni lava, i se vaega mulimuli ane o le mataupu lava lea na aoao atu ai le Faaola . . .’ E pei ona aoao atu la’u soa sa ou lagonaina se mea e pei e mu i totonu o lo’u loto ma faafetai ai mo le mana o le Tusi a Mamona.”

Na faapefea ona faaaoga e nei faifeautalai le Tusi a Mamona? O le a faapefea ona oulua matuai faaaogaina ma le atoatoa ma lau soa i a oulua taumafaiga faafaifeautalai?

Fonotaga Faaleitu ma Konafesi Faalesone

- Faataitai ona faaaoga le Tusi a Mamona i auala uma taitasi o loo ta’ua i ulutala autu o lenei mataupu.
- Ia lisi ni tete po o ni fesili e tuu atu e tagata sailiili. Ia faamalalama atu i isi le auala e te tali atu ai i nei fesili e faaaoga ai le Tusi a Mamona.

Faamatalaga

- Faitau faatasi ia fuaitau o le Tusi a Mamona. Ia fetufaai atu le malamalama, o lagona, ma molimau.
- Faataitai le faaaogaina o le Tusi a Mamona e faamautu ai le savali o le Toefuataiga.
- Filifili se faifeautalai maoae se tasi o le Tusi a Mamona. Ia talanoaina ma faifeautalai ma lisi uiga o lenei faifeautalai. Ia valaaulia ia faifeautalai taitoatasi e faatu se sini ina ia faaaoga se tasi o nei uiga. Ia faifai soo lenei gaoioiga e faaaoga ai faifeautalai o le Tusi a Mamona.
- Ia valaaulia faifeautalai e faamatala atu ni aafiaga na oo i ai lea na fesoasoani ai le Tusi a Mamona i a latou tagata sailiili i le gasologa o le liuaina.
- Tuu atu i faifeautalai e fetufaai atu a latou tali sili o le Tusi a Mamona i se fesili o le agaga.

Peresitene o le Misiona

- Aoao ia faifeautalai i le auala e faaaoga ai le Tusi a Mamona e faamautu ai le moni o le savali o le Toefuataiga.
- Faitau faatasi ma faifeautalai le 1 Nifae 1 ma faatusatusa i le aafiaga na oo i ai Iosefa Samita.
- Ia saunia se Tusi Mamona mama mo faifeautalai. Ia tuu atu ia i latou e faailoga i lanu eseese ia:
 - Mau uma e faatatau ia Iesu Keriso (soo se tasi o Ona suafa po o se sui nauna e faatatau ia te Ia).
 - O Ana fetalai (na fetalai i ai o Ia po o perofeta pe a latou faapea mai, “Ua fetalai mai ai le Alii”).
 - O Ona uiga.
 - O aoaoga faavae ma mataupu faavae o loo aofia ai i totonu o le Tusi a Mamona.

I le pito lava i lalo o itulau taitasi ia fai atu i faifeautalai e faitau le aofaiga o mau faamaonia o loo i ai. I faatalanoaga ma taimi o fonotaga faaleitu i le gasologa o le vaiata lea e fai ai lenei gaoioiga mo le lua i le tolu masina, ia tuu atu i faifeautalai e feaasoa'i mea na latou aoaoina. Atonu e te mafaufau e fai se gaoioiga faapea i le misiona atoa e faailoa ai mau e faatatau i le faatuatua ia Iesu Keriso, salamo, papatisoga, o le meaalofo o le Agaga Paia, po o soo se tasi lava o mataupu faavae o le talalelei.

- I le taimi o faatalanoaga, ia valaaulia faifeautalai e faasoa atu ia te oe ni mau o le Tusi a Mamona na suia ai o latou olaga.
- Fesoasoani i faifeautalai ia iloa le auala o loo aoao atu ai e le Tusi a Mamona ia aoaoga faavae mai lesona a faifeautalai. Mo se faataitai, afai o le autu o le Togiola, ia tuu atu i faifeautalai e tusi i se koluma se tasi ia vaega autu o le Togiola o loo aoaoina i totonu o le Tusi a Mamona, e aofia ai ma ona mau. O le koluma lona lua, ia tuu atu ia i latou e lisi ai i autafa ia vaega lava na o loo aoaoina i totonu o le Tusi Paia. Ia tuu atu i au faifeautalai e faaavanoa pea vaega na e misi pe le o aoaoina i totonu o le Tusi Paia. O le a matuai iloga lava i le faifeautalai e auala ua aveai le Tusi a Mamona ma maa 'au'au o a tatou aoaoga faavae. O lenei foi gaoioiga e mafai ona faia i isi aoaoga faavae o loo aoaoina atu e faifeautalai.
- Ia faailoa atu fesili talafeagai o le agaga mo tagata o loo i lau misiona. Ia valaaulia faifeautalai e saili ia tali i totonu o le Tusi a Mamona.



Pe Faapefea Ona Ou Atiina Ae Uiga FaaKeriso?

Faamatalaga

Manatunatu i le Mea Lenei

- Pe mafai faapefea ona ou atiina ae uiga ia o le a avea ai a'u ma se faifeau malosi ma le ta'uaogaina o le talalelei a Iesu Keriso?
- O le a faapefea ona fesoasoani le atiina ae o uiga faaKeriso i lo'u faamoemoe i le avea ai ma se faifeautal'ai?
- O lē fea uiga e matua'i tatau ona ou atiina ae?

I le amataga o Lana galuega i le olaga faaletino, sa afio atu ai Iesu Keriso i auvai o le I sami o Kalilaia ma valaau atu i faifaiva e toalua, o Peteru ma Anetere'a. "Ina mulimuli mai ia ia te au," na Ia fetalai atu, "ou te faia oulua ma faifaiva i tagata" (Mataio 4:19; tagai foi Mareko 1:17). Ua valaauina foi oe e le Alii i Lana galuega, ma ua Ia valaaulia oe ina ia e mulimuli atu ia te Ia. O le valaaulia e mulimuli atu ia Keriso, o se valaaulia e mulimuli i Lana faataitaiga ma ia avea faapei o Ia.

O nisi mataupu o i totonu o le "*Talai La'u Talalelei*" o loo taulai atu i mea e tatau ona e faia i le avea ai ma se faifeautal'ai—o le auala e suesue ai, o le auala e aoao atu ai, o le auala e faaoga ai ma le atamai le taimi. Ae, e tutusa le taua o mea e te faia, ma le taua o oe lava.

E mafai e le talalelei toefuataiina ona avea oe ia faapei o le Tama Faalelagi ma Iesu Keriso. Ua uma ona faaali mai e le Faaola le ala. Ua Ia faatuina le faataitaiga atoatoa, ma ua Ia poloaiina i tatou ina ia avea e faapei o Ia (tagai i le 3 Nifae 27:27). Aoao e uiga ia te Ia ma saili e tuu Ona uiga faaleatua i lou olaga. O le mana o Lana Togiola, e mafai ai ona e ausia lenei sini ma taitai atu ai foi isi tagata ina ia latou ausia.

Faamatalaga

O loo faamatala mai e tusitusiga paia ia uiga faaKeriso e taua mo oe, ina ia atiina ae a o avea ai oe ma se faifeautalai faapea i lou olaga atoa. Suesue ia mau o loo i ai i lenei mataupu, ma vaavaai mo isi faataitaiga o uiga faaKeriso, a’o e suesueina isi fuaitau.

O uiga faaKeriso o ni meaolofa mai le Atua. E oo mai a o e faaaogaina ma le amiotonu lou saolotoga. Ia ole atu i lou Tama Faalelagi ina ia faamanuiaina oe i nei uiga; e le mafai ona e atiina ae e aunoa ma Lana fesoasoani. Faatasi ai ma se manao e faafiafia i le Atua, ia e iloa ou vaivaiga ma ia e naunau ma popole e faaleleia.

Mau Suesueina**O a mea o loo ta’u mai e nei mau e uiga i le mulimuli i le faataitaiga a Iesu Keriso?**

3 Nifae 12:48

Ioane 13:1–16

1 Peteru 2:21

3 Nifae 27:21, 27

O le a le sootaga o uluai mataupu faavae o le talalelei ma uiga faaKeriso?

Morona 8:25–26

Manatu mo le Suesueina o Lenei Mataupu


E tele auala e mafai ona suesue ai lenei mataupu. Faataitai se tasi o manatu nei:

- A o e faamae’aina le “Gaoioiga o Uiga” o loo i le faaiuga o lenei mataupu, vaai le uiga e sili ona e moomia pe e te manao e atiina ae. Suesue le vaega e faataitai i lena uiga, ma faatutu ni sini e atiina ae ai.
- Faitau i le mataupu atoa e aunoa ma le suesueina o mau, ma vaai po o lē fea uiga e te manao e matuai suesueina atoatoa. Ona suesue lea o mau autu e o faatasi ma le uiga. Saili ni mau faaopoopo e le o lisiina atu i le mataupu lena o loo aoao atu ai lena uiga. Tusi i totonu o lau tusi talaaga o suesuega ia manatu mo le atiina ae o le uiga.
- Vaai se uiga e te manao e suesue. Mulimuli i le faatulagaga o loo i lalo o le ulutala “Atiina ae o Uiga FaaKeriso” o loo maua i le faaiuga o le mataupu.

Faatuatua ia Iesu Keriso

Afai e te faatuatua ia Iesu Keriso, ua e talitonu ia te Ia o le Alo o le Atua, le Alo Pele e Toatasi o le Tama i la le tino. Ua e taliaina o Ia e avea ma ou Faaola ma Togiola ma mulimuli i Ana aoaoga. Ua e talitonu e mafai ona faamagaloina au agasala e ala i Lana Togiola. O le faatuatua ia te Ia o lona uiga, ua e faalagolago ia te Ia ma ua e mautinoa e alofa o Ia ia te oe.

O le faatuatua e tau atu ai i mea e faatino, e aofia ai le salamo, usiusitai, ma le auauna atu ma le maelega. Afai e te faatuatua ia Iesu Keriso, o lona uiga ua lava lou faalagolago i le Alii e mulimuli ai i Ana poloaiga—e tusa lava pe ete matuai le malamalama atoa lava i o latou mafuaaga. E te faataunuuina mea e finagalo le Alii e te faataunuu. E te fesoasoani e aumaia mea lelei i lou lava olaga faapea ma olaga o isi. E mafai ona e faia vavega e tusa ai ma le finagalo o le Alii. O lou faatuatua o le a faaalua lea i le maelega ma galuega.



O le faatuatua o se mataupu faavae lea o le mana. E galue le Atua e ala i le mana, ae o Lona mana e masani lava ona faatinoina e tali atu ai i le faatuatua (tagai i le Moronae 10:7). E galue o Ia e tusa ai ma le faatuatua o Lana fanau. O le masalosalo ma le fefe e teena ai le faatuatua.

O le a faateleina lou faatuatua e ala i le suesue ma le maelega, tatalo, auauna atu ma le filiga, ma le usiustai i uunaiga a le Agaga Paia ma poloaiga.

O lou faatuatua ia Iesu Keriso e tuputupu a'e a o faateleina lou masani lelei ia te Ia ma Ana aoaoga. A o e suesue ma sailiili i tusitusiga paia, o le a e aoao ai i Ona ala, o Lona alofa mo tagata uma, ma Ana poloaiga.

O le faatuatua e aofia ai le lagona mautinoa i le misiona ma le mana o le Agaga Paia. O le faatuatua e te maua ai tali i au tatalo ma musumusuga mo oe lava ia e taitaiina ai oe i le galuega a le Alii.

Mau Suesueina

O le a le faatuatua?

Alema 32:21
Eteru 12:6

Eperu 11:1; see footnote b
Guide to the Scriptures, "Faith"

Faamaoni i le Faatuatua,
"Faith," 52–54

E faapefea ona e maua le faatuatua, ae o le a se mea e mafai ona e faia e ala i le faatuatua?

2 Nifae 25:29
2 Nifae 26:13
Mosaea 4:6–12

Alema 32
Helamana 15:7–8
Eteru 12:7–22

Moronae 7:33
Roma 10:17
Eperu 11

O a faamanuiaga e oo mai e ala i le faatuatua?

Mosaea 3:17

Helamana 5:9–12

Ioane 14:6

Mosaea 5:1–15

Faamoemoe

O le faamoemoe o se talitonuga mausali lea o le a faataunuuna e le Alii Ana folafolaga ia te oe. E faaalua lea i le mautinoa, manatu i ai, naunautai, ma le finau maua'i ma le onosai. O le talitonu lea ma le mafauafau o le a i ai se mea e tula'i mai. A i ai ia te oe le faamoemoe, e te galue ma fetai'a'i ma tofotofoga ma faigata, ae e te mautinoa o le a galulue mea uma mo lou lelei. E fesoasoani le faamoemoe ia te oe e faatoilalo le lotovaivai. E masani ona faamatala e tusitusiga paia le faamoemoe ia Iesu Keriso, o le mautinoa lea o le a e mautofi i le ola faavavau i le malo selesitila.

Na aoao mai Peresitene James E. Faust:

"O le faamoemoe o le taula lea i o tatou agaga. . . .

"O le faamoemoe o le faalagolago lea i folafolaga a le Atua, o le faatuatua afai tatou te galulue nei, o le a faataunuuna faamanuiaga manaomia i le lumanai. . . .

"Ona ua faamanuiaina i tatou i le faamoemoe, e tatau ia i tatou, i le avea ai ma soo, ona aapa atu i tagata uma o e, tatou te le iloa le pogai, ua o ese mai ai i le faamoemoe o le talalelei' (Kolose 1:23). Ia tatou aapa atu e sii ae lima o i latou ua aunoa ma se faamoemoe."

— ELDER NEAL A. MAXWELL
"FAAMOEMOE ATOATO'A LELEI," *LI'AHONA*, IAN. 1995, 42

“O le puna’oa e le mafai ona faatoilaloina o lo tatou faamoemoe, o i tatou ia o ni atalii ma afafine o le Atua ma o Lona Alo, le Alii o Iesu Keriso, ua laveaiina i tatou mai le oti” (“O le Faamoemoe, o se Taula o le Agaga,” *Liahona*, Ian. 2000, 70–72).

Mau Suesueina

O le a le faamoemoe ae o le a foi le mea o loo tatou faamoemoe i ai?

2 Nifae 31:20

Moronaē 7:40–48

Roma 8:24–25

Alema 58:10–11

MFF 59:23

Eperu 6:10–20

Eteru 12:4, 32

MFF 138:14

Guide to the Scriptures, “Hope”

Alofa Mama ma le Alofa

Na fesili se tagata ia Iesu i se tasi taimi, “O lē fea poloaiga o i le tulafono ua sili?” Na tali Iesu: “E te alofa atu i le Alii lou Atua ma lou loto atoa, ma lou agaga atoa, ma lou manatu atoa. O le poloaiga muamua lena ma le sili. E faapena foi lona lua, E te alofa atu i le lua te tuaoi, ia pei o oe lava ia te oe” (Mataio 22:36–39).

O le alofa mama o le “alofa mama lea o Keriso” (Moronaē 7:47). E aofia ai le alofa faavavau o le Atua mo Ana fanau uma. E ao ona tatou saili e atiina ae lena ituaiga alofa. Afai e faatumulia oe i le alofa mama, e te ususitai i poloaiga a le Atua ma e faia mea uma e te mafaia e auauna atu ai i isi ma fesoasoani ia i latou e talia le talalelei toefuataiina.

O le alofa mama o se meaalofa mai le Atua. Na saunoa mai le perofeta o Mamona, e tatau ona tatou “tatalo atu i le Tama ma le malosi uma o le loto, ina ia faatumuina i [tatou] i lenei alofa” (Moronaē 7:48). A o e mulimuli ai i lenei fautuaga ma tauivi e faia galuega amiotonu, o le a faateleina lou alofa mo tagata uma, aemaise lava i latou o loo e auauna atu i ai. O le a e maua se lagona faamaoni o le manatu alofa mo le soifua manuia faavavau ma le fiafia o isi tagata. O le a e vaai atu ia i latou o ni fanau a le Atua faatasi ai ma se avanoa tele e avea ai faapei o lo tatou Tama Faalelagi, ma o le a e galue mo i latou. O le a e aloese mai ni lagona leaga e pei o le ita, matau’a, mana, po o le faaloloto. O le a e aloese mai le faamasinoina o isi, faitioina o i latou, po o le fai o ni faamatalaga sese e uiga ia i latou. O le a e taumafai ia malamalama ia i latou ma o latou manatu. O le a e onosai ia i latou ma taumafai e fesoasoani ia i latou pe a latou tautevateva pe lotovaivai. O le alofa mama, e pei o le faatuatua, e tau atu i le faatinoga. O le a e atiina ae le alofa mama, a o e sailia ia avanoa e auauna atu ai i isi ma e ofoina atu oe lava.



© 2001 Simon Dewey. Aua ne'i kopaina.

Mau Suesueina**O le a le alofa mama?**

Moronaē 7:45–48	1 Korinito 13	Guide to the Scriptures, “Charity”
-----------------	---------------	------------------------------------

Na faapefea ona faaalua e Iesu Keriso le alofa mama?

1 Nifae 19:9	Eteru 12:33–34	Luka 7:12–15
Alema 7:11–13		

O a mea o loo aoao mai e nei fuaiupu e uiga i le alofa mama?

2 Nifae 26:30	Alema 7:24	1 Timoteo 4:12
Mosaea 2:17	Eteru 12:28	1 Peteru 4:8; see footnote a
Mosaea 28:3	MFF 88:125	

Amioatua

O le amioatua e tupu mai i ou manatu ma manaoga loloto. O se ata vaaia o mafaufauga ma amioga e faavae mai tulaga faatonuina mauualuluga o le amio. Talu ai ona e le nofo le Agaga Paia i totonu o malumalu eleelea, o le amioatua o se tulaga manaomia lea e maua ai le taitaiga a le Agaga. O le mea e te filifili e te mafaufau i ai ma fai pe a tuua na o oe ma e talitonu e leai se tasi o vaai atu, o se fua faatatau malosi lea o lau amioatua.

O tagata amioatua e mama ma atoatoa i le faaleagaga. Latou te taulai atu i le amiotonu, o mafaufauga faagaetia, ae tuu ese mai o latou mafaufau manatu ia e taitai atu ai i gaioiga le talafeagai. Latou te ususitai i poloaiga a le Atua ma mulimuli i fautuaga a taitai o le Ekalesia. Latou te tatalo mo le malosi e tetee atu ai i faaososoga ma fai le mea tonu. E vave ona latou salamo mai soo se agasala po o se mea sese. Latou te ola agavaa mo se pepa faataga o le malumalu.

O lou mafaufau e pei lava o luga o se tulaga i se fale faafiafia; ae peitai, i le fale faafiafia o lou mafaufau, e na o le toatasi lava le tagata autu e mafai ona i luga o le tulaga i taimi taitasi. Afai e tuua le tulaga e leai se isi o i ai, e masani ona ulufale atu mafaufauga pogisa ma le agasala i le tulaga e tau faaososo atu. Ae o nei manatu e leai so latou malosi pe afai e tumu le tulaga o lou mafaufau i mafaufauga lelei, e pei o le taulotoina o se viiga po o fuaiupu o se mau lea e mafai ona e tua i ai i se taimi e faaososoina ai. O le puleaina o le tulaga o lou mafaufau, e mafai ai ona faamanuiaina oe e tetee atu i faatosinaga faifai pea ina ia gauai atu i faaososoga ma lolo atu i le agasala. E mafai ona e mama ma amioatua.

Mau Suesueina**O le a le uiga o le amioatua?**

MFF 4:6	MFF 46:33	2 Peteru 1:3–8
MFF 25:2	MFF 121:45–46	Guide to the Scriptures, “Virtue”
MFF 38:24	Mataupu Faavae o le Faatuatua 1:13	

Atamai

Na poloai mai le Alii, “Ia saili i le aoao, e faapea foi i le suesue ma le faatuatua” (MFF 88:118). Na Ia lapatai mai foi, “E le mafai lava ona faaolaina le tagata i le valea” (MFF 131:6). Saili le atamai, aemaise lava i le atamai faaleagaga. Suesue i tusitusiga paia i aso uma, ma suesue foi upu a perofeta soifua. O le suesue ma le tatalo, e maua ai fesoasoaniga mo au

Faamatalaga

fesili patino, luitau, ma avanoa. Ia faapito le vaai i mau na e mafai ona e faaoga, a o e aoao atu faapea foi ma lou taliina o fesili e uiga i le talalelei toefuataiina.

Mafaufau pe faapefea ona e faaogaina mataupu faavae o le talalelei i lou olaga. A o e suesue ma le maelega, ma le agaga tatalo, ma le manatu tonu i ai, o le a faamalamalamaina e le Agaga Paia lou mafaufau, aoaoina oe, ma fesoasoani ia te oe ia maua le malamalama i le uiga o mau ma aooga a perofeta soifua. E mafai foi ona e maua le atamai e ala lea i le vaai ma faalogo i isi, aemaise lava i taitai o le ekalesia. E mafai ona e fai atu e pei o Nifae: “Aua e fiafia lo’u agaga i tusi paia, ua mafaufau foi i ai lo’u loto. . . . Faauta, ua fiafia lo’u agaga i mea a le Atua, e mafaufau pea lo’u loto i mea ua ou vaaia ma faalogoina” (2 Nifae 4:15–16).

Mau Suesueina

E faapefea ona fesoasoani le atamai i le faiga o le galuega a le Alii?

Alema 17:2–3

MFF 88:77–80

E mafai faapefea ona e maua le atamai?

2 Nifae 32:1–5

MFF 76:5–10

Moronae 10:5

MFF 88:118

Guide to the Scriptures, “Knowledge”
MFF 42:61

Onosai

O le onosai o le mana lea e onosaia ai le faatuai, o faaletonu, mea faafeagai, po o le mafatia e aunoa ma le ita, lē mautonu, po o le popole. O le mafaia lea ona fai le finagalo o le Atua ma talia Lona taimi. Afai e te onosai, e te tatālia faigata ma e te mafaia ona e fetaiā’i ma tiga i se tulaga filemu ma le faamoemoe. O le onosai e faiā ma le faamoemoe ma le faatuatua—e tatau ona e faatalitali mo faamanuiaga folafolaina a le Alii ina ia faataunuuna.

E te moomia le onosai i ou aafiaga ma fegalegalea’iga i aso uma, aemaise lava i le va ma lau soa. E tatau ona e onosai i tagata uma, e aofia ai ma oe, a o e galue ina ia faatoilalo ia sese ma vaivaiga.

“E tumu le olaga i faigata, o nisi faigata e mama a o isi e mamafa tele. E foliga mai e le uma lu’i mo tagata uma. O lo tatou faafitauli, ua masani ona tatou faamoemoeina ni tali vave i na lu’i, ae galo ai o le tele lava o taimi e manaomia ai le uiga faalelagi lea o le onosai.”

— PERESITENE THOMAS S. MONSON
“ONOSAI—O SE UIGA LELEI FAALELAGI,” *LIAHONA*, IAN. 1996, 69

Gaoioiga: Suesuega Faaletagata Lava Ia

- Suesue le Mosaea 28:1–9. O le a le manao o atalii o Mosaea?
- O le a le fautuaga a le Alii i na faifeautalai? (Tagai i le Alema 17:10–11 ma le 26:27.)
- O a nisi o taunuuga o lo latou onosai ma le filiga? (Tagai i le Alema 26.)
- Tusi au tali i totonu o lau tusi talaaga o suesuega.

Mau Suesueina**Aisea e taua ai le onosai? E faapefea ona aiga le onosai ma le faatuatua?**

Mosaea 23:21	Alema 34:40–41	2 Korinito 6:1–10
Mosaea 24:9–16	MFF 101:38	Iakopo 5:10–11
Alema 31:31	Roma 5:3–5	Salamo 46:10
Alema 32:41–43	Roma 8:24–25	Guide to the Scriptures, “Patience”

Lotomaulalo

O le lotomaulalo o le naunau lea e gauai atu i le finagalo o le Alii ma tuu atu le mamalu i le Alii mo mea ua faataunuaina. E aofia ai le loto faafetai mo Ana faamanuiaga ma le faailoa atu o lou manaomia pea o Lana fesoasoaniga paia. O le lotomaulalo e le o se faailoga o le vaivai; o se faailoga o le malosi faaleagaga. Afai e te faalagolago ma le lotomaulalo i le Alii ma faailoa atu Lona mana ma le alofa mutimutivale, e mafai ona e mautinoa o Ana poloaiga e mo lou lelei. E te mautinoa e mafai ona e faia soo se mea e moomia mai e le Alii ia te oe, pe afai e te faalagolago ia te Ia. E te naunau foi e faalagolago i Ana auauna filifilia ma mulimuli ia latou fautuaga. O le a fesoasoani le lotomaulalo ia te oe a o e taumafai ina ia usiusitai, ia galue malosi, ma auauna atu ma le le manatu faapito.



O le faafeagai o le lotomaulalo o le faamaualuga, lea e fetuaina i totonu o tusitusiga paia. O le faamaualuga o lona uiga o le faalagolago lea o le tagata ia te ia lava, ae lē o le Atua po o Ana auauna. O le isi foi ona uiga o le faamuamua lea o mea a le lalolagi e sili atu nai lo mea a le Atua. O tagata faamaualuluga, latou te ave le mamalu mo i latou lava ae lē avatu i le Atua. O le faamaualuga e faatautavā; o i latou o e faamaualuluga e saili ina ia tele atu a latou mea ma ua manatu faapea e sili atu i latou nai lo isi tagata. O le faamaualuga e masani ona taunuu atu i lagona o le ita ma le inoino, ma o se mea e tautevateva ai.

Mau Suesueina**O le a le uiga o le lotomaulalo?**

2 Nifae 9:28–29	Alema 5:26–29	Mataio 26:39
Mosaea 4:11–12	Alema 26:12	Guide to the Scriptures, “Humble, Humility”

O a faamanuiaga e te maua pe a e lotomaulalo oe lava ia?

Alema 32:1–16	MFF 67:10	Mataio 23:12
Eteru 12:27	MFF 112:10	
MFF 12:8	MFF 136:32–33	

E mafai faapefea ona e iloaina lou lava faamaualuga?

1 Nifae 15:7–11	2 Timoteo 3:1–4	Faataoto 15:10
1 Nifae 16:1–3	Faataoto 13:10	Faataoto 28:25

Maelega

O le maelega o lona uiga o taumafaiga mausali, tumau, faamaoni, ma le malosi i le faia o le galuega a le Alii. E finagalo le Alii ina ia e galue ma le maelega— ma le finafinau faatasi ma le taumafai malosi ma le manatu i ai. O se faifeautalai maelega e galue mae'ae'a ma faatulaga lelei. O le maelega i le galuega faafaifeautalai o se faailoga lea o le alofa mo le Alii ma Lana galuega. Afai e te maelega, e te maua le olioli ma le faamalieina i lau galuega.

Ia fai ni mea lelei se tele i lou lava lotofuatiaifo (tagai i le MFF 58:27). Aua e te faatali i ou taitai e ta'u atu ia te oe le mea e fai. Ia faaauau pea seia mae'a mea uma e te mafaia, e tusa lava pe e te lē lavā. Ia taulai atu i mea sili ona taua ma aloese mai le faamaumauina o le taimi. Tatalo mo le taitaiga ma le malosi. Ia faia fuafuaga e lē aunoa ma ia lelei. Aloese mai soo se mea e faalavelave i ou mafaufauga ma au mea e fai.

“E masani ona ou fai atu o se tasi o mealilo silisili o le galuega faafaifeautalai, o le galue! Afai e galue se faifeautalai, o le a ia maua le Agaga; afai o le a ia maua le Agaga, o le a ia aoao atu e ala i le Agaga; ma afai o le a ia aoao atu e ala i le Agaga, o le a ia pa'i atu i loto o tagata ma o le a fiafia o ia. O le a leai se toe manatu i le aiga, leai se popole i aiga, aua o taimi ma taleni uma ma naunautaiga uma ua tulimata'i atu i le galuega. Galue, galue, galue—e leai se isi tulaga faamalieloto e mafai ona suitulaga ai, aemaise lava i le galuega faafaifeautalai.”

– PERESITENE EZRA TAFT BENSON
THE TEACHINGS OF EZRA TAFT BENSON (1988), 200

Mau Suesueina

O le a le uiga o le maelega?

Moronaē 9:6
MFF 10:4

MFF 107:99–100

Guide to the Scriptures, “Diligence”

Aisea ua finagalo ai le Alii ia te oe ia e maelega?

MFF 75:2–5
MFF 123:12–14

MFF 127:4

MFF 130:20–21

E aiga faapefea le maelega ma le saolotoga e filifili ai?

Mosaea 4:26–27

MFF 58:26–29

Usiusitai

I le avea ai ma se faifeautalai, ua faamoemoe ia e tausia ma le naunautai poloaiga, ia usiusitai i tulafono o le misiona, ma mulimuli i fautuaga a ou taitai. O le usiusitai o le uluai tulafono lea i le lagi. O se faatinoga o le faatuatua. O nisi taimi atonu e manaomia lou faia o mea e te matua lē malamalama lava i ai. A o e usiusitai, e faateleina lou faatuatua, atamai, faautauta, molimau, puipuiga, ma le saolotoga. Taumafai ina ia usiusitai i le Alii, le perofeta soifua, ma lou peresitene o le misiona.

“O le amio pulea lelei e maua i le usiusitai i aso taitasi ma le ola i ni olaga mama ma lelei, e faaofuina ai oe i se ofutau o le puipuiga ma le saogalemu mai faaosoosoga e oo mai ia te oe a o e i ai i le lalolagi.”

– ELDER L. TOM PERRY

“VALAAULIA E AUAUNA ATU,” LIAHONA, IULAI 1991, 43

Mau Suesueina

O le a le uiga o le usiusitai?

1 Nifae 2:3

MFF 82:8–10

Ioane 14:15

Mosaea 5:8

Mataio 7:24–27

Guide to the Scriptures, “Obedience,

Mosaea 15:7

Ioane 7:17

Obedient, Obey”

O le a se mea e mafai ona e aoaina mai nei mau e uiga i le usiusitai?

1 Nifae 3:7

MFF 105:6

2 Tupu 5:1–14

Aisea na matuai usiusitai ai le autalavou totoa sa i le autau a Helamana?

Na faamanuiaina faapefea i latou?

Alema 56:45–48

Alema 57:21–27

Atiina ae o Uiga FaaKeriso

A o e suesue ma taumafai e atiina ae uiga o loo faamatalaina i lenei mataupu, ma isi uiga o loo maua i totonu o tusitusiga paia, e ono fesoasoani le faiga lenei:

- Ia iloa le uiga e te manao e atiina ae.
- Tusi se faauigaga ma se faamatalaga o le uiga.
- Tusi i lalo fesili e tali a o e suesue.
- Lisi ma suesue mae’ae’a lelei ia mau o loo aoao mai e faatatau i le uiga.
- Tusi i lalo ou lagona ma manatu.
- Faatutu ni sini ma faia ni fuafuaga ina ia faaoga le uiga i lou olaga.
- Tatalo i le Alii e fesoasoani mai ia te oe e atiina ae le uiga.
- Iloilo faavaitaimi lou alualu i luma i le atiina ae o uiga taitasi.

Faamatalaga

Gaoioiga: Suesuega Faaletagata Lava Ia

Vaai ia iloa se uiga mai le mataupu lenei po o tusitusiga paia. Mulimuli i le mamano o loo i luga ina ia malamalama lelei ai ma fuafua ai mo le atiina ae o le uiga.

Vaai i le igoa o loo i luga o lau pine. E eseese faapefea le pine o lou igoa ma le pine o loo faaogaina e se tagata faigaluega o se kamupani? Ia matau o vaega e lua e sili ona taua, o lou igoa ma le suafa o le Faaola. E mafai faapefea ona e mautinoa o loo fai oe ma sui o le Faaola i le avea ai ma se tasi Oona soo? Aisea e taua ai i tagata ona faafesootai lou igoa ma le suafa o le Faaola i se auuala lelei? Tusi ou manatu i totonu o lau tusi talaaga o suesuega.



Mau Suesueina

O a nisi uiga o loo lisiina i totonu o tusitusiga paia?

Mosaea 3:19

MFF 121:41–45

Filipi 4:8

Alema 7:23

Mataupu Faavae o le Faatuatua 1:13

2 Peteru 1:5–8

MFF 4

Manatua le Mea Lenei

- E tatau ona avea oe ma se faifeautalai e faapei o Keriso, ae le na o le *faia* o mea faafaifeautalai.
- O le aoao ia avea faapei o Keriso o se taumafaiga i le olaga atoa.
- Ia e mulimuli i faaitaiga a Keriso—atiina ae Oona uiga—ia tasi le faatinoga ma le faaiuga e fai i lea taimi ma lea taimi.
- O le suia ina ia avea faapei o Keriso, e moomia ai le faatinoina o le faatuatua, salamo, tausia o feagaiga, faateleina le i ai o le Agaga Paia, ma tumau e oo i le iuga.

Manatu mo Suesuega ma le Faaogaina

Faamatalaga

Suesuega Faaletagata Lava Ia

- Sauni se tautalaga e lima minute i se tasi o uiga o loo talanoaina i totonu o lenei mataupu.
- Faaoga le Guide to the Scriptures, e saili ai mo auala na faaa'oa'o mai ai e le Faaola ia uiga o loo faamatalaina i totonu o lenei mataupu. Ia tusi i lalo mea na e aoaoina, i totonu o lau tusi talaaga o suesuega.
- Ia faatumu faavaitaimi le "Gaoioiga o Uiga" o loo i le faaiuga o lenei mataupu.
- Vaai ia iloa se uiga o loo i totonu o lenei mataupu. Ia fesili ifo ia te oe lava:
 - E mafai faapefea ona ou atiina ae lenei uiga?
 - O le a se mea e tatau ona suia i lo'u loto, mafaufau, ma mea e fai ina ia atiina ae ai lenei uiga?
 - O le a faapefea ona fesoasoani le tausia o feagaiga i lo'u atiina ae o lenei uiga?
 - O le a faapefea ona fesoasoani le atiina ae o lenei uiga ia ou agavaa ai mo le Agaga Paia ma avea ai ma se faifeau sili ona malosi o le talalelei a Iesu Keriso?
- Sue ia faaitaiga o uiga faaKeriso i olaga o alii ma tamaitai i totonu o tusitusiga paia. Ia tusi i lalo ou lagona i totonu o lau tusi talaaga o suesuega.

Suesuega Faalesoa

- Suesue i nisi tusi o loo i ai i le fatatusi a le faifeautalai, e faatatau i uiga faaKeriso.
- Ia talanoaina sootaga o uiga eseese. Mo se faaitaiga:
 - E aiga faapefea le faatuatua ma le maelega?
 - O a ni auala e aiga ai le lotomaulalo ma le alofa?
 - E faapefea ona faamalosi e le atamai le onosai?

Fonotaga Faaleitu ma Konafesi Faalesone

- I ni nai aso a o luamani se fonotaga faaleitu po o se konafesi faalesone, ia faatonu faifeautalai taitoatasi e filifili se uiga [faaKeriso] se tasi o loo i totonu o lenei mataupu po o totonu o tusitusiga paia, ma saunia ai se tautalaga e lima minute e uiga i lena uiga, ia aofia ai ma mau na fesoasoani ia te ia.

Faaavanoa se taimi o le fonotaga mo ni nai faifeautalai e fetufaai mai ai a latou tautalaga.

- Vaevae faifeautalai i ni vaega se tolu, ma tuu atu i ai mea nei e faatino:

Vaega 1: Faitau le 1 Nifae 17:7–16 ma tali fesili nei:

 - Na faapefea ona faatino e Nifae Iona faatuatua?
 - O le a le mea pei o se uiga faaKeriso sa faia e Nifae?
 - O a folafolaga na faia e le Alii ia Nifae pe afai o le a ia faamaoni ma tausia ia poloaiga?
 - E faapefea ona faatatau lenei tala i le galuega faafaifeautalai?

Faamatalaga

Vaega 2: Faitau le lakopo 7:1–15 ma tali fesili nei:

- Aisea na matuai malosi ai le faatuatua o lakopo e tetee atu ai i le osofa'iga a Serema?
- Na faapefea ona faatinoina e lakopo le faatuatua ina ua la talanoa ma Serema?
- Na faapefea ona pei uiga o lakopo o ni uiga faaKeriso?
- O le a se mea e mafai ona tatou faia ina ia atiina ae ai le faatuatua e pei o lakopo?

Vaega 3: Faitau le Talafaasolopito—Iosefa Samita 2:8–18, ma tali fesili nei:

- O a ni auala na faatinoina ai e Iosefa Samita le faatuatua ia Iesu Keriso?
- Na faapefea ona tofotofoina Iona faatuatua?
- O le a le mea na ia faia sa faapei ai o Keriso?
- O le a se mea e mafai ona tatou faia ina ia mulimuli ai i le faataitaiga a Iosefa Samita?

A mae'a ia vaega, ona toe aumai faatasi lea o faifeautalai ma fai atu i ai e fetufaai mai mea na latou talanoaina.

- la faamatala atu se aafiaga na e oo i ai ina ua faamanuiaina pe musuia oe e le faatuatua o se isi tagata.
- Fai atu i faifeautalai e tagai i le “Gaoioiga o Uiga.” Ia tuu atu i faifeautalai taitoatasi se fasi pepa e tusi ai i luga ana tali.

A mae'a a latou pepa, ia valaaulia i latou e faatutu ni a latou lava sini.

Fai atu i nai faifeautalai e faamatala mai ni mea na latou aoaoina ma lagonaina a o latou faatumuina a latou pepa.

Ia tuu atu lau molimau e faatatau i le taua o le atiina ae o uiga faaKeriso.

Peresitene o le Misiona

- Faatonu faifeautalai e faitau se tasi o Evagelia e fa o loo i totonu o le Feagaiga Fou po o le 3 Nifae 11–28. Ia latou vasevaseina mea na faia e le Faaola lea foi e mafai ona latou faia.
- Ia faaaoga le faatutuina ma le fuafuaina o sini e aoao ai faifeautalai e uiga i le maelega. Ia faaali atu le auala e ave ai le maelega e taulai atu i tagata, ma se faailoga o le alofa.
- I le taimi o faatalanoaga, fai i faifeautalai e talanoa atu e faatatau i se uiga o loo latou taumafai e atiina ae.
- I se konafesi faalesone, ia valaaulia faifeautalai e faamatala atu ni uiga faaKeriso latou te viia ai a latou soa.

GAOIOIGA O UIGA

Faitau ma le faaeteete ia vaega taitasi o loo i lalo. Fuafua po o le a le moni o lena faamatalaga ia te oe, ona filifili lea o le tali sili ona talafeagai mai faailoga o tali. Tusi lau tali i vaega taitasi i totonu o lau tusi talaaga o suesuega. O le alualu i luma faaleagaga o se gasologa e faifaimalie, ma e leai se tasi e atoatoa, o lea ia e faamoemoe ai e sili atu le faatulagaina o oe nai lo isi i nisi vaega.

Faailoga o Tali 1 = e le tupu lava 2 = o nisi taimi 3 = e masani ai 4 = e toetoe lava o taimi uma 5 = o taimi uma lava

Faatuatua

1. Ou te talitonu ia Keriso ma talia o la e ave ma o'u Faaola. (2 Nifae 25:29)
2. Ou te mautinoa e alofa le Atua ia te a'u. (1 Nifae 11:17)
3. Ua matuai lava lo'u faatuatua ina o le Faaola e talia ai Lona finagalo ma faia soo se mea e poloai mai ai o la. (1 Nifae 3:7)
4. Ou te matuai talitonu o le Togiola a Iesu Keriso e mafai ona faamagaloina ai a'u agasala uma. (Enosa 1:5-8)
5. E lava lo'u faatuatua ia Keriso e maua ai tali i a'u tatalo. (Mosaea 27:14)
6. Ou te mafafau e uiga i le Faaola i le gasologa o le aso ma manatua mea na la faia mo a'u. (MFF 20:77, 79)
7. O loo ia te a'u le faatuatua e tatau ai, e fesoasoani ai e faatupuina mea lelei i lo'u olaga po o olaga o isi. (Eteru 12:12)
8. Ou te iloa e ala i le mana o le Agaga Paia e moni le Tusi a Mamona. (Moronae 10:3-5)
9. Ua matuai lava lo'u faatuatua ia Keriso e faataunuuna ai soo se mea e finagalo o la ou te faia—e oo lava i vavega, pe a tala-feagai ai. (Moronae 7:33)

Faamoemoe

10. O se tasi o o'u manaoga silisili lava o le mautofi lea i le ola faavavau i le malo selesitila o le Atua. (Moronae 7:41)
11. Ua ou mautinoa o le a ou maua se misiona fiafia ma le faamanuiaina. (MFF 31:3-5)
12. Ou te lagonaina le filemu ma le faamoemoe lelei e uiga i le lumanai. (MFF 59:23)
13. Ou te matuai talitonu lava e i ai se aso o le a ou mau faatasi ai ma le Atua ma ave faapei o la. (Eteru 12:4)

Alofa Mama ma le Alofa

14. Ou te lagonaina se naunautaiga faamaoni mo le soifua manuia e faavavau ma le fiafia o isi tagata. (Mosaea 28:3)
15. Afai ou te tatalo, ou te ole atu mo le alofa mama—le alofa mama o Keriso. (Moronae 7:47-48)
16. Ou te taumafai ia malamalama i lagona o isi ma iloa o latou manatu. (luta 1:22)
17. Ou te faamagalalo atu i isi o e na faatiga pe na sese mai ia te a'u. (Efeso 4:32)
18. Ou te taumafai e fesoasoani i isi pe a latou tautevateva pe lotovaivai. (Mosaea 18:9)

19. Afai e talafeagai, ou te ta'u atu i isi ou te alofa ia i latou ma manatu popole mo i latou. (Luka 7:12-15)
20. Ou te vaavaai mo avanoa e auauna atu ai i isi tagata. (Mosaea 2:17)
21. Ou te faia tala lelei e uiga i isi. (MFF 42:27)
22. Ou te agalelei ma onosai mo isi, e tusa lava pe faigata ona mafuta ma i latou. (Moronae 7:45)
23. Ou te olioli ona o mea e ausia e isi. (Alema 17:2-4)

Amioatua

24. Ou te mama ma atoatoa i le loto. (Salamo 24:3-4)
25. E leai so'u manao e faia le leaga ae ia fai le lelei. (Mosaea 5:2)
26. O a'u e ese le faatuatua—ou te faia le mea o le a ou fai atu e fai. (Alema 53:20)
27. Ou te taulai atu i manatu amiotonu ma faagaetia, ae tuuese ma lo'u mafafau ia manatu e le lelei. (MFF 121:45)
28. Ou te salamo i a'u agasala ma taumafai ia faatoilaloina o'u vaivaiga. (MFF 49:26-28)
29. Ou te lagonaina ia aafiaga o le Agaga Paia i lo'u olaga. (MFF 11:12-13)

Atamai

30. Ua ou mautinoa lo'u malamalama i aoaoga faavae ma mataupu faavae o le talalelei. (Eteru 3:19-20)
31. Ou te suesue i tusitusiga paia i aso taitasi. (Ioane 5:39)
32. Ou te saili ma le faamaoni ina ia malamalama i le upumoni ma sailia tali o a'u fesili. (MFF 6:7)
33. Ou te maua le atamai ma le taitaiga e ala i le Agaga. (1 Nifae 4:6)
34. Ou te fiafia ma faataunaina aoaoga faavae ma mataupu faavae o le talalelei. (2 Nifae 4:15)

Onosai

35. Ou te faatalitali ma le onosai mo faamanuiaga ma folafolaga a le Alii ina ia faataunuu. (2 Nifae 10:17)
36. Ou te mafai ona onosai mo ni mea e aunoa ma se le fiafia po o le popole. (Roma 8:25)
37. Ou te onosai ma faapalepale i luitau o le ave ma se faifeautalai. (Alema 17:11)

38. Ou te onosai i sese ma vaivaiga o isi. (Roma 15:1)
39. Ou te onosai ia te a'u lava ia ma faalagolago i le Alii a o o'u galue ina ia faatoilalo o'u vaivaiga. (Eteru 12:27)
40. Ou te faato'ato'a ma le faamoemoe mau-sali i taimi e feagai ai ma faigata ma mafatiaga. (Alema 34:40-41)

Lotomaulalo

41. Ou te agamalu ma lotomaulalo. (Mataio 11:29)
42. Ou te faalagolago i le Alii mo le fesoasoani. (Alema 26:12)
43. Ou te matuai faafetai ma le faamaoni mo faamanuiaga ua ou maua mai le Alii. (Alema 7:23)
44. O a'u tatalo e faatauanau ma faamaoni. (Enosa 1:4)
45. Ou te talisapaia ia faatonuga mai o'u taitai po o faiaoga. (2 Nifae 9:28)
46. Ou te taumafai ina ia gauai atu i le finagalo o le Alii, i soo se mea. (Mosaea 24:15)

Maelega

47. Ou te galue faalelei lava, e tusa lava pe le o poloaiina a'u pe le o i ai foi se isi e vaaia a'u. (MFF 58:26-27)
48. E taulai atu a'u taumafaiga i mea e sili ona taua. (Mataio 23:23)
49. E faalua ona fai a'u lava tatalo i le aso. (Alema 34:18-27)
50. E taulai atu a'u manatu i lo'u valaauga o se faifeautalai. (MFF 4:2, 5)
51. Ou te faatutu ma fuafuaina a'u sini i taimi uma. (MFF 88:119)
52. Ou te galue malosi seia mae'a lelei le galuega. (MFF 10:4)
53. Ou te maua le olioli ma le faamalieina i la'u galuega. (Alema 36:24-25)

Usiusitai

54. Afai ou te tatalo, ou te ole atu mo le malosi e tete ai faaososoga ma fai le mea tonu. (3 Nifae 18:15)
55. Ou te tausia poloaiga e moomia ina ia agavaa ai mo se pepa faataga o le malumalu. (MFF 97:8)
56. Ou te usitai ma le naunautai i tulafono a le misiona ma mulimuli i fautuaga a o'u taitai. (Eperu 13:17)
57. Ou te taumafai ia ole e tusa ai ma tulafono ma mataupu faavae o le talalelei. (MFF 41:5)

Faamatalaga

Lined writing area with horizontal lines and rounded corners.



E Mafai Faapefea Ona Lelei Atu Lo'u Aoaoina o le Gagana a La'u Misiona?

Faamatalaga

Manatunatu i le Mea Lenei

- Aisea e tatau ai pea ona ou saga faaleleia lo'u tomai i le gagana?
- E mafai faapefea ona ou faaleleia lo'u tomai e tautala ma aoao atu i le gagana a la'u misiona?
- E mafai faapefea ona ou maua le meaalofa o le tautala i gagana?

Saunia Oe Lava i le Faaleagaga

Na folafola mai e le Alii, "Aua e oo ina faalogo i lena aso, tagata taitoatasi i le faaatoatoaga o le talalelei i lana lava tautala ma lana lava gagana, mai ia i latou ua faauuina i lea mana" (MFF 90:11). Ia faamalosia lau lava molimau ina ia aumaia le mana e liua mai ai i au upu. Suesue muamua lava ia aoaga faavae ma lesona i lau lava gagana. O lena malamalama o le a faamalosia ai lau molimau ma lou malosi e aoao atu ma molimau atu ai ma le faatauanau. Ona mafai lea ona e aoao e faailoa atu le savali o le Toefuataiga i le gagana a lau misiona i lalo o le taitaiga a le Agaga.

O loo lisi atu i lalo ia auala e mafai ona e faamalosia ai lou faatuatua o le a fesoasoani le Alii ia te oe ina ia e aoao atu ma molimau atu i le gagana a lau misiona:

- Ia iloa na valaauina oe e le Atua e ala mai i se perofeta.
- Ia ola agavaa mo le mafutaga a le Agaga Paia.
- Ia ususitai i poloaiga ma faatulagaga a faifeautalai.
- Tatalo faamaoni mo le fesoasoaniga mai le lagi.
- Suesue, faataitai, ma faaoga le gagana a le misiona i aso taitasi.

Ia Filiga ma Maelega

O le aoao ina ia matuai lelei ona aoao atu i le gagana a lau misiona, e moomia ai taumafaiga maelega. Aua e te ofo pe afai e foliga mai e faigata i le taimi muamua. O le aoaoina o se gagana e tele se taimi e alu ai. Ia e onosai. Saili le fesoasoani a lau soa, tagata o le ekalesia, tagata sailiili, ma isi faifeautalai.

Aua ne'i tuua lou faaleleia o ou tomai i le gagana pe a amata ona malamalama tagata ia te oe. A o faatupulaia lou tomai e tautala i le gagana, o le a faateleina foi ona faalogo atu tagata i mea e te tautala atu ai nai lo le auala e te fai atu ai. O le a laitiiti foi lou popole i le auala e fesootea atu ai ia lagona o loo i lou loto. O le a sili atu ona mafai ona e tali atu i manaoga o tagata sailiili ma uunaiga a le Agaga.

Ia e taumafai ina ia e matuai lelei i le gagana i le taimi atoa o lau misiona faapea ma le taimi e te toe foi ai. Ua tele mea ua tuuina atu e le Alii ia te oe, ma e mafai ona i ai nisi taimi i le lumanai e mafai ona Ia faaogaina ai ou tomai i le gagana. Na faamalamalama mai e Elder Jeffrey R. Holland: "Matou te . . . faamoemoe i faifeautalai uma o loo aoaoina se gagana fou o le talaiga ina ia matuai atamamai ai lava i soo se vaega. . . . A o faapea ona e faia, o le a faaleleia foi ou tomai e talai ma molimau atu ai. O le a sili atu ona taliaina oe ma sili atu ona faagaetia faaleagaga oe i au tagata sailiili. . . . Aua ne'i faamalieina oe i le mea ua tatou ta'ua o le gagana na o faifeautalai. Ia aoaoina lou tagata i le gagana, ma o le a tele atu ai le avanoa e te pa'i atu ai i loto o tagata" (faasalalauga faasatelite a faifeautalai, Aok. 1998).

E le o tuua na o oe i le aoaoina o le gagana a lau misiona. Soo se taimi lava e tuu mai ai e le Alii se poloaiga, Na te saunia lava se auala e faataunuuina ai (tagai i le 1 Nifae 3:7). Saili Lana fesoasoani. Ia filiga i au suesuega. E i ai le taimi o le a e moomia ai tomai o le gagana e faataunuu ai lou faamoemoega i le avea ai ma se faifeautalai.

Aoao le faaPeretania

Afai e te le tautala faaPeretania, e tatau ona e suesueina a o avea ai ma se faifeautalai. O le a faamanuiaina ai oe i le taimi o lau misiona faapea ma lou olaga atoa. O le aoaoina o le faaPeretania o le a mafai ai e oe ona fesoasoani e fausia le malo o le Alii i ni auala faaopoopo ma o le a avea ma se faamanuiaga mo oe ma lou aiga. O le tele o fautuaga o loo maua i lenei mataupu o le a fesoasoani ia te oe. Ia patino lava le taulai atu i vaega nei:

- Faatu se sini ina ia oulua tautatala faaPeretania ma lau soa. Afai e iloa e lau soa le faaPeretania ma o loo taumafai e aoao i lau gagana, e mafai ona oulua filifili e tautatala i le faaPeretania i totonu o le lua fale ae tautatala i le gagana a le misiona pe a oulua o i fafo.
- Ia oulua faitau faatasi ma lau soa i le Tusi a Mamona faaPeretania. E mafai ona e filifili foi e felafola'i: E faitau e oe se fuaiupu i le faaPeretania, ona faitau lea e lau soa se fuaiupu i le gagana a le misiona. Ia faasa'o e le tasi le ta'uga ma le faaleoga o upu a le isi.
- Fesili atu i lou peresitene o le misiona mo ni fautuaga i se faamatalaga o le kalama faaPeretania pe afai e te le'i mauaina.

Mataupu Faavae o le Aoaoina o le Gagana

O le vaega leni o loo faamatala atu ai mataupu faavae e fesoasoani ai ia te oe i le suesueina ma le aoaoina lelei o le gagana.

- **Talia le tiutetauave.** Ia fausia pe fetuunai i taimi uma au sini o le aoaoina ma fuafuaga o le suesueina o le gagana. Taumafai ina ia faaoga le gagana i soo se avanoa.
- **Ia avea lau suesuega ma se mea aoga.** Fesili ifo ia te oe lava: Aisea ua ou suesueina ai lenei mea? O le a faapefea ona fesoasoani ia te au ina ia lelei ai lo'u fesootai atu? Ia faatatau mea na e suesueina i ni tulaga moni lava o le olaga faapea gaoioiga i aso taitasi. Suesue vaega o le gagana na o le a fesoasoani ia te oe e ta'u atu mea e te manao e ta'u atu. Mo se faaitaiga, afai e i ai se tala faatusipaia e te manao ia aofia ai i lau aoaoga, ia aoao le vaogagana ma le kalama e talafeagai e faamatala atu ai.
- **Taumafai e fesootai atu.** Taumafai e saili se tulaga paleni talafeagai i le va o le suesueina o le kalama faapea le fausaga o le gagana ma le aoaoina e ala i au gaoioiga i aso taitasi. E leai se mea e sili atu nai lo le talanoa atu i tagata e tautatala ai i le gagana.
- **Aoao lelei ni manatu fou.** O le a mafai ona e toe manatuaina ma faaoga lelei ia mataupu faavae o le gagana pe afai e te iloilo ina soo mea na e suesueina ma afai e te toe faaitaia i ni tulaga fou.

Ia Fausia se Fuafuaga e Suesue ai le Gagana

O se fuafuaga e suesue ai le gagana e fesoasoani lea i faifeautalai fou ma faifeautalai e le lava le malamalama, ia taulai atu i mea e mafai ona latou faia i aso taitasi e faaleleia ai lo latou tomai e tautatala i le gagana a le misiona. O lau fuafuaga o le a aofia ai mea o le a e faia i lou taimi e suesue ai le gagana ma mea o le a e faia i le aso atoa.

A manaomia ai, ia faaoga nisi o ou taimi e suesue ai le gagana e fausia pe fetuunai ai lau fuafuaga e suesue ai. O taeao uma lava la i le taimi e te suesueina ai le gagana, ia aoao le gagana e moomia mo gaoioiga o le aso. O taiala nei o le a fesoasoani i le fausiaina o lau lava fuafuaga e aoaoina ai le gagana:

1. Faatu ni sini. O sini faalevaiaso ma sini o aso taitasi o le a fesoasoani ia te oe e aoaoina le gagana a lau misiona. Ia taulai atu i au sini i le faaleleia o ou tomai e fesootai ma aoao atu i le taimi o gaoioiga faatulagaina, e pei o ni taimi faatulagaina mo aoaoga, o avanoa e saili ai, faapea fonotaga a le aufono a le uarota. Iloilo lou alualu i luma i le ausiaina o au sini o le gagana. Fesili ifo ia te oe lava po o a mea e mafai ona e faia e fesootai atu ai ma le manino faapea ma le mana i le taimi o au gaoioiga faatulagaina.

2. Filifili po o a meafaigaluega e faaoga. Iloilo meafaigaluega nei o le gagana ma fuafua po o a mea e mafai ona e faaogaina ina ia ausia ai au sini:

- O tusitusiga faavae i le gagana a lau misiona.
- O lesona i le gagana a lau misiona.
- O se tamai lolomifefiloi.
- O se tamaitusi o le kalama.
- Mea e faaoga i le NAF [MTC] mo le gagana.
- Tamai kata mo faamatalaga tusitusia.
- O se tamai api.
- Isi mea e faaogaina e le Ekalesia o loo i le gagana a lau misiona.



3. Tauloto ia upu ma fuaitau. Ia iloa upu ma fuaitau o le a fesoasoani ia te oe i le ausiaina o au sini. O lau fuafuaga o le gagana e mafai ona aofia ai manatu nei:

- Ia iloa upu ma fuaitau o loo i totonu o lesona, tamaitusi, tusitusiga paia, ma isi lomiga a le Ekalesia e mafai ona e faaaogaina i aoaoga.
- Tusi i se tamai api ia upu ma fuaitau e te le iloa. Ia feaveai se tamai lolomifefiloi ma sue ai upu nei.
- Ia feaveai ni tamai kata e tusi ai faamatalaga e suesue ai i le aso atoa. Tusi se upu po o se fuaitau i le isi itu ae tusi le uiga i le isi itu. Ia tuu ese upu ua e iloa. Ia galue i upu o loo totoe seia e iloina uma.
- Faaaoga upu ma fuaitau fou i ni fuaiupu i le taimi o au suesuega faaletagata, aoaoga, ma le aso atoa.
- Ia faataitai le faaleoga e ala lea i le ta'u leotele o upu ma fuaitau.
- Tauloto ia mau autu i le gagana a lau misiona.
- Tauloto ia ni faamatalaga faigofie mai lesona po o tamaitusi e avatu ai ia mataupu faavae autu o le talalelei. Saili isi auala e faailoa atu ai nei manatu.

4. Aoao le kalama. Faaaoga au meafaigaluega o le gagana e iloa ai mataupu faavae o le kalama ia o le a fesoasoani ia te oe e ausia ai au sini. Afai e moomia, ia fesili atu i lau soa, o se faifeautalai ua lava le silafia, po o se tagata o le ekalesia mo se fesoasoani. Mafaufau ia aofia ai nisi o manatu nei:

- Faaaoga le faamatalaga o le kalama na e mauaina i le NAF po o se faamatalaga e faamaonia atu e lou peresitene o le misiona e fesoasoani ai ia te oe ia e malamalama i le kalama ma le faatulagaga o fuaiupu o loo maua i lesona, tamaitusi, ma tusitusiga paia.
- Ia saunia fuaiupu e faaaoga i au gaoioiga ua faatulagaina lea e faaaoga ai nei mataupu faavae o le kalama. Faataitai ona tautala ma tusi ia fuaiupu.
- Ia faalogo lelei i le faasologa o upu i le gagana faapea ia upu ma a latou vaega i le faaaogaga.
- Vaai mo avanoa e faataitai ai ma faaaoga i aso taitasi le kalama na e suesueina.

5. Faalogo ma le toto'a. Mafaufau ia aofia ai vaega nei:

- Faalogo ma le toto'a i tagata e tautatala i le gagana. Faataitai mea na e faalogo i ai.
- Afai na e faalogo i se mea e te le malamalama ai, tusi i lalo ma saili po o le a le uiga. Faataitai le faaaogaina o upu po o le faatulagaga o fuaiupu.
- A o e faalogo, ia iloa upu ma faatulagaga na sa e aooina talu ai nei.
- Afai e te faalogo i se fuaitau e ese lona faaaogaga mai le auala e te faaaogaina ai, ia tusi i lalo ma faataitai. Ae peitai, i le aveai ai ma se auauna a le Alii, ia faaaoga pea lava le gagana talafeagai, ae le o se gagana faataatua.
- Ia fai se lisi o mea atonu e ta'u atu e tagata ia te oe i le taimi o au gaoioiga fuafuaina. Vaai ia upu ma fuaitau e faatatau i nei tali. Fuafua ma faataitai ni auala e mafai ona e tali atu ai.

6. Faalelei ou tomai tusitusi ma faitau. Faitau le Tusi a Mamona i le gagana a lau misiona e aoao ai i upu ma fuaitau ma faataitai ai le kalama, faaleoga, ma le lelei atoatoa. E i ai se mana tele lava i le faaaogaina o tusitusiga paia i lau suesueina o le gagana. Ia mafaufau foi i manatu nei:

- Aoao e faitau ma tusi le alafapeta, tusitusiga, po o mataitusi a lau gagana. Mo le faiga e tusitusi ai mataitusi, ia taulai atu lava i tomai e faitau ai, e pei o le faitauina o tusitusiga paia, o le a fesoasoani lena ia te oe pe a e aoao atu.
- Faitau leotele mai le Tusi a Mamona, o isi tusitusiga paia, po o mekasini a le Ekalesia i le gagana a lau misiona. Ia tagai lelei i upu, fuaitau, ma le kalama e le masani ai. Afai e te le malamalama i se upu, taumafai ia malamalama i lona uiga mai le aano o le fuaitau na e sueina. Faaopoopo le upu i au kata o faamatalaga tusitusia. Ia faaaoga faatasi au tusitusiga paia i lau lava gagana faapea i le gagana a le misiona pe a talafeagai ai.
- Ia i ai se tasi e faatonutonuina oe i le ta'uga, faaleoga, ma vaega e taofi ai a o e faitau.
- Faataitai ona tusitusi i le gagana a lau misiona—mo se faataitaiga, o faamatalaga tusitusia a oe lava ia faapea ma faamanatu, o tusi, o faamatalaga e faafetai atu ai, ma faamatalaga faamalosi. Tusi lau molimau i totonu o kopi o Tusi a Mamona e te tufatufaina atu.

7. Fai i isi e fesoasoani atu ia te oe. Mafaufau ia aofia ai manatu nei:

- Afai o lau soa o lana gagana lea e tautala ai, ia faaaoga lelei lenei avanoa silisili e ala lea i le fesili soo atu i ai ma ia maua mai ni tali.
- Fai atu i lau soa ma tagata e tautatala i le gagana e faasa'o oe ma fautua atu ni auala e faaleleia ai. Afai latou te faaaogaina se upu e te le malamalama ai, fai i ai e faamanino atu mo oe. O fanau iti ma matua o matua e masani lava ona naunau e fesoasoani atu.
- Ia valaaulia i latou o loo e aooina ina ia fesoasoani atu. Ia faamalamalama atu i ai, "O lea ou te aooina la outou gagana. Faamolemole fesoasoani mai ia te a'u. Afai ou te fiu e tau saili se upu, faamolemole fesoasoani ia te a'u."
- Aua e te popole e fesili atu mo se fesoasoani patino: "E faapefea ona e fai atu ____?" "E faapefea ona faaleo le ____?" "O le a le uiga o le ____?" "Faamolemole pe mafai ona e toe ta'u mai le mea lena?" Tusi tali i lalo ma ia suesueina. _____
- Fai atu i tagata o le ekalesia e suesue [lou malamalama] i au kata e tusitusi ai faamatalaga po o lisi o upu, ma fesoasoani atu ia te oe i le faitauina leotele o tusitusiga paia.



8. Iloilo ma toe fetuunai lau fuafuaga e suesue ai. Iloilo lau fuafuaga e suesue ai i vaiaso taitasi e fuafua ai pe o aoga. Ia valaaulia lau soa ma taitai o le misiona e fautua atu ni vaega e faaleleia ai.

Ia faaaoga le gagana a lau misiona i soo se vaega. Ia tautatala ma lau soa i le gagana i le malosi e mafai ai i le aso atoa. Tatalo na o oe pe tatalo faalauaitele i le gagana a le misiona ina ia aoao ai le gagana talafeagai mo le tatalo ma ia aoao e faaleo atu mea o i lou loto.

Aua e te fefe pe a sese. O tagata uma lava e aooina se gagana fou, e i ai lava sese. O le a malamalama tagata, ma o le a latou talisapaia au taumafaiga uma ina ia aooina le latou gagana. O le taulotoina o fuaitau ma mau o le a fesoasoani ia te oe ia aloese mai ni mea sese, ae le tatau ona e faaaogaina ni mau po o ni tusitusiga uumi ua taulotoina, e aveva ma auala e aloese ai mai ni sese.

Gaoioiga: Suesuega Faaletagata Lava Ia

I le faaaogaina o tiala o loo faamatala atu i luga, ia fausia se fuafuaga e suesue ai. Iloilo faatasi ma lau soa po o se taitai o le misiona lau fuafuaga.

Aoao Faatasi ma Au Soa

Fesoasoani i au soa ia maua le aafiaga o le faamanuiaina ma maua le mautinoa i le aooina o le gagana i le saosasoa e mafai ai. Ia tuuina atu soo ma le faamaoni le faamalo i au soa ma isi faifeautalai i lo latou alualu i luma. Ia mataala e aua ne'i tuuina atu se faamatalaga po o le faia o soo se mea e faavaivaia ai lo latou mautinoa, ae aua foi le soona puipuia i latou ina ne'i o latou le aoao ai. Aua e te taofia le fesoasoani pe a manaomia. Ia tuu atu ia i latou ni avanoa se tele e aoao ma molimau atu ai ma le faamanuiaina. Mafaufau i manatu nei mo le aooina faatasi ma au soa:

- Ia aoao atu e le tasi ia le isi i le kalama ma upu na e aooina.
- Faataitai ona aoao atu i le gagana a le misiona. I le taimi muamua, atonu e faigofie lava le aoao atu a faifeautalai fou, faasoa atu se molimau faigofie, ma tauloto atu ia mau. A o faateleina lo latou mautinoa ma le gafatia, o le a mafai ona latou auai atoatoa i le aooina o tagata sailiili.
- Faataitai ona faaoga le gagana e fesoatai atu ai i tulaga masani faafaifeautalai.
- Ia tuu atu e le tasi i le isi se tali atu agalelei ma faigofie e faataitai ai. E taua foi lou mauaina o ni tali mai e aunoa ma le tiga ai.

Ia matauina le auala na fesoasoani atu ai se faifeautalai ua lava le iloa i lana soa o loo i le tala lenei.

Na faatoa ou taunuu atu lava i la'u eria lona lua ae ta'u mai e la'u soa ua oo ia te a'u le faasologa ou te faia ai se mafaufauga faaleagaga i le ma fafaga. Sa ou lagonaina le fefe. O la'u soa muamua e fiafia lava o ia na te faia le aoaoga, ae o a'u sa faaoga e tuuina atu ni nai vaega laiti o le lesona ona ou faalogolo lea a o ia folafola atu ma tali soo se fesili.

Sa ou taumafai e faasufi la'u soa e tataua ona ia tuuina atu le mafaufauga faaleagaga, ae sa ia faamalosiau mai ia te au ou te talia le tofiga. Sa ou faataitai faatasi ai ma lana fesoasoani.

Ina ua oo i le taimi e fai ai, sa ou susueina a'u tusitusiga paia ma faitau atu mai le 3 Nifae 5 ma le 7. Sa feto'i la'u alu ae sa ou mafaia lava ona faamalamalama atu le mafuaaga na ou lagona ai le taua tele o a'u fuaiupu na filifilia, ma sa ou maua le to'a ina ua uma. Ina ua tuu mai se fesili, sa ou tilotilo atu i la'u soa e tali, ae le'i matala lona gutu. O le taimi lena sa ou ofo ai ia te a'u lava ia ona o lo'u tuuina atu o se tali na manino lelei i le faaFarani. Sa sili ona ou ofo ona sa foliga mai e le'i iloa e le tagata lea o a'u lea e faaletonu ona o lo'u malamalama i fesoataiga. Sa ou maua le to'a ma iloaina sa sili atu la'u faaFarani nai lo se togi ou te tuuina i ai.

Sa mavae atu va'iaso, ma sa faaauau pea ona tuu mai a'u e la'u soa ou te faia ia aoaoga—e tusa lava pe ou te le'i manatu ou te mafaia, e tusa lava foi pe sa tau mafaufau o ia pe ou te mafaia. Ae ona sa ia faamalosiau mai ia te a'u ina ia ou tautala, faalogo, ma aoao atu, o lea sa amata ai ona saosasoa lo'u alualu i luma, ma sa ou lagonaina le ave a a'u ma se meafaigaluega a lo tatou Tama oi le Lagi nai lo le ave ma se soa gugu a se alii faifeautalai.

Gaoioiga: Suesuega Faaletagata Lava Ia po o Suesuega Faalesoa

- Afai o loo oulue galulue faatasi ma se faifeautalai fou, e mafai faapefea ona sili atu ona e fesoasoani i lau soa ina ia aooina le gagana?
- Afai o oe o se faifeautalai fou, o le a se ituaiga fesoasoani atonu e te talosagaina mai lau soa sinia?

Aoaoina o le Aganuu ma le Gagana

O le aganuu ma le gagana e vavalalata lava lo la sootaga. O le malamalama i le aganuu o le a fesoasoani e faamalamalama ai le mafuaaga ua faaaogaina ai le gagana i le tulaga o loo i ai. Taumafai ia malamalama i le aganuu a tagata ina ia mafai ona e talanoa atu i ai i vaega taua o le savali o le Toefuataiga i se auala o le a manino ia i latou.

O se tasi o mea silisili e mafai ona e faia ina ia maua ai le faatuatuaga ma le alofagia o oe o le taliaina lea o le latou aganuu i ni auala talafeagai. O le toatele o faifeautalai maoae sa latou faia faapena (tagai i le 1 Korinito 9:20–23). Taumafai ia maua le lagona mautinoa o tagata ia te oe ma lau gagana.

Gaoioiga: Suesuega Faaletagata Lava Ia po o Suesuega Faalesoa

- Mafaufau faapea o loo e auaina atu i se misiona i Asia. O loo e sauniuni e aoaoina se tasi e uiga i le toetu, ma ua e iloa o tagata lotu Puta e talitonu i le toefanauina. O le a faapefea ona e aoao atu e uiga i le toetu i se auala o le a malamalama ai le tagata sailiili o lenei aoaoga faavae e matuai manino lava le eseese mai le toefanauina? O a upu ma fuaitau atonu e moomia ona e aoaoina ina ia faataunuu ai lenei galuega?
- Mafaufau i tulaga faaleaganuu ma faalelotu o tagata o loo e aoaoina. Ia iloa se tulaga faaleaganuu pe faalelotu atonu e mafai ona oo atu ai i latou i se le malamalama i aoaoga faavae o le talalelei. Fuafua ni auala e manino ai ona aoao atu nei aoaoga faavae.

O Le Meaalofa o le Tautala i Gagana

Saili meaalofa a le Agaga, e aofia ai le tautala i gagana ma le faaliliuina o gagana. E sili atu nai lo se isi lava mea, o lenei vaega o le a fesoasoani ia te oe e te tautala ma malamalama ai i le gagana a tagata o lau misiona. O le a le mauaina lenei meaalofa e aunoa ma se taumafaiga a oe; e moomia ona e matuai sailia ma le atoatoa. O se vaega o le sailia o le meaalofa o le tautala i gagana, o le galue lea ma tauivi ma faia mea uma e te mafaia ina ia aoaoina ai le gagana. Ia faatuatua o le a fesoasoani le Agaga ia te oe a o e ola ai i le auala e tatau ai ma e faia le mea sili ona lelei. Ia i ai le faatuatua e mafai ona e maua le meaalofa o le tautala i gagana i lona lagona sili ona moni ma atoatoa.

Afai e te lagona lou tauivi ina ia faailoa atu ou lagona i le manino e te manao i ai, ia manatua e mafai e le Agaga ona tautala atu i loto o fanau uma a le Atua. Na aoao mai Peresitene Thomas S. Monson: “E i ai le gagana e tasi . . . ua silafia uma e faifeautalai—o le gagana lea a le Agaga. E le aoaoina mai ni tusi ua tusia e tagata popoto aoaoina, pe aoaoina foi i le faitau po o le tauloto. E maua le gagana a le Agaga e soo se tasi e saili ma lona loto atoa ia malamalama i le Atua ma tausi Ana poloaiga paia. O le malamalama atoatoa i lenei gagana e mafai ai e le tagata ona soloia puniala, manumalo i toatuga, ma uunaia loto o tagata” (“O Le Agaga e Ola Ai,” *Liahona*, Iuni 1997, 4).

Manatua le Mea Lenei:

- Suesue muamua i lau lava gagana ia aoaoga faavae ma lesona e te aoaoina atu.
- Aoao ina ia faailoa atu nei aoaoga faavae ma ou lagona i le gagana a lau misiona.
- Ia fausia se fuafuaga e suesueina ai le gagana ma ia taumafai pea e faaitaitai ni manatu fou a o e taumafai e faalelei oe lava ia i le gagana a lau misiona.
- Ia saili le taitaiga a le Agaga ina ia fesoasoani ia te oe ia malamalama ma fesootai ma tagata o lau misiona.

Manatu mo Suesuega ma le Faaogaina

Suesuega Faaletagata Lava Ia

- Iloilo fautuaga o loo i lenei mataupu. Ia iloa se fautuaga e te le'i faataitaia, ma faatu se sini ina ia faataitai i ai i ni nai aso o sosoo ai.
- I le isi a outou fonotaga faaleitu, ia talosaga atu i se faifeautal'ai ua lava le iloa ma ua i ai ni tomai lelei i le gagana, e faailoa atu po o le a le mea na ia faia na ia aoaoina ai le gagana.
- Ia faitau ma talanoaina le saunoaga lenei mai ia Elder Richard G. Scott: "O mea . . . o loo feteenai ai tu masani a lou aiga po o lou atunuu poo tu ma aga i fanua ma aoaoga a le Atua, ia faataatia ese. O mea e ogatasi ai tu masani ma aganuu ma Ana aoaoga, e tatau ona faapelepele i ai" ("Aveeseina o Puniala i le Fiafia," *Liahona*, Iulai 1998, 98). Mafaufau i auala e eseese ai aganuu a le eria o loo e talai ai ma lau aganuu. Ia fai se lisi o eseese. Ona kolosi ese lea o soo se aganuu e feteenai ma aoaoga o le talalelei. Mafaufau i aganuu taitasi na o loo totoe, ma mafaufau pe mafai faapefea ona e avea nei aganuu ma ni au lava aganuu.
- Ia fausia se fuafuaga e suesue ai ina ia saunia ai oe e faia se tasi o mea nei i le gagana a lau misiona:
 - Faamatala le tala ia Iosefa Samita.
 - Fai se aotelega o le 3 Nifae 11.
 - Fai se aotelega o le Alema 32.
 - Faamatala Nifae ma papatusi apamemea (tagai i le 1 Nifae 3–5).
 - Faamalalalama ia tisipenisione.
 - Faamatala atu sou aafiaga faaletagata.
- Ia faia ni kata e tusitusi ai faamatalaga mo upu e te le iloa ina i se tasi o lesone. Ia e feavea'ia seia oo lava ina ua e malamalama uma i ai.

Suesuega Faalesoa

- Faataitai ona aoao e le tasi ia le isi i lesone a faifeautal'ai i le gagana a lau misiona.
- Fai i lau soa e faalogo atu i lau faaleoga o upu ma fesoasoani ia te oe ina ia faaleleia.
- Filifili ni tala faatusipaia po o ni fuaitau e te manao e faaoga i le aoaoga. Ia faataitai ona e faia se aotelega i ni au lava upu.
- Ia iloilo manatu o loo i totonu o lenei mataupu. Ia talanoaina ia fautuaga e mafai ona e faaogaina i suesuega faalesoa i le gasologa o le vaiaso e sosoo ai.
- Afai o loo e aoaoina se faifeautal'ai fou, ia matauina ia tulaga pe afai e le malamalama lau soa. Ia fai se lisi o upu, fuaitau, po o le kalama e taulalata i ai ia o le a fesoasoani i lau soa. Ia faamalalalama ma faataitai le auala e faaoga ai upu o loo i le lisi i gaoioiga fuafuaina o le a oo mai.

Fonotaga Faaleitu ma Konafesi Faalesone

- Ia valaaulia atu i le fonotaga ia tagata e tautatala ai i le gagana. Ia fuafua e aoaoina i latou e faifeautal'ai i ni vaega tolaite. Fai atu i tagata e tautatala i le gagana ina ia tusitusi i lalo mea latou te matauina ma toe avatu ni tali e tusa ai ma le gagana a faifeautal'ai.
- Ia vave tofi se faifeautal'ai se toatasi pe toalua e faamatala ni tulaga faamanuina sa la mauaina i le suesueina o le gagana. Ia la faasoa atu ni o la manatu.

Faamatalaga

- la tofi se faifeautalai ua lava le malamalama e tuu atu faapuupuu ni vaega o le gagana lea e masani ona faigata i faifeautalai. la tuu atu ni faataitaiga o le faaaogaina lelei, ma tuu atu i faifeautalai e faataitai.
- la tuu atu i faifeautalai e ola ai i le aganuu ina ia faasoa atu ni manatu e fesoasoani ai.

Peresitene o le Misiona

- la faatalanoaina faavaitaimi ia faifeautalai i le gagana o loo latou aoaoina.
- Talosaga atu i taitai perisitua mo ni manatu i le auala e mafai ai e faifeautalai ona faaleleia le latou gagana.
- la iloa ia mea e masani ona sese ai faifeautalai o loo aoaoina le gagana a lau misiona. la tuu atu ni aoaoga i konafesi faalesone e faasa'o ai nei mea sese.
- la aoao faifeautalai i le aoaoga faavae o meaalofa faaleagaga.
- la matauina au faifeautalai pe a latou aoao atu i le gagana.
- Vaai mo ni avanoa e faaaoga ai le gagana faatasi ma au faifeautalai.

Faamatalaga

Lined writing area with 26 horizontal lines.



Pe Faapefea Ona Ou Faaogaina Tatau O'u Taimi?

Faamatalaga

Manatunatu i le Mea Lenei

- E mafai faapefea ona fesoasoani sini e avea ai au ma se faifeautalai e sili atu ona ta'uaogaina?
- O le a le mea e tatau ona avea ma autu o a'u sini?
- O a ni a'u meafaigaluega ma punaoa po o risosi, ma pe faapefea foi ona ou faaogaina [ia punaoa]?
- Aisea e taua ai le tusi a le eria?
- Pe faapefea ona ou faafoeina fuafuaga faalevaiaso ma fuafuaga faaleaso?
- Ou te iloa faapefea pe o fesoasoani a'u sini ma fuafuaga e faalateleina ai le galuega a le Alii?

Ua tofia oe e fai le galuega a le Alii i se eria patino. E finagalo o Ia ina ia e vaaia lau eria ma le alofa ma le matua faaeteete tele. O lou faamoemoega, o le fesoasoani lea i isi ia o mai ia te Ia, e ala i le papatisoga ma le faamauga.

Ia faia mea uma e te mafaia ina ia e tuua lau eria, a ua sili atu ona malosai nai lo le mea na e alu atu o i ai. O sini taua ma fuafuaga e faia ma le faaeteete, o le a fesoasoani ia te oe e faataunuaina ai mea ua finagalo le Alii e te faia. A'o e vaavaaia ia tagata o le eria ua tofia i ai oe, ua ia te oe le tiute e te faamatala atu ai ia te Ia faapea ou taitai o le misiona.

O loo ta'ua i le tusi o lou valauga faafaifeautalai e faapea: "O le a faamoemoe e te tuuina atu lou taimi atoa ma lou mafaufau e te auauna atu ai i le Alii, ae faataatia ese isi mea uma tau oe lava ia. A e faia nei mea, o le a faamanuiaina oe e le Alii ma o le a avea oe ma se fautua ma se avefeau ta'uaogaina o le upumoni. Ua matou tuuina atu ia te oe lo matou faatuatuaga, ma e matou te tatalo foi ina ia fesoasoani atu le Alii ia te oe i le faataunuaina o ou tiutetauave i lenei tofiga paia." O le a fesoasoani lenei mataupu ia te

Faamatalaga

oe, e te iloa ai pe faapefea ona fesoasoani le faatutuina o sini, faia o fuafuaga, ma le tauaveina o le matafaioi e tali atu ai, e aumaia ai tagata e toatele ia maua le talalelei toefuataiina.

Gaoioiga: Suesuega a le Tagata Lava ia pe Faalesoa

Faitau le lakopo 5:11–13, 61–64, 74–75, ma tali ia fesili nei:

- O le a se lagona o le Alii i Lana fanau?
- O le a le ituaiga taumafaiga o loo manaomia e le Alii mai Ana auauna?

Faailoga Autu mo le Liuaia

Atonu sa e mafaufau pe o lē fea o a tatou mau matafaioi e sili ona taua. Ina ia mafai ona tali lenei fesili, e tatau ona e malamalama i lou faamoemoega ma ia e iloa, o le lelei o le faaogaina o le taimi e mafai ona fesoasoani ia te oe e faataunuuna ai lenei faamoemoega.

O lou faamoemoega o le valaaulia lea o isi e o mai ia Keriso, e ala i le fesoasoani ia i latou ia talia le talalelei toefuataiina e ala i le faatuatua ia Iesu Keriso ma Lana Togiola, salamo, papatisoga, ma le mauaina o le meaalofa o le Agaga Paia, ma tumau ai e oo i le iuga. Ua faailoa mai e taitai o le Ekalesia ia faailoga autu e fesoasoani ia te oe e taulai atu ai i lenei faamoemoe. A e taulai atu i nei faailoga autu, o le a e fesoasoani i tagata e agai atu i le papatisoga, faamauga, ma faauau ai ona toaaga i le Ekalesia, ma le liua tumau.

Faailoga Autu e Faamaumau ma Lipoti Atu

- Tagata sailiili ua papatiso ma faamau
- Tagata sailiili ma le aso e papatiso ai
- Tagata sailiili sa auai i le sauniga faamanatuga
- Lesona sa aoao i tagata sailiili a o i ai se tagata o le ekalesia
- Isi lesona sa aoao atu
- Tagata sailiili ua agai i luma
- Aofa'i o igoa na faailoa mai ma faafesootai
- Tagata sailiili fou
- Lesona sa aoao i tagata faatoa liliu mai ma tagata o le ekalesia e le o toaaga mai

O nei faailoga o loo faailoa mai ai mea na tutupu ma tulaga o loo ta'u mai ai le aga'i atu o se tagata ina ia liua moni. O loo tuuina atu i lalo se faamatalaga puupuu o faailoga autu taitasi:

Tagata sailiili ua papatiso ma faamau: O tagata sailiili taitoatasi o e ua maua sauniga o le papatisoga ma le faamauga.

Tagata sailiili ma le aso e papatiso ai: O tagata sailiili taitasi ua malilie ina ia papatiso ma faamauina i aso patino.

Tagata sailiili sa auai i le sauniga faamanatuga: O tagata sailiili taitoatasi na auai i le sauniga faamanatuga.

Lesona sa aoao i tagata sailiili a o i ai se tagata o le ekalesia: O le aofai atoa o lesona na aoaoina i tagata sailiili uma a o i ai se tagata o le ekalesia. O se lesona e masani ona i ai

le aoaoina atu o se mataupu faavae se tasi pe sili atu foi mai lesona, o se tatalo amata ma se tatalo faaiu, ma valaaulia e faia ni tautinoga. E lē tau aoaoina atu uma ia mataupu faavae o se lesona e ta'ū ai faapea o se lesona atoa. O le lelei o lau aoaoga e mafai ona fua i le tuputupu ae o tagata sailiili i lo latou faatuatua i le Faaola, salamo i a latou solitulafono, ma saunia faamaoni mo le mauaina o sauniga o le papatisoga ma le faamauga.

Isi lesona sa aoao atu: O le aofai atoa o lesona sa aoao atu i tagata sailiili ae lē o i ai se tagata o le ekalesia.

Tagata sailiili ua agai i luma: O le aofai o tagata sailiili o e sa aoaoina i se lesona se tasi pe sili atu foi, ma o loo tausia ia tautinoga e pei o le tatalo, faitau mai le Tusi a Mamona, auai i le lotu, ma sauniuni mo le papatisoga ma le faamauga. O tagata sailiili o e naunau e faaaauu pea ona suesue e uiga i le talalelei, ae e faigata ona tausia ia tautinoga, e le o ni tagata sailiili ua agai i luma e pei ona faamatalaina i i. Ua faavasega i latou o ni tagata sailiili fou, po o isi tagata sailiili.

Aofai o igoa na faailoa mai ma faafesootai: O le aofai o igoa na faailoa mai sa e faafesootaiina pe sa aoaoina foi, pe na fesiligia mo se aso patino e toe foi atu ai. O le taimi lava e te faafesootaia ai se igoa na faailoa mai, e aveesea mai ai lea igoa mai le vaega o igoa na faailoa mai, ma a le avee loa ma se tagata sailiili fou, ua faailoga mo le toe siakiina, pe aveese mai [le lisi o tagata sailiili o loo i ai nei]. O se igoa na faailoa mai, e makaina foi na faafesootai pe afai ua mavae le tele o taumafaiga, ae le'i mafai ona e maua le tagata pe na iloa ane foi e sese le tuatusi. O nei igoa na faailoa mai, e toe auina atu i le ofisa o le misiona, faatasi ma se faamatalaga e ta'ū atu ai le mafuaaga na lē mafai ai ona faafesootai.

O le aofai o igoa na faailoa mai, e faatatau lea i igoa uma na faailoa mai ia te oe, ae le'i faafesootaia (igoa na faailoa mai e tagata o le ekalesia, tagata sailiili, laumua o le Ekalesia, ma isi).

Tagata sailiili fou: O le aofai o tagata taitoatasi o e na maua se lesona ma talia se taimi faatulagaina patino e toe asiasi atu ai.

Lesona sa aoao i tagata faatoa liliu mai ma tagata o le ekalesia e le o toaaga mai: O le aofai o lesona na aoaoina i tagata liliu mai e le'i atoa se tausaga talu ona avee ma tagata o le ekalesia, faapea ma tagata o le ekalesia e le toaaga mai.

A o seti au sini ma faia au fuafuaga, ia iloilo po o a mea e te faia e mafai ai ona faaopoopo atu i le numera o tagata ua faatatau i ai nei faailoga autu taitasi. O lau sini e tatau ona faatoateleina le aofai o faailoga autu taitasi.

O le a e faia le tele o mea e lē o faamatalaina atu i faailoga autu, e pei o le faafesootai i le auuala pe o suesuega a le tagata lava ia po o le faalesoa foi. O nei gaoioiga taua e tofu sao uma lava i se faailoga autu se tasi pe sili atu foi. Mo se faataitaiga, a e aoaoina tagata na e mauaina i au lava taumafaiga, ua e faaopoopoina tagata sailiili fou i lau vaega o tagata e aoao. Ma o le maua o au lava suesuega ma suesuega faalesoa, o le a faaleleia atili ai lou tomai e aoao atu e ala i le Agaga, o le a faamanuaina ai au tagata sailiili fou ma tagata sailiili ua agai i luma. O le mana o lau sailiga ma aoaoga, o le a aafia ai ia faailoga autu uma lava. Ia toe iloilo au mea uma e fai pe o faaopoopo atu i le numera o tagata i vaega nei. Afai e le o mafai e oulua ma lau soa ona iloa pe mafai faapefea ona fesoasoani se gaoioiga talai e faateleina ai le numera o tagata i se faailoga autu se tasi pe sili atu foi, ua tatau loa ona oulua fesili pe o alu aoga lo oulua taimi i lea gaoioiga.

Faamatalaga


Gaoioiga: Suesuega Faalesoa

I totonu o lau tusi talaaga o suesuega, ia lisi ai ia gaoioiga talai uma sa oulua faia i aso e tolu ua tuanai. Mo gaoioiga taitasi, vaai pe na i ai se aafiaga i se tasi o faailoga autu. Afai na i ai, ia tusi ai i talane le *ioe*. Afai e leai, tusi ai le *leai*. Mo gaoioiga taitasi o loo i ai le *ioe*, ia faamatala pe na faapefea ona i ai se aafiaga. Mo gaoioiga taitasi e *leai*, ia filifili pe aisea na e faia ai lea mea, ma pe o le a e faia pea lea gaoioiga i le lumanai. Ia talanoaina lau lisi faatasi ma lau soa, ma faamatala i ai pe aisea na e faailogaina ai nisi o gaoioiga i le *ioe* ae o nisi gaoioiga i le *leai*. Ia talatalanoa pe o lē fea gaoioiga atonu ua tatau ona tuu.

O Le Tusi a le Eria ma Mea e Faaoga mo Fuafuaga ma Lipoti

E faatatau ia i latou o e na taliaina i totonu o le Ekalesia e ala i le papatisoga ma le faamauga i ona aso, sa aoao mai ai Moronae, “Ua tusia o latou igoa, ina ia manatulia i latou ma tausia i le afioga lelei a le Atua, ina ia faatumaaina i latou i le ala tonu” (Moronae 6:4).

Ua tuuina atu ia te outou meafaigaluega e faaoga e fesoasoani ai e faamaumaaina ai faamatalaga taua e uiga i tagata e te aoaoina. O meafaigaluega foi nei e faatagaina ai oe e faasoa atu le aofaiga tonu o faamatalaga ia i latou o loo manaomia, e pei ona faailoa atu i le ata o loo i lalo.



O meafaigaluega nei ma faamatalaga uma e manaomia e fai ai lau galuega, e teuina i totonu o le tusi a le eria ma le Lisi o Fuafuaga a le Faifeautalai i Aso Taitasi. O le tusi a le eria e faatulagaina faapenei:

- **Faafanua a le Eria**
 - Faafanua a le eria ma se oototoga o tuaoi
- **Faamaumauga o le Alualu i Luma**
 - Fomu o Faamaumauga o le Alualu i Luma
- **Tagata Sailiili ma le Aso e Papatiso ma Faamau Ai**
 - Fomu o Faamaumauga o Aoaoga
- **Tagata Sailiili ua Agai i Luma**
 - Fomu o Faamaumauga o Aoaoga
- **Tagata Sailiili Fou ma Isi Tagata Sailiili**
 - Fomu o Faamaumauga o Aoaoga
- **Tagata e Ono Mananao e Sailiili i le Talalelei**
 - Fomu o Tagata e Ono Mananao e Sailiili i le Talalelei
 - Igoa na faailoa mai e ala i faasalalauga ma isi faamaumauga o igoa na faailoa mai
- **Tagata Sailiili Na i Ai Muamua**
 - Fomu o Faamaumauga o Aoaoga

- **Tagata Faatoa Liliu Mai ma Tagata o le Ekalesia e le o Toaaga Mai**
 - Fomu o Faamaumauga o Aoaoga
 - Fomu o Lisi o Mea e Faataunuu mo Tagata Liliu Mai
- **Faamatalaga i le Uarota ma le Misiona**
 - Lisi o numera o telefoni a le uarota
 - Lisi o tofiga o tagata o le uarota
 - Faatulagaga o fonotaga a le uarota ma faifeautalai
 - Lisi o aiga e le lolotu uma
 - Lisi o numera o telefoni a faifeautalai o loo i lau itu po o le sone
- **Faaleautaitai**
 - Lipoti o le Aotelega [e Fai e Faifeautalai i Luga o le Telefoni]
- **Faamatalaga e uiga i le Eria**
 - Faamatalaga e uiga i le fale
 - Femalagaaiga faitele
 - Fale otiulu
 - Fale ta lavalava
 - Nofoaga e fai ai faatau
 - Nofoaga e aloese mai ai
 - Faafesootai

O Le Tusi a le Eria

O eria talai uma lava e i ai se tusi a le eria, lea e avea ma se faamaumauga tumau o au taumafaiga mai lea aso i lea aso. Ia tuu i ai faamatalaga autu o aso taitasi, ma ia toe vaavaai i ai i vaiaso taitasi i le taimi e fai ai au fuafuaga faalevaiaso. Ia tusi mama, ma ia tusi ai faamatalaga lata mai ma ia sa'o, ina ia mafai e soo se faifeautalai i le lumanai ona fausia ai i luga o auunaga musuia sa e tuuina atu. Pe a valaaulia oe, ia ave lau tusi a le eria i faatalanoaga po o konafesi faalesone, lea e mafai ai e taitai o le misiona ona iloilo ina ma fesoasoani e faasino atu le ala e te faaogaina lelei ai.

E tatau ona e tilotilo i nisi vaega o le tusi a le eria i aso taitasi a o e faatumuina ma fetuunai au fuafuaga. Ave lau tusi a le eria i konafesi faalesone ma faatalanoaga ina ia mafai ona iloilo ina e taitai o le misiona. E tatau ona tuu tusi lea i lou fale pe a e siitia, ina ia mafai ona faaoga faamatalaga e faifeautalai e mulimuli mai.

O lau tusi a le eria, ia tusia ai ni faamaumauga sa'o, atoatoa, ma lata mai o tagata uma o loo outou galulue faatasi. O loo tuuina atu i lalo se faamalamalama o meafaigaluega ua saunia.

Faamaumauga o Aoaoga: E fesoasoani le fomu leni ia te oe e tusia ai faamatalaga auiliili e faatatau i le alualu i luma o tagata sailiili, tagata faatoa liliu mai, ma tagata o le ekalesia e le toaaga mai, o loo e aoaina.

Faamatalaga

Faamatalaga

- Faamatalaga o le tagata.
- Aso o papatisoga ma faamauga.

Faamauga o Aoaoga

O LE EKALEZIA A
IESU KERISO
O LE AU PAIA O ASO
E GATA AI

Ena o le tagata _____ Uarota po o le paranesi _____ Sileki po o le itu _____

Faamatalaga o le Tagata (I le isi itu mo nisi faamatalaga faapoopo patino)

Igoa o le tagata po o le ulugali _____	Tausaga e le matua _____	Tausaga o le uluai lesoataga _____	Aso ua fuafua o le papatisoga _____	Aso tonu o le papatisoga _____	Aso o le faamauga _____	Igoa o tamaiti (E matai ona tusia isi igoa faapoopo i le waga o Faamatalaga Faapoopo e boi i tua.) _____
Tausaga o le matua _____	Tausaga o le matua _____	Tausaga o le matua _____	Tausaga o le matua _____	Tausaga o le matua _____	Tausaga o le matua _____	Tausaga o le matua _____
Tuatusi _____	Numera o le telefoni _____	Faifeautakai na amataina le aoaoga _____				
Igoa o tagata na faaumeaina mai ma faaoga o aga po o faaoga asiasi _____	Numera o le telefoni _____	Tuatusi _____				

*Huaga: TS = Tagata Sailiili; FL = Tagata Faatoa Liliu Mai; LT = Tagata o le ekalesia e Le Toaga; TE = tagata o le Ekalesia; LLU = Aiga e Le-Lokotu Uma

Aso Na Aoa Atu Ai Lesona ma Mataupu Faavae (U o pe afai sa aso o i ai se tagata o le ekalesia.)	I le Faalapotopotoga	I le Mataupu	I le Faalapotopotoga	I le Mataupu	I le Faalapotopotoga	I le Mataupu
Savali o le Toefuataiga	Pololeiga	Tulaga o Tautinoga po o Gaoioga mo le Tagata Sailiili po o le Ulu o le Aiga				
O Le Atua o lo tatou Tama Faalelagi alofa	Uitua	Faitau mai le Tusi a Maimana				
E faamamaina aiga e le talalelei	Tatalo soo	Tatalo e uiga ia Iosefa Samita ma le Tusi a Maimana				
Augatupulaga o le talalelei	Suesue tusitusiga paia	Auai i se sauniga faamanatuga ma isi sauniga				
O le galitaga a le Faaita'i i le lalolagi	Tausi le aso Sepati ia paia	Auai tamaiti i le Peraimeti, Alii Takavou, po o Tamaitai Takavou				
O Le Lilivese Tele	Papatisoga ma le Faamauga	Faailoa atu le aiga ma uo i faifeautakai				
O Le Toefuataiga: Iosefa Samita	Mulimuli i le perofeta	Aga i se sauniga o le papatisoga				
O Le Tusi a Maimana	Tausi Tulafono e Setulu	Faailoa ma le epikopo ma tagata o le aufoa a le uarota				
Tatalo, Agaga Paia	Ota i le tulafono o le legavia	Atina le faafoaga ma tagata o le uarota				
Ata o le Faaolataga	Uitua i le Upu o le Poto	Tausia Tulafono e Setulu				
Mua'i olaga	Tausi le tulafono o le setulua	Ota i le tulafono o le legavia				
O Le Foafoaga	Tausi le tulafono o le anapogi	Ota i le Upu o le Poto				
Saolotoga ma le Pa'u	Pe faapolea ona faai atu setulua ma taluaga	Ota i le tulafono o le setulua				
O lo tatou olaga i le lalolagi	Uitua ma faamamalu i le tulafono	Ota i le tulafono o le anapogi				
O Le Togioa	Tulafono ma Sauniga	Ota i le tulafono o lafaelele				
O le lalolagi o agaga	Perisitua ma ausilali	Ia faatanoaina mo le papatisoga ma le faamauga				
Toetu, faamasinoga, ma le timo o le paa	Galluega faifeautakai	Valaaulia uo ma aiga e auai atu i lo latou papatisoga ma le faamauga				
Malo o le mamalu	Faaiiopotoga e faavae	Ia papatisoina ma faamauga				
Talalelei a Iesu Keriso	Makamala ma talafasolotopo o le aiga	Faia i aso taitasi ia tatalo a le Iosefa lava ia ma le sauniga o tusitusiga paia				
Faamamaina mai le agasala	Auuna atu	Faia i aso taitasi ia tatalo faaleaga ma le sauniga o tusitusiga paia				
Faahutu ia Iesu Keriso	Aoa atu ma le aoaoina mai	Faia afafai faaleaga i vaaso taitasi				
Salamo	Tumau e oo i le luga	Maua le perisitua				
Papatisoga, o le latou uluai faagataga	Iloilo Fetili o le Faatanoaina mo le Papatisoga	Maua se valaanga o le Ekalesia				
O le mesalota o le Agaga Paia		Auai i sui papatisoga				
Tumau e oo i le luga						

(Luma)

- O se faamauga o aso na e aoa atu ai mataupu faavae mai lesona taitasi e lima, ma pe na i ai se tagata o le ekalesia. O lenei vaega e mafai ai ona e fetuutuunaia le faasologa o mea na e aoaoina atu, e tusa lava pe o le a le faasologa e te aoa atu ai ia mataupu faavae.
- E mafai ona e iloa ai le faasologa o lesona na aoaoina a o le'i faia le papatisoga ma lesona na aoaoina ina ua uma le papatisoga.
- E tatau ona teuina se faamauga o le tulaga ua i ai tautinoga a tagata sailiili. I lenei vaega, e te tusia ai le aso na e tuuina atu ai le valaaulia ma faailoga ai pe o latou tumau i le tausia o tautinoga.

Faamatalaga

- O se vaega e te avatu ai faamatalaga e uiga i le tagata po o lona aiga. Aua le tusia ai ia faamatalaga e matuai faapitoa lava i le tagata ia, pe o ni faamatalaga le lelei.
- O se vaega e te faamatalaina ai le taua o faamatalaga mai asiasiga e faia ai lesona. E mafai ona e tusia ai ni popolega na tuuina mai e tagata, tautinoga sa latou tauivi e tausia, ma tulaga faamanuiaiina na latou maua ia latou faitauga po o tatalo. E mafai foi ona e faailoa mai ai pe na latou auai atu i le lotu, ma po o le a le tusi o loo latou faitauina i le Tusi a Mamona.
- O se vaega e mafai ona e iloa ai asiasiga e toe siaki, pe afai ua le toe sailiili se tagata po o se aiga i le Ekalesia.

Faamaumaga o Asoaga (Iasauu)
 Faamatalaga Faamatalaina na faamatala pe na faapitoa ona faatalia le tagata po o le aiga ma le Ekalesia, gikaga, tautinoga tauivi, mea e faia i le lotu, ma na lona vaega.

Manatu e uiga i Faleloaga na Aoso Atu Ai			
Aso	Hi faatalia pe na faapitoa le lotu iadidideno po o le tatalo e ma na aoso aty, tatalo e tautinoga, ma na vaega faapitoa.	Ma aua le lotu, le lotu vaiaa? E uiga.	Faamaumaga o le lotu tatalo e le Lotu a Mamona.

Tutaga o Tagata sa Sailili Muamua
 Na faamatala pe aosa na tusa ai le lotu saillili i le Ekalesia, le faamatala tauinoga o asiasiga (taisi e toe siaki ai)

Aso	Tauinoga o le asiasiga	Faleloaga

(Tua)

Afai ua uma ona fai se Faamaumaga o Asoaga, e tatau ona tuu ai pea i totonu o le tusi a le eria, seia oo lava ina toaga lelei mai le tagata po o le aiga i le Ekalesia, pe siitia ese, pe maliu foi.

O LE EKALESTIA A IESU KERISO
 O LE AU PATA O ASO E GATA AI

Faamaumaga o le Alualu i Luma
 E faaoga o saunia ai faamatalaga e tuuina atu i taitai o uarota po o siteki e uiga i tagata sailili, o tagata faatoa illu mai, ma tagata o le ekalesia e le o tosaaga mai.

Igoa o faamatala: _____
 Uarota po o le panasoni: _____ Aso: _____

Buaga Tagata o loo Aoso Aso	Igoa	Tu aso ai ma	A po ai	Tusua	Numera o le leloti	Lesona sa aacina i le po ai faa sa acina o i ai se tagata o le ekalesia	Tagata na se faamatalaina mai po o le faa saiga o aiga	E faatua ona aua i le lotu	Aso o le papafisiga ma le faamaumaga	Aso na faaua ai le pefesitua	Fefesecosi o loo manatonia

*Ruaga: TS = Tagata sailili; FL = Tagata Faatoa Liliu Mai; LT = Tagata e Le Toaga; LLU = Aiga e Le-lotolu uma

Faailoga Autu: Vaia e uma i le

Tagata sailili na pefesitua ma ua faamau	Tagata sailili ma le aso e papafisiga ai	Tagata sailili sa aua i le tauinoga faamatalaina	Lesona sa aoso i tagata sailili o i ai se tagata o le ekalesia	Ioi lesona sa aoso atu	*Tagata sailili ua agai i luma	Igoa na faailoa mai	Lesona sa aoso i tagata faatoa illu mai ma tagata o le ekalesia e le o tosaaga mai
Papafisiga	Faamau				Autu	Faateoosoti	Tagata sailili fou

*Tagata sailili ua agai i luma: O tagata sailili ua faailoa pe aili atu lo taimi ua aacina ai, ma o loo faatua e latou tautinoga e faatua le Tusi a Mamona ma tatalo e uiga i le Tusi a Mamona, ma le Pefesitua o Ropota Soma, ma aua i le lotu, ma na lona vaega.

© 2004 B.R. 704, 704, Loka i le EA, 2008 890

Faamatalaga

Faamaumauga o le Alualu i Luma: O le faamaumauga lenei e mafai ai ona e aoteleina le alualu i luma o tagata sailiili, tagata faatoa liliu mai, ma tagata o le Ekalesia e le toaaga mai o loo e aoaina. E mafai ai foi ona e lipotiina atu faailoga autu. Faa'oga e fuafua faatasi ai a outou taumafaiga ma taitai o le uarota ma le siteki i fonotaga faamaopoopo a faifeautalai ma le aufono a le uarota. O le a e tusia faamatalaga lata mai o lenei faamaumauga i le taimi e faia ai au fuafuaga faalevaiaso, pe fai foi a o le'i faia foi fonotaga a le aufono a le uarota. Afai e mafai, ia avatu ni kopi o lenei faamaumauga i le epikopo, taitai misiona a le uarota, ma isi tagata o le aufono a le uarota, i vaiaso taitasi po o soo se taimi e manaomia ai. Ia mautinoa o faamatalaga e te tusia i luga o fomu o Faamaumauga o le Alualu i Luma ia atoatoa, sa'o ma tusitusi manino. O lenei mea o le a fausia ai le talitonuina o oe e le aufono o le uarota.

Tagata e Ono Mananao e Sailiili i le Talalelei: O le fomu lenei e mafai ai ona e tausia se faamaumauga o tagata o e mananao e avea ma ni tagata sailiili.

- O le tulaga o le tagata sailiili. (Pe ua aveesea mai o ia, pe ua aoaina nei o ia, pe e te manaomia le toe saga siakiina pea?)
- Pe o le tagata o se igoa na faailoa mai pe na maua e faifeautalai.
- O le aso na faafesootai ai le tagata.
- Faamatalaga taua.

O LE EKALESIDIA IESU KERISO O LE AU PALA O ASO E GATA I:						
Tagata e Ono Mananao e Sailiili i le Talalelei <small>Tusi faamatalaga e uga i igoa na faailoa atu ia se oe, po o tagata foi se faafesootai, o'i ono mafa'ona tatalaina se vasa'ula e aso i le talalelei tofutaina, e ala i nisi mau fesootaga ma faafesootai.</small>						
Eia o le tagata				Siteki po o le lu		
Uroto po o le paroto				Siteki po o le lu		
*Tulaga	Igoa	Tuutusi	Numera o le telefele	**Nunuiaga faafesootaga	Aso na faafesootai ai	Faamatalaga (Iuga o i ai le nau'au mai o le tagata sailiili, o vasa'ula na e tuaina atu le tagata sailiili, numera o anaiga e toe tau'ua)

*A = Aveese (mai le loi o tagata sailiili i ai nei); AN = Aso (e faafesootai i le taimi nei); S = (Tasi) ono Siteki
 **FTE = Faailoa atu e le tagata o le ekalesia; FTS = Faailoa atu e le tagata sailiili; FTL = Faailoa atu e le tagata le lotu;
 FLE = Faailoa atu o le numera o le Ekalesia; FF = Faafesootai e le faafesootai

© 2004 EK KSA 104 (4/01) & KSA 2009 (00)

Sii mai faamatalaga taua mai le “Tagata e Ono Mananao e Sailiili i le Talalelei” mai le vaega o le “Lisi o Fuafuaga a le Faifeautalai i Aso Taitasi” ma kopi i totonu o le fomu o le “Tagata e Ono Mananao e Sailiili i le Talalelei”. Faa'oga faamatalaga nei e fuafua ai ia asiasiga e toe siaki ai, toe iloilu ai le galuega faafaifeautalai a tagata o le Ekalesia faatasi ma le taitai misiona a le uarota, ma fuafua ai isi gaoioiga e mafai ona fesoasoani ai i nei tagata e amata ai ona latou sailiili i le talalelei tofutaina. O le fomu foi lenei e avea o se faamaumauga faasolopito mo faifeautalai e tofi atu i lena eria i le lumanai. Pe a e siitia atu i se isi eria, ia mautinoa ua kopi uma faamatalaga mai lau Lisi o Fuafuaga a le Faifeautalai i Aso Taitasi.

- O se fuafuaga o le aso e mafai ona e faamaumauina ai ou taimi faatulagaina mo le aoaoina atu o lesona, fonotaga, ma gaoioiga e saili ai. Ia fuafua ina ia mafai ona e maua ni gaoioiga aoga mo itula taitasi o le aso. O loo i ai foi ni avanoa mo ni fuafuaga faaleoleo.
- Avanoa e lisi ai galuega e tatau ona e faia (telefoni, tagata e faafesootai, sauniuniga mo lesona, toe siaki tautinoga, ma isi mea faapena).

- Avanoa e faamaumau ai mea o le a e suesueina a o e sauniuni mo taimi faatulagaina e aoao atu ai lesona.
- Sini o aso taitasi ma aofaiga tonu mo faailoga autu na filifilia.

Lipoti Faalevaiaso a le Faifeautalai: O lenei lipoti e tuuina atu ai ia te oe le avanoa e lipoti sa’o atu ai i le peresitene o lau misiona e uiga i au taumafaiga tala’i, ma nisi lava tulaga patino e te manao e fetufaa i ai. Pe a tusia lenei tusi, ia tuusa’o lava, ae aua e te manatu faapea e tatau ona e faatumuina atoa le avanoa. E na o ia lava le tagata e faitauina lenei tusi, o lea ia e maua le lagona saoloto e ta’u atu ou manatu.

Lipoti Faalevaiaso a le Faifeautalai

IN LE ENGLISH O IESU KERISO O LE AFI PAIA O ASO E OTOA I...

... (Form fields for name, address, phone, and other details) ...

Faailoga Autu

Tagata o le aso	Tagata o le aso	Tagata o le aso	Tagata o le aso	Tagata o le aso	Tagata o le aso	Tagata o le aso	Tagata o le aso

Tusi i le Peresitene a le Misiona

... (Form fields for reporting to the mission president) ...

Faamatalaga

E Faapefea Ona Seti ni Sini

O sini e atagia ai le naunautai o o tatou loto ma lo tatou malamalama, i mea e mafai ona tatou ausia. O sini ma fuafuaga, e faaliliuina ai o tatou faamoemoega i galuega faatino. O le setiina ma le fuafuaina o sini, o gaoioiga o le faatuatua. Ia seti ma le agaga tatalo ni sini e ogatasi ma le poloaiga a le Faola ina ia “fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia” (Mataio 28:19).

Ia seti ni sini o faailoga autu taitasi. E mafai foi ona e setiina ni sini mo le atiinaega o lou lava tagata. Ia fai mea uma i lou malosi e ausia ai au sini, a o e faaaloologia foi saolotoga o isi. O le fua faatatau aupito i taua o le manuia, e lē na o le ausiaina o sini, ae o le auaunaga e te tuuina atu ma le alualu i luma o i latou e te aoaoina ma faaaumea. O sini o le auala lea e fesoasoani ai e aumaia le tulaga maoae o le lelei i fanau a le Tama Faalelagi. E le tatau ona faaaogaina ina ia maua ai ni viiga.

O sini e manatunatu i ai ma le faaeteete, o le a e maua ai se taitaiga manino ma o le a fesoasoani e faatumuina ai ou aso i gaoioiga o le a faamalolosia ai tagata i lo latou faatuatua i le Faola ma agai atu ai i le papatisoga, faamauga, ma toaga atoatoa i le Ekalesia. O sini faigata o le a fesoasoani e te galue mae’ae’a ai ma taitai atu ai oe i le alualu i luma ma le tuputupu ae. Mulimuli i taiala o loo i lalo a o setiina au sini:

- Mulimuli i le Agaga.
- Ia tulaia atu i faailoga autu.
- Ia tulaia atu i tagata. E ui ina o le a e faaaogaina ia fuainumera, ia mafai ona e lagolagoina au fuainumera i igoa o tagata pe a mafai.
- Ia patino ma faamaoni, ae ia seti ni sini e te alualu ai i luma.
- Seti ni sini faalevaiaso ma ni sini faaleaso.
- Seti ni sini mo au lava suesuega ma suesuega faalesoa, e aofia ai lou suesueina o le gagana pe afai o loo e aoaoina se isi gagana.
- Ia fua lou agai i luma i aso taitasi, i vaiaso taitasi, ma pe a mavae periota taitasi o vaiaso taiono. Afai ua le mafai ona e ausia se sini, ia toe iloilo au taumafaiga ma saili ni auala e ausia ai le sini. Pe a manaomia, ia fetuutuunai mea o e faamoemoeina.

E i ai taimi, o le a faatuina ai e ou taitai ni tulaga o le lelei atoatoa e siitia ai au sini ma faateleina ai lou faatuatua. O tulaga faatonuina i le itu, sone ma le misiona, e mafai ona fesoasoani e te alualu ai i luma, galue lelei, ma oo atu ai i tulaga mauualuluga o le

“Ua matuai uunaia lava au, afai tatou te le setiina ni sini i o tatou olaga ma iloa pe faapefea ona taulimaina tomiai e ola ai ina ia ausia a tatou sini, e mafai ona tatou oo atu i se matua e gata ai ma toe tepa mai i tua i o tatou olaga, ma iloa ai ua na o sina vaega itiiti lava o mea tatou te gafatia sa tatou ausia. Pe a iloa e se tasi ona taulima ia mataupu faavae o le setiina o se sini, o le a mafai ona ia faia se eseese tele i taunuuga na te maua i lenei olaga.”

– ELDER M. RUSSELL BALLARD
LAUGA NA TUUINA ATU I LE AUTALAVOU MATUTUA
O LE ERIA A SATE LEKI, OKE. 18, 1981

faatinoaina. E le tatau ona faaaogaina o ni fuainumera e tatau ona ausia, e fai ai ma avega mamafa ni sini patino ia te oe ma lau soa.

Gaoioiga: Suesuega Faalesoa

Ia seti ni sini faalevaiaso mo faailoga autu taitasi. Ia fesili ifo ia te oulua lava, mo sini taitasi:

- Pe o i ai ni igoa o tagata tonu o loo fitoitonu i ai fuainumera o le lipoti?
- Pe o patino le sini?
- Pe o faamaoni le sini?
- Pe tatou te alualu i luma i lenei sini?
- Pe ua tatou tautino atu ea e faatino lenei sini?

Ia talanoaina sini taitasi. Afai e mafai, ia vaai pe faapefea ona e toe faaleleia ma pe aisea foi.

Faiga o Fuafuaga Faalevaiaso

A uma ona seti au sini, ia filifili pe o le a faapefea ona e ausia [ia sini]. E tatau ia te oe ma lau soa ona faataunuu le faiga o fuafuaga faalevaiaso i se aso ma se taimi e faalēlelei tele i le talai, e pei o aso Tofi po o taeao o Aso Farai. O le a setiina e lou peresitene o le misiona le aso ma le taimi o le faiga o fuafuaga faalevaiaso. O lenei fuafuaga faalevaiaso e mafai ona faaluina ai le lua i le tolu itula e faamae'a ai.

E tatau ona taulai atu le lua talanoaga i manaoga o tagata ma pe faapefea ona fesoasoani ia i latou ina ia alualu i luma. I le taimi o le faiga o fuafuaga faalevaiaso, ia toe faamanatu ia sini ua mavae, ma toe seti ni sini fou mo le vaiaso a sau. Ia mafaufau i soo se vaega o lau talaiga.

O le afiafi o le Aso Sa o le aso fautuaina lea mo le Lipoti o le Aotelega faalevaiaso [e Fai e Faifeautalai i Luga o le Telefoni]. O le lipoti i le afiafi o le Aso Sa, e tuuina atu ai se tulaga sa'o ma talafeagai o le misiona, aua o le tele lava o papatisoga ma faamauga e faia i Aso Toonai po o Aso Sa.

Talu ai ona o le aso lua te faia ai fuafuaga faalevaiaso e ono ese mai ma le aso e lipoti atu ai, ia fai lau fuafuaga faalevaiaso ma e mafaufau i ni aso se 10. Mo se faataitaiga, afai o le faiga o fuafuaga faalevaiaso e faia i le Aso Tofi, o le a e iloiloaina le alualu i luma o au sini e oo atu i le faaiuga o lena vaiaso, ma o le a e fuafuaina mea e tatau ona e faia e ausia ai nei sini e oo atu i le Aso Sa. Ona seti lea o ni sini ma faia ni fuafuaga mo le vaiaso e sosoo ai mai le Aso Gafua e oo i le Aso Sa. O le afiafi o le Aso Sa o le a e faaopoopo ai ma lipoti atu le aofaiga mai le vaiaso ua te'a, ma o le a i ai sau fuafuaga ua saunia mo le vaiaso a sau. O loo i lalo se faamatalaga o le faaaogaina o taiala mo le faia o fuafuaga, i le faiga o fuafuaga faalevaiaso.

1. Tatalo mo musumusuga ma ia sailia. Ae e te lei amata, ia faalatalata atu lau Lisi o Fuafuaga a le Faifeautalai i Aso Taitasi ma le tusi a le eria. Ia amata le faiga o fuafuaga i se tatalo. Ia sailia musumusuga a o lua talanoaina manaoga o tagata ma fuafua pe faapefea ona auauna atu ia i latou, ma fesoasoani ina ia latou alualu i luma i le talalelei. Ia tatalo faapitoa mo a oulua tagata sailiili. Ia i ai le faatuatua e fesili atu ai i le Tama Faalelagi e faamanuia i latou ia maua tali o a latou tatalo, ma se naunautaiga e auai atu i le lotu, ma isi mea faapena.

2. Seti ni sini ma faia ni fuafuaga mo tagata sailiili ina ia papatiso ma faamauina i le vaiaso a sau. Ia toe faamanatu le Faamaumauga o Aoaoga mo tagata taitoatasi o e ua tautino mai e papatiso pe faamauina i le vaiaso a sau. Ia talanoaina ia fuafuaga e tatau ona e faia mo faatalanoaga mo le papatisoga, sauniga ma faamauga. I le faaaogaina o le Faamaumauga


Faamatalaga

o Aoaoga, ia talanoaina soo se tautinoga atonu o loo faigata i nei tagata, faatasi ai ma le auala e mafai ona e fesoasoani atu ai ia te i latou. Ia fuafua e faia ni fesoootaiga i aso taitasi ma i latou. Ia talanoaina pe mafai faapefea ona e fesoasoani atu i le taitai misiona a le uarota e galulue faatasi ma le epikopo mo o latou faamauga i le sauniga faamanatuga.

3. Seti ni sini ma faia ni fuafuaga mo tagata sailiili ma le aso e papatiso ai. Ia toe faamanatu ia Faamaumauga o Aoaoga mo tagata taitoatasi o le a papatiso i vaiaso o i luma atu. Ia talanoa e uiga i lesone e tatau ona e aoaoina ai i latou. Ia mafaufau pe mafai faapefea ona e fesoasoani atu ia i latou e sauniuni mo le papatisoga ma le faamauga. Ia talanoa e uiga i tagata sailiili e le'i papatisoina i aso na latou faatulagaina. Ia mafaufau ma le faaeteete ma talanoa i o latou manaoga. Seti ni sini fou ma faia ni fuafuaga o le a fesoasoani ia i latou e agai atu ai i se aso ma se taimi faapitoa e mafai ai ona latou ulu atu i feagaiga o le papatisoga, ma maua le sauniga o le faamauga. I lau Faamaumauga o Aoaoga, ia faailoga i se penitela ia mataupu faavae ua e fuafuaina e aoao atu ma tautinoga o le a fesoasoani ia i latou ina ia tausia. Ia vaai pe o le a se mea e mafai ona e faia e fesoasoani ai ia latou talia nei lesone ma tausia nei tautinoga.

4. Seti ni sini ma faia ni fuafuaga e fesoasoani ai i tagata sailiili ia auai i le sauniga faamanatuga.

Ia toe faamanatu ia Faamaumauga o Aoaoga mo tagata sailiili taitasi, ma ia talanoaina lona auai i le sauniga faamanatuga. Mo tagata sailiili e auai atu e lē aunoa i sauniga faamanatuga, ia talanoaina po o a mea e tatau ona e faia e fesoasoani atu ai ia te i latou ina ia faaaau pea ona latou maua o se aafiaga faagaetia faaleagaga. O i latou e le i o atu lava i se sauniga faamanatuga, o i latou na o le faatasi na auai atu, pe seāseā foi auai atu, ia talanoaina pe o le a se mea o taofia ai lo latou o mai. Mo se faaitaiga, atonu latou te manaomia se fesoasoani mo ni auala e malaga mai ai, atonu



latou te fefefe pe le masani foi i sauniga lotu a le Au Paia o Aso e Gata Ai, pe atonu foi sa i ai ni o latou aafiaga le lelei i se taimi ua te'a. Ia talanoaina po o a ni mea e mafai ona e faia e fesoasoani ai e aveesea nei pa pupuni. Seti ni sini mo le numera o tagata sailiili ua e fuafua e maua i le isi sauniga faamanatuga. Ia fuafua pe o ai o le a aveina atu nei tagata i le lotu, pe o ai o le a faafeiloa'ia i latou, ma o ai foi o le a latou nonofo faatasi i le taimi o sauniga. Ia fuafua e faafesootai ia taitai o le korama ma ausilali ma soo se faiaoga e nafa ma vasega o le a faatasi atu i ai tagata sailiili. Ia fuafua e logo le epikopo. I le Faamaumauga o le Alualu i Luma, ia lisi ni auala e mafai ona fesoasoani ai le aufono a le uarota. Ia faia ni fuafuaga mo ni mea e tatau ona e faia i aso taitasi o le vaiaso, e sauniuni ai nei tagata ina ia auai.

5. Seti ni sini ma faia ni fuafuaga mo lesone e aoao atu i tagata sailiili ua agai i luma. Ia toe faamanatu le Faamaumauga o Aoaoga mo tagata sailiili taitasi ua agai i luma, o e na aoaoina a o i ai se tagata o le ekalesia. Ia talatalanoa pe o le a sou manatu i lo latou mauaina o le savali. Ia toe faamanatu tautinoga ma mea na tutupu mai Faamaumauga o Aoaoga o loo latou tauivi e tausia pe faamae'aina. Ia talanoaina pe faapefea ona fesoasoani atu i tagata o le uarota ma le aufono a le uarota ina ia tumau pea ona aofia ai ma i latou i lo latou

alualu i luma. Ia seti ni sini mo lesona o le a e aoaoina atu; o tautinoga o le a e fesoasoani ia latou tausia, aemaise lava o le auai atu i le lotu; ma aafiaga taua o le a e fesoasoani ina ia latou mauaina i vaiaso e sosoo ai.

Ia faamanatu ia Faamaumauga o Aoaoga mo tagata sailiili taitasi ua agai i luma, o ē sa aoaoina e aunoa ma se tagata o le ekalesia na i ai. O nei tagata sailiili atonu o tagata sa e mauaina i au lava taumafaiga. Ia talanoa faatasi po o ai le taitai perisitua po o ausilali, e mafai ona valaaulia e faauo ia i latou. Ia toe faamanatu ia lesona o le a e aoaoina atu ma tautinoga o le a e fesoasoani ia latou tausia. Ia seti sini mo lesona o le a e aoaoina atu, pe faapefea ona e faaafia ai tagata o le Ekalesia, ma pe faapefea ona e fesoasoani i nei tagata sailiili ina ia auai i le sauniga faamanatuga. Ia tusi nei sini i le Faamaumauga o Aoaoga ma fai fuafuaga e tatau ai.

6. Seti ia sini ma faia fuafuaga mo lesona e aoao atu i isi tagata sailiili uma lava. Ia toe faamanatu ia Faamaumauga o Aoaoga mo tagata sailiili taitasi e lē o alualu i luma. Ia talanoaina pe aisea ua le tausia ai e tagata sailiili taitoatasi a latou tautinoga. Ia talanoaina pe faapefea ona e faaafia ai taitai perisitua ma ausilali ia faauo atu i nei tagata sailiili. Ia talanoaina le tele o nei lava mea o loo fautuaina mai i le laasaga lona 5. Ia seti ni sini ma faia fuafuaga e fesoasoani ai i nei tagata ia alualu i luma. Ia tusi nei sini i le Faamaumauga o Aoaoga.

7. Seti ia sini ma fai ni fuafuaga e faafesootai ai ma aoao ia igoa [tagata] na faailoa mai e tagata o le Ekalesia, tagata sailiili, tagata le lolotu, ma le laumua o le Ekalesia. Ia toe iloilo fomu o Tagata e Ono Mananao e Sailiili i le Talalelei. Ia toe iloilo ia igoa uma na faailoa mai na ua ia te oe. Ia toe iloilo ia igoa na faailoa mai e te le'i faafesootaiina. Ia seti ni sini ma faia fuafuaga e faafesootai ai igoa na faailoa mai i se tele e mafai ai, i totonu o le vaiaso—e sili ona lelei pe a faafesootai igoa uma na faailoa mai. O igoa na faailoa mai e le laumua o le Ekalesia e tatau ona faafesootaia i totonu o le 24 itula, pe afai e mafai. Ia talanoaina pe faapefea ona e talanoa atu i tagata taitoatasi po o aiga, ma pe o le a foi lau savali e mafai ona e aoaoina atu. Afai o le igoa na faailoa mai e mai le laumua o le Ekalesia, ia talanoaina pe o le a faapefea ona e aoaoina atu se savali o le talalelei e faaoga ai se vitio, tusi, po o isi mea ua latou talosagaina. Ia mautinoa o ia te oe le mea latou te talosagaina. Afai e mafai, ia faafesootai le igoa na faailoa mai e ala i le telefoni ma faatulaga ai se taimi tou te feiloa ai. Talanoaina pe o le a le faiga e te toe siakiina ai.

8. Seti ni sini ma fai ni fuafuaga e saili ai nisi igoa e faailoa mai e tagata o le Ekalesia, tagata sailiili, ma tagata le lolotu. Ia saili ma le agaga tatalo ia e iloa isi tagata o le Ekalesia ma tagata sailiili e mafai ona e asia. Ia fuafua pe o le a faapefea ona e fesoasoani atu ia i latou, e valaaulia a latou uo ma tagata o aiga e aoao e uiga i le talalelei toefuataiina. Ia talanoaina pe o le a faapefea ona e valaauliaina i latou e auai i le galuega faafaifeautalai. Ia faatulaga ni taimi o feiloaiga ma fai ni fuafuaga e talafeagai.

9. Seti ni sini ma faia ni fuafuaga mo lesona o le a e aoaoina atu i tagata faatoa liliu mai ma tagata o le Ekalesia e le toaaga mai. Ia toe faamanatu ia Faamaumauga o Aoaoga mo tagata faatoa liliu mai taitoatasi ma tagata o le ekalesia e le toaaga mai o loo e aoaoina. Seti ni sini ma faia ni fuafuaga mo lesona o le a e aoaoina atu. Ia saili pe o le a faapefea ona e fesoasoani atu i nei tagata ia auai i sauniga faamanatuga ma tausia isi tautinoga.

10. Seti ni sini ma faia ni fuafuaga e saili ai ni tagata sailiili fou. Ia toe iloilo taumafaiga o le vaiaso ua tuanai atu e saili ai ni tagata sailiili fou, e ala i igoa na faailoa mai, avanoa mo auauunaga, ma gaoioiga a le tagata lava ia e saili ai. Ia vaai i faamatalaga o loo i le vaega “Tagata e Ono Mananao e Sailiili i le Talalelei” o lau tusi a le eria. Ia talanoaina pe aisea na

Faamatalaga

avea ai isi tagata ma ni tagata sailiili fou a o isi e leai. Seti ni sini pe toafia ni tagata sailiili fou o le a e sailia i lenei vaiaso. Ia faailoa mai ni tagata e ono mafai ona avea ma ni tagata sailiili. Ia faailoa mai foi ni aiga o le ekalesia ma ni aiga e le lolotu uma e te manao e asiasi i ai, igoa na faailoa mai e asiasi i ai, ma avanoa mo auuaunaga o le a e sailia. Ia fuafua po o lē fea meafaigaluega e saili ai o le a e faaaogaina, e pei o kata fepasiasi, kaseti vitio, DVD, tusitusiga paia, po o tamaitusi. Ia talanoaina foi po o fea o le a e alu i ai e faafesootai ai tagata, pe toafia tagata o le a e faafesootaia i aso taitasi, tagata sailiili o le a e fesili i ai mo ni igoa e faailoa mai, tagata sailiili na i ai muamua o le a e asia, o ni auala e mafai ai ona fesoasoani mai le aufono a le uarota, ma isi foi. Ia faia ni fuafuaga faapitoa mo le aso e sosoo ai. Ia faaoga ia taimi uma e totoe i gaoioiga e sailia ai, o le a faapea ona fesoasoani ia te oe e ausia ai au sini. Seti ni sini ma fuafua e talanoa atu i ni tagata se toatele e mafai ai, pe a tuuina mai e le Alii i lou ala. Ia taumafai pea i taimi uma e saili ni tagata e aoao.

11. Fuafua pe faapefea ona galulue faatasi ma le aufono a le uarota. O le epikopo o le taitai pulefaamalumu. Ia faaloalo ma faamamalu i lana pule. I lalo o lana taitaiga, ia toe iloilo ai le Faamaumauga o le Alualu i Luma na faaogaina i le fonotaga faamaopoopo ma faifeautalai na faia talu ai, po o le aufono a le uarota. Ia talanoaina ia galuega faatino na e maua mai le epikopo po o le taitai misiona a le uarota, ma lipoti atu pe ua mae'a ona e faataunuuina. Ia talanoaina pe faapefea ona faaofia ai isi tagata o e e mafai ona fesoasoani atu, e pei o le taitai misiona a le uarota, taitai perisitua ma ausilali, ma isi tagata o le ekalesia. Ia saunia ma le faaeteete se Faamaumauga o le Alualu i Luma mo le isi fonotaga i le lumanai a le aufono a le uarota, fonotaga a taitai o le perisitua, po o le fonotaga faamaopoopo a faifeautalai. Ia mautinoa o tusi faalelei ma ia mama. Seti ni sini ma faia ni fuafuaga ina ia galulue faatasi ma taitai o le uarota. Pe afai e mafai, ia fai ni kopi o le Faamaumauga o le Alualu i Luma mo taitai o le uarota o le a auai.

12. Ia faatulaga ni fonotaga e fai soo. I totonu o lau Lisi o Fuafuaga a le Faifeautalai i Aso Taitasi, ia faatulaga ai ni fonotaga e fai soo, e pei o fonotaga faaleitu, konafesi faalesone, faatalanoaga, ma sauniga lotu. Ia talanoaina tofiga e te manao ia faataunuuina a o le'i oo i soo se fonotaga o nei fonotaga, ma faaopoopo i totonu o au Faamatalaga/Lisi o Mea e Fai.

13. Faia se iloiloga o le lua va faalesoa. I le faaiuga o le faiga o le fuafuaga faalevaiaso, ia fetufaai ma lau soa i sini talafeagai, ma fesili atu ia te ia pe fesoasoani atu ia te ia ina ia ausia [ia sini]. Ia talanoaina le malosi o le lua va faalesoa. Ia talanoaina soo se luitau atonu o loo toafia mai ai le lua soa mai le galulue faatasi pe toafia mai ai foi mai le usiusitai. Ia faalelei ni feeseeseaiga. Ia faasoa atu i lau soa lou manatu e uiga i ona malosiaga. Fesili atu mo ni fautuaga i se auala e mafai ai ona e alualu i luma. Pe afai e mafai, ia seti ni sini o le a faapea ona faaleleia ai le lua va. Ia faaiuina i se tatalo.

Faiga o Fuafuaga o le Aso

Ia faia se taimi e fai ai fuafuaga i le faaiuga o aso taitasi. Afai o loo e aoaoina se lesone, atonu e ta le 9.30 i le po lua te le i foi i le fale. Ae a leai, ia toe foi atu i lo oulua fale i le 9:00 i le afiafi ma faia se taimi mo fuafuaga o le aso mai le 9:00 e oo i le 9:30 i le afiafi. (E i ai i le peresitene o misiona le faautautaga e fetuunai ai le taimi faatulagaina e tusa ai ma tulaga i le lotoifale.) Ia faaoga na lava mataupu faavae e tasi ma taiala i le faiga o fuafuaga o le aso e te mulimuli ai i se fuafuaga faalevaiaso, ae i se auala e faigofie atu. Ia e maua le agaga tatalo a o e talanoaina ia lesone po o autu e mafai ona e suesueina i le taimi o au lava suesuega, ma suesuega faalesoa, na o le a fesoasoani ia te oe i lau fuafuaga. Tusi autu na i le avanoa ua tuuina atu i le faatulagaga o aso taitasi. Ia toe iloilo lau

faatulagaga o aso taitasi. Ia fuafua se gaoioiga aoga mo itula taitasi o le aso. I le taimi o le faiga o fuafuaga i le po o le Aso Sa, ia faaopoopo faatasi ma auina atu lau Lipoti o le Aotelega [e Fai e Faifeautalai i Luga o le Telefoni] faalevaiaso, tusi lau tusi faalevaiaso i lou peresitene o le misiona, ma faamaea ona tusia ni au sini mo le vaiaso o lumanai.

A e lua te lei tuua le lua fale i le isi aso e sosoo ai, ia toe iloilo a oulua sini, fuafuaga, ma le lisi o fuafuaga ua faatulagaina taimi. Ia toe faamanatu pe afai e manaomia. Ia tatalo i taimi uma lava a o le'i tuua lo oulua fale. E mafai ona e iloa le aoga o au fuafuaga faaleaso pe a e le tau fesili atu i isi, "O le a la se mea e tatau ona ou faia?"

Tali atu mo oe lava

O le mataupu faavae o le tali atu mo oe lava e taua i le fuafuaga e faavavau a le Atua. O le a tatou tutu uma lava i luma o le Alii i le faamasinoga mulimuli ma tuuina atu se faamatalaga i mea na tatou faia i avanoa sa Ia tuuina mai ia i tatou (tagai i le Alema 5:15–19; MFF 137:9). E tele mea e mafai ona e aoaoina e uiga i le tali atu mo oe lava i lau misiona, o le a aoga ia te oe i lou olaga atoa. O le mataupu faavae o le tali atu mo oe lava, o le a faamanuiaina ai oe pe afai e te:

- Setiina au sini ma fuafuaga ma le mafauafau, o le a e tali atu mo au lava taumafaiga i ou taitai o le misiona ma le Alii e ala i le tatalo.
- Lagonaina lou lava tiutetauave mo le faatuatuaga paia ua tuuina mai e le Alii ia te oe.
- Seti ni sini aoga.
- Filifili ina ia e taulamua i lou tali atu mo lau galuega i le Alii ma ou taitai o le misiona. Aua le faatali seiloga e tau faatonu atu [e fai]. Aua le faamalositia isi e faafesootai soo atu oe [mo ni faamatalaga]. Ia i ai se naunautaiga e te tali atu mo au lava galuega.
- Ia talia e te tauaveina le tiutetauave atoa mo au taumafaiga. Aua le tuuaia isi mo tulaga faigata po o le leai o se alualu i luma.
- Saili e aoao mai ou taitai, ma valaaulia i latou e fautua mai ni auala e mafai ai ona e faalelei atili.
- Ia faaosofia oe e faia le galuega e aupito sili ona lelei e te mafaia.

O le tali atu mo oe lava e le faapea na o le taimi lava o le faaiuga o lau misiona e oo mai ai. O se mataupu faavae e aafia ai le ala na e amataina ai, le ala e te mafauafau ma faalogona e uiga i le tiutetauave ua tuuina atu e le Alii ia te oe, o le auala e te faia ai lau galuega, ma le umi e te tumau ai. O ou uiga faaalii i ou aafiaga o le misiona, o se ata vaaia lea o lou alofa mo lou Tama Faalelagi ma Lona Alo ma lou faaaloalo mo le perisitua.

A fai a oe lava tatalo faapea foi ma a oulua tatalo faalesoa, ia saili musumusuga mo mea e ao ona oulua faia i aso taitasi. A o e mulimuli i au fuafuaga, tatalo ma fesili atu i le Alii mo le taitaiga. Ia i ai se tatalo i lou loto i le aso, atoa ina ia mafai ona fesoasoani mai le Agaga ia te oe e iloa ai le mea e te alu i ai, le mea e fai, ma le tala e fai. Ia fesili ifo ia te oe lava, "O a nisi mea e mafai ona ou faia?" I lau tatalo i le faaiuga o le aso, ia tuuina atu se tala o lau galuega.

*"Pe a fuaina le faatinoga,
ona faaleleia lea o le
faatinoga. Pe a fuaina ma
lipoti atu le faatinoga, o le
a televave le faaleleia."*

– ELDER THOMAS S. MONSON
"THOU ART A TEACHER COME FROM GOD,"
IMPROVEMENT ERA, TES. 1970, 101

Faamatalaga

O le a e tuuina atu se tala i vaiaso taitasi i taitai o lau misiona e faaoga ai le Lipoti o le Aotelega [e Fai e Faifeautalai i Luga o le Telefoni]. Afai o oe o se taitai o le misiona, o le a e maua mai lenei faamatalaga mai isi faifeautalai. Ia faaali atu sou fiafia i o latou olaga ma olaga o i latou o loo latou aoaoina, nai lo na o fuainumera. Aua nei e faaogaina nei lipoti ma fomu po o faamatalaga na e avatu ia te oe, e fai ma auala e faafoe pe faagaoioia ai. O faamatalaga na e te maua atu i nei lipoti ma fomu, o le a e maua ai ni avanoa e viia ai faifeautalai mo lo latou faamaoni, ma iloa ai foi ni avanoa mo ni aoaoga i le lumanai.

Mau Suesueina**O le a le uiga o le tali atu mo oe lava?**

MFF 58:26–33

MFF 101:78

Esekielu 33:1–6

Aisea e taua ai le saolotoga e te tali atu ai mo oe lava?

2 Nifae 2:26–29

Helaman 14:30–31

E faapefea ona galulue faatasi se faifeautalai ma se taitai misiona?

MFF 38:23–25

Eperu 13:17–18

Manatua Le Mea Lenei

- Taulai atu au taumafaiga i lou faamoemoega.
- Seti ia sini e tusa ai ma faailoga autu.
- Ia tatalo malosi mo au sini ma au fuafuaga.
- Faaoga le tusi a le eria ma le Lisi o Fuafuaga a le Faifeautalai i Aso Taitasi e fesoasoani ai i tagata e atiina ae le faatuatua, salamo, ia papatisoina, maua le meaalofa o le Agaga Paia, ma tumau ai e oo i le iuga.
- Mo faailoga autu taitasi, ia seti ni sini e fesoasoani ia te oe e te alualu ai i luma, faaoga ai le faatuatua, ma galue lelei ai.
- Ia fai ni taimi o fuafuaga faalevaiaso ma aso taitasi e taulai atu i le fesoasoani i isi ia aga'i i luma i totonu o le talalelei.
- Ia e tali atu i le Alii ma ou taitai misiona mo au lava taumafaiga.

Manatu mo Suesuega ma le Faaogaina

Faamatalaga

Suesuega a le Tagata Lava Ia

- I totonu o lau tusi talaaga o suesuega, tusi ai se tali e tasi le fuaiupu mo fesili taitasi o loo i le “Manatunatu i le Mea Lenei.”
- la faaoga ni nai minute e mafaufau ai e uiga i lou aso mulimuli i totonu o le misiona. Pe a oo mai lena aso:
 - O le a sau tala e fia fai i mea sa e faia, o se faifeautalai?
 - O le a se mea e te manao e te oo i ai?
 - O a ni eseese e te manao ia matau e isi ia te oe?

I totonu o lau tusi talaaga o suesuega, tusi ai se tali i fesili taitasi nei. Ia vaavaai pe o a mea e tatau ona e faia i le taimi nei e te iloa ai nei sini. Tusi ia fuafuaga po o le ata faataatia e oo atu i lou mafaufau.

Suesuega Faalesoa

- Faaoga la oulua tusi a le eria, ma tali fesili o loo i lalo:
 - Pe o i ai uma faamaumauga aupito lata mai, ma pe o sa’o ma faigofie ona faitau?
 - Pe mata e mafai e se faifeautalai e fou atu i le eria ona iloilo ina le tusi a le eria, ma iloa ai po o le a le tulaga o i ai le alualu i luma faaleagaga o tagata, ma pe o a nisi mea e tatau ona fai e fesoasoani ai ia te i latou?
 - Pe mata e mafai ona faamanuiaina se faifeautalai e fou atu i le eria mai au taumafaiga e saili ni tagata sailiili fou?
 - Ia e manatu faalemafaufau i lou tuuina atu e oe lava ia o lau tusi a le eria i le Alii, a o e tuuina atu se faamatalaga i le ala na e tausia ai tagata o lau eria. Pe mata o le a fiafia le Alii i au taumafaiga?
- Ia talanoa e uiga i se tasi o au tagata sailiili fou. I totonu o lau Lisi o Fuafuaga a le Faifeautalai i Aso Taitasi, ia sue le itulau ua faaautuina “O Mea e Fai e Oo Atu ai i le Papatisoaga, Faamauga, ma le Toaga i le Ekalesia.” Filifili se mea se tasi, ma fai se lisi o mea uma e tatau ona e faia ina ia mafai ona tupu lena mea. Ia talanoaina pe o le a faapefea ona e fuafuaina nei galuega, ina ia mafai ona tupu lea mea i se taimi vave e mafai ai.
- Ia talanoaina le faataoto lena faatasi ma lau soa. Iloilo pe o le a le umi e i ai lau “afa fagota” i totonu o le vai i aso taitasi.

“E leai se tasi o i tatou e tatau ona pei o le tamaloa faifaiva na manatu ua alu le aso atoa o fagota, ae o le mea moni sa ia faaaluina le tele o lona taimi e alu atu ai ma toe sau mai le vai, ‘ai lana meaai, ma tau fai lana mea fagota. O le manuia o le fagotaga e fesootei i le umi e tuu ai lau afa fagota i totonu o le vai, ae lē o le umi na e alu ese ai mai le fale. O nisi faifaiva e o ese mai le fale mo le sefululua itula ae sefulu itula e tuu a latou afa fagota i totonu o le vai. O isi faifaiva e o ese mai le fale mo le sefululua itula ae na o le lua itula e tuu ai a latou afa fagota i totonu o le vai. Atonu e tau manatunatu le vaega lea na ta’ua mulimuli, pe aisea e le faamanuiaina ai foi i latou e pei o isi.

“E faatatau foi lea lava mataupu faavae i faifeautalai, o e na valaau e le Matai o ‘faifaiva i tagata.’ E tatau ona tuu e se faifeautalai lana afa fagota i totonu o le vai i le taimi lava na te tuua ai le fale” (Dallin H. Oaks, seminar for new mission presidents, Iuni 20, 2000).

Faamatalaga

Fonotaga Faaleitu ma Konafesi Faalesone

- Faitau i faifeautalai se tasi o tulaga o loo i lalo. I ni vaega toalaiti, ia tuu atu i faifeautalai e talatalanoa i sini ma fuafuaga o le a fesoasoani i tagata o loo i totonu o nei faaitaiga e agai atu ai i le papatisoga ma le faamauga. Tuu atu i vaega taitasi e fetufaai mai o latou manatu.

Tulaga muamua: Sa oulua feiloai ma Lale ma Peta a o la tuuina atu se auaunaga i se nofoaga e kuka ai ma saunia meaai mo tagata matitiva. E tasi le lesona sa e aoaoina atu ia te i la'ua, ma ua la mananao nei e saga iloa atili. La te lē iloaina ni tagata o le Ekalesia. O Peta e Kerisiano, ae o Lale e leai se lotu faapitoa e lotu ai. E le i faaipoipo i la'ua ae o loo nonofo faatasi. O Lale e faigaluega mai le 4:00 i le afiafi e oo i le 12:00 i le po. O Peta e faigaluega i le ao.

Tulaga lona lua: O Sitivi sa fai uma lava ana lesona ma pe na o le faalua i le masina e alu ai i le lotu. E talitonu o ia o Iosefa Samita o se perofeta ma e moni le Tusi a Mamona. O tagata o lona aiga o ni tagata malolosi i le Lotu Katoliko, ma e le fiafia i latou i ana feiloaiga ma faifeautalai.

Tulaga lona tolu: O Tili o se tamaitai e aoga i le kolisi. E i ai sana uo o se tagata o le Ekalesia. Na valaaulia o ia e lana uo o le Ekalesia ina ia oulua feiloai. E lua lesona ua uma ona e aoao atu ia te ia. Sa i ai foi lana uo o le Ekalesia i ia lesona uma. E le'i auai atu o ia i le lotu i le taimi nei, ma e matua pisi tele o ia i ana meaaoga, e faigata ai lava ona ia faitauina le Tusi a Mamona.

- Ia valaaulia faifeautalai e fetufaai mai ni aafiaga, sa mafai ai ona latou fesoasoani atu i tagata, ona o lo latou setiina o sini ma le faia o fuafuaga po o ata faataitia:
 - Atiina ae se faatuatua sili atu i le Faaola.
 - Salamo ma fai ni suiga ua latou latalata atili atu ai i le Atua.
 - Talia feagaiga o le papatisoga ma le faamauga.
 - Toe foi mai i le Ekalesia ma faafouina feagaiga o le papatisoga.
- Vaevae ia faifeautalai i ni vaega se tolu. Ia faamatala i ai, o vaega taitasi o le a tuuina atu i ai se galuega taua e faatino. Ona tuuina atu lea i vaega taitasi o se galuega se tasi o loo ta'ua i lalo:
 - Tatala se eria fou mo le talaiga.
 - Saunia se aoaoga mo le konafesi faalesone e faataua i le faailoaina atu o le Tusi a Mamona i tagata sailiili.
 - Faamasani se aiga sailiili i totonu o le uarota. O le aiga e i ai ni tamaiti se toatolu: o se teineitiiti e 8-tausaga, o se teineitiiti e 12-tausaga, ma se tamaitiiti e 16-tausaga.

Ta'u i faifeautalai e valu minute latou te faia ai se fuafuaga po o se ata faataitia. E tatau ona tusi i lalo le fuafuaga e se faifeautalai se toatasi, ia aofia ai gaoioiga i aso taitasi.

Tuu atu i vaega taitasi e faailoa mai la latou fuafuaga. A mae'a aoaoga taitasi, ona fesili lea:

- O a mea e tatau ona iloa e faifeautalai i tulaga taitasi?
- O le a se taunuuga e ono oo i ai pe afai e te le fuafuaina ni gaoioiga aoga pe le faia foi se fuafuaga po o se ata faataitia?

A uma loa ia aoaoga uma lava, ona fesili lea:

- E faapefea ona ave le faia o le fuafuaga ma le setiina o sini ma ni aga o le alofa? aga o le faatuatua?

Faamatalaga

Peresitene o le Misiona

- Faatonu faifeautalai e aumai a latou tusi a le eria i konafesi faalesone po o faatalanoaga. E le gata ina e iloiloia e oe lava ia tusi a le eria, ae mafaufau foi e tuu atu i taitai o le misiona po o lou toalua e iloiloia ia tusi a le eria.
- Mai lea taimi i lea taimi foi, ia tagatagai i le faiga o fuafuaga faalevaiaso po o fuafuaga faaleaso a faifeautalai.
- Mai lea taimi i lea taimi foi, ia faia ni faatalanoaga i totonu o fale o faifeautalai. A o e faia lea mea, ia tuu atu i lou toalua po o fesoasoani o le peresitene e iloiloia ia tusi a le eria ma le lisi o fuafuaga a le faifeautalai i aso taitasi.
- Ia iloilo soo lisi o fuafuaga a faifeautalai mo aso taitasi.
- Mai lea taimi i lea taimi, ia e auai atu i se fonotaga a le aufono a le uarota.



E Faapefea Ona Ou Maua Tagata e Aoao?

Manatunatu i le Mea Lenei

- O le a le uiga o le “maua latou e talia outou” (MFF 42:8)?
- E faapefea ona ou faateleina lou faatuatua e maua ai tagata e aoao?
- Aisea e tatau ai ona ou faaaui tagata o le ekalesia i au taumafaiga e sailia [tagata e aoao]?
- O le a le matafaioi a au ala o faasalalauga ma igoa na faailoa mai e le laumua o le Ekalesia?
- O le a le faia i le va o le sailia ma le aoaoina?
- O le a le matafaioi a le auauna atu i le sailia o tagata e aoao?
- O a nisi o manatu e uiga i le sailia o tagata e aoao ou te lei faataitaia?

Atiina ae o le Faatuatua e Saili

O aoaoga faavae ma mataupu autu o lenei mataupu o le a faamalosi ai lou faatuatua, o loo faapea ona saunia e le Alii ia tagata ina ia talia outou ma le talalelei toefuataiina. O le a Ia taitaiina atu oe ia i latou pe o le a Ia taitaiina mai foi i latou ia te oe. O le sailiga e eseese i vaega eseese o le lalolagi. E tatau i faifeautalai ma peresitene o misiona ona faamasani i tulaga eseese. E ui lava i eseesega, ae o mataupu autu mo le sailia e [tutusa ai] le lalolagi atoa lava.

O Le Aiga o le Atua. O tagata uma i luga o le fogaeleele o ni tagata o le aiga o le Atua i le muai olaga (tagai Galuega 17:26–29; Eperu 12:9). O i tatou o se vaega o le aiga o le Atua i lenei olaga ma e mafai ona tatou olioli i ni faamanuiaga e sili atu o ni tagata o Lona aiga i le olaga a sau. O i tatou uma o uso ma tuafafine i le aiga o le Atua. O lenei malamalama na te aumaia ia te i tatou se lagona o lou iloa moni po o ai oe, ma se lagona o oe moni o se tasi o lea vaega. E aumaia ia i tatou le mafuaaga o le faamoemoe mo le olaga e faavavau i le afioaga o le Atua. Ua tatou iloa nei upumoni autu ona o le Toefuataiga. O le aoaoina atu o upumoni toefuataiina i ou uso ma tuafafine o lau matafaioi ma se faamanuiaga. E pei o Alema na saili e fesoasoani i tagata Sa Sorama na liliuese, e mafai ona e tatalo: “Le

Faamatalaga

Faamatalaga

Atua e, pe e te alofa mai ea ia te i matou e toe faafoisia mai i latou ia te oe, ia Keriso. Silasila mai ia, le Atua e, ua taua o latou agaga . . . ; o lea, ia e foai mai ia te i matou, le Atua e, le mana ma le poto, ina ia matou faafoisia mai ia te oe i latou nei, o matou uso” (Alema 31:34–35).

“**Saili I Latou e Talia Outou.**” E tatau ona e fausia le Ekalesia e ala i le sailia o i “latou e talia outou” (MFF 42:8). O le a iloa e na tagata o outou o auauna a le Alii. O le a latou naunau e faatino lau savali. O le toatele o nei tagata na “taofia mai le upumoni ona ua latou le iloa le mea e maua mai ai” (MFF 123:12).

E masani lava, tou te le iloa po o ai nei tagata. Atonu latou te le vave silafiaina foi o outou o auauna a le Alii. Atonu latou te le malamalama o le filemu sili atu, taitaiga, ma le faamoemoega o le olaga o le a oo mai e ala i le talalelei toefuataiina nai lo se isi lava mea. E tele ina latou le iloa ina o loo latou saili mo le talalelei toefuataiina, sei vagana ua latou mauaina. Mo se faataitaiga, na fai mai se tasi tagata liliu mai, “Ina ua ou faalogo i le talalelei, na faatumuina ai se naunautaiga i lou loto ou te leiloa sa i ai.” Na faapea mai se isi, “ua ou faaiuina le sailiga ou te leiloa sa ou faia.”

Po o fea lava ua tofia i ai oe e galue ai, ia manatua o le Alii ua “tuu atu ai ia te oulua lua te o mai i lenei nuu; aua e faapea ona tatau ia te [Ia] mo le faaolataga o tagata.” Ia galulue malolosi e “sii ae ia o oulua leo i lenei nuu; ia tautala atu i mafaufauga o le a tuu [e le Alii] i totonu o o oulua loto.” Afai lua te faia, o le a oulua maua le folafolaga o le a faapea ona “le faafememeaiina ai lea o oulua i luma o tagata,” ma o le “a tuuina atu ia te oulua . . . i le minute lava, le mea lua te fai atu ai” (MFF 100:4–6). O le sailia e ala i le Agaga, e taua lava e pei o le aoao atu e ala i le Agaga. E pei foi o le aoao atu, o au taumafaiga i le sailia o le a aoga pe afai e taitaiina oe e le Agaga. Ia e faatuatua o le a e iloa le mea e aoao atu ma le mea e fai, e saili ai i latou o e o le a taliaina oe.

Gaoioiga: Suesuega Faalesoa

O le tele o tagata o le Ekalesia tou te asiasi atu i ai atonu o tagata liliu mai i le Ekalesia. Ia fuafua se taimi e fesiligia ai i latou pe na faapefea ona latou fesooteai ma le Ekalesia, ma pe na faapefea foi ona latou iloa na aoao atu i latou e faifeautalai i le upu moni. Ia otooto o latou aafiaga i lau tusi talaaga o suesuega.

Mau Suesueina

E faapefea ona saunia fanau a le Atua ma taitaiina mai i le talalelei toefuataiina?

Alema 13:24

MFF 29:7

MFF 84:45–47, 88

Alema 16:16–17

MFF 33:6

MFF 136:32–33

Talatalanoa ma Tagata Uma

A o faimalaga atu le Perofeta o Iosefa Samita faatasi ma se vaega o faifeautalai i luga o le Vaitafe o Misuri, na faaali mai e le Alii, “E le aoga mo . . . au toaina ona folau faavave . . . a o fano e o nonofo i itu o auvai i le le talitonu” (MFF 61:3). A o e gaoioi faavave e fuafuaina ia gaoioiga, tatalo mo le mafaia e iloa ai avanoa e lei fuafuaina e auauna atu ai ma aoao atu i latou o e atonu o “fano i le le talitonu.” Tatalo ia matala le mafaufau faaleagaga e iloa ai



avanoa. O le a e iloa ai, o le a tuuina e le Alii i ou ala Ana fanau o e ua saunia e talia le talalelei toefuataiina.

E leai se mea e tupu i le galuega faafaifeautalai sei vagana ua e maua se tasi e aoaoina. Ia talanoa i ni tagata se toatele e te mafaia i aso taitasi. O le tulaga faalenatura lava le popole e talanoa i tagata, ae e mafai ona e tatalo mo le faatuatua ma le malosi ina ia e malosi atu i le tatalaina o lou fofoga e folafola atu ai le talalelei toefuataiina. Taumafai e faaoga ia manatu nei ao e saili e talanoa i tagata uma e te feiloai atu i ai:

- Talanoa i tagata e uiga i o latou aiga. Fesoasoani ia latou iloa le auala e mafai ai ona avea le talalelei toefuataiina ma se faamanuiaga i o latou aiga.
- Vaavaai mo ni faailoga—e pei o aitema i totonu o fale po o fanua, mataitusi i luga o lavalava, po o le faailoga o fanau—e fesoasoani ia te oe e iloa ai le auala e amata ai ona talanoa i tagata.
- Faalogo ma le totoa i tala a tagata o loo fai atu ia te oe.
- Ia agalelei, faauo, ma fiafia. Ofo atu e fesoasoani.
- Faalagolago i le Agaga e tuu i lou loto ma lou mafaufau mea e aoao atu.
- Ia valaaulia tagata uma ina ia aoao e uiga i le talalelei toefuataiina.
- Ofo atu ni kata o i ai faamatalaga e uiga i le Ekalesia ma ona polokalama.
- Fesili mo suafa o uo a tagata o e atonu e fia faalogo i lau savali.

A o e faitau i le tala moni o loo i lalo, ia vaavaai i le ala na saunia ai le alii e talia faifeautalai ma le ala na faaoga ai e faifeautalai se avanoa e lei fuafuaina e aoao atu ia te ia le talalelei.

A o ou laitiiti, e lei aoaoina lava au e faitau i le Tusi Paia. Ou te alu i le lotu i Aso Sa, ma e leai lava se mea ou te ofoina atu, ma e leai foi se mea ou te maua mai ai. Sa faavaivaia au e lo'u talitonuga. . . . Sa ou sailia le . . . Atua—ma fia iloa pe o soifua o Ia. Sa ou matuai manao lava e iloa o Ia ma Ana afioga. Ae sa foliga mai e le i mafai ona ou maua le mea o loo ou fia iloaina.

E i ai taimi na toetiiti lava faamalieina lo'u galala i le fia inu. Ina ua ou siiina lo'u afafine muamua i o'u lima, sa ou lagona e moni lava e i ai le Atua. O le tele o tausaga mulimuli ane, ina ua fanau mai lona uso, sa ou mauaina ai foi lea lava lagona e tasi. . . . Ae peitai, o le tele lava o taimi, ou te faalogoina i lo'u agaga e i ai lava le mea o loo misi. Sa ou galala i le fia inu i le faaleagaga, ae sa ou le maua se vai ou te inu ai.

O Aperila o le 1994, sa ou nofo ai i le aai o Monterrey, Mekisiko, sa ou faigaluega laupasese i se taavale laitiiti. O se tasi aso, sa umi lava se taimi o timu, ma ua tafe mai ai vai i auvae mauga. A o ou fealuai solo i timuga mo ni nai itula, sa ou taunuu atu i se aai laitiiti lava pe tusa e valu kilomita (lima maila) le mamao mai Monterrey. Ua latalata foi i le taimi . . . ou te alu ai i le fale. E lei umi ae ou vaai ni alii talavou se toalua o savavali atu. Sa fai o la ofuvae paauli ma ni ofutino papae, ma ua matuai susu pala lava mai ulu e oo i vae.

Ina ua ou oo atu ia i laua, sa ou tatalaina le faitotoa o le taavale laitiiti ma valaau atu, "Susu mai i totonu! Ou te alu i Monterrey."

O le alii umi, paepae sa tali mai, "E leai se ma tupe."

"E le totogia," o la'u tali atu lea.

Na vave ona la tulioso mai i totonu o le taavale laitiiti.

Sa matou talanoa ao ou aveina le taavale. Sa la fesiligia au pe mafai ona faasoa mai la laua savali e uiga ia Iesu Keriso. Sa ou taliaina ma avatu ia i la'ua lo'u tuatusi.

Ina ua ou taunuu i le fale, sa ou fafaguina lo'u toalua ma faamatala i ai alii talavou nei e toalua. "E matuai fetau lelei lava," o la'u tala lea. "O le isi alii o le Mekisiko ae o le isi o le Amerika, ae o o la igoa uma o Elder."

Faamatalaga

“O le Elder o lona uiga o le faifeautalai,” o le tali mai lea a lo’u toalua, e itiiti sona iloa e uiga i le Ekalesia.

Sa ou faalogoina se lagona ese i totonu ia te au. Na tuua e nei alii talavou se lagona paia ma le maofa i lo’u lotu. Na ou lagona lo’u latalata i le vai e faamalie ai lo’u fia inu, lea sa latalata mai ia te au.

Na oo mai faifeautalai i lo matou fale i le aso 5 o Iuni, ma sa ou fiafia e faalogologo ia i laua. Na papatisoina au i le lua vaiaso na sosoo ai i le aso 19 o Iuni. O lo’u toalua na papatiso i le fa masina mulimuli ane ia Oketopa. O la ma tama teine matua sa aoaoina i mataupu faalelotu i le aoga. O le taimi muamua lava na alu atu ai o ia i le lotu, sa ia faapea mai ai, “Tama, e sili mamao atu lava mea ia i mea o loo aoaoina ai au i le aoga!” Sa papatisoina foi o ia ia Oketopa.

O Tesema o le 1995 na faamauina ai i matou o se aiga i le Malumalu o Mekisiko i le Aai o Mekisiko mo le olaga lenei ma le ola e faavavau. I le taimi nei o i matou o se aiga olioli i a matou fegalegaleaiga, filemu ma fiafia. Ua matou iloa Lē o loo matou tapuai i ai. Ua matou iloa le mea na matou o mai ai ma le mea matou te o i ai. Matou te fiafia i afioga a le Atua, ae maise lava o le Tusi a Mamona, ma matou te alolofa i Lana Ekalesia, O Le Ekalesia a Iesu Keriso o le Au Paia o Aso e Gata Ai. O nei meaalofa ua matou maua ai le vaipuna o le Vai ola



© 2001 Simon Dewey. Aua nei i kopifina.

lea na ta’u atu e le Faola i le fafine Samaria: “A o se inu i le vai ou te avatu ia te ia, e le toe fia inu ia e faavavau; a o le vai ou te avatu ia te ia, e aveva i totonu ia te ia o le vaipuna, e puna i luga i le ola e faavavau” (Ioane 4:14). [Victor Manuel Cabrera, “Fia Inu i le Vai Ola,” Liahona, Aok. 2001, 43–44]

Gaoioiga: Suesuega Faaletagata Lava Ia pe Faalesoa

- Na faapefea ona saunia le tamaloa mo le talalelei toefuataiina?
- O le a le mea semanu e tupu pe ana le tatala fofoga o alii faifeautalai e faasoa atu le savali o le talalelei?
- Toe iloilo mea na e faia ananafi. Na mafai ona e talanoa i ni tagata se toatele? Afai e leai, fai ni fuafuaga ma seti ni sini ina ia e faia i le aso.

Mau Suesueina

O le a le fetalaiga a le Alii e uiga i le tatalaina o lou gutu? O a mea e tatau ona e aoao atu? O a mea ua folafolaina mai ia te oe?

MFF 24:12

MFF 33:7–15

MFF 60:2–3, 7–8

MFF 28:16

Aoao Atu Pe a E Maua, Ia Maua Foi Pe a E Aoao Atu

O le [saili ia] maua ma le aoao atu, o ni gaoioiga e i ai lo la’ua sootaga ma e fesootai. Pe a e feiloai atu i tagata, ia e saunia e aoao atu i ai ni aotelega pupuu o le upumoni toefuataiina, ina ia mafai e le Agaga Paia ona molimau atu o oulua o auaua a le Alii. O le tele lava o tulaga, e tatau ona e mafai ona aoao atu se savali mo se minute pe laitiiti ifo foi. Ua masani tagata i faamatalaga pupuu ma mamana. Mo se faataitaiga, e mafai ona e molimau atu e uiga i le savali o le Toefuataiga i na o ni fuaiupu se lua pe tolu foi:

Ina ua mavae auga seneturi na leiloa ai, sa toefuataiina mai ai upumoni taua a le Atua (o le talalelei a Iesu Keriso) e se Atua alofa e ala mai i se Perofeta soifua. O loo ia i maua se faamaoniga e mafai ona e uuina i ou lima, faitauina, mafaufau loloto i ai, ma tatalo ai ina ia iloa ai lona moni mo oe lava. E mafai ona e faatagaina i maua e . . .

Afai e lava se isi taimi itiiti, atonu e mafai ona e faia nisi faamatalaga se tele:

O le ma savali e faigofie. O le Atua o lo tatou Tama. O i tatou o Ana fanau. O i tatou o se vaega o Lona aiga. E alofa o Ia ia i tatou. Mai le amataga o le lalolagi, na Ia mulimuli ai i se faatulagaga o le alofa ma le manatu popole. E tele taimi na ia aapa mai ai i le alofa ina ia faaali mai le talalelei a Iesu Keriso, ina ia mafai ona iloa e Lana fanau le ala e toe foi atu ai ia te Ia. Sa ia faailoa atu i perofeta e pei o Atamu, Noa, Aperaamo, ma Mose. Ae sa filifili pea tagata e teena lena talalelei. I le lua afe tausaga talu ai, na aoao atu ai e Iesu Keriso lava Ia Lana talalelei. Ae o le mea e maofa ai, sa teena lava e tagata ia Iesu. Soo se taimi lava e le amana'ia ai pe faaseseina ai e tagata ia aoaoga faavae ma sauniga, e aveesea foi e le Atua Lana pule e taita'ia ai le Ekalesia.

O la ma valaaulia ia te oe, e faaopoopo atu lea i upumoni ua uma ona e faatauaina. Mafaufau i le ma faamaoniga e faapea, na toe aapa mai lo tatou Tama Faalelagi i Ana fanau i le alofa ma faaali mai aoaoga faavae ma sauniga i se perofeta. O le igoa o lenei perofeta o Iosefa Samita. O le faamaoniga o lenei upumoni mamalu o loo maua lea i totonu o se tusi—o le Tusi a Mamona. E mafai ona e uuina i ou lima, faitauina, ma mafaufau loloto i lona moni i lou mafaufau ma lou loto.

Aloese mai le uunaiga e fai atu faaupuga e pei o le, “E maua sou taimi puupuu sei ma aoao atu ai ia te oe se savali e faatatau . . .” Nai lo lena, ia atiina ae se masani o le amataina vave ona aoao atu ma molimau atu a o e feiloai atu i tagata. O le a e maua ni tagata se toatele e aoaoina a o e molimau atu ma faatagaina i latou ia latou lagonaina le mana o le Agaga Paia.

Po o le a lava lau auala muamua, ia talanoa faavave ma faafaigofie i le Toefuataiga o le talalelei, aua o le tatou savali tulaga ese lea i le lalolagi. O i latou e te aoaoina, e masani ona i ai a latou uo po o aiga o e ua saunia e talia le talalelei toefuataiina. I tulaga uma lava o le aoao atu—e pei o le sailia, aoaoina o tagata sailiili, galulue faatasi ma tagata o le ekalesia—ia fesili atu, “O ai tou te iloa o le a fiafia ma faamanuiaina mai lenei savali?” A uma ona maua se igoa na faailoa mai, ia fesili atu, “O ai se isi tagata e mafai ona faamanuiaina i le ma savali?” Aua le musu e tuuina atu ma toe tuuina atu lenei fesili i ni feiloaiga mulimuli mai. A fiafia i latou o loo e aoaoina i faamanuiaga o le talalelei, o le a faateleina lo latou naunau e faasoa atu [le talalelei] (tagai 1 Nifae 8:12). E masani ona latou maua ni uo fou a o latou aoaoina le talalelei. O faifeautalai e faaogaina lenei faiga, e masani ona tele ni a latou tagata e aoao.

Gaoioiga: Suesuega Faalesoa

- la saunia se savali e tasi le minute le umi e faavae i se tasi o lesona. Mafaufau i ni auala e aoao atu ai lenei lesona i se tulaga o le sailia.
 - lloilo pe mafai faapefea ona e vave faafesootaia lenei savali i le Toefuataiga.
 - la faasoa atu le savali i lau soa.
 - la seti se sini e aoao atu lenei savali i se taimi talafeagai o le aso, ina ia faaopoopo atu ai se tagata sailiili fou i tagata o loo e aoaoina.
-
- la toe iloilo se lisi o tagata o loo e aoaoina i le taimi nei. Ia fai se lisi o i latou na e fesiligia mo igoa na faailoa mai, ma i latou e te lei fesiligia. Ia faataitai pe faapefea ona e tuuina atu se valaaulia mo igoa na faailoa mai ia i latou o loo i vaega taitasi. I lau fuafuaga, ia tusi ai e tuuina atu lenei valaaulia i le isi a outou feiloaiga e sosoo ai.

Talanoa e Uiga i le Taua o le Aiga

O le Toefuataiga o le talalelei a Iesu Keriso ua faamanuiaina ai aiga. O le ola ai i aoaoga faavae o le talalelei toefuataiina, e faamallosia ai aiga ma e mafai ona latou lagonaina ai le filemu, olioli, ma se lagona o le auai ma le faasinomaga.

O le tauina atu o le taua o aiga ia i latou tou te feiloai i aso taitasi, o le a fesoasoani ia te oe e maua ai tagata e aoao. O le toatele lava o tagata e i ai lo latou fiafia faalenatura i aiga. I le tele lava o tulaga e saili ai, e mafai ona e vave faatatau atu mea ua toatele tagata latou te iloa, e uiga i le aiga i le savali o le Toefuataiga. A o sailia, e mafai ona e fai atu se faamatalaga pei ona ta'ua i lalo:



E lei se mea e sili atu ona taua ia i matou nai lo o tatou aiga. O o tatou aiga e fusia faatasi ai i tatou i isi tagata [o le aiga], e aumaia ia i tatou se igoa, ma fesoasoani ia tatou lagonaina le manaomia ma le alofaia. Mai o tatou aiga, tatou te maua mai ai uiga o le tagata lava ia, amioga, ma foliga vaaia, e aumaia ai foi ia i tatou nisi o faasinomaga tulaga ese.

O le maua o se aiga malosi ma fiafia, o le matafaioi maualuga lea mo le toatele o tagata i le lalolagi atoa. O le ausiaina o lenei sini, e masani ona faigata. O le tausaiaina o fanau ma le maua o se faaiipoipoga malosi, i le lalolagi i aso nei, ua toetoe lava foliga mai e le mafai i nisi o taimi, aua o loo i ai ma le tiapolo o loo siomia ai i tatou.

Ona e faia lea o se suiga agai atu i le savali o le Toefuataiga:

O lagona o le alofa ma le manatu popole o loo ia i tatou mo o tatou aiga, e faavavau ma e loloto lava i o tatou agaga. O loo tutotonu i lo tatou sootaga ma le Atua. Ua aveae oe ma se vaega o le aiga o le Atua, ae e te lei fanau mai. O Ia o lo tatou Tama. Talu ai ona o Ia o lo tatou Tama, o i tatou foi o uso ma tuafafine. E finagalo le Tama Faalelagi ina ia tatou toe foi atu e mau faatasi ma Ia o se vaega o Lona aiga. O aiga iinei i le lalolagi o se sootaga lea i le aiga o le Atua. E mafai ona mafuta faatasi aiga pe a mavae lenei olaga. Ua tatou iloa lenei mea aua ina ua tuanai auga seneturi na leiloa ai, o aoaoga faavae moni ma sauniga e pei o le papatisoina i le faatofuina ua toe fuatai mai i le lalolagi e lo tatou Tama Faalelagi alofa, e ala mai i se perofeta soifua. O nei upu moni toefuataiina e le gata ina fesoasoani ia i tatou e malamalama ai i lo tatou tulaga i le aiga o le Atua, ae o ni faamoemoega sili foi ia o loo ia i tatou mo ni aiga malolosi, ma fiafia i lenei olaga. Sei o ma aoaoina atu le tele o isi mea e uiga . . .

E mafai foi ona faia lenei lava mea i isi autu, e pei o le fiafia, faigata, o le faamoemoega o le olaga, po o le oti. Po o le a lava lau auala e saili ai, ia manatua e vave faafesootai atu i la tatou savali tulaga ese mo le lalolagi.

O Le Taua o Tagata o le Ekalesia

Galulue faatasi ma tagata o le Ekalesia e sailia tagata e aoao. O le faiga e manaia, o le valaaulia lea e tagata o le Ekalesia o isi ina ia aoaoina ma ia auai foi i le aoaoga. A fai e tagata o le Ekalesia lenei mea, e toatele atu tagata e papatisoina ma tumau le malolosi i le Ekalesia. O le faifai mea faatasi ma tagata o le Ekalesia e taua aua e faamaluluina ai loto o tagata ma e masani ona taitaiina atu ai i latou e sailiili i le talalelei toefuataiina. O le uiga o lenei mea, e aumaia i latou i totonu o le lio o uo a tagata o le Ekalesia, e aofia ai tagata o le Ekalesia e toaaga ma tagata e le toaaga mai, tagata fou faatoa liliu mai, ma aiga e le lolotu uma.

Ua aoao mai Peresitene Gordon B. Hinckley: “O le toatele o i tatou, tatou te vaai atu i le galuega faafaifeautalai e na o le talai. O i latou uma o e ua masani i lenei galuega, latou te iloa e i ai se auala e sili atu. O lena auala e ala mai lea i tagata o le Ekalesia. Soo se taimi lava e faailoa mai ai e se tagata o le Ekalesia se tagata sailiili, e vave lava ona i ai se faiga e lagolago ai. E molimau atu le tagata o le Ekalesia i le moni o le galuega. E naunau o ia mo le fiafia o lana uo o le tagata sailiili. E fiafia o ia a o alualu i luma lena uo i le aoaoina o le talalelei.

*“Mai mea uma ua tauina
atu, o le tiute aupito sili
ona maoae ma taua o le
talai atu lea o le Talalelei.”*

– O LE PEROFETA IOSEFA SAMITA
TEACHINGS OF THE PROPHET JOSEPH SMITH, 113

“Atonu o le faifeautalai faamisiona o loo ia faia le galuega o le aoaoina, ae le tagata o le Ekalesia, i soo se taimi e mafai ai, o le a lagolagoina lena aoaoga ma ofoina atu lona fale e faia ai lenei galuega faamisiona. O le a ia tuuina atu se molimau faamaoni i le paia o le galuega. O le a i ai o ia iina e tali i fesili pe a le i ai faifeautalai. O le a avea o ia ma uo i le tagata liliu mai o le o loo faia se suiga tele ma e masani ona faigata. . . . O le faiga o le aumaia o tagata fou i totonu o le ekalesia e le na o faifeautalai e ana lena matafaioi. E sili atu ona faamanuiaina i latou pe a avea tagata o le ekalesia ma puna e mafai ona maua ai ni tagata sailiili fou” (*Ensign*, May 1999, 105–6).

O le taimua lava mo le fausiaina o sootaga malolosi ma tagata o le ekalesia o le epikopo. Ofo atu e fesoasoani ma auauna atu i soo se auala amiotonu lava na te talosagaina. Ia fesili ifo ia te oe lava mai lea taimi i lea taimi, “Po o au ea o se faamanuiaga po o se avega i le epikopo?” Ia atinae se uiga “E mafai faapefea ona ou fesoasoani atu?” Afai o le a e vaavaai mo ni avanoa e alofa atu ai, auauna atu ai, ma aoao atu ai, o le a sili atu ona faatuatua ina oe e le epikopo ma tagata o le uarota i tagata o o latou aiga ma uo.

Mafaufau i le fuaitau lenei mai se tusi na tusia e se faifeautalai i le peresitene o lana misiona:

Peresitene Pele,

Na valaau mai fesoasoani ana nei ma ta’u mai o le a ou siitia. Sa ou manatu e tatau ona ou tusi atu e faafetai atu mo le auina mai o au i lenei eria. E foliga mai e pei lava o ananafi na e ta’uina mai ai ia te au e uiga i luitau o loo i luma atu.

O le ma Aso Sa muamua lava na faamaonia ai mea na e ta’u mai ia te au. Na ma maua se faafeiloaiga faaleogolua i le uarota. Na o le pau lava le mea lelei o lena Aso Sa muamua o Sikoti, o le taitai misiona fou a le uarota. Na siitia atu o ia i le nofoaga a le Fua Vaalele i le masina ua tuanai, ma ua lua vaiaso o auauna atu o se taitai misiona. Sa valaaulia i ma’ua e Sikoti i lona fale mo le aiga i le afiafi i lo ma Aso Sa muamua, ina ia talanoaina se mea e mafai ona faia e faagaioi ai le galuega. Ina ua uma le taumafataga, sa matou tootutuli i le tatalo ma fesili atu i le Tama Faalelagi mo Lana taitaiga. A o matou tatalo, na matou faalogoina se lagona o le toafilemu ma le naunautai. Na matou fuafuaina o le auala sili lava e faaalualu ai i luma le galuega, o le maua mai lea o le faatuatua o tagata o le au paia. Na tonu ia i matou e mulimuli i le faataitaiga a Amona ma auauna atu ia i latou.

Sa matou amata i le epikopo. Talu ai ona o le leai o ni papatisoga i le eria ma le leai o se taumafaiga mai faifeautalai na i ai muamua, o lea na fai ai si ona le naunau tele i la matou talosaga ina ia matou fono faatasi ma ia. Sa iu lava ina ua ia valaauliaina i matou matou te o atu i lona fale mo se meaai i le po. Na ma iloa ai na sauni le epikopo e aveese le kapeta mai lona potu malolo ma toe faalelei le fola laupapa na pito i lalo. Na ma ofoina atu le ma fesoasoani ma sa ia taliaina. Ina ua mae’a le galuega, na talosaga mai le epikopo ina ia ma lauga i se lotu faamanatuga. Sa ma avea lenei mea o se faamaoniga ua amata ona ia faatuatua ina ma’ua.

Faamatalaga

Sa ma mulimuli i lenei lava aga o le auauna atu a o ma feiloai atu i isi tagata o le au paia. Sa ma maua ni avanoa e fesoasoani ai ia i latou i ni auala faigofie. Afai matou le i ai faatasi ma tagata o le Ekalesia, ma te tu'itu'i i faitotoa ma talanoa atu i le toatele o tagata e mafai ona maua e uiga i le talalelei toefuataiina. Sa faamanuiaina i ma'ua i tagata e aoao, ma na vaai tagata o le au paia o ma aumaia tagata i le lotu o e na ma sailia lava e i ma'ua. Na amata ona suia uiga o le uarota atoa. Na faateleina le fiafia e uiga i le galuega faafaifeautalai. O le taimi lava na faatuatuaina ai i ma'ua e tagata o le au paia, na faateleveveina ai foi le galuega. E tele papatisoga na mulimuli mai ai.

E toatele tagata o le Ekalesia e i ai o latou popolega i le faatauunuina o le galuega faafaifeautalai. O le toatele e le mautinoa po o fea e amata atu ai po o le a foi le tala e fai. O le toatele e popole nei le toe maua a latou uo lelei pe a latou taumafai e faasoa atu le talalelei ia i latou. E tele auala e fesoasoani ai i tagata o le ekalesia. Mo se faaitaiga, fesoasoani e fausia lo latou faatuatua e ala i le aoaoina o i latou i le savali o le Toefuataiga ma isi aoaoga faavae o lesona. Fesoasoani ia latou lagonaina le Agaga ma le mana o la tatou savali. O le faamalosi o lo latou malamalamaaga i le aoaoga faavae a Keriso, o le a tele atu ni mea na te faia e faateleina ai lo latou faatuatuaina o oe ma fausia ai lo latou fiafia e faia le galuega faafaifeautalai, nai lo se isi lava mea e mafai ona e faia. Fesoasoani ia latou malamalama o le ofoina atu o le talalelei toefuataiina o le a tafe atu lava mai fegalegaleaiga o loo latou sailia, e alolofa i ai ma auauna atu i tagata o o latou aiga ma uo. Aoao atu ia i latou le aoaoga faavae mai le vaega "Ia O Atua ma Agalelei Atua" o lenei mataupu. Ia uunaia tagata o le Ekalesia ina ia "faatasi i le anapogi ma le tatalo faatauana ia faaolaina agaga o e ua le [iloa] le Atua" (Alema 6:6). O mea uma lava tou te faia ma tagata o le ekalesia, saili ina ia siitia ma fausia lo latou faatuatua ma fesoasoani ia latou faia le galuega faafaifeautalai.



E faapopo atu i le galulue faatasi ma tagata toaaga o le ekalesia, saili ia maua tagata e aoao e ala i toeaia faamoemoeina, tagata o le Ekalesia e le o toaaga mai, ma tagata fou o le ekalesia. O nei tagata atonu e i ai ni uo se toatele o isi tapuaiga ma ia faamanuiaina a o latou faasoa atu le talalelei toefuataiina i tagata o o latou aiga ma uo.

I soo se feiloaiga lava ma tagata o le Ekalesia, ia faia mea uma e te mafaia e uunaia ai i latou e:

- Tatalo ma mulimuli i le Agaga.
- Tuuina atu auaunaga.
- Atiina ae faauoga.
- Tatala o latou gutu e fetufaai atu le talalelei toefuataiina.
- Valaaulia isi e faia mea e faateleina ai lo latou faatuatua ia Keriso.

O igoa uma na faailoa mai e se tagata o le ekalesia, e tatau ona faia o se mea e sili ona pele. A tuuina atu e se tagata o le ekalesia se igoa o se uo e telefoni atu i ai pe asiasi foi i ai, ia tali vave atu i ai ma toe lipoti atu ia taunuuga i le tagata o le ekalesia.

Manatu mo le Fesoasoani Atu i Tagata o le Ekalesia

E tele auala e uunaia ai tagata o le ekalesia ina ia faateleina lo latou auai i le galuega faafaifeautalai. Mafaufau i manatu nei:

- Saili le taitaiga a le epikopo ma isi taitai o le uarota. Tagai i le mataupu e 13 mo fesoasoaniga faaopopo i lenei eria.
- Aoao atu i taitai ma tagata o le Ekalesia ia le savali o le Toefuataiga ma isi lesona.
- Aoao i latou ia alolofa ma auauna atu i o latou tuaoi ma uo.
- Uunaia i latou ina ia anapopogi ma tatalo mo avanoa faafaifeautalai.
- Uunai i latou ina ia asiati atu i tagata masani o e e lei leva ona oo i ai nei mea na suia ai o latou olaga (fanau mai, maliu i totonu o le aiga, faaipoipoga, pe lei leva ona siitia atu).
- Valaaulia i latou ina ia fesoasoani atu ia te oe e aoao atu. O le tulaga manaia o le i ai lea o se tagata o le Ekalesia faatasi ma oe, o le sa i ai muamua i le lotu na i ai le tagata sailiili.
- Fesoasoani ia i latou i le setiina o aso o le a latou valaauliaina ai a latou uo e aoao e uiga i le savali o le Toefuataiga.
- Faaali atu ia i latou ia mea e mafai ona latou tuuina atu i isi, e pei o kopi o le Tusi a Mamona, vitio, ma kata o faamatalaga e uiga i le ekalesia.
- Uunaia i latou ina ia valaaulia a latou uo e auai i le lotu po o se afiafi faaleaiga, e matamata ai se ata vitio a le Ekalesia, pe ia auai i se talanoaga e uiga i le talalelei.
- Fesoasoani ia i latou e faataitai faamatalaga e mafai ona latou tauina atu ia latou uo.
- Aoao i latou i le mafuaaga ua taua ai le fetufaai atu o le talalelei e tusa lava pe o a taunuuga e i ai.

E tele lava isi auala e fesoasoani ai i tagata o le ekalesia ia latou atili aafia ai. Taumafai e faaopopo atu i lenei lisi i lau misiona atoa. Ia faasoa atu ou manatu i isi faifeautalai.

Gaoioiga: Suesuega Faalesoa

Ia toe iloilo faatasi ma lau soa mea na lua faia e auauna atu ai ma fesoasoani atu ai i le epikopo ma isi taitai i le masina ua tuanai. Ia talanoaina ma fuafua mea e mafai ona e faia i le masina a sau, ina ia atiina ae ai se sootaga malosi ma i latou.

Ia toe iloilo ia manatu o loo lisiina i le pusa “Manatu mo le Fesoasoani Atu i Tagata o le Ekalesia”. Vaai po o a nisi manatu e te lei faataitai’ia. Faaoga lau lisi o fuafuaga mo aso taitasi e fai ai ni fuafuaga ma faataitai nisi o manatu i le vaiaso e sosoo ai.

Igoa Na Faailoa Mai i Faasalalauga ma le Laumua o le Ekalesia

O igoa na faailoa mai o nisi ia o auala i le sailia o i latou ua saunia mo le talalelei toefuataiina. E faaopopo atu i igoa na faailoa mai e tagata o le Ekalesia, e malosi lava le aapa atu o le Ekalesia i le tele o auala i fanau a le Atua. E faaosofia e le Ekalesia le fiafia e ala i taumafaiga e pei o faatosinaga i ala o faasalalauga, ofisa autu mo tagata tafafao, vaaiga i talafaasolopito, uelefea ma fesoasoaniga mo tagata lautele, ma le Initoneti (www.mormon.org, www.lds.org, www.familysearch.org). O igoa na faailoa mai i ala o faasalalauga ma le laumua o le Ekalesia, ua faatusa i tagata o e ua malilie ia asiati atu sui o le Ekalesia e auina atu ia i latou se mea (e pei o se Tusi Paia po o se Tusi a Mamona) ma ia aoaoina atili e uiga i le Ekalesia. O nai avanoa e aoao atu ai e tataua ona faaoga e faifeautalai, o se matafaioi paia.

Ae e te lei asiati atu i se igoa na faailoa mai, ia mautinoa ua e masani i le aitema na talosagaina. Fuafua se lesona puupuu e suia mai ai i le aitema agai atu i le aoaoina o le

Faamatalaga

savali o le Toefuataiga. I nisi tulaga, e taitaiina atu ai oe e igoa na faailoa mai i isi o e ua saunia e le Atua. Afai e le fia faalogo tagata ua e faafesootaia, ia fesili atu ia i latou pe latou te iloa se tasi atonu e fia faalogo. Ia talanoa foi ma isi tagata o le aiga ma o latou tuaoi. Ia fesili atu ia i latou taitoatasi po o ai se tasi atonu e fiafia i lau savali. Atonu ua taitaiina atu oe i lenei tagata ona o se tasi i totonu o lona aiga po o le tuaoi ua saunia mo le talalelei.

Pe a galulue i igoa na faailoa mai, ia manatua e:

- Faafesootai i latou i totonu o le 24 itula.
- Afai e mafai, ia valaau muamua ia i latou e fuafua ai se taimi faatulagaina o le feiloaiga. Afai e le o i ai i le fale, ia taumafai i ni taimi eseese o le aso.
- Ia aveina atu le aitema na talosagaina, ma faamanatu atu ia i latou o i latou na talosagaina le lua asiasi atu. Ia faapotopoto ane uma tagata o le aiga e faalogologo.
- Aoao atu le savali o le Toefuataiga.
- Ia tuuina atu ni valaaulia e fausia ai lo latou faatuatua ia Keriso.
- Fesili atu mo ni igoa e faailoa mai.
- Toe faatulaga se taimi e toe asiasi atu ai.
- Ia fuafua e galulue i lona vaituaoi pe a mae'a le lua taimi faatulagaina o le asiasiga.
- Afai e le o i ai le tagata i le fale, ia talanoa i tuaoi.

Gaoioiga: Suesuega Faalesoa

Ia sue uma ia igoa na faailoa atu na maua i lau eria i totonu o le masina ua tuanai. Vaai soo se tagata e lei faafesootaia, ma asiasi atu i ai. Ia filifili po o ai o i latou ua uma ona faafesootai e tatau ona toe asiasi atu i ai.

Talafaasolopito o Aiga

O talafaasolopito o aiga po o gafa e maua ai le isi auala e mafai ona e maua ai ni tagata e aoao. O talafaasolopito o aiga ua avea nei ma se tasi o gaoioiga e fiafia tagata o le lalolagi atoa e fai. Ua faatosinaina e le Agaga o Elia ia le faitau miliona o tagata i le lalolagi atoa ina ia saili mo o latou augatuaa. E toatele ua mananao i se sootaga malosi atu i o latou aiga lautele. E mafai ona oo atu lenei mea i se naunau e saili ia sootaga ma faasinomaga i le aiga o le Atua.

Ia sailiili pe o a ituaiga o punaoa o talafaasolopito o aiga o loo maua i lo outou eria. Mo se faataitaiga, atonu e te valaaulia ia tagata i le ofisa autu o talafaasolopito o aiga pe faailoa atu ia i latou ia tagata o le Ekalesia o e e mafai ona fesoasoani atu ia i latou i uluai sailiga o faasologa o o latou augatuaa. E le faapea e tatau ona e iloa ni mea se tele e uiga i talafaasolopito o aiga ina ia e ofoina atu lenei auaunaga pe afai o loo i ai tagata o le Ekalesia e fesoasoani atu. I le tele o eria o le lalolagi, o loo i ai lava tagata o le Ekalesia e mafai ona fesoasoani atu i isi e sailia o latou tuua. Ia faaauai tagata o le Ekalesia ina ia mafai e tagata sailiili

“Ou te faamoemoe ina ia ou vaai atu ua tatou soloia le laina tuaoi fai i le poto o tagata, lea o loo masani ona tatou tuu i le va o galuega faafai feautalai ma galuega faalemalumalusa ma gafa, aua o le galuega faaola lava lea e tasi!”

— PERESITENE SPENCER W. KIMBALL
“O MEA O LE FAAVAU—PE TATOU TE LE TUTU EA I TULAGA PAGATIA?” LIAHONA, ME 1977, 2

faamoemoeina ona feiloai atu i tagata e mafai ona faauoina i latou. Ia faamatala atu o le faaaogaina o ofisa autu o talafaasolopito o aiga o se auaunaga e le totogia.

Pe a e talai, atonu e mafai ona e tuuina atu i tagata se kata o faamatalaga e uiga i le Ekalesia e faatatau i talafaasolopito o loo i ai i luga le numera o le telefoni o le ofisa autu o talafaasolopito i le lotofale, e ofoina atu se sailiga amata o tuua e le totogia. Ia toe siaki i le isi aso po o ni aso se lua e sosoo ai i fale na lua tuua ai kata. Ia fetufaai atu nei kata i tagata sailiili o e e mafai ona latou tuuina atu i a latou uo ma aiga. O se manatu lelei tele foi le feaveaiina o lau lava siata o augatupulaga e fa e fai ma faataitaiga, ma ia fetufaai atu ia i latou atonu e tutusa o outou faaiu.

Ina ia amataina, mafaufau e fai mea nei:

- Asiasi i se ofisa autu o talafaasolopito o aiga, pe afai o i ai se ofisa i le tou eria.
- Ia talanoaina ma le epikopo ma le aufono a le uarota lou naunau e ofoina atu le fesoasoani i le talafaasolopito o aiga ia i latou o e e te feiloai i ai i aso taitasi.
- Ia talanoa ma taitai o le uarota pe o le a se auala sili e faatulagaina ai lenei taumafaiga:
 - O fiafia le epikopo i le ofoina atu o lau fesoasoani i tagata o le uarota?
 - O ai tagata o le uarota o loo auauna atu i le ofisa autu o talafaasolopito o aiga pe i ai foi ni potu masani i galuega o talafaasolopito o aiga?
 - O le a le auala sili e mafai ona e talosagaina ai nei tagata o le uarota mo se fesoasoani?
 - O ai e mafai ona lua o faatasi pe a e tufaina atu nei pepa o le faasologa o le gafa po o talafaamaumau o le vaega faaleaiga?

Faitau le tala o loo i lalo na faamatalaina e se faamisiona sinia. Ia matau le galuega na faia e talafaasolopito o aiga i le liuaina o le ulugalii.

O Mildred Schultz o se tagata faamaoni o lana ekalesia. E le o se mea e faateia ai, le tuitui atu o faifeautalai i lona faitotoa, na te lei maumauina se taimi ae ona valaauliaina i laua i totonu ina ia ona aaoaina i laua i le “upu moni.” A o aao atu faifeautalai, sa ootia o ia i upu moni o le talalelei toefuataina ma na papatisoina ai. O le taimi atoa lava o le aooaga, na filifili ai lona toalua o Farani, e le fia faalogo.

O le vaega leni na ou aafia ai. Na faailoa atu au e faifeautalai i a Sister Schultz. Na ma fesoasoani ia te ia e amataina lona gafa ma valaaulia o ia ina ia matou feiloai i le ofisa autu o talafaasolopito o aiga. Na oo mai le aso o le matou feiloaiga, ma na fesili mai Farani pe mafai ona sau ina ia mafai ona saili mo ona foi augatuaa. Oi ioe, sa matuai fiafia lava o ia i le manatu, ma la agai atu loa i le ofisa autu.

Na fuafuaina e alii faifeautalai matou te fetau iina i se taimi mulimuli ane o le aso. A o le'i taunuu mai i la'ua, sa ma faasino atu ia Farani ma Mildred le faletusi ma faafeiloai i laua ia Sister Wright. O Sister Wright o le tagata tomai faapitoa i talafaasolopito o aiga, ma sa ia ofo mai e fesoasoani e saili faamatalaga e uiga i le tamā o Farani. Sa ia maua lona igoa i totonu o se tusi ma na mafai foi ona tuuina atu ia Farani se faafanua o Siamani na faaalua ai le nofoaga na fanau ai lona tamā. Na fiafia tele o ia i nei sailiga, ma ina ua taunuu mai alii faifeautalai, sa ia valaauliaina i la'ua latou te fai taumafataga i le afiafi ina ia faaali atu ia i la'ua ia ata ma faasoa atu le talafaasolopito o lona aiga. Na pa'i atu le Agaga o Elia ma faamaluluina ai lona loto, ma sa tatalaina ai le faitotoa mo le talalelei e faatumuina ai lona olaga.

O lena afiafi, sa mafaufau loloto ai Mildred pe o le a sana tala e fai atu ia Farani e fesoasoani e faafiafiaina atili ai o ia i le talalelei. Na oo mai se fesili i lona mafaufau. “Farani,” sa ia faapea atu ai, “e te manao ta te faatasi pea e faavavau, e tusa lava pe mavae atu leni olaga? E te manao e te maua se aiga e faavavau?” Sa vave lava ona ia faapea mai, “Oi, Mildred, ioe ou te manao i ai. E faapefea ona ou faia?” O le fesili leni sa ia talotalo lava i ai. “Faalogo i aooaga a faifeautalai,” o lana tali atu lea. Sa malie i ai o ia. A o aao atu alii faifeautalai, na aveeseina e le mafanafana o le savali o le Toefuataiga ona le mautonu ma le popolega. Sa vave ona ia taliaina upu moni na faasoa atu e faifeautalai. Sa ia taliaina le valaaulia ina ia papatiso. Talu mai lena taimi, o loo malolosi pea ma toaaga Farani ma Mildred i le Ekalesia.

Faamatalaga

Sa galulue malosi Farani ma Mildred e faamae'aina le galuega ina ia mafai ona faataunuuina ia sauniga faaola mo o la'ua aiga. O se aso fiafia ina ua papatisoina i la'ua e fai ma sui o tagata o o la'ua aiga. I le faagasologa o le faataunuuina o galuega faalemalumalu sa, na faia ai e Brother Schultz se miti e uiga i lona tamā. Sa ia vaaia lona tamā i le faatoaga na aveva ma ona fale i aso o laititi. Sa tutu lona tamā i tafatafa o lana nofoa faalua, o loo laei papae ma faaloaloa mai ona lima i lona atalii. Na ala a'e ma le tagi Farani mai lana miti. Sa ia iloa ua taliaina e lona tamā le galuega sa la faia.

Gaoioiga: Suesuega Faalesoa

- O le a le mea na faaosofia ai Farani e filifili ina ia aoaoina o ia e faifeautalai?
- E mafai faapefea ona e faafesootaia lelei ia galuega o le talafaasolopito o aiga i le fuafuaga a le Atua mo aiga?
- O faapefea ona e faaaogaina ia talafaasolopito o aiga o se auala e maua ai [ni tagata aoao]? O a ni auala e mafai ona e ofoina atu ai ni faamatalaga o talafaasolopito o aiga i tagata e te feiloai atu i ai i aso taitasi? Ia fai ni fuafuaga e amata ona faaoga ia talafaasolopito o aiga o se meafaigaluega sili ona taua i au taumafaiga e saili [ni tagata aoao].

O talafaasolopito o aiga o se auala mamana e faaoga e sailia ai i latou ua saunia e le Alii e talia le talalelei toefuataiina. Tatalo ina ia mataala i ni avanoa e faaoga ai talafaasolopito o le aiga i au taumafaiga o sailiga. O tagata e masani ona i ai o latou lagona faaleagaga a o latou talanoa e uiga i aiga. E lagona foi e tagata le Agaga a o aoaoina i latou e uiga i aoaoga faavae pe aisea tatou te faia ai galuega o talafaasolopito o aiga. Ma le isi, o le a faaleleia atili le faatumauina o tagata liliu mai a o mafai e tagata fou o le Ekalesia ona saili o latou gafa, ma faataunuu ia sauniga paia e fai ma sui o o latou augatuaa.

Mau Suesueina

O le a le mea na toefuataiina mai e le Alii i le lalolagi e ala mai ia Elia?

MFF 110:14–16 MFF 138:32–34 Malaki 4:5–6 MFF 128:16–18

Gaoioiga: Suesuega Faaletagata Lava Ia ma Suesuega Faalesoa

Ia fuafua e asiasi atu i le ofisa autu o le talafaasolopito o aiga i le lotoifale, faatasi ma se tagata o le ekalesia e i ai se poto masani i talafaasolopito o aiga. A o e malaga asiasi i le ofisa autu o talafaasolopito o aiga, ia saili po o a ituaiga o auunaga o loo maua. Saili isi faamatalaga, e pei o taimi e tatala ai le ofisa autu, o i latou o e auunaga atu i le ofisa autu, ma po o a mea e ofoina atu ia i latou e te faafesoota'ia i aso taitasi.

Faataitai pe faapefea ona e ofoina atu fesoasoani i talafaasolopito o aiga ia i latou tou te feiloai i ai. Fai ni fuafuaga e ofoina atu ai ia talafaasolopito o aiga i au taumafaiga e saili ai.

Faitau ma talatalanoa i le “Talafaasolopito o Aiga ma Gafa” i le *Faamaoni i le Faatuatua* ina ia maua ai se malamalamaaga atili o le galuega o talafaasolopito o aiga. Tusi mea ua e aoaoina i lau tusi talaaga o suesuega.

Tagata Sailiili Na i Ai Muamua

O tagata sailiili na i ai muamua o se auala taua mo le sailia o tagata e aoao. E tele ia mafuaaga e ala ai ona taofi sailiiliga a tagata i le ekalesia. O mafuaaga e aofia ai le siitia ese o faifeautalai, malaga atu o tagata sailiili e fai malologa, o le le toe o atu o faifeautalai e asiasi e ui lava ina tatali mai e tagata sailiili a latou asiasiga, ma tagata sailiili ua talitonu

e leai ni mea fou a faifeautalai e aoao atu ia i latou. O le tele lava o tagata sailiili na i ai muamua latou te faapea mai, o le a latou toe feiloai ma faifeautalai.

Ia iloilo soo lau tusi a le eria, ina ia iloa ai tagata sailiili na i ai muamua. Ia mafaufau ma le agaga tatalo i faamatalaga o loo i le tusi a le eria e uiga i le ala na fesoota'i muamua ai tagata sailiili i le Ekalesia, o mea na aoaoina ai i latou, o le ala o loo latou tali atu ai, ma pe aisea ua mumusu ai e sailiili i le talalelei. Afai na aofia ai tagata o le ekalesia i le aoaoina ma le faaumeaina o tagata sailiili na i ai muamua, ia fesili atu i tagata o le ekalesia i mea latou te manatua e uiga i lea aafiaga. Mai leni faamatalaga, ia fai ni fuafuaga e toe faafesootai atu i le tagata sailiili.



© 2001 Del Parson. Aua nei i Kopina.

Afai ua filifilia se tasi o loo e aoaoina e taofi ana sailiiliga o le talalelei, ia tusi ia faamatalaga i le tusi a le eria, o le a fesoasoani i faifeautalai o e o le a faafesoota'ia i latou i le lumanai.

A o outou faitauina leni aafiaga, ia mafaufau i le mana o le faafesoota'ia o tagata sailiili na i ai muamua.

Na ou matua'i te'i, ina ua valaauina au ou te galue i le misiona lea na galue ai foi lo'u uso matua i le tausaga e tasi na muamua atu. Ina ua mavae ni nai masina i totonu o le galuega faamisiona, na siitia atu ai au i se tasi o eria na tala'i ai lo'u uso. Ina ua ia iloa lo'u siitaga, na tusi mai lou uso ma fai mai ou te asiasi i se aiga sa la aoaoina ma lana soa. Sa ia faailoa mai le alofa ma le vavalalata sa i ai ia te ia ma le aiga o Norman ma lona le fiafia tele ina ua taofia a latou sailiiliga i le Ekalesia.

Sa ma sailia loa ma la'u soa le aiga o Norman ma sa latou taliaina fiafia i ma'ua. Sa latou talia la ma valaaulia ina ia toe faalogologo i le talalelei toefuataiina. Ou te le mautinoa pe o le a le eseese na i ai i le taimi nei, ae sa latou saunia atoatoa e talia le ma savali. Sa papatisoina ma faamauiina le aiga atoa.

Ina ua mavae leni aafiaga, sa ou mafaufau i isi tagata sailiili na i ai muamua, sa galulue faatasi ma lo'u uso. Sa ou faapea ifo, "Afai na aoga mo le aiga o Norman, atonu foi o le a aoga mo isi tagata sa ia aoaoina foi." Sa tonu loa ia te au ou te tusi atu i lo'u uso e uiga i le manatu o le faafesoota'ia o isi tagata sa ia aoaoina. Sa suesue o ia i lana tusi talaaga ma auina mai ia te au ia igoa o isi tagata sailiili na i ai muamua i le eria.

Na ma faaaluina ma la'u soa le vaiaso na sosoo ai i le faafesootaiina o nei tagata. I lo ma fiafia tele, toetoe o le afa o i latou na taliaina se valaaulia e toe faalogo i le talalelei toefuataiina. O nisi o leni vaega na papatiso ma faamauiina. A o feiloai ai ma nei tagata sailiili na i ai muamua, sa ma fesili atu foi ia i latou mo ni igoa na faailoa mai o a latou uo ma paaga atonu o le a fiafia i le ma savali. O le taunuuga, sa ma maua ai nisi tagata faapoopo e aoaoina. O le taimi aupito pisi leni o la'u misiona.

Gaoioiga: Suesuega Faalesoa

- Ia saili tagata sailiili uma na i ai muamua i totonu o lau tusi a le eria.
- Fai ni fuafuaga e faafesootai ni tagata se toatele e mafai i totonu o le isi 24 itula.

Mauaina e ala i Au Lava Taumafaiga

Saili e faamalosa lou faatuatua e faapea, o loo saunia e le Atua ia Lana fanau e talia le savali o le Toefuataiga. A o e faia mea uma e te mafaia i lalo o le taitaiga a le Agaga Paia e sailia tagata e aoaoina, o le a tuu e le Alii na tagata i lou ala.

O loo tele ia auala lelei e sailia ai i latou ua saunia mo le talalelei toefuataiina. E tatau ona e faia mea uma e te mafaia ina ia tuuina atu ai [oe] i le ala o i latou ua saunia. Ua iloa

Faamatalaga

e faifeautalai o manatu nei sa fesoasoani ia i latou i le sailia o i latou e aoaoina e ala i a latou lava taumafaiga. A o e iloiloina lenei lisi, fai ni fuafuaga ina ia taumafai e fai nisi o manatu e fou ia te oe. O lenei lisi e ave faoi o se taimua mo oe e te mafaufau ai i nisi auala lelei e sailia ai tagata e aoaoina.

- Galulue faatasi ma le epikopo ma le aufono a le uarota e faailoa atu ma faafesootai ia ni tagata faatoa fanau se pepe, malaga mai i le eria, pe malaga atu i le eria, pe na i ai se maliu i le aiga.
- Vaavaai mo ni avanoa e ofo atu ai ni auaunaga faigofie.
- Aoao tagata o le ekalesia—e aofia ai tagata e toaaga mai ma lē toaaga mai, tagata faatoa liliu mai, ma aiga e le lolotu uma—le savali o le Toefuataiga. Talosaga atu ia i latou e faailoa atu oe i tagata e mafai ona e aoaoina.
- Fuafua ina ia faia ni faeasaite a tagata o le Ekalesia, lea e mafai ai ona latou aumaia a latou uo e mafai ona e aoaoina atu i ai le talalelei ma fesili atu mo ni igoa e faailoa mai.
- Ofo atu e aoaoina tagata i le ala e faia ai afiafi faaleaiga.
- Ofo atu e ave i latou tou te feiloai i se matamataga i le falelotu i le lotoifale.
- Ofo atu e fuafua se fonotaga ma le epikopo.
- Ia valaaulia tagata ina ia faaoga le tuatusi i le Initoneti o le www.mormon.org.
- Faatulagaina se vasega o suesuega i tusitusiga paia.
- Aoao atu le Igilisi o se gagana lona lua.
- Ia valaaulia tagata e talafeagai tausaga e auai i le seminare po o le inisititiuti.
- Ia o atu mai lea fale i lea fale, pe talanoa foi i tagata i luga o le alatele.
- Faaoga ni kata feavea’i [o loo i ai faamatalaga e uiga i le Ekalesia], DVD, vitio, ma tamaitusi.
- Saili ia igoa na faailoa atu mai tagata sailiili o i ai nei, tagata sailiili na i ai muamua, tagata o le ekalesia e le o toaaga mai, toaina faamoemoeina, ma tagata uma e te feiloai i ai.
- Ia galulue vavalalata ma le sui o le va i fafo o le Ekalesia i le lotoifale mo avanoa e lolomiina ai ni tusitusiga i se nusipepa i le lotoifale lava ia, e uiga i la outou auaunaga faafaifeautalai.
- Ia valaaulia tagata i sauniga a le Ekalesia, gaoioiga, ma fale tatala.
- Valaaulia tagata i sauniga o papatisoga. O nei mea e maua ai se faafeiloaiga sili ona lelei i le Ekalesia ma maua ai avanoa lelei mo tagata sailiili e lagonaina ai le aafiaga a le Agaga.



Ia o Atu Ma Agalelei Atu

O lou faatuatua e maua tagata e aoaoina, e faaalua i au amioga. O le Faaola i le taimi o Lana talaiga i le lalolagi, “ua uiga o ia faatasi ma le pologa” (Filipi 2:7). O ia sa femaliuui “ma agalelei” (Galuega 10:38) ma “talai atu foi le talalelei” (Mataio 4:23). A o e mulimuli i lenei faaitaiga, o le a e mauaina i latou o e o le a taliaina oe.

E ala atu i le auauna atu, o oe faapea ma i latou o e ua saunia mo le talalelei toefuataiina, e o mai faatasi i se auala mamana ma musuia. O au galuega lelei o le a fesoasoani ai i tagata latou te iloa ai oe o se auauna a le Atua, ma o le a maua ai avanoa e aoao atu ai le talalelei toefuataiina.

O le tele o aafiaga o faifeautalai i le auauna atu a o lei o atu i a latou misiona e aafia ai “galuega fesoasoani” fuafuaina, e pei o le fesoasoani atu i se tasi e malaga ese atu, auauna atu i se faatoaga a le Ekalesia, po o le faamamaina o se fanua. I le avefa ai ma faifeautalai, o le a e ofoina atu na ituaiga auaunaga fuafuaina i vaiaso taitasi (tagai i le *Tusitaulima a Faifeautalai* mo faamatalaga faapoopo).



O le ituaiga o auaunaga o loo faamatalaina i lenei vaega e taulai atu i avanoa e lei fuafuaina. O lenei ituaiga o auaunaga e aofia ai le faalogologo i le Agaga e iloa ai avanoa mo gaoioiga laiti, ma faigofie o le agalelei, lea e mafai ona e ofoina atu i le fanua a le Atua. Tatalo ma ia e iloa avanoa i aso taitasi e te faia ai mea lelei. A e saili e faia mea lelei, o le a taitaiina atu oe i tagata ua saunia mo le talalelei toefuataiina.

A o e faitauina le tala leni, ia matau le ala na faatino ai e faifeautalai “le agalelei” ma talai atu le talalelei.

E masani lava ona sau Pablo i la matou vasega faalevaiaso o le Igilisi. O ia o se alii ua litaea, ae a’oga i le Igilisi e fesoasoani ai ina ia aveesea mai lona mafaufau mai ona popolega mo lona toalua ma’i. E tasi le vaiaso ae le toe sau. E leai se tasi na foliga mai na iloa pe aisea. Pe tusa o le tasi le masina mulimuli ane, na toe sau ai foi i le vasega. Na ese lava ona foliga. Ua pae, ma na foliga mafatia lava. Sa le auai o ia i talanoaga a le vasega e pei ona sa ia faia muamua, ae sa ia tuua foi le vasega ae matou te lei talanoa.

I le vaiaso na sosoo ai, sa ma tatalo ai ma la’u soa ina ia toe sau Pablo i le vasega ina ia mafai ona ma talanoa atu ia te ia. Na tali mai a ma tatalo aua na sau i le vasega i le aso na sosoo ai. A o ma talanoa atu ia te ia ina ua tuua le vasega, sa ia faamatala mai ua maluu lona toalua. Sa ia faamatala mai ia i ma’ua si mea itiiti e uiga i le aafiaga, ma sa ma faailoa atu foi i ai lo ma faanoanoa. Sa ma fai atu ia te ia, ma te mananao ina ia malamalama i le ala e mafai ai ona la toe faatasi ma lona toalua. Na ea ae i luga lona ulu, ma tilotilo mai i o’u mata, faapea ma loimata o le ita ma le faanoanoa ma faapea mai, “Afa’i lua te mananao moni e fesoasoani mai ia te au, lua te o mai la i lo’u fale ma fesoasoani ia toe faatulaga lelei lo’u olaga. Pe le o le mea ea lena e fai e faifeautalai? Ou te manaomia le fesoasoani i le faatulagaina o lo’u fale ma a’u fuafuaga.”

Sa ma tetei ma faalotomaulaloina i le tali a Pablo. Sa ma ofoina atu la ma fesoasoani mo soo se mea lava sa ia manaomia. Ou te manatu, o le tulaga lena na amata ai ona ia faatuatua ina o ma faamoemoega. Sa ia fai mai e tatau ona ma o atu i lona fale i le aso na sosoo ai, e fesoasoani e teu ana laau. Sa ma o atu i lona fale i le taimi faatulagaina ma amata ona galulue i ona tafatafa. O masina sa ia tausaiaina ai lona toalua, sa ia le faia ai ni feau i lona fanua ma lona fale. Sa tele ni galuega mo le toatolu o i matou e fai. Na avefa leni mea ma auaunaga faalevaiaso i lona fale. Sa ma teuina laau, vele vao, ma tau fua o

“E te manao e te maua le fiafia? Faagalo oe lava ae taase i lenei galuega tele. Tuu atu au taumafaiga e fesoasoani ai i tagata. . . . Ia tu maualuga atu, siitia i latou ua vaivai tuli vae, sisii ae i luga lima o i latou ua tautau i lalo [lima]. Ola i le talalelei a Iesu Keriso.”

— PERESITENE GORDON B. HINCKLEY
TEACHINGS OF GORDON B. HINCKLEY, 597

Faamatalaga

laau. E lei amata ona ma aoao atu—soo se taimi lava ma te taumafai ai e amata, ae vave lava ona ia faamutaina a matou talanoaga. Sa sili atu lona fiafia e talanoa e uiga i lona olaga ma lona aiga. O le tele o taimi, na o le ma faalogologo lava.

I le mavae ai o le masina ma le afa, na faateia ai i maua e Pablo i le fesili mai, “Pe ou te toe vaai la i lou toalua?” Sa ma tali atu ma le fiafia tele, e mafai. Sa ma molimau atu e uiga i aiga e faavavau ma sa ma faia le mea sili e taliina ai ana fesili.

Sa ma aoaoina Pablo i le ata o le faaolataga. Sa ootia o ia i le aoaoga faavae. Ae ma te lei tuua o ia, sa i ai sana lisi o fesili sa ia manaomia ni tali, e pei o le, “Pe o le a i ai se tino o lo’u toalua pe a ou toe vaai ia te ia?” ma le “Pe o le a ma saoloto mai la i ma’i ma tiga?” Sa ma taliina ana fesili ma seti se isi taimi faatulagaina e talanoaina ai mataupu faavae o le talalelei toefuataiina a Iesu Keriso.

E lei umi lava, ae suia foliga o Pablo. Ua tele ina ataata ma foliga mai ua sili atu ona toafilemu. Sa i ai moni lava lona “faamoemoe ma faamaoni i se lalolagi e sili ona lelei” (Eteru 12:4). O le ma auaunaga sa fesoasoani ia te ia e talitonuina ai mea na ma aoaoina atu.

Gaoiiga: Suesuega Faaletagata Lava la po o Suesuega Faalesoa

- O a ni auala na faia e faifeautalai i lenei tala e “faatino ai le agalelei”?
- O le a le matafaioi na faia e le auauna atu i le filifiliga a Pablo ina ia aoaoina i le talalelei?
- Pe e te vaai ea mo ni avanoa e faia ai mea lelei i aso uma? E mafai ona e alualu i luma i lenei vaega?

Tusi i lau tusi talaaga o suesuega pe talanoaina faatasi ma lau soa pe faapefea ona lua faia ni mea lelei se tele i le aso atoa ina ia maua ai ni tagata e aoao.

Ia talitonu o tagata o e ua saunia e talia le savali o le Toefuataiga, o le a tuuina atu i lou ala. O le a tuuina foi oe e le Atua i le tulaga e avea ai au galuega lelei ma upu lelei e saunia ai tagata e talia faifeautalai ma tagata o le Ekalesia. I au taumafaiga uma e saili, ia tatalo ma vaavaai mo ni avanoa e auauna atu ai, fesoasoani ma siitia isi. A o e auauna atu, ia talanoa i tagata uma e te feiloai i ai. Ia e maua le faatuatua e mafai ona e fetufaai atu le talalelei toefuataiina.

I soo se auala lava e te auauna atu ai, e tatau ona e faia ona o lou alofa i ou uso ma tuafafine ma e moomoo ai ma tatalo, ma naunau faamaoni e aoao atu ia i latou le talalelei toefuataiina.



Taiala

Ia manatua ia taiala nei a’o e saili e faia mea lelei:

- Nonofo faatasi ma lau soa.
- Ia puipui le natura paia o lou valaauga.
- Ia tausii i tulafono a faifeautalai, ma aua nei e foaiina atu pe faaaogaina au tupe.
- Tagai i lau *Tusitaulima a Faifeautalai* mo taiala e uiga i le vaiaso o galuega fesoasoani.

Mau Suesueina**O le a le matafaioi o le auauna atu i le soifuaga o le Faaola?**

3 Nifae 17:7, 21 Mataio 9:1–8 Ioane 4:46–54
 Mataio 8:1–4 Mareko 1:21–28

O le a le matafaioi o le auauna atu i misiona a Amona ma Arona?

Alema 17:19–25 Alema 18:8–10 Alema 22:3

O le a le mea ua poloiaina oe e le Alii e fai?

3 Nifae 27:21

E Leai Ni Taumafaiga E Maimau

A filifili tagata e aua ne'i sailiili i le talalelei toefuataiina, e le o maimauina au galuega. O au taumafaiga faifaipea i le auauna atu ma le aoaoina o le toatele o tagata e te mafaia, o le tasi lea o auala e saunia ai e le Atua Ana fanau ina ia taliaina ai Ana auauna. E masani ona Ia aapa mai i Lana fanau e ala ia te oe. E tusa lava pe a le taliaina e tagata le avanoa e aoao ai i le talalelei, o au auaunaga ma upu o faamaoniga o le alofa o le Atua mo i latou ma e mafai ona totoina ai se fatu o le a seleseleina e faifeautalai ma tagata o le Ekalesia i le lumanai.

A le talia e tagata le talalelei, aua le lotovaivai. Ua uma ona e avatu i ai se leo o le lapataiga. Ua uma ona e tuuina atu ia i latou se filifiliga manino. E lagona e Soo o Keriso le faanoanoa pe a filifili ia tagata e lē salamo, ae e tumau lava le malamalama [o Soo o Keriso] pe o ai i latou ma le galuega o loo latou faia. E faaauau pea ona latou agai i luma ma le maelega.

Manatua Le Mea Lenei

- la fausia le Ekalesia e ala i le saili ia maua mai i “latou e talia outou” (MFF 42:8).
- la saili mo le Agaga ma mulimuli ai pe a maua.
- Ua saunia tagata o lau eria e talia le talalelei toefuataiina.
- O tagata o le Ekalesia—e aofia ai i latou e toaaga i le lotu, tagata e lē toaaga mai, toeaina faamoemoeina po o tagata ua tataua ona umia le tofi o le toeaina, ma tagata faatoa liliu mai—o au punaoa po o risosi sili na ona lelei mo le sailia o tagata e aoaoina, papatiso, ma faamau.
- la atiina ae se sootaga malosi ma le epikopo ma tagata o le au paia.
- Aoao atu pe a e maua, ma ia maua foi pe a e aoao atu.
- la mataala mo avanoa e lei fuafuaina, ae e maua ai.
- Tatalo mo avanoa e faia ai mea lelei ma folafola atu ai le savali o le Toefuataiga o le talalelei a Iesu Keriso.
- E tele auala e maua ai tagata e aoao atu. Aloese mai le taulai atu i le na o se auala se tasi pe lua.

Faamatalaga

Manatu mo le Suesuega ma le Faaogaina

Suesuega Faaletagata Lava Ia

- Faitau le tusi lenei mai se faifeautalai i ona matua: “Sa ou aoaina se tamaitai lelei lava i luga o le pasi. Sa ma foi mai i la matou fonotaga faaleitu, ma na o le pau lea o le nofoa avanoa, o lea na ou nofo ai loa i lalo ma amata ona ou tilotilo i la'u meli. loe, o le tusi muamua lava na ou faitauina o lau tusi, o loo i ai ata pepe o Evan. Sa ou matauina o mata o loo i ou tafatafa sa matamata mai foi i ata, ma sa ou ea a'e i luga ma ou vaai atu ai i mata o se tamaitai e matua atu. Sa ia ataata mai ia te au ma pupula ese atu ai i fafo o le faamalama. Ona moeiini lea o ona mata e foliga mai o le a moe. Sa ou tatalo, 'le Tama Faalelagi e, ou te fia talanoa ia te ia. Faamolemole fesoasoani mai ia te au.' I se minute mulimuli ane, sa toe pupula ona mata ma nofo faasa'o i luga, ma na vave ona ou faapea atu, 'O le a sou silafia, e aulelei o ia?' sa ou faaali atu ia te ia ata o le pepe o Evan ma amata ona ou talanoa ia te ia e uiga i aiga. Sa ou fesili atu ia te ia e uiga i lana fanau, ona maligi lea o ona loimata ma faamatala mai se tala e uiga i le inoino o lana tama teine ia te ia, ma ua le toe manao ia te ia [lona tina]. Sa tagi o ia ma na ou tagi foi faatasi ma ia. Sa ou ta'u atu ia te ia e uiga i le ata o le faaolataga, ma e silafia e le Tama Faalelagi o ia ma le tulaga ua oo i ai. Sa ou tagi ma ta'u atu ia te ia, ou te iloa e alofa lana tama teine ia te ia aua o a'u o se tama teine a se tina e alofa ia te au, ma ou te alofa foi ia te ia. Sa ou faamatala atu i ai, o nisi taimi e faia ai e tagata ia filifiliga leaga, ma ua i ai foi le saolotoga i lana tama teine. Sa ataata o ia ma faapea mai, 'ou te talitonu ua matuai misia lava oe e lou tina, ma o le a na le toe tuua lava oe e alu pe a toe vaai ia te oe.' Sa ia faafetai mai ia te au mo le ma talanoaga ma sa ia tuu mai ia te au lona tuatusi, ina ia mafai ona ma fetufaai i le talalelei. A o oso ese o ia mai le pasi, sa ia faapea mai, 'e sese le pasi lea na ou oso i ai, ae ou te le'i toe oso i fafo. E le'i i ai se tasi na nofo i ou tafatafa, ae vagana ina ua e sau . . . ae sei vaai la i le mea ua tupu.' E atoatoa lava le fuafuaga a le Atua!”

O a ni mataupu faavae mai lenei mataupu ua e vaai i lenei tala? Ia toe iloilo le mataupu ma fai se lisi i lau tusi talaaga o suesuega. O le fea o nei mataupu faavae e mafai ona e taumafai e faaogaina i le aso?

- Faitau le loane 15:12–13; 21:15–17; 1 Tesalonia 2; ma le Mosaea 18:8–10. O le a le lelei o loo e faataunuuna ai lau matafaioi o le alofa atu ma auauna atu i isi? E faapefea ona e faaleleia? Tusi lau tali i totonu o lau tusi talaaga o suesuega.
- E faapefea ona iloa e tagata o oe o se auauna a le Alii? A o e mafaufau loloto i lenei fesili, suesue le Moronae 7:3–5; Mataio 7:20; loane 13:34–35. Tusi ou manatu i lau tusi talaaga o suesuega.
- Faitau le 3 Nifae 18:31–32; Alema 8:16; Alema 24:7–8; ma le Alema 32:41. Manatunatu pe o a mea ua aoao mai e nei fuaiupu e uiga i le galulue faatasi ma tagata saililili na i ai muamua. Tusi mea na e aoaina i lau tusi talaaga o suesuega ma aoao atu i lau soa.

Suesuega Faalesoa

- Faaogaina lau lisi o fuafuaga mo aso taitasi, ia faia ni fuafuaga e feiloai atu i tagata faatoa liliu mai. Fai atu ia i latou e faamatala mai pe na faapefea ona latou saunia mo le talalelei. Fai i ai fesili e pei o le: O le a le taimi muamua na e iloa ai le Ekalesia? O le a le mea na iu ina faatalitonuina ai oe e talanoa ma faifeautalai? Tusi mea ua e aoaina i lau tusi talaaga o suesuega.
- Ia toe iloilo ia autu taitasi nei. I le faaogaina o lesone, ia saunia se auala faigofie e saili ai. Faataitai le aoao atu i se tulaga ua maua ai [se tagata], ma ia vave ona faafesoota'i atu i ai autu taitasi i le Toefuataiga.
 - Lagona le manaomia o nisi taitaiga ma le faamoemoega o le olaga.

Faamatalaga

- Manao e faalatalata atili atu i le Atua.
- Manaomia o le fesoasoani i filifiliga taua.
- Faitau itulau e 66–68 o le *Our Search for Happiness* ma itulau 59–64 o le *Faamaoni i le Faatuatua* ina ia malamalama lelei ai i aoaoga faavae o le galuega o talafaasolopito o aiga, ma ia fetufaai atu i lau soa.
- Ia manatu faapea ua siitia atu oulua ma lau soa i se eria fou. Ua e maua le tusi a le eria o loo lelei pea, ae e leai ni tagata sailiili. O le a se mea e te faia ina ia maua nisi tagata e faapopopo i au tagata aoao, i le vave e mafai ai? Fai ni fuafuaga e faatino ai nisi o nei manatu fou i le aso.
- O manatu o loo i lalo ua aoga mo le toatele o faifeautalai ma tagata o le ekalesia. Faitau ma suesue faatasi ma lau soa i lenei manatu.
 - Fesoasoani i tagata o le au paia e faia se lisi o uo, aiga, ma aumea mamae, o i latou e mafai ona latou fetufaai atu i ai le talalelei. Ia toe iloilo faatasi ma tagata o le au paia lenei lisi, ma fesoasoani ia i latou ina ia filifilia ma le agaga tatalo se tasi latou te mananao e saunia e faalogo i le talalelei.
 - Fesoasoani ia i latou e seti se aso e mafai ona (a) galulue ai e sauniuni le tagata po o le aiga ina ia aoaoina i lo latou fale pe (e) fai nisi gaoiiga faaaumea e sauniuni ai i latou. O le setiina o se aso e tuuina atu ai i tagata o le ekalesia se sini ma fesoasoani e faaaoaga ai le faatuatua.
 - Fesoasoani ia i latou e fuafua po o a mea o le a latou faia i le va o le aso lenei ma le aso ua latou setiina.
 - Siaki i latou i taimi uma ina ia lagolagoina ma faamalosiua atu i ai. Valaaulia i latou ina ia fetufaai mai o latou tulaga faamanuiaina ma ni mea o popole i ai.

Talanoaina pe mafai faapefea ona e faaogaina lenei manatu i le eria o loo e galue ai.

Fonotaga Faaleitu ma Konafesi Faalesone

- Faitau ma talanoaina le vaega “Mauaina e ala i Au Lava Taumafaiga”.
 - Ia talanoaina pe na faapefea ona fesoasoani nei manatu i faifeautalai e maua ai tagata e aoao.
 - I luga o le laupapa, lisi ai nisi manatu mo le sailia ma maua mai tagata e aoao. Ia valaaulia faifeautalai e faaali atu o latou manatu.
 - Ia valaaulia faifeautalai e seti ni sini a le tagata lava ia mo le faaleleia o a latou taumafaiga e saili.
- Fai se lisi o tulaga e saili ai.
 - Tofi ia tofu le faifeautalai ma se tasi o tulaga. Ia tuu atu i faifeautalai uma le tai 5 minute e saunia ai pe faapefea ona ia aoao atu le savali o le Toefuataiga. Faatepa i latou i le lesona “O Le Savali o le Toefuataiga o le Talalelei a Iesu Keriso” pe a manaomia.
 - Ia faamamafa atu le taua o le tausisia o le umi o le savali ia talafeagai ma le tulaga. Mo se faataitaiga, atonu e faaaluina e faifeautalai se taimi tele e aoao atu ai i le fale o se tagata o le ekalesia, nai lo le aoaoina o se tasi i totonu o le faleloa.
 - Ia faatagaina ni faifeautalai se toatele pe a lava le taimi, e aoao atu le savali o le Toefuataiga i tulaga ia na tofi atu i ai.

Faamatalaga

- la aoao atu mataupu faavae o loo maua i le vaega o le “Aoao Atu Pe a E Maua, la Maua Foi Pe a E Aoao Atu”.
 - Tofi ia faifeautalai taitasi e saunia se savali e tasi le minute e mafai ona ia fetufaai atu i se tulaga e maua ai. O nei savali e tatau ona faavae i luga o aoaoga faavae moni o loo maua i lesona a faifeautalai.
 - la valaaulia ia faifeautalai e faataitai ona fetufaai atu a latou savali e taitasi minute i le isi. Atonu o le a e manao e seti ni tulaga eseese e maua ai, e pei o le aoao atu i le fale o se tagata o le ekalesia, aoao atu i luma o le faasitepu o le fale, aoao atu i luga o le ala savali, pe o le faafesoota’ia o se igoa na faailoa mai. Tuu atu i faifeautalai e faataitai ona aoao atu i nei tulaga taitasi.

Peresitene o le Misiona

- Fai se faataitaiga o le galuega faafaifeautalai ma tagata o le au paia, i totonu o lou aiga. Fetufaai atu i faifeautalai ma tagata o le au paia, mea na e oo i ai.
- la fefautuaai ma taitai perisitua pe o le a le auala sili ona lelei mo faifeautalai e maua ai tagata e aoaoina i lau misiona.
- Faatulaga ni faeasaita a faifeautalai e mafai ai ona e talanoa atu ai i tagata sailiili i lau misiona. Ia galulue faatasi ma taitai perisitua i le lotoifale ina ia mafai ona faia faeasaita, ina ia mafai e tagata o le ekalesia ona aumai i ai a latou uo. O se vaega o nei faeasaita, ia tuu atu i tagata faatoa liliu mai e faia ni a latou molimau ma faamatala lo latou liliu mai, ae e te le’i lauga atu. Ia taulai atu lau tautalaga i le savali o le Toefuataiga.
- la fetufaai atu lau siata o le faasologa o le gafa o au tupulaga e fa i faifeautalai, ma faamalamalama atu i ai le auala e te faaaogaina ai i au taumafaiga e saili.
- la o ma faifeautalai i nisi taimi e fesoasoani ia i latou i le sailia o tagata e aoao.



E Mafai Faapefea Ona Ou Faaleleia O'u Tomai Faafaiaoga?

Faamatalaga

Manatunatu i le Mea Lenei

- E faapefea ona ou aoao atu mai tusitusiga paia?
- Aisea e tatau ai ona ou faia ni fesili pe a ou aoao atu?
- O a ni ituaigā fesili e tatau ona ou faia?
- E mafai faapefea ona ou faalogo lelei ia i latou ou te aoaina faapea ma le Agaga?
- E mafai faapefea ona ou fesoasoani i tagata e foia o latou popolega?
- E mafai faapefea ona ou fesoasoani i isi e faatoilaloina mea ua fai ma a latou masani, ma manaoga leaga?

Ua valaauina oe e talai atu le talalelei toefuataiina i le toatele o tagata o le a taliaina oe. O le aoao atu o le totonugalemu lea o mea uma e te faia. E te atiina ae uiga faaKeriso, sutesue lesonea a faifeautalai, faalelei lou mafaia ona tautala i le gagana a lau misiona, ma faalagolago i le Agaga ina ia mafai ona aoao atu ma le mana e faatalitonuina ai. Na matuai faigofie ona faaupu mai e le Alii, o se poloaiga faatasi ai ma se folafolaga:

“Aua le saili e talai atu la’u upu, a e mua’i saili ia maua la’u upu, ona matala ai lea o lou laulaufaiva; o lea, afai e te manao ai, o le a e maua lo’u Agaga ma la’u upu, ioe, o le mana lea o le Atua i le faatalitonuina o tagata” (MFF 11:21).

“Aua nei popole muamua outou i mea o le a outou fai atu ai; a ia teu pea i o outou mafaufau upu o le ola, ma o le a tuuina atu ia te outou i lea lava itula lena vaega e tatau ai mo tagata taitoatasi” (MFF 84:85).

Ua ta’u mai e le Au Peresitene Sili ma le Korama a Aposetolo e Toasefululua: “O lo tatou faamoemoega o le aoao atu lea o le savali o le talalelei toefuataiina i se auala e faatagaina ai le Agaga e taitaiina e le gata i faifeautalai, ae faapea foi ia i latou o loo

Faamatalaga

aoaoina. E taua tele le aoaoina o manatu [o lesona], ae o nei lesona e le tatau ona aoaoina atu faatauloto. E tatau ona lagona e le faifeautalai le tu'usaolotoina o ia e faaoga ana lava upu e pei ona musuia ai e le Agaga. E lē tatau ona ia tuuina atu se tauloto, ae ia tautala atu mai le loto i ana lava upu. E mafai ona ia alu ese mai le faasologa o le lesona, ae tuuina atu mea e musuia ai o ia, e tusa ai ma manaoga ma mea e fiafia i ai le tagata sailiili. O le tautala atu i lona lava talitonuga maumaututu ma ana lava upu e tatau ai ona ia tuuina atu lana molimau i le moni o ana aoaoga" ("Faamatalaga i le Galuega Faafaifeautalai," Tusi a le Au Peresitene Sili, 11 Tes. 2002).

Aoao ia faalagolago i le Agaga e tuuina atu ia te oe le mea e tatau ona e ta'u atu ma fai. O le suesue, atiina ae, ma le faaogaina o tomai mo le aoao atu o loo i ai i lenei mataupu, o le a avea ai oe ma se mea faigaluega atamai i aao o le Alii. O le a tuuina atu e le Alii le atamai ma le tomai ua e atiina ae, e fesoasoani ai ia te oe ia aoao atili atu ai ma le mana. O le maualuga o le lelei ma le malosi o lau aoaoga, o le a fesoasoani ai i isi e malamalama ai ma lagona le taua o le talalelei toefuataina mo i latou. O le a tosina lo latou malamalama i lou lava tulaga agavaa. O le a tosina foi lo latou malamalama i le lelei o le taulai atu o ou manatu ia i latou, e ala i le lelei ona e faamalamalamaina o le talalelei, faaogaina o tusitusiga paia, fetufaai atu o lau molimau, fai ni fesili, ma valaaulia i latou e faia ma tausia tautinoga.

Mulimuli i le Agaga

"O le Agaga o le elemene taua lea e tasi i lenei galuega. O le Agaga e faalauteleina ai lou valaauga, e mafai ona e faia ai vavega mo le Alii i totonu o le galuega faamisiona. A aunoa ma le Agaga, e le mafai lava ona e manuia *tusa lava* po o a au taleni ma [mea e te] mafaia ona fai" (Ezra Taft Benson, seminar for new Mission Presidents, 25 Iuni 1986).

Ia Valaaulia le Agaga

O manatu o loo i lalo o le a fesoasoani ia te oe e valaaulia ai le Agaga a o e aoao atu:

- Tatalo.
- Tuu atu lau molimau.
- Faaali atu lou alofa mo le Alii ma isi.
- Faaoga tusitusiga paia.
- Fetufaai atu mea na tutupu [ia te oe].

E Amata Faapefea ona e Aoao Atu

E matua taua tele nai taimi muamua faatasi ma tagata sailiili. E tatau i tagata sailiili ona aoao e faatuatuaina oe. Amata la oulua uluai talanoaga i se auala faauo, faaaloalo, ma le loto faamaoni. Fai ni nai fesili faigofie e fesoasoani e te malamalama ai i o latou olaga faalelotu ma o latou faamoemoega e uiga i a outou talanoaga. Mo se faataitaiga, ia e fesili, "O le a se mea o faia e le ekalesia i lou olaga?" Ae, aua nei e faia ni fesili faaletagata e ono faalēlelei ai o latou lagona.

Ae e te le i amata [ona aoao atu], ia talosagaina i latou uma o i ai ina ia outou auai faatasi i le lesona. Ia uunaia i latou e tapē le televise ma aveese nisi mea e fai ma faalavelave, ina ia aua nei aveesea ai le Agaga o le Alii.

Ia faamalamalama atu i ai, e te manao e amata ma faaii ia lesona taitasi i se tatalo. Fai i ai o le a e faia le tatalo amata. Ia faafaigofie le tatalo ma ia faatauana, ina ia faamanuia mai e le Alii ia tagata o loo e aoaoina i soo se vaega o o latou olaga, aemaise lava ia mafai ona latou lagonaina mea o le a e aoao atu.

Ia faaali atu i ai lou fiafia ma le alofa faamaoni mo tagata sailiili ma faatuatua i le mana faaliliu o le talalelei (tagai Moronae 7:43–48). Pe a taialaina ai e le Alii, e mafai ona e faailoa atu manatu e pei ona ta'ua i lalo i au tagata sailiili:

- Talu ai ona o le Atua o lo tatou Tama Faalelagi, o i tatou uma lava o uso ma tuafafine. Ma te mananao e ta'u outou o uso ma tuafafine.
- O tagata taitoatasi tatou te aoaoina e i ai ni luitau ma ni popolega faaletagata lava ia. E tusa lava po o a ou manaoga po o popolega, o le Faaola ma Ana aoaoga—o le talalelei—o le a fesoasoani ia te oe.
- O le ma savali o le a mafai ai ona siitia le tulaga lelei o o outou olaga. O le a fesoasoani ia te outou i le taulimaina o faafitauli ma lu'itau o loo fetaia'i ma i tatou uma i le olaga.
- O le ma savali, lea e faaautu ia Iesu Keriso, e aoga tele ma taua.
- Tatou te sese uma lava i le olaga, ma o nei mea sese e mafua ai lagona o le ta'usalaina ma le ma. O nei lagona e le mafai ona aveesea e aunoa ma le salamo ma le faamagaloga. E mafai ona faamaloloina atoatoa e ala i le Togiola a Keriso.
- O le ma savali e le mafai ona aoaoina uma i le taimi e tasi. O le a oo mai le malamalama i le gasologa o taimi e ala i le tatalo, suesue, o mea e tutupu, ma le tausia o poloaiga a le Atua.
- E i ai o tatou vaivaiga, e pei lava o tagata uma. Atonu e lē lelei le ma tautatala i le gagana, pe lē mafai foi ona taliina uma a outou fesili. Ae ua valaauina i ma'ua e se perofeta a le Atua, e fetufaa'i atu mea ua ma iloa. Ma te iloa e moni le ma savali.
- O le a avea i ma'ua ma taiala ina ia mafai ona outou iloa mo outou lava le moni o le ma savali. Ua i ai lau lava filifiliga pe talia ma faatino loa le savali. O le mea lea, e tatau ona e maua le lagona saoloto e tuuina mai ni fesili.
- A outou saili ma le loto i ai ina ia outou malamalama i le ma savali, e mafai ona outou fetaia'i ma ni luitau, ae o le a fesoasoani le Atua ia te oe.
- A outou taliaina le ma savali, o le a outou iloa ai ona osia feagaiga, po o tautoga, ma le Atua. O le a outou iloa ai ona faia ni suiga ia atili latalata atu ai o outou olaga i Ana aoaoga. O le a outou mananao e mulimuli i aoaoga a Iesu Keriso ma ia papatisoina i le pule tatau (tagai Ioane 3:5).

Ao le i aoaoina atu aoaoga faavae i se lesona, ia mafaufau e tuu atu sina vaaiga lautele faigofie o mea o le a e aoao atu. Fesoasoani i tagata ia latou iloa o le a patino ona taua ia i latou lava. O le toatele o tagata sailiili e te aoaoina, na saunia lava e le Alii (tagai Alema 16:16–17). A o outou fetufaa'i faatasi i aafiaga faaleagaga i le feiloaiga muamua, o le a latou iloa ina o oulua o ni auauna a le Alii.

Gaoioiga: Suesuega Faalesoa

Ia faataitai faatasi ma lau soa ni auala eseese e amata ai se lesona e faaoga ai nai fautuaga nei.

Ia Fetuuna'i Le Faiga o a Oulua Aoaoga ina ia Fetau'i ma Mea e Manaomia

E tulaga ese lava tagata taitoatasi po o aiga na tou te aoaoina. E ui lava ina o le a outou le malamalama i mea uma latou te fiafia i ai, o mea na ausia, manaoga, ma popolega, ae e tatau ona e sailiili ina ia e nofouta i o latou tulaga. Tusa lava pe o a tulaga e manaomia po o faafitauli, e sili atu ona lelei le fesoasoani i tagata uma pe a latou talia ma ola i le talalelei. O le a mafai ona fetuutuunai a outou aoaoga pe a outou faalogo i musumusuga a le Agaga.


E mafai ona e fesuia'ia le faasologa o lesone, a o musuia oe e fetuuna'i e tusa ai ma mea e fiafia i ai tagata sailiili ma o latou manaoga. E mafai ona e faaogaina ni asi-asiga e sili atu i le tasi e aoao atu ai ia mataupu faavae o se lesone se tasi, ma e seāseā lava ona tupu, ae e mafai ona e aoao atu ni lesone se lua i se asi-asiga se tasi. O loo silafia e le Tama Faalelagi Ana fanau, o lea la, ia faalagolago i musumusuga e faia ai nei faaiuga a o e aoao atu. Ia tatalo mo le meaalofo o le iloaitino, ma ia faalogo lelei i mafauauga e oo mai i lou mafauafau po o lagona e te maua e uiga i mea e aoao atu.

O le a manaomia ona fetuutuunai au aoaoga ina ia taulai atili atu ai i tautinoga e sili atu ona faigata i se tagata sailiili ona tausia. Mo se faataitaiga, atonu e faigofie i se tasi tagata ona taliaina le Tusi a Mamona o le afioga a le Atua, ae e faigata i le isi ona talia se isi mea vagana ai le Tusi Paia. Atonu foi e faigata i se tasi tagata ona tuu le tapaa, ae o le a vave ona talia le tulafono o le sefuluai.

A o e fuafua po o afea e aoao atu ai ia ni aoaoga faavae patino, ia nofouta pe o le a le tele o faamatalaga fou e te fetufaai atu. Ia aoao atu i se televave e talafeagai lelei ma tagata sailiili. O nisi o le a televavave pe telegegese foi lo latou alualu i luma nai lo isi. Ia mautinoa e lava ni fesili e te fesili atu ai, ma ia faalogo lelei i a latou tali, ina ia e maua se malamalamaaga lelei pe o le a le vave ma le lelei o le iloa ma le faaogaina e le tagata sailiili o aoaoga faavae o loo e tuuina atu.

Ia nofouta i le taimi. O le tele o taimi faatulagaina mo lesone, e le tatau ona sili atu i le 45 minute. Ae peitai, e mafai ona mae'a se asi-asiga e fai ai se lesone i le 15 po o le 20 minute pe a manaomia. Afai na o le 15 minute o le tagata tou te feiloai ai, ia sui lau aoaoga ina ia fetau'i ma lena taimi faatapulaa.

Ia faalagolago i le folafolaga o le a tuuina atu e le Agaga ia te oe "i le ituaso lava, ioe, i le minute lava, le mea lua te fai atu ai" (MFF 100:6).



Gaoioiga: Suesuega Faaletagata Lava Ia

Mafaufau o loo e savali i le auala ma e vaaia ai se tamaloa matua o loo taumafai e tuu ni taga mamafa i totonu o se apa lapisi. Ua oulua fesoasoani atu ma lau soa ia te ia, ma o le mea ua tupu ua fesili atu po o ai oulua. Ina ua uma ni nai talanoaga, ua ia valaaulia oulua i lona fale ma malie ai e faalogologo i le lua savali. I le taimi o la outou talanoaga muamua, ua ia ta'u atu ai:

- Na maliu lona toalua i le tausaga ua mavae, ma ua ia matuai misia lava o ia.
- E lē lavā gofie ona o se tulaga o lona fatu.
- Ua faateteleina i le taimi nei nai lo se isi lava taimi ona mafaufau, pe o i ai moni ea se Atua.

O le a se mea e mafai ona oulua aoao atu ia te ia? E mafai faapefea ona oulua fetuuna'ia a oulua aoaoga ina ia sili atu ona fetui ma ona manaoga ma popolega?

Mau Suesueina

O le a le uiga o le tuuina atu “o lena vaega e tatau ai mo tagata taitoatasi”?

Alema 29:8

MFF 84:85

O le a se mea ua folafola mai e le Alii i faifeautalai faamaoni?

MFF 68:2–4

MFF 100:5–8

Mataio 10:19–20

Ia Ouluu Aoao Atu ma Lau Soa i le Lotogatasi

Na poloai mai le Alii, “Tou te o atu foi taitoalua i le mana o lou Agaga, e talai atu la’u talalelei” (MFF 42:6). O le a sili atu ona mamana ma manaia la oulua talaiga, pe afai lua te galulue faatasi ma lau soa i le lotogatasi. A o lua fuafua ma suesue i aso taitasi, ia talanoa pe o le a faapefea ona oulua aoao atu ina ia sili atu ona oulua lotogatasi ma aoao atu i le leo e tasi.



O le a sili atu ona mamana la oulua aoaoga pe afai lua te auaua’i i le tuuina atu o ni vaega pupuu o le lesona. Aloese mai le faia o se faiga e taotasi ai le tuuina atu o le savali. Ia e lagolago i lau soa e ala i le tuuina atu o se molimau lona lua e uiga i upu moni sa ia molimau atu ai. Mulimuli i ou lagona pe a musuia ai oe e le Agaga e fai atu se faamatalaga. I le aveai ai o se soa, ia saunia e tuu atu le avanoa i le isi, ina ia aua ai nei faatuai le taitaiga a le Agaga. A e tautala, ia tilotilo sa’o i mata o le tagata sailiili. Afai e te le o tautala, ia e tatalo mo lau soa ma ia matauina ma le faaeteete ia tali a le tagata sailiili.

Mau Suesueina

E faapefea ona lagolagoina e le tasi o le soa le isi?

Alema 12:1

MFF 42:6

MFF 52:9–10

Ia Valaaulia Tagata o le Ekalesia e Fesoasoani ia te Oulua e Aoao Atu

Soo se taimi lava e mafai ai, ia valaaulia tagata o le Ekalesia, e sili lava tagata faatoa liliu mai, ina ia fesoasoani ia te oe i le aoaoina atu. O le faiga sili, o le faaaofia ai lea o tagata o le Ekalesia sa lolotu muamua i le lotu a tagata sailiili. Ia faaali atu i tagata o le Ekalesia se kopi o le lesona, ma ia talanoaina le mea lua te mananao latou te aoaoina atu. Ia talanoa pe faapefea ona outou galulue faatasi. Mo se faataitaiga, ia tuu atu i tagata o le Ekalesia, pe a talafeagai, e faamatala pe na faapefea ona latou aoao, talia, ma ola i se mataupu faavae faapitoa o le lesona. Ia tuu atu ia i latou e faamatala atu pe na faapefea ona latou faia le filifiliga e auai i le Ekalesia. A auai tagata o le Ekalesia i le aoaoga, o le a latou maua foi le avanoa e lagonaina ai le fiafia i le galuega faafaifeautalai. E maua ai foi faauoga mo le tagata sailiili. Na aoao mai Peresitene Thomas S. Monson:

I le taimi o le faagasologa o le aoao atu, e mafai ona faamanuaina ia tagata sailiili i le malosi o molimau a se ulugalii o le Ekalesia, o e na faia i tausaga ua mavae se laasaga e papatisoina ma avea ma tagata o le ekalesia. I le Misiona a Kanata i Ontario ma Quebec, lea sa nonofo ai lo matou aiga a o ou vaaia le misiona, na matou iloa ai o le toatele o tagata o le atunuu masalo e auai i ekalesia autu e tolu: o le Katoliko Roma, Anelikana, ma le Ekalesia Tuufaatasi a Kanata. I aai uma lava o le misiona, sa matou faia ai fuafuaga mo se aiga faatoa papatisoina ae na o mai mai nei faatuatuaga taitasi, ina ia avanoa mo faifeautalai i le faagasologa o le aoaoina o se tagata sailiili fou, ina ia mafai e lena ulugalii o le Ekalesia ona o faatasi ma le 'au faifeautalai atonu pe o le feiloaiga lona lua po o le lona tolu foi.

Mo se faataitaiga, e mafai ona e talisapaia le malosi o le molimau a Brother ma Sister William Stoneman, o e na o mai mai le Ekalesia Tuufaatasi a Kanata, pe a galulue faatasi ia faifeautalai ma i latou mai le Ekalesia Tuufaatasi a Kanata. O le a faapea mai Brother Stoneman, o se tagata lolomitusi, "Ina ua ou auai i le Ekalesia a Iesu Keriso o le Au Paia o Aso e Gata Ai, o a'u sa taiulu i le au lomitusi o le Ekalesia Tuufaatasi. Sa tuli a'u ma le galuega. Ae na ou maua se galuega e sili atu. Ae o le mea e sili ona taua, sa ou iloa ai lona moni atoatoa. E mafai foi ona e faia le fetuuna'iga. E mafai foi ona e faia lea lava faaiuga e tasi. Ae, o le a ma pikiina oulula i le taeao o le Aso Sa, ina ia mafai ona tatou nonofo faatasi i le lotu. Ona mafai lea ona e faalogo ma lagona mo oe lava. O le a ma i ai lava i ou tafatafa."

Na avea Anthony ma Edith Belfiglio o se ulugalii na faaumeaina i latou o e na i ai talitonuga o le Katoliko Roma. Na tutusa lava ia taunuuga. E mafai ona fai. Ma o tagata liliu mai faapena e tumau lava lo latou liua. E le gata i lea, o ulugalii na filifilia e faataunuu lena tofiga, na atili faamausali ai o latou lava foi talitonuga i totonu o le talalelei. Na avea uma ia Brother Stoneman ma Brother Belfiglio o ni peteriaka faauuina. O taumafaiga tuufaatasi a tagata o le Ekalesia ma faifeautalai i na faiga soofaatasi patino, na maua ai se faapotopotoina tele o agaga faapelepele [o tagata liliu mai] i le Ekalesia (faasalalauga o aoaoga faasatelite a faifeautalai, 25 Ape. 2003).

Gaoioiga: Suesuega Faaletagata Lava Ia

Mafaufau ua i ai sou taimi faatulagaina mo le taimi muamua, e te aoaoina atu se lesona i se aiga i le fale o se tagata o le ekalesia. Mafaufau pe faapefea ona e saunia ia tagata nei o le Ekalesia e fesoasoani atu i lau aoaoga:

- O se faifeautalai a le uarota faatoa foi mai le misiona
- O se ositaulaga
- O se tagata faatoa liliu mai
- O le epikopo

Faaaoga ia Tusitusiga Paia

O tusi faavae a le Ekalesia o au punaoa autu ia mo le aoaoina atu o le talalelei toefuataiina a Iesu Keriso. E mafai foi ona e faaaogaina ai saunoaga a perofeta soifua. E tele mafuaaga e taua ai ona e faaaogaina tusitusiga paia o ni tusi autu mo lau aoaoga. Mo se faataitaiga:

- Ua poloaiina i tatou e le Alii ma Ana perofeta ina ia tatou faia (tagai MFF 42:12, 56–58; 71:1). Na lapatai mai se perofeta o aso e gata ai, “O upu ma le auala o loo faaaogaina e le Alii i le Tusi a Mamona . . . e tatau ona tatou faaaogaina i le aoaoina atu o mataupu faavae o le talalelei” (Ezra Taft Benson, “The Book of Mormon and the Doctrine and Covenants,” *Ensign*, May 1987, 84).
- E valaaulia e tusitusiga paia le Agaga Paia i lau aoaoga. Latou te aoao mai ia afioga a le Atua ma le mana (tagai Alema 31:5).
- E taliina e tusitusiga paia ia fesili e tele o le loto (tagai 2 Nifae 32:3; Iakopo 2:8).
- E tuuina mai e tusitusiga paia le pule ma le mana i au aoaoga, e oo lava i vaega e leai se malamalamaaga i mea faaKerisiano.

O lou tomai e aoao atu ai ma le mana mai tusitusiga paia, o le tele lava e maua mai le taimi e te faaaluina e te suesueina ai e oe lava ia. A o e suesue i aso taitasi i le afioga, o le a faateleina lou tomai e aoao atu ai mai tusitusiga paia. E le gata i lea, o au valaaulia ina ia suesue ma mafaufau loloto i tusitusiga paia, o le a sili atu ona mamana auā o loo e faia foi lea mea e tasi i lou olaga. Fesoasoani i tagata ia latou maua le faatuatua i tusitusiga paia— aemaise lava i le Tusi a Mamona—o ni punavai o le upumoni toefuataiina. A oo ina talitonu tagata i tusitusiga paia, o le a atili ai ona faigofie ona e fesoasoani ia te i latou ia malamalama sa’o i aoaoga faavae. E mafai ona fesoasoani fautuaga nei.



© Greg K. Olsen. Aua nei i Iepina.

Ia folasia atu le mau. Faamatala faapuupu le mafuaaga o le mau ma upu o le fuaitau o le a e faaaogaina. Ia valaaulia le tagata sailiili e vaavaai mo ni manatu faapitoa o le fuaitau. Pe a aoaoina ni tagata e faalelava le malamalama i tusitusiga paia, atonu e tatau ona e amata mai le faamatalaina o mea o loo tusia ai i le fuaitau, e faaaoga ai upu latou te malamalama ai. O loo i lalo ia faataitaiga o le folasia atu o se mau:

- “O le talafaasolopito a Iosefa Samita, o loo i ai upu a Iosefa lava ia o loo faamatalaina ai le mea na tupu ia te ia, a o alu atu o ia i le vao e tatalo. Sa ia faapea mai, ‘Sa ou vaai ai i se malamalama faaniutu . . .’ ”
- “O le fuaitau leni o loo aoao atu ai le Perofeta o Alema i tagata o e sa vaivai i le faaaogaina o o latou faatuatua i le afioga a le Atua. Sa ia faatusatusaina le afioga a le Atua i se fatu e mafai ona totoina i o tatou loto. E mafai ona e faitau e amata mai i le fuaiupu e . . .”

Faitau le fuaitau. Ia faitau leotele ia fuaiupu pe fai atu foi i le tagata sailiili e faitau leotele mai. Ia nofouta mo i latou e lē lelei le faitau. Afai e faigata ona latou malamalama i se fuaitau, ia faitau faaeteete faatasi ma i latou ma fesoasoani ia latou malamalama i vaega e sili ona faigata. Pe tuu atu foi ia i latou se fuaitau faigofie e faitauina. E mafai foi ona e faamalalamaina ia upu po o fasi fuaitau faigofie:

Faamatalaga

- “Ina ole atu ia i le Atua, o lē foai tele mai i tagata uma ma le le toe ta’uta’ua [o le ‘le toe tauta’ua’ o lona uiga o le a le tu’ua’ia pe tuuaiseina e le Atua] ona foaiina mai ai lea ia te ia” (Iakopo 1:5).

O nisi fuaitau i mau o loo manino ma e le manaomia ai se faamalamalama. Ae o isi e tatau ona e faaaluina se taimi e faamatala ai le mea na faitauina.

Faaaoga le mau. “Faatatau” ia mau ia te oe ma tagata sailiili e ala i le ta’u atu o le aoga o le i ai o mataupu faavae i aso nei (tagai 1 Nifae 19:23). Faailoa atu i tagata sailiili le ala e mafai ona latou faaogaina ai ia mataupu faavae i o latou olaga. A latou faia, o le a latou iloa ai e moni ia aoaoga faavae. Tuuina atu lau molimau e uiga i le mataupu faavae, ma folafola atu ia i latou ni faamanuiaga. Mo se faataitaiga:

- “E pei foi o le nuu o Alema, sa tuuina i o latou luga ni avega mamafa, na toetoe lava a sili atu nai lo mea na latou onosa’ia. Ae a o latou faaogaina le faatuatua ma ‘tagi malosi [ia te Ia] i le Atua,’ Sa ia faamalosi atu ia te i latou ina ia latou onosai i lu’itau ona laveaiina ai lea o i latou mai o latou tofotofoga. E pei lava ona faia i nei tagata, ou te iloa o le a fesoasoani foi le Atua ia te oe i ou tofotofoga a o e . . .”
- “O faatonuga a Alema i tagata i le vai o Mamona, e aoga foi ia i tatou i le taimi nei. Ioane, e te naunau e . . .”

O tagata e te aoaoina o le a eseese mamao lava i le ala latou te faauigaina ai ia tusitusiga paia, pe o le a lo latou iloa o le Tusi Paia, pe o le a le lelei o lo latou malamalama i le gagana faatusipaia, ma le mafuaaga o lo latou talitonuga malosi o le Tusi Paia o loo i ai afioga a le Atua. Fesoasoani i tagata sailiili uma ina ia latou talisapaia tusitusiga paia. O le faaogaina lelei o mau i au aoaoga, e mafai ai ona e fesoasoani i tagata sailiili e amata ona suesueina e i latou lava ia tusitusiga paia. A mavae asiasiga taitasi, ia ta’u atu i ai ni mataupu faapitoa po o ni fuaiupu latou te faitauina. Atonu e te tuuina atu ia i latou ni fesili e mafaufau i ai a o latou faitauina, lea e mafai ona oulua talanoaina i le isi a outou feiloaiga. O lenei mea o le a uunaia ai i latou e suesue i tusitusiga paia i aso taitasi i totonu o o latou aiga ma auai i sauniga Lotu ma vasega lea o loo faaogaina ai tusitusiga paia.

Vaaiga Faaleaganuu i Tusitusiga Paia

O le tele lava o Ekalesia e i ai ni a latou tusitusiga paia po o tusi o mau, ae o la latou faaogaga ma o latou manatu i mau, atonu e ese mai i le auala e faauigaina ai e le Ekalesia ia tusitusiga paia. Mo se faataitaiga, atonu e tatau ona e faamatalaina atu o lou makaina o mau, o le faamaoniga lea o lou naunau ia malamalama ma faaoga ia aoaoga o mau, ma e le o se faailoga o le le faaaloalo. Fesoasoani ia i latou e te aoaoina ia latou iloa o tusitusiga faavae e taua aua o loo i ai afioga a le Alii na tusia e Perofeta a le Atua, ma e tatau ona tatou taliaina ia tusitusiga paia o upu moni.

Gaoioiga: Suesuega Faalesoa**Ia faamanatu ia fasifuaitau o loo i lalo. Ia mafaufau pe faapefea ona e:**

- Folasia atu le fuaitau.
- Tuuina atu ni faamatalaga e uiga i le mau ma ona faaupuga.
- Faitau le mau ma faamalamalama lona uiga.
- Faamalamalama ia upu faigata.
- Fesoasoani i tagata sailiili ina ia latou faaaogaina [le aoaoga] i o latou olaga.

Itulau Tomua o le Tusi a Mamona; 3 Nifae 11; Moronae 10:3–8; Ioane 17:3; Roma 8:16–17; 1 Korinoto 15:29; Iakopo 1:5; 1 Peteru 3:19–20; Amosa 3:7

Mau Suesueina**Aisea e taua ai le aoao atu mai tusitusiga paia?**

1 Nifae 19:23

MFF 20:7–12

2 Timoteo 3:15–17

2 Nifae 4:15–16

Aoao Atu mo se Malamalamaaga

E sili atu ona talitonu tagata i le savali o le Toefuataiga o le talalelei pe a latou malamalama i le savali. Fai mai Peresitene James E. Faust: “Suesue, mafaufau loloto, ma aoao atu mai tusitusiga paia, aemaise lava mai le Tusi a Mamona ma le Feagaiga Fou. Ia e iloa lelei upu moni ina ia manino lelei lou faamatalaina atu. Na tusia e B. H. Roberts, “Ina ia iloa, e tatau ona ta’uina atu le upu moni, ma o le manino ma le atoatoa o le faamatalaga, o le lelei foi lena o le avanoa e maua e le Agaga Paia e molimau atu ai i agaga o tagata e moni le galuega.’ [New Witnesses for God, 3 vols. (1909), 2:vii]. E le mafai ona e faaliliuina tagata e sili atu nai lou lava liuaina” (“What I Want My Son to Know before He Leaves on His Mission,” *Ensign*, May 1996, 41).

Ua poloaia outou e talanoa faatasi ma faamatala atu ia mau pe a e aoao atu (tagai MFF 68:1). *Faamatala* o lona uiga ia faalautele pe faamalamalama manino atu. O le faamatala atu o le talalelei o lona uiga e te faamalamalama atu uiga o aoaoga faavae ma mau ia faafaigofie ma manino, ae faalagolago i le Agaga e ta’ialaina upu e te tautala atu ai. E te faaaogaina le gagana tautala faaloalo ina ia fesoasoani i tagata ia malamalama i aoaoga faavae. E te fesili atu ni fesili ia fesoasoani latou te mafaufau ai i mataupu faavae ma iloa ai pe ua latou malamalama ma talia mea na e aoaoina atu.

I le faaiuga o lesone taitasi o lesone muamua e tolu, i le mataupu e 3 o loo i ai se lisi o upu atonu e le masani ai i latou e te aoaoina. O se vaega o le aoao atu mo se malamalamaaga o le mauiua lea e te faamatalaina atu na upu, fasi fuaitau, ma manatu ina ia malamalama lelei ai isi tagata. E mafai ona faaleleia lou tomai e faamalamalama atu ai le talalelei e ala i le:

“O se tagata atamai moni na te aveina se mataupu e le manino ma faigata, e faalauteleina ma faafaigofieina ina ia mafai ona malamalama ai se tamaitiiti.”

– PERESITENE JOHN TAYLOR

THE GOSPEL KINGDOM, SEL. G. HOMER DURHAM (1943), 270

Faamatalaga

- Malamalama i upu e te faaaogaina.
- Faamatalaina o upu atonu e le malamalama ai isi. O le tele o upu e faapitoa o latou uiga i tagata o le Ekalesia, o loo faafaigofie ona faamalamalamaina i le Taiala i Mau ma le *Faamaoni i le Faatuatua*.
- Fesili atu i tagata i fesili e pei o le, “E te silafia le uiga o le ma faamatalaga . . . ?” po o le “E mafai ona e toe ta’uina mai le faamatalaga na ma tuuina atu nei lava, i ni au lava upu?”

A o e suesueina le aoaoga faavae o loo i le mataupu e 3, ia sue upu e te manatu e faigata ona malamalama i ai se tagata sailiili. A o e aoaoina atu le aoaoga faavae i le mataupu e 3, ia tusitusi i lalo ni upu, fuaitau, ma manatu e faigata ona malamalama i ai tagata sailiili. Ia faamatala le uiga o na upu e faaoga ai auala o loo ta’ua i luga. Ia faaitaitai lou faauigaga faatasi ma tagata sailiili ma tagata faotoa liliu mai.

Mau Suesueina

Aisea e tatau ai ona tatou faamatala pe faamalamalama atu ma le faaeteete ia aoaoga faavae?

Mosaea 8:3

Alema 12:1

MFF 68:1–5

Mosaea 27:35

3 Nifae 26:1

MFF 71:1

E faapefea ona tatou aoao? Aisea e taua ai le faamatalaina pe faifai malie ona faailoa atu o faamatalaga?

2 Nifae 28:30

Mosaea 2:9

MFF 98:11–12

Iakopo 4:13

Aisea e taua ai le tuusao atu?

2 Nifae 25:4, 7, 28

Alema 13:23

Neemia 8:8

2 Nifae 32:7

E faapefea ona fesotai mai le Alii i Lana fanau?

2 Nifae 31:3

MFF 1:24

Fai ni Fesili

E masani ona fesili Iesu Keriso e fesoasoani ai i tagata ina ia mafaufau loloto ma faaoga aoaoga faavae. O Ana fesili e faaosofia ai manatu, o mafaufauga loloto, ma tautinoga.

O fesili lelei o le a fesoasoani e te malamalama ai i mea e fiafia i ai, o popolega, po o ni fesili a isi tagata. E mafai ona latou faalateleina au aoaoga, valaaulia le Agaga, ma fesoasoani e aoao ai au tagata sailiili.

O fesili e lē lelei e mafai ona taufaafefe, faaoso ita, ma faatiga ai i tagata sailiili. E mafai foi ona e le mau manatu ai i le tulaga o lou aoao atu. Taumafai e fai fesili e:



- Faigofie ma malamalama gofie.
- Fesoasoani ai i tagata e mafaufau i mea o loo e aoaoina atu.
- Fesoasoani e te iloa ai pe o le a le lelei o le malamalama o le tagata sailiili i mea o loo e aoaoina atu.
- Fesoasoani ai i tagata e faaoga mea ua latou aoaoina.

O i latou uma e te aoaoina e tali mai i nei ituaiga fesili, o le a latou lagonaina e mafai ona latou talanoa faamaoni atu. O fesili lelei e mafai ona taitaiina atu ai tagata sailiili e fesili atu pe a latou le malamalama, pe a i ai ni o latou popolega, pe a oo foi ina latou fia iloa le mea e fai. O fesili lelei e mafai ona fesoasoani ia i latou o loo e aoaoina e fetuفاai mai o latou lagona, ma o le faia o lenei mea e mafai ona latou maua ai se molimau ua tuputupu ae. O faaitaiga o fesili aoga e aofia ai:

- O a ni au fesili e uiga i mea ua ma aoaoina atu?
- E te talitonu e alofa le Tama Faalelagi ia te oe? Aisea?
- Aisea tatou te faia ai i nisi o taimi ia mea sese na faia foi e tagata o loo i lenei tala?

Ina ia fesoasoani ia i latou o loo e aoaoina ia saunia e tali i fesili, atonu e te fia fai atu i ai, "E pei ona ou faamatalaina le taua o le tausia o le Aso Sapati ia paia, ia fesili ifo ia te oe lava, 'O le a le uiga o lenei poloaiga ia te au?' " Aloese mai le faia o fesili:

- E sili atu i le tasi se manatu o i ai.
- E faatatau i aoaoga faavae e te le i aoaoina atu.
- E le manino se faamoemoega.
- E suesue ma āiā valea ai fua.

O le tele o fesili e fesili atu, aemaise lava i lau asiasiga muamua, e foliga ai o loo faia sau "suesuega." Aua le fesili atu i tagata sailiili e tuuina mai ni tali patino e uiga i faamatalaga e lē taua pe o iloagofie foi. O lenei faiga o le a suia ai se siosiomaga lelei o le aoaoina atu, i se taaloga taumatemate. A oo ina e manaomia se tali patino, e sili atu le faia o se fesili faamaoni po o le tuuina atu o le faamatalaga i se isi auuala. Aloese mai le faia o fesili e ono faalumaina ai se tasi pe a latou le iloa le tali. E sili atu le aoga o fesili pe a fai i le taimi ua uma ona e aoaoina atu ma molimau atu e uiga i le aoaoga faavae faapitoa. O loo i lalo ia ni faaitaiga o fesili e lē lelei:

- O ai le uluai perofeta? (Fesili ae e te lei aoaoina atu e uiga i tisipenisione.)
- E faapefea ona fesoasoani le tausia o o tatou tino ia mama, ina ia tatou maua ai le Agaga ma faaalua ai o loo tatou naunau e mulimuli i le perofeta a le Atua? (E sili atu ma le tasi ni manatu.)
- Pe taua le iloa o poloaiga a le Atua? (Tali ioe-leai, ma e iloagofie lava [le tali].)
- O a ni o outou lagona e uiga i le Tusi a Mamona? (Ae latou te le i faitauina.)
- O le a se mea tatou te faia i aso taitasi e mafai ona fesoasoani tatou te latalata atu ai i le Atua? (Fesili faalēmanino o loo mana'o i se tali patino: tatalo.)
- O ai le perofeta na sosoo ma Noa? (O loo fesili atu ai latou te mate maia.)

Faamatalaga

Aoao e fai fesili e uuna'ia ai e le Agaga. O le ituaiga fesili sa'o i le taimi sa'o, e matuai aoga tele ia i latou o loo e aoaoina e aoao ai i le talalelei ma lagona ai le Agaga. E faapena foi, ia ituaiga fesili sese po o fesili e sese le taimi e fai atu ai, e mafai ona avea ma faalavelave ia latou sailiiliga. Fesili atu i fesili talafeagai i le taimi tatau, e manaomia ai lou mauaina o le Agaga, e te faalogo ia i latou o loo e aoaoina, ma e taulai atu i le taimi atoa i le aafiaga o le aoao atu. O le lelei o le aoao atu, o se galuega faigata ma e manaomia ai le mafaufau atoa ma se taumafaiga i lau vaega faapea ma lau soa.



© 1985 Robert T. Barrett. Aua me'i kopina.

Gaoioiga: Suesuega Faaletagata Lava Ia pe Faalesoa

O le a se mea e mafai ona tupu i le alualu i luma o se tagata sailiili, pe afai e fetai'a'i o ia ma tulaga o loo ta'ua i lalo, ae e te le iloaina?

- O tagata latou te faigaluega faatasi e masani ona ula i mea faaleagaga.
- Tagata o aiga e malolosi i se isi lotu.
- O uo e talitonu, o tagata Mamona e le o se faapotopotoga Kerisiano.
- O se aafiaga faaleagaga i le faitauina o le Tusi a Mamona.

Maufaufau i se fesili e mafai ona e fesili atu ai, ina ia e iloa ai ni mea se tele e uiga i tulaga o loo i luga. Tusi au fesili i lau tusi talaaga o suesuega. Talanoa ma lau soa pe faapefea ona oulua faaleleia ia fesili na oulua tusia mo lenei gaoioiga.

Faalogo

A e faalogo faalelei i isi, ona e malamalama atili ai lea ia i latou. A latou iloa e te faatauaina o latou manatu ma lagona, o le a atili ai foi ona latou fia faalogo i au aoaoga, ma fetufaai mai mea na tutupu i le tagata lava ia, ma faia ni tautinoga. A e faalogo, o le a mafai ona e saga fetuuna'ia lelei lau aoaoga ia talafeagai ma o latou manaoga ma mea e fafia i ai.

Ia faapitoa lou faalogo mo musumusuga a le Agaga. A o fetufaai mai e isi o latou lagona ia te oe, atonu o le a oo atu ni mafaufauga po o ni manatu i lou mafaufau, na tuuina mai e le Agaga. O le a mafai foi ona e malamalama i mea o loo taumafai isi e faailoa atu.

A talanoa atu isi tagata ia te oe, aloese mai lou taumafai e mafaufau pe o le a sau tala o le a fai atu. Ia mautinoa o loo e matuai faalogo lelei i le tagata o loo tautala nai lo le mafaufau i sau tali. Na aoao mai Elder Jeffrey R. Holland: "E sili atu le taua o le faalogo nai lo le tautala. O nei tagata e le faapea o ni mea e leai ni ola, ma ua na ona faitaulia i le numera o papatisoga. O i latou o fanau a le Atua, o o tatou uso ma tuafafine, ma o loo latou moomia le mea o loo ia i tatou. Ia e faamaoni. Ia aapa atu i ai ma le faamaoni. Ia fesili i na uo po o le a le mea e sili ona taua ia te i latou. O le a le mea latou te faapelepele i ai, ae o le a foi le mea latou te manatu e taua? Ona e faalogo lelei lea. Afai e sa'o le tulaga o i ai, e mafai ona e fesili atu po o a ni mea o loo latou atuatuvaile ai, po o a mea o loo

latou naunau i ai, pe o latou lagonaina foi o loo misi i o latou olaga. Ou te folafola atu ia te outou e i ai lava *se mea* latou te ta'uina mai o le a laualuga mai ai *pea* se upu moni o le talalelei e mafai ona e tuu atu ai se molimau, ma mafai ai ona tele nisi mea e te ta'uina atu. . . . Afai tatou te faalogo ma le alofa, e le tatau ona tatou tau manatunatu pe o le a le tala e fai. O le a tuuina mai ia i tatou—e ala i le Agaga faapea ma a tatou uo" ("Molimau Ia te Au," *Liahona*, Iul. 2001, 16; faatusilima i le uluai tusiga).

E i ai foi mea e ta'u mai e tagata i le ala latou te saofafai ai, o o latou foliga faaalua, ma mea latou te faia i o latou lima, o o latou leo, ma taga a o latou mata. Ia matau nei savali lē leoa; e mafai ona fesoasoani nei [savali lē leoa] e malamalama ai i lagona o tagata o loo e aoaoina. Ia e mataala foi i gagana a lou lava tino. Auina atu se savali o le fiafia ma le naunautai e ala i lou faalogo ma le faamaoni.

Aua le popole pe a leai se isi e tautala. E masani ona manaomia e tagata se taimi e mafaufau ai ma tali atu i fesili pe faailoa atu o latou lagona. E mafai ona e filemu aua e te tautala pe a uma ona e tuuina atu se fesili, pe a mae'a ona faamatala atu se mea faaleagaga na tupu, pe afai o fai si faigata i tagata ona faamatala mai o latou lagona. Ia mautinoa e tuu atu i tagata le taimi e faamae'a ai o latou mafaufauga ae e te le i tali atu, ma aua le faalavelave a o talanoa atu.

A e lagonaina ua e malamalama i le tala o fai mai, fai ni faamatalaga e faailoa atu ai ua e malamalama, e pei o le "O le uiga la o lau saunoaga o le _____. E sa'o lena?" po o le "Afai e sa'o a'u, o loo e lagonaina le _____." Afai e te le iloa pe ua e malamalama, ia fai i le tagata e faamanino mai.

O nisi tagata e foliga mai latou te faoa atoa le talanoaga ma taofia ai oe mai le aoaoina atu o le talalelei toefuataiina. E tatau ona e aoao ia e iloa ona faafoe lelei na ituaiga tulaga. Mo se faataitaiga, "Ma te faafetai i le mea ua e faamatala mai, ae o le vaega lena ma te fia talanoa atu ai i se taimi mulimuli. O le a fai i la'u soa e tusi i lalo ina ia mautinoa ai e le galo i le isi a ma asiasiga mai." Ia manatua, e sili atu ona e fesoasoani i tagata pe a e aoaoina atu ia i latou le talalelei a Iesu Keriso.

A e faalogo ma le faaeteete, o le a fesoasoani atu le Agaga e te iloa ai le tala e fai. O le faalogo e manaomia ai se taumafaiga ma le mafaufau atoa. Na faamatala mai e se tasi o faifeautalai le mea moni lena na tupu (ua suia igoa):

Sa ma aoaoina ma la'u soa le aiga o Sanchez. Sa vevela [le aso] ma sa pisapisao tamaiti. Sa ou fesili ia Sister Sanchez e uiga i lana fuitauga o le Tusi a Mamona. A o amata ona ia faamatala mai, na ou vaai atu ua se'i e le la tama tama le api laitiiti a la'u soa ma tamoe solo i le potu ma faalala i luga. E ui lava ina sa ou tilotilo atu ia Sister Sanchez, ae ese lava le mea na i ai lo'u mafaufau. Sa ou faapea ifo ia te au, "Matuai vevela tele, ma maimau pe ana nofo i lalo le la tamaitiiti. E matuai leai lava se aoga o lena mea." A o fealua'i solo lo'u mafaufau, na ou matauina ua tau le tautala ia Sister Sanchez. Na oo mai se manatu vaivai i lo'u mafaufau ou te faalogo. Sa ou tauivi e aveese mai lo'u mafaufau mai le vevela ma le pao. Sa ou matauina ma le faaeteete ona foliga a o tautala o ia. Sa tilotilo ifo i lalo, ona toe tepa a'e lea i luga ia i ma'ua ma la'u soa. Sa taumafai lava foi lona toalua e faafilemu ia tamaiti. Na leai se tala, ma i lona leo gatete sa ia faapea mai ai, "Na ou faia le mea na lua fai mai ai. Na ou faitauina na mataupu na lua mananao ou te faitauina, ma sa ou tatalo." Sa toe filemu o ia ma tilotilo i lalo. Sa autilo atu i lana fanau, ona tau mai lea o lana vaai ia te au. "Sa ou maua se tali," sa soiso'i o ia ma fai mai ai ma ona mata ua loimatā. "E moni, ou te iloa e moni." Sa faatumulia le potu i le Agaga. Faatasi ai ma se loto na tumu i le loto faafetai ona sa ou faalogo, sa ou ataata ma faapea atu, "Toe, e moni."

Faamatalaga

Gaoioga: Suesuega Faaletagata Lava la pe Faalesoa

A uma ona iloilo le tala o loo i luga, ia tusi ia tali o fesili o loo i lalo i lau tusi talaaga o suesuega, pe talanoaina foi faatasi ma lau soa fesili nei.

- O le a se mea semanu e tupu pe ana sili atu le popole o le faifeautalai mo ona lava lagona lelei, po o le api foi a lana soa?
- Na faapefea ona faamanuaina lenei tagata sailiili ona sa faalogo le faifeautalai?

Tali fesili o loo i lalo:

A = E le sa’o e uiga ia te au E = O nisi taimi e sa’o ai e uiga ia te au
 I = E masani ona sa’o e uiga ia te au O = O taimi uma lava e sa’o ai e uiga ia te au

- A ou talanoa i isi, ou te mafaufau lava i ni mea faapena na tutupu e mafai ona ou fetufaai nai lo lo’u faalogo lelei.
- A faamatala mai e isi o latou lagona, ou te taumafai e tuu a’u i o latou tulaga ia iloa ai pe o le a se faalogona.
- Pe a ou aoaoina ia tagata sailiili, ou te popole pe o le a le isi a’u tala o le a fai pe aoao atu.
- Ou te le fiafia pe a fia tautala soo ia tagata sailiili.
- E faigata ona ou mulimuli pe malamalama i mea o loo taumafai isi tagata e ta’u mai ia te au.
- E masani lava ona alu solo lo’u mafaufau a o fai e la’u soa se lesona.
- Ou te le fiafia pe a talanoa mai se tasi ia te au, ae faasalavei mai pe faalavelave mai nisi ia te au.
- Ou te mauaina musumusuga faaleagaga ou te tautala atu pe faia foi se mea, ae ou te faagalologo lava i ai.

Vaai pe o le a se mea e mafai ona e faia e faaleleia ai lou tomai e faalogo ai.

Atiina ae se Sootaga Lelei ma Tagata Sailiili

Ina ia aua nei faalumaina, o nisi tagata o le a latou taliina ia fesili i le auala latou te manatu o loo e manao e tali atu ai nai lo le faasoaina atu o o latou lagona moni. Ia saili e atiina ae se sootaga e mafai ai ona latou faasoa mai o latou lagona moni ia te oe.

Fesoasoani i Tagata e Foia o Latou Popolega

O nisi o i latou o loo e aoaoina, o le a leai se faatuatua e tausia ai tautinoga, o nisi o le a feagai ma le tete, ma o nisi o le a latou lē taliaina i taimi uma mea uma e te faasoaina atu. E tatau ona latou faia a latou lava filifiliga, a e o le a e manao e faia mea uma e te mafaia, e tali ai a latou fesili, fesoasoani ia foia o latou popolega, ma faatoilalo le tete.

O nisi taimi o popolega o tagata e pei o ni oga aisa tetele. E na o sina vaega lava e aliali ae i luga. O nei popolega e mafai ona lavelave ma faigata ona foia. O le mafuaaga lenei e manaomia ai lou mulimuli i le Agaga ma tali atu i se agaga e sili ona talafeagai ma le tulaga o i ai. Tatalo mo le meaalofa o le iloatino ma mulimuli i ou uunaiga. E silafia e le Tama Faalelagi ia loto ma mea e tutupu i tagata uma lava (o le oga aisa atoa) ma o le a fesoasoani ia e iloa le mea sili mo tagata taitoatasi.



Aua nei kopina.

A e fesoasoani atu i isi e foia o latou popolega, ia saili muamua ia e malamalama i o latou popolega e ala i le fesili atu ma faalogo. Ia faalagolago i le Agaga e fesoasoani ia te oe ia iloa le ala e foia ai o latou popolega. Mo se faataitaiga, atonu e te faaaogaina se mau e faailoa atu ai se popolega e uiga i le manaomia o le papatisoga, pe faasoa atu foi lau molimau e uiga i le Perofeta o Iosefa Samita.

E masani lava, o popolega e mafuli i le vafealoha'i nai lo aoaoga faavae. Mo se faataitaiga, e ono popole ia tagata sailiili i le tetee o tagata o o latou aiga pe a latou auai i le Ekalesia. Pe atonu foi latou te popole i le teena o i latou e a latou uo i le galuega. Po o le a lava le popolega, atonu e i ai ni mea na tutupu muamua i au tagata sailiili po o nisi mea o fai ma popolega e te le malamalama i ai. I le tele o tulaga, e ono mafai e tagata o le Ekalesia ona fesoasoani ina ia e malamalama ma fesoasoani i o latou faaaitauli.

O le ala e te fesoasoani atu ai i le faaaitauli o se tagata sailiili o le a faalagolago lava i le natura o le faaaitauli. Ia vaai pe ua alia'e mai le faaaitauli ona e le o i ai se faamaoniga faaleagaga o le moni o le Toefuataiga, i le tagata, pe e le o mana o le tagata e tautino e ola i se mataupu faavae moni. O le malamalama i le faapogai o le faaaitauli i lena auala, e fesoasoani ia te oe e iloa ai pe tatau ona taulai atu i le molimau po o le tautinoga.

Gaoioiga: Suesuega Faalesoa

Filifili se valaaulia mo se tautinoga se tasi e te tuuina atu [i le tagata sailiili] pe a e aoaoina atu ia lesona. Ona faailoa atu lea o faaaitauli eseese atonu e ono taofia mai ai se tasi mai le taliaina po o le tausaina foi o lena tautinoga. Ia talanoaina ma faataitai pe o le a le auala sili e fesoasoani atu ai i tagata a o latou galulue e foia o latou popolega.

Salamo ma le Toe Faaleleia mai Mea Leaga ua Fai ma Masani

O le salamo o se auala faaleagaga e aofia ai le lotomaulalo, ta'uta'u atu, toe faaleleia, ma le liliu ese mai le agasala. O se suiga tumau lea o manatu ma amioga. O le mea e tatau ona i ai, o le salamo i se agasala patino e tatau lava ona na o le faatasi. Ae peitai, afai e toe faia le agasala, o loo i ai le salamo o se auala o le faamalologa (tagai i le Mosaea 26:30; Moronae 6:8; MFF 1:31–32).

O le salamo e mafai ona aofia ai lagona ma la le tino. E tatau i tagata ona tuu ia faiga faifai pea ua mausali o amioga lē talafeagai. Ua tatau ona suia taga e lē manaomia i amioga lelei ma talafeagai.

O le mea lea, o le salamo ma le toe faaleleia e ono tele se taimi e faia ai. O nisi taimi o tagata liliu mai, e tusa lava pe i ai faamoemoega sili ona lelei, e gauai atu i faaosoosoga a o latou agai atu ina faateleina le amio pulea. O tulaga faapena e galulue faatasi ai tagata faatoa liliu mai ma o latou taitai perisitua, ae le o faifeautalai, a o latou taumafai e faatoilalo ia tofotofoga ma salamo atoatoa.

O le papatisoga ma le faamauga, e maua ai e tagata le meaalofa o le Agaga Paia, lea o le a malosi ai lo latou tomali e faatoilaloina nei luitau. Ae o le papatisoga ma le faamauga atonu e le mafai ona faapea o le a matua leai ni uunaiga o lagona ma la le tino lea e o faatasi ma nei amioga. E ui lava ina mafai ona faamanuiaina i le amataga, ae e ono tatau lava ona i ai nisi faamalologa o lagona ina ia atoatoa ai ona salamo ma faaleleia.

Faamatalaga

Gaoioga: Suesuega Faaletagata Lava Ia pe Faalesoa

- la mafaufau i se tagata sailiili, tagata faatoa liliu mai, po o se tagata o le Ekalesia e le toaga mai, o loo taumafai e faatoilalo mea ua fai ma masani.
- la toe faamanatu le “Faatuatua ia Iesu Keriso” ma le “Salamo” mai le lesona “O Le Talalelei a Iesu Keriso” i le mataupu e 3.
- O le a se mea e mafai ona e aoao atu i lena tagata mai lenei lesona ma mai lenei mataupu, o le a fesoasoani ia te ia e faatoilalo mea ua fai ma masani?
- la fai se ata faataatia o le lesona e fesoasoani ai i lenei tagata.

Fesoasoani i Tagata Sailiili ma Tagata Faatoa Liliu Mai ia Malamalama i le Salamo ma le Toe Faaleleia mai Mea Leaga ua Fai ma Masani

Atonu o le a fesiligia oulua e tali ia fesili ma popolega e uiga i lenei mea ua fai ma masani. O le a e manao foi e fesoasoani atu i tagata e saili tali i fesili faigata e faataata i nei faafitauli. Atonu o le a aoga manatu o loo i lalo:

- Ia tuuina atu lau molimau e uiga i le natura faamalololo o le talalelei, aemaise lava o le Togiola (tagai i le Alema 7:11–13).
- Ia molimau atu e na o le Atua lava e mafai ona faataunuuina ai le vavega o le faamalologa faaleagaga (tagai i le Salamo 147:3).
- Ia faamatala atu o le meaalofa o le faamalologa e oo atu uma i le tino ma le agaga.



© 2000 Simon Dewey, Aua nei! Kōpina.


O laasaga muamua e fesoasoani ai i tagata i le faagasologa o le faamalologa o lagona e aofia ai le:

- Malamalama ma iloa le faafitauli. O lenei mea e manaomia ai se iloiloga faeteete ma le faamaoni a le tagata lava ia.
- Iloa o le amioga e leaga tele. E aafia ai isi ma e manaomia ai le suiga.
- Lotomaulalo ma lagonaina le faanoanoa.
- Sailia o se faamagaloga mai isi o e na faaleagaina, ma aoao ia faamagalo e le tagata ia lava.
- Taofia o amioga leaga ua fai ma masani, ae amata ona faia mea lelei.
- Tumau i le faamaoni—tausia o feagaiga o le papatisoga, tuuina atu ni auaunaga, tatalo mo le fesoasoani mai le Agaga Paia, ma faaalua se naunautaiga e tausii poloaiga a le Atua.
- Malamalama o le a alofa pea lava le Alii i Ana fanau—e tusa lava pe latou te faia se mea sese ma gauai atu i manaoga tuai. E i ai pea lava le salamo ma le auala i le toe faaleleia.

O Se Fuafuaga mo le Faatoilaloina o Amioga Leaga ua Fai ma Masani

Atonu e fesili ia tagata sailiili ma tagata fou o le Ekalesia ma tagata e le toaaga mai, po o a mea e mafai ona latou faia e faatoilaloina ai se amioga leaga ua fai ma masani. Latou te faatuatua e te mafai ona tuuina atu le taitaiga ma le lagolago. E mafai ona fesoasoani fautuaga o loo i lalo:

- Tuu atu ia i latou e fai se lisi o taimi, nofoaga, ma tagata na fesoasoani i le amioga [leaga]. Ona talanoaina lea o le lisi ma le toalua, epikopo, faifeautalai o le uarota, po o se isi uo faatuatua. Talanoa po o a mea e tatau ona latou fai e suia pe aloese mai ai mai mea ia o loo tusia i le lisi.
- Tuu atu ia i latou e tusi i lalo pe o a mea ua latou le maua ona o lea amioga, ma afai e le faasa’oina, pe o le a le mea o le a latou le maua i le lumanai ona o lea amioga.
- Tuu atu ia i latou e tusi i lalo ni mea eseese e mafai ona latou faia e aloese mai ai pe taofia ai ia amioga lē talafeagai. O lena mea e mafai ona aofia ai le talanoa i le toalua, valaau atu i le epikopo po o se uo mo se fesoasoani, faamalositino, ma soo se isi lava gaoioiga e fesoasoani ai ia i latou ia aloese mai ai i faaososoga.
- Uunai i latou ina ia tatalo soo, suesue i tusitusiga paia, faalogologo i musika musuia, ma faitau i tusi lelei.
- Uunai i latou e saili mo se faamanuiaga faaleperisitua.
- Uunai i latou e faaauau pea ona toaaga i le lotu, lea o loo i ai e fesoasoani ia i latou e faatoilalo o latou faafitauli ma ola latalata atu ai i le Alii.
- Uunai i latou e auai i se faalapopotoga fesoasoani talafeagai, pe saili se fesoasoaniga faapolofesa. O isi atunuu, o loo i ai le LDS Family Services.
- Uunai i latou ina ia aua lava nei fiu! O le a fesoasoani le Alii ia i latou, e tusa lava pe umi se taimi e alu ai.



O tagata toaaga o le Au Paia o Aso e Gata Ai, e mafai ona sili atu ona latou fesoasoani i tagata fou o le Ekalesia ia tumau lo latou toaaga, e ala i le aveia ma a latou uo. E tatau i tagata o le Ekalesia ona aapa atu i tagata sailiili ma tagata fou o le Ekalesia i se uiga mafanafana ma le lelei. O le a tali atu tagata sailiili ma tagata faatoa liliu mai ma le fiafia pe a faafeiloa’ia [i latou] i laufofoga fiafia, pe a fesili atu ma le faamaoni po o a mai i latou, pe a nonofo atu nisi i o latou tafatafa i le taimi o sauniga, ma pe a valaaulia i latou mo se taumafataga faaleaiga po o se afiafi faaleaiga.

Talu ai ona e i ai lava nisi e toe foi lava i se mea ua fai ma masani, e le tatau ona faate’ia pe lotovaivai ia taitai perisitua po o tagata o le Ekalesia, pe afai latou te iloa o loo tauivi se tagata sailiili po o se tagata e fou mai i le Ekalesia, ma na ituaiga faafitauli. E tatau ona latou faaali atu lo latou talitonu i le tagata ae aua le faamasino atu pe afai ua gauai atu se tagata i se vaivaiga tuai. E tatau ona latou taulimaina o se faafitauli e le tumau ma malamalama gofie. O le ta’usalaina o le tagata sailiili po o se tagata faatoa liliu mai e i ai amioga ua fai ma masani, e le aoga lava ma e iu ina oo atu ai ina lotovaivai,

Faamatalaga

toilalo, ma lē toe lotu ai. O se tagata faatoa liliu mai ua faafuasei ona le toe sau i se lotu, atonu ua toe gauai atu i se vaivaiga tuai ma ua lagonaina le le agavaa ma le lotovaivai. E mafai ona fesoasoani se asiasiga faavave e tuuina atu i ai le faamalosiuga ma le fesoasoani i le tagata ia toe manuia. E tatau i tagata o le Ekalesia ona faaalua i upu ma amioga ua latou taliaina ia tagata liliu mai (tagai i le 3 Nifae 18:32).

O le tumau ona toaga i le Ekalesia ma le taumafai ina ia ola faamaoni, o mea aupito sili ia ona taua e mafai e soo se tasi ona faia e faatoilaloina ai faafitauli o amioga leaga ua fai ma masani.

Gaoioiga: Suesuega Faaletagata Lava Ia

Mafaufau i ni mea ua fai ma au masani—o se mea e masani ona e faia, e aunoa ma le mafaufau i ai, e pei o le faapapaina o ou tu'elima, fetuutuuna'i o au tioata, 'ai tele, pe moe umi foi. Ia taumafai la'ia mo se aso se tasi ia aua ne'i faia. A manuia, taumafai e aua le faia i se vaiaso atoa. Ia talanoaina ma lau soa le mea na e oo i ai. Ona taumafai lea e mafaufau pe o le a le faigata o loo taumafai ai se tagata sailiili ia manumalo mai le faia o amioga masani e pei o le faaogaina o le tapaa po o ava oona.

Ia I Ai se Mea e Tuu

A mae'a asiasiga taitasi, ia tuu atu i le tagata sailiili se mea e faitau ma mafaufau loloto i ai e sauniuni ai mo le isi asiasiga. E mafai ona e tuuina i ai ni mataupu o le Tusi a Mamona e faitau. E mafai ona e tuuina i ai se tamaitusi o loo faamatalaina ai le mea na aoaoina, po o mea foi o le a e aoaoina atu i le isi asiasiga, pe o se tusi faitau po o se lipine o se aooga e matamata ma faalogologo i ai. Afai e mafai ona latou faaogaina le Initoneti, ia uunaia i latou e tagai i le www.mormon.org. E tatau lava ona tuu atu ia i latou se mea e mafaufau i ai, e mafaufau loloto i ai, ma tatalo e uiga i ai. O lenei mea e mafai ona avea o se autu mo se talanoaga faasamasamanoa i le isi taimi tou te feiloai ai.

Gaoioiga: Suesuega Faalesoa

Ia toe iloilo tusi ma mea o loo ia te oe e mafai ona e tuu atu i tagata sailiili e aofia ai tamaitusi ma lipine faalogologo ma atavito. Pe o i ai nisi mea e tatau ona e maua ina ia mafai ona e faasoaina atu i au tagata sailiili? Tusi i lau lisi o fuafuaga mea e tatau ona e okaina.

Ia mafaufau i tagata sailiili taitasi ua fuafua e te aoaoina i lenei vaiaso. O a mataupu o le Tusi a Mamona o le a sili ona fesoasoani ia i latou? O a isi mea po o tusi o le a aoga ia i latou? Ia tusi i Faamatalaga /Lisi o Mea e Fai i lau lisi o fuafuaga, mea ua e fuafua e tuuina atu i tagata sailiili taitoatasi ma mea o le a e faia e siaki i le isi au asiasiga.

Aoao atu le Talalelei Toefuataiina ia i Latou e Le Iloa le FaaKerisiano

O nisi o tagata o le a e aoaoina atonu o le a le talitonu i le Tama Faalelagi ma Iesu Keriso, pe i ai foi ni tu ma aga faaKerisiano. Peitai, o le toatele o nei tagata, o le a i ai ni talitonuga, aga, ma ni nofoaga e paia ia te i latou. I le avea ai o se auauna a le Atua, e taua lou faaali atu o le faaaloalo talafeagai mo o latou talitonuga ma tu ma aga faalelotu. Aua lava ne'i faia se mea e faaalua ai le le faaaloalo i mea e taua ia i latou.

Atonu o le a e mafaufau pe o le a faapefea ona e fetuutuuna'ia le auala e te aoao atu ai i nei tagata. E aoga tele ona manatua, ina ia mafai ona liua le fanau uma a le Atua, e tusa lava pe o le a le tulaga na ola a'e ai, e tatau ona atiina ae se faatuatua ia Iesu Keriso,

salamo, talia sauniga o le papatisoga ma le faamauga, tumau e oo i le iuga e ala i le tausia o poloaiga ma le tuuina atu o le auaunaga. O mataupu faavae e fesoasoani ai i isi e fausia le faatuatua ia Iesu Keriso e tutusa i aganuu uma lava.

E mafai ona e fesoasoani i tagata ia maua se malamalamaaga sa'o e uiga i le Atua o lo tatou Tama Faalelagi, ma atiina ae le faatuatua ia Iesu Keriso, e ala i le fesoasoani ia i latou ia maua ni aafiaga faaleagaga o le tagata lava ia, nai lo le na ona ta'uina atu ia i latou e uiga i le natura o le Atua. Mo se faataitaiga, o le a e fesoasoani ia latou maua lenei malamalamaaga pe a latou:

- Maua se faamautinoaga faaleagaga e faapea, o le Atua le Tama ma Lona Alo o Iesu Keriso, na faaali mai i le Perofeta o Iosefa Samita.
- Faalogo i au aoaoga ma molimau faamaoni e uiga i le talalelei, e aofia ai ma le pe aisea na e filifili ai e mulimuli ia Iesu Keriso.
- Faalogo soo ia te oe faapea isi tagata o le Ekalesia o talanoa e uiga i le Tama Faalelagi i se tatalo faigofie, mai le loto.
- Faalogo ia te oe o tuuina atu se molimau mamana.
- Tatalo faatasi ma oe ma tatalo foi na o i latou.
- Mafai ona latou iloa ou lagona e uiga i tusitusiga paia a o e faitau ma talanoaina.
- Faitauina afioga a le Atua mai tusitusiga paia i aso taitasi (aemaise lava o le Tusi a Mamona).
- Auai atu i le lotu ina ia mafai ona latou vaai pe faapefea ona tatou tapuai i le Alii.
- Feiloai atu i tagata o le Ekalesia o e e mafai ona latou faamatalaina pe na faapefea ona latou talitonu i le Tama Faalelagi ma Iesu Keriso.
- Tausi i poloaiga.

O nei gaioiga e aoga mo tagata uma e te aoaoina, ae taua pe a aoaoina i latou e le iloa le faaKerisiano, ona atonu o nei tagata e le'i i ai so latou silafia i nei mea muamua.

O le tele o tagata liliu mai e lei i ai ni o latou silafia i le faaKerisiano, latou te faapea mai, latou te le'i malamalama tele i faamatalaga a faifeautalai, ae na latou lagonaina le Agaga ma sa latou mananao e faia mea na fai atu ai faifeautalai. E tatau ona e faia mea uma e mafai ona e faia, e fesoasoani ai i tagata sailiili ia malamalama i aoaoga faavae o le talalelei. Ia onosai ma ia lagolago ia i latou, aua e fai sina umi o se taimi mo tagata latou te iloa ai ma faamatala mai o latou lagona o loo i totonu. Atonu e tatau ona e suia le televave ma le loloto o au aoaoga ina ia fesoasoani ia i latou ia malamalama. A o e sauniuni e aoaoina i latou e le iloa le faaKerisiano, e ono mafai ona fesoasoani ia laasaga o loo i lalo:

- Ia saunia ni aotelega ma ni toe faamanatu faigofie mo lesona taitasi.
- Fai i ai latou te faamatala atu mea ua latou malamalama ai, ma mea na latou oo i ai.
- Faaalu se taimi e faamatalatala atu ai upu taua ma aoaoga faavae taua. Atonu e le masani i latou o loo e aoaoina i le tele o upu o le a e faaogaina pe a e aoao atu.
- Ia toe foi i tua i se lesona na aoaoina muamua, e toe faamalamalama lelei se aoaoga faavae. Atonu e talafeagai leni mea i soo se taimi o le faagasologa o le aoaoga.

Faamatalaga

Faataitaiga mai Tusitusiga Paia

O loo i ai i tusitusiga paia ni faataitaiga o faifeautalai na aoaoina i latou o e le'i talitonu i le Atua pe o i latou na le'i malamalama i Lona tulaga moni. Ia suesue i mau o loo i lalo, ona faamatala atu lea i lau soa pe tusi i totonu o lau tusi talaaga o suesuega le auala na fesoasoani ai nei faifeautalai i tagata ia maua se molimau, o loo i ai se Atua.

- Alema ma Amoleka (Alema 9–12; 15)
- Amona ma Arona (Alema 17–22)
- Alema (Alema 30)
- Alema ma isi (Alema 31–35)
- Paulo (Galuega 17:16–34)

Gaoioiga: Suesuega Faalesoa

Afai e mafai, ia faamatala atu e uiga i se tagata liliu mai o le e lei masani i le aganuu faaKerisiano, a e lei feiloai atu i faifeautalai. Ia fuafua ina ia feiloai atu ia te ia, ma fesili atu mo lona aafiaga e uiga i lona liliu mai. Mo se faataitaiga, atonu e te fesili atu pe o le a le mea na taitaiina atu ai o ia e talitonu i le Atua, o le taimi muamua sa ia tatalo ai, o le taimi muamua lava na ia lagonaina ai se tali i lana tatalo, o le matafaioi a tusitusiga paia i lona liua mai, ma pe na faapefea lona faatoa auai atu i sauniga i Aso Sa. Tusi ia mea na e aoaoina i lau tusi talaaga o suesuega.

Manatua Le Mea Lenei

- Pe a aoaoina tagata i le talalelei toefuataiina ma ola ai, o le a mafai ona taulimaina o latou manaoga.
- Ia fuafua ma suesue i aso uma ma lau soa ina ia tasi oulua ma aoao atu i le leo e tasi.
- Ia tuuina atu lau molimau i taimi uma.
- O tusitusiga paia, aemaise lava o le Tusi a Mamona, o au punavai autu ia mo au aoaoga.
- Tatalo mo le meaalofa e iloaitino ai pe o le a le taimi e faaoga ai ia tomai o loo faamatalaina i totonu o lenei mataupu.

Manatu mo le Suesuega ma le Faaogaina

Faamatalaga

Suesuega Faaletagata Lava Ia

- la mafaufau faapea ua e oo i se tulaga e pei ona ta'ua i lalo. E faapefea ona e faaogaina ia mataupu faavae ma tomai o loo i lenei mataupu e fesoasoani ai i nei tagata ia alualu i luma? Ia fuafua pe o le a faapefea ona e faaogaina ia tulaga taitasi.
 - A o oulua savalivali atu i le paka, ua lua vaaia se fafine ma se tamaitiiti o nofonofo mai na o i la'ua i se laulau. O loo tagi le fafine.
 - Ua oulua taunuu atu i le fale o tagata sailiili o e ua sauni e papatiso, ma ua latou ta'u atu ia te oulua, ua latou le toe fia feiloai ma oulua.
 - Ua outou feiloai mo le taimi lona fitu ma se tagata sailiili o le na aoaoina mo ni nai taimi e nisi faifeautalai muamua i se vaitaimi o le lua tausaga ua mavae. E itiiti lava ni faailoga pe afai na i ai, o lona alualu i luma.
 - Ua amata ona oulua aoaoina se aiga o le Ekalesia i se savali o le talalelei, ma ua latou faapea mai, "Ua uma tagata matou te iloa ona matou fai i ai ina ia talanoa atu i faifeautalai, ma ua latou fai mai uma lava e leai."
- Filifili se lesona se tasi a faifeautalai. Ia filifili ni fuaitau se tasi pe lua mai aoaoga faavae autu taitasi. Ia faataitai ona aoao atu mai na fuaitau e pei ona faailogaina i le vaega "Faaoga ia Tusitusiga Paia" o lenei mataupu.
- Mo ni nai vaiaso, ia toe faamanatu le aoaoga a le Faaola o loo i Evagelia a (Mataio, Mareko, Luka, Ioane) ma le 3 Nifae. Ia fai se lisi o fesili sa la fesili ai, i totonu o lau tusi talaaga o suesuega. Ia faatusatusa nei fesili i fesili e masani ona e fesiligia.
- Ia faitau le tala ia Amona ma le Tupu o Lamona e i le Alema 18 ma le tala ia Arona i le Alema 22:4–18. A o e faitau, ia saili ma faamatala pe na faapefea ona faia e Amona ma Arona ia [vaega o loo i lalo]:
 - Mulimuli i le Agaga ma aoao atu ma le alofa.
 - Amata ona aoao atu.
 - Fetuutuunai a la'ua aoaoga ina ia fetuai ma manaoga.
 - Tuuina atu molimau.
 - Faaogaina ia tusitusiga paia.
 - Tuuina atu fesili, faalogo, ma foia popolega.
 - Uunaia i latou na la aoaoina e faia ia tautinoga.
- la mafaufau loloto i faamatalaga nei mai ia Peresitene Harold B. Lee e faatatau i le aoao atu mo se malamalamaaga. Ia iloilo pe o le a le manino e te aoaoina atu ai aoaoga faavae o le talalelei. Tusi mea na e aoaoina i lau tusi talaaga o suesuega.

"Ia e tumau i le faamatalaga mai le mau, ma ia faapuupuu i ni upu e malamalama gofie" (*The Teachings of Harold B. Lee*, sel. Clyde J. Williams [1996], 444).

"O outou i le avefa ai ma ni faiaoga, e le o auina atu outou e aoao atu se aoaoga faavae fou. E tatau ona outou aoao atu aoaoga faavae tuai, ia lē matuā faigofie ia na ona latou malamalama ai, ae e tatau ona outou aoao atu ia aoaoga faavae o le Ekalesia ia matuai faigofie lelei ina ia leai se tasi e mafai ona lē malamalama ai" (*The Teachings of Harold B. Lee*, 458).

Aoaoga Faalesoa

- Toe faamanatu le ata faataatia o lau lesona mai se lesona e lei mamao atu ona e aoaoina. Ia tusi se fesili se tasi mo aoaoga faavae autu taitasi o loo faailogaina i

Faamatalaga

lau ata faataatia. Ona toe faamanatu lea o au fesili e iloa ai pe o tutusa ma mea o loo aoaoina i lenei mataupu. Ona sosoo ai lea ma le taliina o fesili taitasi, e pei o oe le tagata sailiili. Toe faamanatu au fesili pe a manaomia. la fetufaai atu au fesili i lau soa. la iloilo faatasi a oulua fesili.

la mafaufau i manaoga o se tagata sailiili o loo e aoaoina. la talanoa pe o le a faapefea ona ia taliina au fesili. la talanoaina foi pe mafai faapefea e nei fesili ona valaaulia le Agaga ma fesoasoani i le tagata sailiili e aoao i le talalelei.

- la mafaufau i au tagata sailiili fou uma. la talanoa pe o le a se mea e mafai ona e faia e fesoasoani ai ia avea i latou ma tagata sailiili alualu i luma. Tusi ou manatu i lau tusi talaaga o suesuega ma fai fuafuaga i lau lisi o fuafuaga mo aso taitasi.

Fonotaga Faaleitu ma Konafesi Faalesone

- la valaaulia ia tagata o le Ekalesia po o tagata sailiili o loo i ai nei i le tou fonotaga. la faamatala atu i le vaega, e te manao i faifeautalai ina ia faaleleia o latou tomai e fetufaai atu la latou savali taua. la filifili se lesona ma se tomai. la tuu atu i faifeautalai e aoao atu i tagata o le Ekalesia po o tagata sailiili ia le lesona ua e filifilia mo le 20 minute, ia taulai atu i le tomai ua e faailoa maia. la fesuia'i i latou pe a uma le 20 minute. A uma ona tuuina atu i faifeautalai le avanoa e aoao atu ai, ia toe faatasitasi mai le vaega ma tuu atu i tagata o le Ekalesia ma tagata sailiili e ta'u atu i faifeautalai ia vaega na sili ona latou lelei ai, ma se auala se tasi e mafai ona latou faaleleia.
- la faaali ni vitio o faataitaiga o faifeautalai o loo aoaoina pe faafesootaia foi ia tagata. la filifilia se tomai ma talanoaina faatasi o se vaega, pe o le a le lelei na faaoga ai e faifeautalai o loo i le vitio ia mataupu faavae mo lena tomai.
- la filifilia se tomai po o se vaega taua o se tomai, ma faailoa atu ia aoaoga faavae po o fuaitau o mau e lagolagoina ai lena tomai. la aoao atu le aoaoga faavae o le tomai i faifeautalai.

Peresitene o le Misiona

- la i ai faatasi ma faifeautalai i nisi taimi a o latou aoao atu. Tou te fuafuaina faatasi le ala e mafai ai ona e auai atu i le aoaoga.
- la uunaia ia taitai perisitua ina ia o faatasi ma faifeautalai i a latou asiasiga e fai ai lesona ma tuuina mai se lipoti.
- la faasino atu i ai le auala lelei e faaogaina ai mau, o fesili, ma le faalogo pe a aoaoina faifeautalai i konafesi faalesone ma faatalanoaga.



E faapefea Ona Ou Fesoasoani i Tagata E Faia ma Tausia Tautinoga?

Manatunatu i le Mea Lenei

- Aisea e tatau ai ona ou taulai atu i le valaaulia o tagata e fai tautinoga?
- E fesootei faapefea tautinoga ma le liuaina?
- E mafai faapefea ona ou tuuina atu se molimau lotomaulalo?
- O a faamanuiaga e mafai ona ou folafola atu?
- Aisea e taua ai ia te a'u ona toe siaki pe a fai e tagata ni tautinoga?

Tuuina Atu le Valaaulia mo Tautinoga

Ole avea o oe ma se faifeautalai e te manao ai i le faaolataga o agaga (tagai i le Mosaea 28:3). Ua e iloa e mafai ona o mai tagata ia Keriso ma faolaina, i le na o tuutuuga o le salamo (tagai i le MFF 18:10–16). E tasi le auala e mafai ona faataunuaina ai ou manaoga, o le alagaina lea o le salamo (tagai i le Alema 5:49; MFF 15:6; 16:6) ma valaaulia ma le lototele ia tagata ina ia faaoga le faatuatua e oo i le salamo, ina ia papatisoina i le vai ma le Agaga, ma ia tumau faamaoni seia oo i le iuga (tagai i le 3 Nifae 27:16–20; Mamona 7:10).

O le tautinoga o se vaega taua o le salamo. O le aga o le uuna'ia o se tasi i se faiga o ni faatinoga, ona mulimuli ai lea ma le maelega i lena faaiuga. A tautino atu ma le faamaoni ia tagata, ua i ai lo latou faamoemoega moni, o lona uiga ua latou matuai mananao atoa e faia le mea ua latou tautino atu e fai. Ua latou faia se faaiuga mausali ma faamaoni e sui. Ua oo

Faamatalaga

Faamatalaga

ina latou faamaoni ia Keriso ma tuuina atu atoa i latou lava i Lana talalelei. O le tausia o a latou tautinoga o le ala lea latou te “faaali mai ai ma le faamaoni i a latou galuega ua latou maua le Agaga o Keriso i le faamagaloina o a latou agasala” (MFF 20:37). Pe a e fesili atu mo tautinoga o se vaega o lau aoaoga, ua e valaaulia le tagata sailiili ina ia salamo.

O se tasi o auala e sili ona lelei e fesoasoani ai i tagata e faia ma tausia tautinoga, o le tuuina atu lea o le valaaulia mo tautinoga. O le tuuina atu ma le siakiina o valaaulia mo tautinoga e taua ona:

- E liua tagata pe a latou ola i mataupu faavae latou te aoaoina (tagai i le Ioane 7:17) ma lagonaina le faamautinoa atu e le Agaga, o le mea o loo latou faia e fiafia i ai lo latou Tama Faalelagi.
- O le salamo ma le suia o le a fesoasoani i tagata e faatoilaloina ai luitau, aveese mai ai i latou mai le maasiasi ma le ta’usalaina, ma iloa ai le filemu ma le olioli o le faamagaloga a le Atua.
- O le tausia o tautinoga e saunia ai tagata e osia ma tausii feagaiga paia.



© 2001 Simon Dewey, Aua nei! Kopina.

E mafai ona faaali atu lou alofa mo tagata ma lou faatuatua i folafolaga a le Atua, e ala i le toe siaki ina ia fesoasoani ia i latou ia salamo ma tausia a latou tautinoga.

O tautinoga e manaomia mo le papatisoga o loo lisi atu i lesona muamua e fa. O tautinoga e faatatau i le alualu i luma faaleagaga pe a uma ona papatiso ma faamau, o loo lisi atu i le lesona 5. Ia iloa e le aunoa le manaomia ona valaaulia ia tagata e faia mea o le a faapea ona faamalolosia ai o latou faatuatua ia Keriso. Ia manatua aoaoga faavae nei:

- Soo se avanoa lava e saili ai—faatasi ma tagata o le ekalesia, o igoa na faailoa mai, pe faafesootai e le tagata lava ia—e tataua lava ona tau atu ai i se valaaulia, e masani lava ina ia aoao atili e uiga i le savali o le Toefuataiga.
- E seāseā lava, pe afai e i ai, ona e talanoa atu i tagata pe aoaoina i latou e aunoa ma le tuuina atu o se valaaulia ina ia faia se mea o le a faamalolosia ai lo latou faatuatua ia Keriso.
- Ia taulai atu i se tautinoga se tasi pe sili atu foi pe a e aoao atu. Afai e te le valaauliaina tagata e faia nei tautinoga, e te le o talosagaina i latou ina ia salamo ma o mai ia Keriso.
- A o e sauniuni i suesuega faalesoa e aoao atu se lesona, ia mafaufau i manaoga ma tulaga o tagata sailiili taitasi, ma ia aofia ai se tautinoga se tasi pe sili atu i le ata faataatia o lau lesona.
- I le taimi o se lesona, atonu e musuia oe e tuuina atu se valaaulia mo tautinoga nai lo mea na e fuafuaina. Ia valaaulia i taimi uma ia tagata ina ia salamo.
- Ia lototele ma ia toa a’o e valaaulia tagata e faia ia tautinoga (tagai i le Alema 38:12). O le lototele e faaalia ai lou faatuatua o le ususitai i poloaiga a le Alii, e aumaia ai faamanuiaga.
- Atonu o le a le mafai lava ona suia ia tagata seiloga e te valaaulia i latou ina ia sui.

Mau Suesueina

Aisea lava e taua ai le tuuina atu o valaaulia?

Alema 5:62

Moronae 7:13

Aisea ua taua tele ai ia tautinoga?

2 Nifae 31

Alema 7:14–16

MFF 20:37

Mosaea 2:41

MFF 14:7

Ioane 7:17

Alema 32:27

Faamatalaga

Fesili i Fesili Tuusao

O le valaaulia mo se tautinoga e masani ona faaaoga ai le fesili “o le a e”, lea e manaomia ai se tali *ioe* po o le *leai*. O valaaulia e tatau ona patino, tuusao, ma manino. Latou te valaaulia pe taitaiina atu ai tagata i se ala o le faatinoga. E manaomia ai lo latou faia o se tautinoga ma faaaoga ai le faatuatua ola i mataupu faavae na e aoao atu ia i latou.

O loo i lalo nisi o faataitaiga o valaaulia lelei, sosoo ai ma le amataga o se folafolaga ma se molimau:

- O le a e faitau la i le [3 Nifae 11, Moronae 10:3–5, lenei tamaitusi] ae lei oo i la tatou feiloaiga a taeao i le 7:00 i le afiafi? Ou te iloa o le faia o lea mea o le a . . . ou te molimau atu o le Tusi a Mamona e . . .
- O le a e tatalo la ma fesili atu i le Atua pe o Iosefa Samita o se perofeta? Ou te iloa a e tatalo i le Atua o le a . . . ou te iloa o Iosefa Samita o se perofeta . . .
- O le a tatou o la i le lotu i le Aso Sa nei i le 9:00 i le taeao? Afai e te alu, o le a e . . . ou te iloa ua toefuataiina mai le Ekalesia a Keriso . . .
- O le a amata la ona e ola i le tulafono o le legavia e pei ona ma faamatalaina atu? O le ola ai i lenei tulafono o le a . . . I le avea ai ma se auaua a le Alii, ou te molimau atu o le ola i se olaga mama . . .
- O le a e valaauliaina la [igoa] ae lei oo i le Aso Faraile, ina ia tatou feiloai ma amata ona aoao e uiga i le talalelei? O le a fesoasoani le Agaga ia te oe . . . O le fetufaai atu o le talalelei o le a faamanuiaina ai lou olaga . . .
- E mafai la ona ma o atu i lou fale ma faamatala atili atu ia te oe e uiga i le valaauina e le Atua o se perofeta i o tatou aso nei, e pei ona Ia faia i aso anamua? O le a oo atu ni faamoemoega, taitaiga ma le filemu tele i lou olaga a o e malamalama . . . Ou te molimau atu ua toe tofia foi e le Atua . . .

Faamatalaga

Gaoioiga: Suesuega Faaletagata Lava Ia pe Faalesoa

Tusi i lau tusi talaaga o suesuega ia se valaaulia e faigofie, tuusao ma manino mo tautinoga taitasi i totonu o se lesone. Afai na e faia muamua le gaoioiga lenei, ia toe fai ma faatusatusa au valaaulia fou i valaaulia muamua. Ia fesili ifo ia te oe lava pe ua faaleleia lou tomai i le tuuina atu o valaaulia.

Ia toe faamanatu faatasi ma lau soa ia valaaulia ua e tusia. Mo valaaulia taitasi, ia talanoaina ia fesili nei:

- Pe o ou faamatala atu ea ia faamanuiaga folafolaina a le Alii a o ou tuuina atu ia valaaulia? Afai e leai, aisea?
- Pe o ou taumafai ea e aloese mai le tuuina atu o lenei valaaulia? Afai o lea, aisea?
- Pe o ou lagonaina ea le matamuli pe a ou tuuina atu lenei valaaulia? E mafai faapefea ona ou faaleleia?
- O le a le taua o lenei valaaulia ia te au lava ia?
- E faafia ona ou manatua e toe siaki ia valaaulia na ou tuuina atu? E mafai faapefea ona ou faaleleia?

Mafaufau i tagata sailiili ma tagata o le Ekalesia lē toaaga e te iloina, ma faataitai ona tuuina atu nei valaaulia e faapei o loo e fai atu i nei tagata taitoatasi.

Afai e tatau ai, ia toe faamanatu ia valaaulia i le ata faataatia o lau lesone. Ia seti ni sini patino o le a fesoasoani ia te oe e tuuina atu ai ia valaaulia i le aso ma le vaiaso atoa.

Folafola Atu Faamanuiaga i Tagata

E manaomia e tagata se mafuaaga e suia ai o latou mafaufau ma amioga. O faamanuiaga folafolaina e masani ona tuuina atu ai se uunaiga mamana ina ia usitai i le Atua. Pe a tuuina mai e le Alii se poloaiga, e masani lava ona Ia folafola mai ai ni faamanuiaga mo le tausia o lenei poloaiga (tagai i le MFF 130:20–21). A o e saunia tagata e usitai i se poloaiga patino, ia aoao atu ia i latou e faapea:

- O le ola ai i poloaiga e faaalua ai le alofa mo le Atua ma Lona Alo.
- Latou te faaalua ai lo latou faatuatuaaina o le Atua a o latou usitai i Ana poloaiga.
- O le tau, o le a latou maua ia faamanuiaga ua Ia folafola mai.

A o e molimau atu e uiga i se poloaiga, ia talanoa e uiga i faamanuiaga ua e maua mai le ola ai i lenei poloaiga. Ia folafola atu ia i latou o loo e aoaoina, e mafai foi ona latou olioli i faamanuiaga faapena.

A o taumafai tagata e tausia se tautinoga, ia talosagaina i latou e talanoa e uiga i faamanuiaga ua tuuina mai e le Tama Faalelagi ia i latou. Ia faamautinoa atu ia i latou e ui lava i faigata o le a oo atu i o latou olaga, ae o le a faaauuina pea Ana faamanuiaga pe a latou usitai i Lona finagalo.

Mau Suesueina**O le a le fetalaiga a le Alii e uiga i Lona naunau e faamanuia i tatou?**

Alema 37:17

MFF 1:37

MFF 76:5–10

Gaoioiga: Suesuega Faaletagata Lava Ia

Faitau le Mataupu Faavae ma Feagaiga 82:10 ma le 130:20–21. Ona suesue lea o mau o loo i lalo. Ia vase ni koluma se lua i lau tusi talaaga o suesuega. I le isi itu, tusi ai le poloaiga e te maua i fuaitau taitasi. O le isi itu, tusi ai folafolaga mo le tausia o le poloaiga.

MFF 11:21

MFF 89:18–21

MFF 100:5–8

MFF 84:85

MFF 95:8–9

Malaki 3:10–12

Ia toe faamanatu ia tautinoga o loo lisi atu i se tasi o lesona a faifeautalai [i le mataupu e 3]. Mo tautinoga taitasi, ia tali fesili nei:

- O a faamanuiaga na folafola mai e le Alii ia i latou o e tausia lenei tautinoga?
- E faapefea ona fesoasoani le usitai i lenei mataupu faavae e maua ai e tagata le faatuatua ma ni molimau?
- E faapefea ona fesoasoani lenei tautinoga i tagata e salamo ai ma atili vave ai ona lagonaina le Agaga?

Ia Fai Soo Atu [Lau] Molimau

O se tautinoga o se molimau faaleagaga ma se faamautinoaga e tuuina mai e le Agaga Paia. O le molimau atu, o le tuuina atu lea o se tautinoga tuusa’o faigofie o le talitonuga—o se lagona, se faamautinoaga, se talitonuga maumaututu i le moni o le talalelei. O le faasoaina atu o lau molimau e masani lava o se tasi lea o auala mamana e valaaulia ai le Agaga ma fesoasoani ai i isi ia lagonaina le Agaga. E faaopoopo atu ai se molimau i le taimi nei, a oe lava ia, i upumoni na e aoao atu mai tusitusiga paia. O se faifeautalai mataala, e aoao atu, molimau atu, ma valaaulia isi e faia mea e fausia ai le faatuatua ia Iesu Keriso. O lenei mea e aofia ai le faia o folafolaga lea e oo mai ona o le ola ai i mataupu faavae moni. Mo se faataitaiga, atonu e faapea atu se faifeautalai, “Ou te iloa a e tausia le Aso Sapati ia paia, o le a faateleina le filemu i lou loto.”

Ina ia maua e lau molimau se mana faatalitonuina, e tatau ona e faamaoni. O le molimau mamana e le faalagolago i le lelei o upu pe o lou leotele, ae o le talitonuga maumaututu o lou loto. Ia taumafai i aso taitasi e faamalosi lou malamalamaaga ma talitonuga i aoaoga ma mataupu faavae e te aoaoina atu. Ia fai soo atu lau molimau e faamautuina ai le moni o mataupu po o aoaoga o loo e aoaoina atu. I le tele e mafai ai, ia e aoao atu, ona molimau atu ai lea, ma molimau atu a o e aoao atu.

“E faatatau i le molimau a se tasi. Ia manatua, o le tagata e naunau e faasoa atu [lana molimau], na te teuina, ae o le na te teuina ma lona manatu faapito, e aveesea ai. . . . Aoao atu ma molimau atu. E leai lava se isi faatulagaga e sili atu.”

– ELDER THOMAS S. MONSON
PATHWAYS TO PERFECTION [1973], 100–101

Faamatalaga

O lau molimau e mafai ona faigofie e pei o le “o Iesu Keriso o le Alo o le Atua” po o le “Ua ou iloa mo au lava e moni le Tusi a Mamona.” E mafai foi ona e faamatala faapuupuu atu se mea na tupu e uiga i le ala na e maua ai lenei malamalama. Ia tuuina atu soo lau molimau i lesona taitasi, ae le na o le faaiuga. Ia molimau atu o mea na aoao atu e lau soa e mai le Atua ia. Ia molimau atu o le mataupu faavae o le a e aoaoina atu o le a faamanuiaina ai olaga o tagata sailiili pe a latou mulimuli ai. Ia talanoa i le auala ua faamanuiaina ai lou olaga ona o le ola ai i se mataupu faavae.



Atonu o nisi taimi e fesiligia ai ma le atamai e tagata mea o loo e aoaoina atu, ae e faigata tele ona fesiligia se molimau faamaoni mai le loto. Pe a e molimau atu, ia tatalo ina ia mafai ona lagona e i latou o loo e aoaoina ia le molimau faamautinoa a le Agaga Paia. Pe a e molimau atu, ua e fesoasoani e faia se siosiomaga mo tagata sailiili e lagonaina ai le Agaga Paia, o faamaonia lau molimau e uiga i le upumoni. O lenei mea e saunia ai i latou e talia ia tautinoga o le a e tuuina atu.

O Polika Iaga e lei papatiso i totonu O Le Ekalesia a Iesu Keriso o le Au Paia o Aso e Gata Ai, i le tausaga muamua sa ia aoao ai e uiga i le talalelei toefuataiina. Ae o lona liliu mai sa ia faapea mai ai: “Afai o taleni uma, tomai, poto, ma tulaga mataalia o le lalolagi na aumai ia te au faatasi ma le Tusi a Mamona, ma ua tautino mai ai, i faaupuga e aupito sili ona maua i le lalolagi, o lona moni, o taumafaiga ina ia faamaonia e ala i le aoaoina ma le atamai faalelalolagi, ia te au lava ia, e peisea o se asu e alu a’e ma mou atu ai. Ae ina ua ou vaaia se alii e lē mau upu pe talenia foi i le faiva faafailauga, o lē sa na o le pau le mea sa mafai ona fai atu ai, ‘Ou te iloa e ala i le mana o le Agaga Paia, e moni le Tusi a Mamona, o Iosefa Samita o se Perofeta a le Alii,’ o le Agaga Paia na aumaia e lena tagata na faasusuluina ai lo’u malamalama, ma sa i o’u luma le susulu, mamalu, ma le tino ola pea. Sa siomia ai a’u, ma sa faatumulia ai foi a’u, ma na ou iloa ai mo a’u lava, e moni le molimau a le tagata” (in *Journal of Discourses*, 1:90).

Gaoioiga: Suesuega Faaletagata Lava Ia

O fuaitau o loo i lalo o ni faataitaiga o le tuuina atu o se molimau. Ia faitau ia fesili ma mau taitasi. Tusi au tali i lau tusi talaaga o suesuega.

- I nei fuaiupu, o le a le mea o loo molimau mai ai aposetolo ma perofeta?
- O le a le malosi o lo latou talitonu i mea o loo latou fai mai ai? E faapefea ona e iloa ua latou mautinoa ua moni?
- Pe a e fai atu, “Ou te iloa _____ e moni,” o le a le uiga o lau faamatalaga? O a nisi upu e mafai ona e faaogaina e faailoa atu ai lou mautinoa?

Iakopo 7:7–12

MFF 76:22–24

Galuega 2:14–38

Alema 5:45–48

Ioane 3:3–11

Galuega 10:34–44

Alema 34:1, 8

Mau Suesueina

O a nisi o mataupu faavae ma folafolaga o le tuuina atu o se molimau?

2 Nifae 33:1

MFF 84:61

Ioane 15:26

MFF 62:3

MFF 100:5–8

Faamatalaga

Toe Siaki

O le tuuina atu o se valaaulia e aunoa ma le toe siakiina, ua pei lava o le amataina o se malaga ae le faaiuina, po o le faatauina foi o se pepa ulufale i se konaseti e aunoa ma le alu i totonu o le fale matamata. A aunoa ma le gaoioiga faaiu, e leai se aoga o le tautinoga.

E mafai ona faigata ia suiga. O lau matafaioi o le fesoasoani lea e faamalosia ia tagata i a latou faaiuga e sui. E tatau ona e faia mea uma e te mafaia e fesoasoani ai i tagata e tausia a latou tautinoga.

O le salamo moni e sili ona faaalua i faatinoga amiotonu mo se taimi umi, aemaise lava i poloaiga e pei o le legavia, o le Upu o le Poto, ma le sefuluai. A o outou galulue faatasi ma taitai perisitua ma tagata ina ia fesoasoani ia latou tausia a latou tautinoga, ia faaalua le loto malamalama. Ia onosai ae ia faatauinau pea. E le i uma lau galuega seiloga e tausia e tagata nei tautinoga, po o se isi faaupuga, seiloga latou te salamo (tagai i le 3 Nifae 18:32). O nisi taimi e talafeagai ai ni nai asiasiga ina ia mafai ona e fesoasoani atu i tagata e atiina ae ni faatuatua malolosi i se mataupu faavae e taitaiina atu ai i le salamo.

O le toe siakiina e amata i le taimi muamua lava e te asiasi atu ai ma aoaoina tagata:

- Tuu atu ia i latou e tusi a latou tautinoga i luga o se mea na e tuua mo i latou, e pei o se tamaitusi po o le kata o loo i ai o oulua igoa ma le numera o le telefoni.
- Ia mautinoa e iloa e tagata o le a e faia i aso taitasi ni asiasiga pupuu i le va o aso faatulagaina mo le aoaoina atu [o lesona]. Ia faamalamalama i ai o lou faamoemoega o le lagolagoina o i latou ma fesoasoani atu i ai. Avatu i ai se manatu i le mea o le a e faia i le taimi o na asiasiga.
- Ia tusia ni faamatalaga faapitoa i le vaega o Faamatalaga/Lisi O Mea e Fai o lau fuafuaga e toe siaki a taeao valaaulia uma mo tautinoga na e tuuina atu i le aso.

Ia fai soo ni fesoataiga, i aso taitasi pe a mafai, e iloa ai pe o a mai le alualu i luma o tagata i a latou tautinoga, tali ni fesili, aoao atu ni lesona faaopoopo, faitau faatasi mai le Tusi a Mamona, fetufaai atu ni mau, pe faaoga ia tusi ma ata po o lipine faalogologo. A e asiasi soo atu i tagata, o le a e faamalosia ai lagona faaleagaga latou te maua a o e aoao atu ia i latou le savali o le Toefuataiga o le talalelei a Iesu Keriso. E taua tele lenei faatosinaga a le Agaga. Atonu e i ai taimi e te faafesoota'ia ai tagata sailiili ma uunaia i latou e tausia se tautinoga.

Fesoasoani i tagata sailiili e faailoa mai faamanuiaga ua latou maua ina ua latou tausia a latou tautinoga. Ae ia faapitoa ona e fesoasoani atu ia i latou e faamatala o latou lagona e pei ona molimau atu ai le Agaga i le moni o le savali.

Ia faamalo atu ma faamalosia i tagata ua faamanuiaina i le tausia o tautinoga. Ua suia olaga o tagata sailiili. E tele ni mea e ao ona latou aoaoina ma faia. Ia viia soo ma le agaga faamaoni i latou. Faailoa atu lou agaga faafetai mo lo latou alualu i luma ma lou mautinoa e mafai ona faamanuiaina i latou. Ia faamalosia atu ia i latou i soo se taimi tou te faatasi ai.

Ia faailoa atu le popolega ma le faanoanoa pe a le tausia e tagata a latou tautinoga ma le mafai ai ona iloa ia faamanuiaga.

Faamatalaga

Gaoioiga: Suesuega Faaletagata Lava Ia pe Faalesoa

Tusi i lau lisi o fuafuaga i aso taitasi, au fuafuaga mo le faafesootaiga o tagata sailiili i aso taitasi. Ia fuafua mamao ni nai aso po o le a se mea e te faia e toe siaki ai ia tagata sailiili.

Ia filifili se valaaulia se tasi mo le tautinoga o le a e tuuina atu pe a e aoaoina atu ia lesona. Ona vaai lea pe o a popolega eseese e ono taofia mai ai se tasi mai le taliaina po o le tausia foi o lena tautinoga. Ia talanoaina ma faataitai pe mafai faapefea ona e fesoasoani lelei i tagata a o latou galulue e foia o latou popolega.

Manatua Le Mea Lenei

- Ia taulai atu i le valaauliaina o tagata e faia tautinoga i soo se tulaga lava e maua ai pe aoaoina ai, i latou e le o ni tagata o le Ekalesia ma tagata foi o le ekalesia.
- Ia tuuina atu le valaaulia mo tautinoga ina ia fesoasoani i tagata ia iloa le liuaina.
- Folafofa atu ni faamanuiaga.
- Tuu atu le molimau.
- Ia toe siaki ina ia fesoasoani i tagata e tausia tautinoga.

Manatu mo Suesuega ma le Faaogaina

Faamatalaga

Suesuega Faaletagata Lava Ia

- Vaai se poloaiga o loo lisi atu i le lesona e 4 po o le 5 foi. Mafaufau i faamanuiaga ua e maua mai i le usitaia o lenei poloaiga, ma tusi i totonu o lau tusi talaaga o sueduega.
- Ia fesili atu i tagata o lou aiga i se tusi e tusi, pe na faapefea ona faamanuiaina i latou e ala i le usitaia o se poloaiga patino (mo se faataitaiga, o le sefuluai).
- Tusi i lalo ou lagona e uiga i le tuuina atu o ni tautinoga. E te lototele pe palaai? E te mautinoa o le a manuia ia tagata, pe o i ai ni ou masalosaloga? E te tumau, onosai, ma loto fesoasoani a o e faia ia fesoootaiga i aso uma? O iloa e tagata e te alofa ia i latou? E faapefea ona e faasa'oina soo se vaivaiga ua e iloa i au valaaulia?
- Ia toe iloilo ia ata faataatia o au lesona mo lesona taitasi. Pe o e tuu i ai ma ni tautinoga patino? Pe o taitai tonu oe e le ata faataatia o lau lesona i tautinoga?

Suesuega Faalesoa

- Mai lau lisi o fuafuaga o aso taitasi, ia fai se lisi o tagata na e faafesootaia i aso e lua ua mavae, e aofia ai tagata sailiili ma tagata o le ekalesia. Mo tagata taitasi, ia tusi ia tautinoga ua latou faia ma isi valaaulia e mafai pe sa tatau ona e tuuina atu. Ia talanoaina pe aisea na mafai ai ona e maua mai ni tautinoga mai nisi o nei tagata, ma pe o le a se mea na taofia mai oe mai le mauaina o ni tautinoga mai isi. O le a se mea e te faia e toe siaki ai nei tautinoga?
- Vaai i lau lisi o fuafuaga o aso taitasi, ma tusi ia igoa o ni tagata sailiili patino o le a e aoaoina i le isi aso pe lua e sosoo ai. Ia vaai po o le fea poloaiga o loo lisi i le lesona 4 ma le 5 o le a e valaaulia i latou e ola ai. Ia talanoaina pe faapefea ona e tuuina atu le tautinoga ma faamanuiaga faapitoa o le a e folafolaina atu mo le ususitai.
- Ia manatu e faaali atu le Faamaumauga o Aoaoga i tagata sailiili ina ia latou iloa ai le mea o le a faamoemoeina mai ai. Afai e talafeagai, ia tuuina atu se kopi [o le Faamaumauga o Aoaoga] mo i latou.
- Ia toe faamanatu ia Faamatalaga/Lisi o Mea e Fai o loo i lau fuafuaga mo aso e tolu ua mavae e vaai ai pe ua e tusia au galuega faatino e toe siaki ia valaaulia uma na e tuuina atu.

Fonotaga Faaleitu ma Konafesi Faalesone

- Ia talanoaina ia manatu lelei ma manatu fou mo faafesootaiga i aso taitasi ma tagata sailiili. Na faapefea ona galulue lelei faifeautalai ma tagata o le ekalesia? O a tusi po o vitio ma lipine faalogologo e aoga? O a ni mea e mafai ona e faia pe a le o i ai tagata i o latou aiga, pe ua pisi tele foi ua le mafai ai ona outou feiloai?
- Ia talanoaina ia auala na lelei ai le aoaoina e faifeautalai o poloaiga o loo i le lesona 4 ma le 5.
- Ia talanoaina ia ni popolega patino o nisi o tagata sailiili o loo i ai nei. O le a le natura o na popolega? O le a se mea e mafai ona faia e faifeautalai e foia ai na popolega?

Peresitene o le Misiona

- Ia i ai faatasi ma faifeautalai mai lea taimi i lea taimi a o latou aoao atu. Fesoasoani ia latou taulai atu i le fesoasoani i tagata e faia ma tausia tautinoga.
- Ia uunaia taitai perisitua ma tagata o le Ekalesia ina ia auai malosi i le faia o fesoootaiga i aso taitasi ma tagata sailiili.
- Ia fai ma faataitaiga i le tuuina atu o valaaulia i au taumafaiga faafaifeautalai faapea ma faifeautalai o loo outou galulue.



E Faapefea ona Ou Saunia Tagata mo le Papatisoga ma le Faamauga?

Faamatalaga

Manatunatu i le Mea Lenei

- O le a le mea e tatau ona ou faia, e fesoasoani ai e saunia tagata mo le papatisoga ma le faamauga?
- E faapefea ona ou faia se faatalanoaga lelei mo le papatisoga?
- E faapefea ona fuafua ma ta'ita'i se sauniga faaleagaga o le papatisoga?
- E faapefea ona ma galulue vavalalata ma le epikopo ina ia mautinoa ai ua faamauina tagata liliu mai?
- Aisea e taua ai le faatumuina ia mae'a faamauga o papatisoga ma faamauga?

Ia Saunia Tagata mo Papatisoga ma Faamauga

Ole faamoemoega o lou aoao atu, o lou fesoasoani lea i isi e atiina ae le faatuatua ia Iesu Keriso ma salamo i a latou agasala. E pei ona aoao mai e Mamona, “o le faapolopolo o le salamo o le papatisoga lea” (Moronae 8:25). O le faatalanoaga mo le papatisoga, o le auala lea ua faavaeina e le Ekalesia, e faamautinoa ai ua ausia e tagata taitoatasi tulaga faatonuina a le Alii mo le papatisoga, ma ua saunia mo le mauaina o le meaalofo o le Agaga Paia. O le faatalanoaga lenei, e faataunuu ai e tagata papatiso le tulaga manaomia ua ta'ua i tusitusiga paia, latou te molimauina i luma o se sui faamaonia o le Ekalesia, ua latou “salamo faamaoni lava i a latou agasala uma” (MFF 20:37). O tautinoga e faia e

Faamatalaga

tagata sailiili e saunia ai i latou e osia ma tausia feagaiga o le papatisoga. O tagata ua tausia tautinoga sa e valaaulia i latou e fai, o le a saunia lelei mo le faatalanoaga ma le avea ai ma tagata toaaga o le Ekalesia.

A o e aoaoina tagata sailiili ma saunia i latou mo le papatisoga ma faamauga, ia mautinoa ua latou ausia tulaga manaomia mo le papatisoga.

Tulaga Manaomia mo le Papatisoga

Mataupu Faavae ma Feagaiga 20:37:

- la faamaulalo i latou lava i luma o le Atua.
- la mananao e papatiso.
- la faaalua loto momomo ma agaga ua salamo.
- la salamo mai a latou agasala uma.
- la naunau e tauave i o latou luga le suafa o Keriso.
- la i ai se naunauta'iga e auauna ia Keriso seia oo i le iuga.
- la faaalua ia latou galuega ua latou mauaina le Agaga o Keriso i le faamagaloina o a latou agasala.

Au Peresitene Sili ma le Korama a le Toasefululua:

- Faia ia lava suiga i o latou olaga ina ia agavaa ai e pei ona poloaiina ai i le Mataupu Faavae ma Feagaiga 20:37.
- la atiina ae le faatuatua ia Keriso.
- la salamo mai soligatulafono.
- Ola i mataupu faavae o le legavia.
- Ola i le Upu o le Poto.
- Tautino atu e totogi sefuluai
- la maua uma lesona a faifeautalai [lesona 1–4 o i le Faamauga o Aoaoga ma tautinoga e o faatasi ai.]
- Feiloai ma le epikopo po o le peresitene o le paranesi.
- Auai i ni sauniga faamanatuga eseese.

(“Faamatalaga i le Galuega Faafaifeautalai,” tusi a le Au Peresitene Sili, 11 Tes. 2002)

A uma ona seti e se tagata sailiili se aso mautinoa mo le papatisoga, ia faatulaga loa po o afea e faamae'a uma ai ia gaoioiga uma seia oo atu i le papatisoga ma le faamauga e pei ona lisiina i lau fuafuaga o le aso. Ia toe faamanatu ma le totoia ia Faamauga o Aoaoga, ina ia mautinoa ai ua e aoaoina atu ia aoaoga faavae autu ma ua saunia ia tagata e taliina ia fesili taitasi i le faatalanoaga mo le papatisoga. Ia toe faamanatu faatasi ma le tagata lenei faasologa i le isi a oulua feiloaiga. Afai e mafai, e tatau ona auai atu le tagata i se sauniga papatisoga a o lei oo i lona lava papatisoga.

Afai e te lagona e manaomia e le tagata o loo e aoaoina isi sauniuniga faaopoopo, aua nei faatulagaina se faatalanoaga seia oo ina ausia e le tagata sailiili ia tulaga faatonuina. Afai o le tagata o se tamaitiiti laitiiti, ia mautinoa ua tuuina atu e matua po o le tagata o loo tausia, ia se faatagaga tusitusia pe a mafai, ina ia papatisoina o ia.

A o e fesoasoani i tagata e saunia mo o latou faatalanoaga mo le papatisoga, ia talanoa ia i latou e uiga i le faamoemoega o le faatalanoaga. Ia aoao atu i latou ma tuuina atu le molimau e uiga i le paia o le papatisoga ma le mauaina o le meaalofo o le Agaga Paia.

Ia faamatala atu e te manao ia mautinoa ua latou malamalama i mataupu faavae sa e aoaoina atu ma le feagaiga o le a latou faia. Ia faamatala atu foi o le faatalanoaga o se avanoa lea mo i latou e molimau atu ai i luma o sui o le Alii ua latou saunia mo nei sauniga paia. A latou tausia ia feagaiga na faia i le papatisoga ma le faamauga, o le a latou maua foi le faamagaloga o agasala. Ia ta'u atu i ai fesili o le a fesiligia e le tagata fai faatalanoaga, e uiga i o latou talitonuga i aoaoga faavae taua, o lo latou salamo i agasala ua mavae, ma lo latou naunautai e osi feagaiga e usitai ia Iesu Keriso i o latou olaga atoa. Ia faamamafa atu o le papatiso e ala i le vai e le atoatoa pe a aunoa ma le faamauga ma le meaalofo o le Agaga Paia.

Gaoioiga: Suesuega Faaletagata Lava la pe Faalesoa

- Ia faitau mau taitasi o le savali o loo i lalo, ma ia fai se lisi e aofia uma ai tulaga e agavaa ai mai tusitusiga paia mo le papatisoga ma le faamauga.

2 Nifae 9:23; 31:4–13	3 Nifae 27:13–21	MFF 20:37
Mosaea 18:8–10	Moronae 6:1–4	MFF 22
Alema 7:14–15	Moronae 8:25–26	Galuega 2:37–39

- I faatalanoaga mo le papatisoga, e fesiligia tagata pe ua latou loto ina ave i o latou luga le suafa o Keriso. O le a se mea e mafai ona e faia e fesoasoani ai ia latou malamalama i lenei fesili? A o e mafaufau loloto i lenei fesili, ia suesue i mau nei:

Mosaea 4–5	Mosaea 26:18, 21–27	3 Nifae 27:1–10
Mosaea 18:1–11		

Atonu e te manao foi e vaavaai mo isi fuaitau e fesoasoani e te malamalama ai i lenei mataupu faavae.

Auala e fai ai le Faatalanoaga

O le tagata e faia le faatalanoaga e tatau ona faaoga ia fesili o le faatalanoaga mo le papatisoga, faatasi ai ma le taitaiga a le Agaga e iloa ai pe ua ausia e le tagata ia tulaga e agavaa ai e pei ona faamatalaina i le Mataupu Faavae ma Feagaiga 20:37. E tatau foi ona ia fetuutuunaia ia fesili e tusa ai ma tausaga ma le matua o le tagata.

Afai e le agavaa se tagata e tusa ai ma fesili o le faatalanoaga mo le papatisoga, e tatau ona tolopo le papatisoga ma le faamauga. E tatau i le tagata sailiili ona maua nisi aoaoga faapoopo mai faifeautalai faamisiona ma le faaumea mai i tagata o le uarota.

O le taitai itu po o le taitai sone o lē na te faia le faatalanoaga e tatau ona:

- Faia le faatalanoaga i se nofoaga lelei ma leai se mea e faalavelave ai, e fesoasoani e lagonaina ai le Agaga o le Alii. E tatau ona latalata atu i ai le soa a le faifeautalai o loo faia le faatalanoaga.
- Amata i se tatalo.
- Fesoasoani i le tagata ina ia lagona le toa.
- Avea le faatalanoaga o se aafiaga faaleagaga e faagaetia ai.
- Mautinoa e malamalama le tagata i le faamoemoega o le faatalanoaga.
- Fai atu i ai fesili o le faatalanoaga mo le papatisoga. Faaoga fesili e toe siaki ai ina ia lagonaina ai le malosi o le molimau a le tagata ma le faamaoni o lona salamo.
- Tali atu i fesili a le tagata.

Faamatalaga

- Valaaulia le tagata e tuuina mai lana molimau ma faamatala mai ona lagona.
- Afai e i ai ni luitau o le tagata e faatatau i le molimau po o le agavaa, ia faamalamalama atu e sili ai le tolopo o le papatisoga seia saunia lelei o ia.

Fesili o le Faatalanoaga mo le Papatisoga

1. E te talitonu o le Atua o lo tatou Tama Faavavau? Pe e te talitonu o Iesu Keriso o le Alo o le Atua, o le Faaola ma le Togiola o le lalolagi?
2. E te talitonu o le Ekalesia ma le talalelei a Iesu Keriso ua toefuataiina mai e ala mai i le Perofeta o Iosefa Samita? Pe e te talitonu o le [Peresitene o i ai nei o le Ekalesia] o se Perofeta a le Atua? O le a lona uiga ia te oe?
3. O le a le uiga o le salamo ia te oe? Ua e lagona ua e salamo mai au agasala i le taimi ua tuanai?
4. Pe na e faia se solitulafono matuia? Afai na i ai, pe o e nofo vaavaaia pe ua palola? Pe na e aafia i se faiga e faapau ai pepe? po o se sootaga faaulugalii o le tane ma le tane po o le tamaitai foi ma le tamaitai?
5. Pe ua aoaoina ea oe e faapea o le ave ma se tagata O Le Ekalesia a Iesu Keriso o le Au Paia o Aso e Gata Ai, e aofia ai le ola i tulaga o le talalelei. O le a lou silafia e uiga i tulaga o loo i lalo? Pe ua e naunau ea e usitai i ia [tulaga]?
 - a. O le tulafono o le legavia, lea e faasaina ai ia faiga feusua'i i fafo atu o noataga o se faaipoipoga faaetulafono i le va o se alii ma se tamaitai.
 - e. O le tulafono o le sefuluai.
 - i. O le Upu o le Poto.
 - o. O le aso Sapati, e aofia ai le 'ai ma inu i le faamanatuga i vaiaso taitasi ma le tuuina atu o le auaunaga i uso a tagata o le ekalesia.
6. Pe a papatisoina oe, ua e osi feagaiga ma le Atua ua e loto e ave i ou luga le suafa o Keriso ma tausi Ana poloaiga i lou olaga atoa. Pe ua e saunia ea e osi lenei feagaiga ma taumafai ina ia e faamaoni i ai?

I le faaiuga o se faatalanoaga manuia, ia faamalo atu i le tagata. Ia toe faatasi atu i isi faifeautalai ma faamatala atu i ai le mea o le a tupu i le sauniga o le papatisoga.

Ia faamatala atu o le faamauga o le a faia i lalo o le taitaiga a le epikopo i se sauniga faamanatuga a le uarota o loo latou nonofo ai.

Pe a talafeagai ona tolopoina se papatisoga, e tatau ona taulimaina ma le faautauta e le taitai itu po o le taitai sone ma isi faifeautalai lea tulaga ma ia lē faalauaiteleina. Ia faalototele atu i le tagata e mafai ona ia manumalo, ma ta'u atu o nisi solitulafono e manaomia ai se taimi tele e salamo lelei ai. Ia faamatala atu o le uiga paia o le sauniga e manaomia ai se tulaga maualuga o le agavaa. Ia faalototele atu i le tagata o le a outou faia faatasi ma isi ia mea uma tou te mafaia e lagolagoina ai o ia. Ona mulimuli atu lea ma le faamaoni ina ia tausia lau folafolaga.

Papatísoga ma le Faamauga: Fesili ma Tali**O ai e faia le faatalanoaga mo le papatísoga ma le faamauga?**

E masani lava o le taitai itu na te faatalanoaina ia tagata na aoaoina e faifeautalai i lana itu mo le papatísoga, e aofia ai tagata na aoaoina e ona taitai sone. O taitai sone e faatalanoaina tagata na aoaoina e le taitai itu. O le peresitene o le misiona po o se tasi na te tofia e tatau ona faatalanoaina tagata na aafia i ni agasala matuia. E le faatalanoaina e taitai itu po o taitai sone ia tagata papatísoga e i fafo atu o a latou lava itu po o sone, seiloga e tofia i latou e le peresitene o le misiona latou te faia.

O le a le uiga o se papatísoga liliu mai?

O papatísoga liliu mai o le papatísoga o:

- Tagata e tai iva tausaga ma matutua atu o e e lei papatísoga pe faamauina muamua o ni tagata o le Ekalesia.
- O tamaiti e tai valu tausaga ae o o latou matua uma e le o ni tagata o le Ekalesia, pe o o latou matua e papatísoga ma faamauina i le taimi lava lena faatasi ma le tamaitiiti.

Pe ou te manaomia se faatagaga e papatísoga ai se tamaitiiti laitiiti?

Ae e te lei aoaoina ma papatísoga se tagata sailiili e le i atoa ona tausaga faatulafonoina, e tatau lava ona e maua mai se faatagaga a matua po o tagata o loo tausaga faaletulafono, e ala mai i se tusi. Ma e tatau foi ona i ai sau mafuaaga lelei lava e talitonu ai ua malamalama le tamaitiiti i le feagaiga o le papatísoga, ma o le a ia faia ni taumafaiga uma e tausaga ai na feagaiga e ala i le usiusitai i le talalelei, ma le auai atu ma le faamaoni i sauniga lotu.

Pe ou te manaomia le faatagaga a le toalua ina ia mafai ona papatísoga ia se tane po o se ava?

loe, aua le papatísoga se tagata ua faaipoipo e aunoa ma se faatagaga mai lona toalua.

Afai e lei saunia le tamā o le aiga mo le papatísoga, pe tatau la ona ou papatísoga le aiga pe faatali seia saunia le tamā?

Afai e lei saunia le tamā o se aiga mo le papatísoga ma le faamauga, ae ua saunia isi tagata o le aiga, e mafai ona e ta'u atu i le tamā, e te le manao e papatísoga le aiga e aunoa ma ia, aua e faaaloalo le Ekalesia i le ulu o le aiga ma o le a sili atu ona alualu i luma tagata o le aiga i le talalelei o se iunite faaleaiga. Afai e faaauau pea ona le taliaina e le tamā, e mafai ona e papatísoga ma faamau isi tagata i le ekalesia i lana maliega.

Pe o se manatu lelei ea le faauu o se tamā i le Perisitua Arona i le taimi lava e uma ai ona papatísoga, ina ia mafai ai ona ia papatísoga isi tagata o le aiga?

Leai. E tatau ona faamauina le tama i se sauniga faamanatuga, ma a uma se faatalanoaga ma le epikopo, ona lagolagoina lea ia maua le Perisitua Arona. E le tatau ona faatuai le papatísoga o tagata o se aiga, ina ia mafai e le tamā ona faataunuuna ia papatísoga.

Pe mafai ona ou aoaoina ma papatísoga se tagata sa tape le igoa [mai le Ekalesia]?

O papatísoga o tagata na tape igoa, e lē o ni papatísoga liliu mai, ma e lē faatalanoaina e faifeautalai ia tagata faapena mo papatísoga. Na o le pau le auala e mafai ona outou galulue faatasi ai ma ni tagata faapena, o lalo lea o le taitaiga vavalalata a le peresitene o le misiona ma le epikopo.

Ae faapefea pe afai ua faatulaga e se tagata se aso e papatísoga ai, ae na te le o tausaga uma ia tautinoga?

Afai e te lagona e manaomia e se tasi o loo e aoaoina ni sauniuniga faaopoopo, aua le faatulagaina se faatalanoaga mo le papatísoga, seiloga e tasi e le tagata sailiili ia tautinoga ma ausia tulaga faatulagaina.

Faamatalaga

O le a se mea ou te faia pe a mananao ni tagata e papatiso, ae ua nonofo faatasi ae lei faaipoipoina?

O tagata o le a papatiso o loo nonofo faapouliuli ma se tagata o le isi itupa, e tatau lava ona faaipoipo, pe aua loa nei toe nonofo faatasi, ona faatoa mafai lea ona papatisoina i la'ua.

O le fesili lona 4 i le faatalanoaga mo le papatisoga, o loo fesiligia ai pe afai na aafia le tagata i se agasala matuia, e pei o le faapauina o pepe, o le faaulugalii o le alii ma le alii, po o le tamaitai foi ma le tamaitai, po o se soligatulafono matuia. O le a se mea e tatau ona ou faia pe a ta'u mai e se tagata se agasala faapena?

1. *Faatonuga mo le aoaoina o faifeautalai.* O nisi taimi e tau mai ai lava e tagata sailiili ia faamatalaga e uiga i ni agasala faapena, a o e aoao atu e uiga i poloaiga ma valaaulia i latou e faia tautinoga. Ae peitai, afai latou te le ta'uina atu se mea ae ua e manatu e i ai so latou faafitauli, ia sauniuni i latou mo le faatalanoaga mo le papatisoga, e ala i le fesili atu pe na latou aafia i se agasala o nei agasala. Afai ua e matauina se agasala matuia, aua nei e fesili atu mo faamatalaga auiliili e uiga i le agasala. Aua le faatulagaina se aso mo le papatisoga pe faia soo se folafolaga faapea o le a faamaonia i latou mo le papatisoga ma le faamauga. Ia faailoa atu lou alofa ma toe faamanatu le mataupu faavae o le salamo. Ia faamalamalama atu ma le agalelei, o nei agasala e matuia, ma o le a latou talanoa ma se tasi e sili atu lona matua ma tele lona silafia (o lau peresitene o le misiona po o se tasi na te tofia) e fesoasoani ia i latou i nei tulaga. Ona auina sa'o atu lea o se talosaga mo le faatalanoaga mo le papatisoga i le peresitene o le misiona.

2. *Faatonuga mo le tagata e taitaiina le faatalanoaga mo le papatisoga ma le faamauga.* Afai na lelei ona aoaoina e faifeautalai le tagata a o lei faia le faatalanoaga mo le papatisoga, o nei vaega, pe afai e i ai, e tatau ona auina sa'o atu i le peresitene o le misiona. Afai e tutupu mai, ia faailoa atu lou alofa ma toe faamanatu ia poloaiga ma mataupu faavae o le salamo. Ia faamalamalama atu ma le agalelei, o nei agasala e matuia, ma o le a latou talanoa ma se tasi e sili atu lona matua ma tele lona silafia (o lau peresitene o le misiona po o se tasi na te tofia) ma fesoasoani ia i latou i nei tulaga. Ona auina sa'o atu lea o se talosaga mo le faatalanoaga mo le papatisoga i le peresitene o le misiona.

Gaoioiga: Suesuega Faaletagata Lava Ia

Ia mafaufau pe o a ni ou lagona pe a faapea o oe o loo faatalanoaina. Ia mafaufau i fesili nei:

- O a vaega o le faatalanoaga atonu e fou ia te oe? O le a se mea e mafai ona fai pe ta'u atu foi e le tagata fai faatalanoaga ia te oe, ina ia e le popole ai?
- E faapefea ona e manao i le tagata e faia le faatalanoaga ina ia oulua galulue faatasi?
- E faapefea ona e manao e tali atu le tagata e faia le faatalanoaga, pe afai e te faailoaina atu ni lagona lē mautonu pe lē malamalama foi pe e te ta'uina atu foi ni agasala matuia?

Ia tusi au tali i fesili nei i totonu o lau tusi talaaga o suesuega.

Ia faatumu ia Faamauga o le Papatisoga ma le Faamauga

O le faifeautalai e taitaiina le faatalanoaga, e tatau ona faatumuina se fomu o le faamauga o le papatisoga e tusa ma faatonuga o i ai i le fomu. E tatau ona ia faamalamalama atu o le pepa faamaumau e fausia mai i faamauga o le papatisoga ma o le a i ai faamatalaga taua e uiga i tagata fou o le Ekalesia ma sauniga ua latou maua. Soo se taimi lava e femalagaai ai tagata o le Ekalesia, e auina atu le pepa faamaumau i le iunite fou, ina ia mafai ona tuuina atu i ai e lo latou epikopo fou le

faaumea ma le fesoasoani. E tatau ona fesili atu le faifeautalai i le tagata [o le a papatiso] ina ia faamaonia mai ia faamatalaga o loo i luga o le fomu i le taimi o le faatalanoaga. A leai se pepa faamaumau, e le mafai e se tagata ona maua se pepa faataga o le malumalu. E faamautinoa e le epikopo ua faatumu se fomu o le faamauga mo tagata taitoatasi e tusa ai ma faatonuga o i le fomu.

Gaoioiga: Suesuega Faaletagata Lava la pe Faalesoa

Suesue le Mosaea 6:1–3 ma le Moronae 6:1–4. O le a le faifā a nei mau i lau matafaioi o le teuina o ni faamaumauga sa’o o papatisoga ma faamauga?

O Le Sauniga o le Papatisoga

E malosi lava le oo mai o le Agaga a o faataunuuna ia sauniga paia o le papatisoga ma le faamauga. O le sauniga papatisoga ma le faamauga e sosoo ai, e tatau ona avea o ni faatumutumuga faaleagaga mo tagata fou liliu mai. E tatau ona outou faia ma le taitai misiona a le uarota ia mea uma tou te mafaia, ina ia mautinoa ai ua faatulagaina, musuia, ma manatuaina pea le sauniga papatisoga. O nei sauniga e tatau ona faamalosia ai ia tagata faatoa liliu mai i a latou tautinoga ina ia tumau le toaaga.

Ia valaaulia le epikopo, taitai o korama ma ausilali, ma faiaoga o aiga ma faiaoga asi (pe afai ua tofia) ina ia auai atu i le sauniga o le papatisoga. E tatau ona valaaulia ia uo ma aiga o tagata liliu mai, faapea foi ma au tagata sailiili uma o loo i ai nei, ina ia auai i le sauniga faamanatuga o le a faia ai le faamauga. O nei aafiaga o le a fesoasoani ia i latou e lagonaina ai le Agaga ma saunia ai i latou e talia le valaaulia e aoao atili e uiga i le talalelei. Ia galulue faatasi ma le tagata o le a papatiso faapea ma le taitai misiona a le uarota e valaaulia ia uo ma aiga o le tagata o le a papatiso, ina ia auai. Ona toe siaki lea pe a mae’a le sauniga e talatalanoa e uiga i o latou aafiaga ma valaaulia i latou e aoao pe aisea na filifili ai la latou uo ina ia papatiso.



O faifeautalai na aoaoina le tagata o le a papatiso, e galulue faatasi ma le taitai misiona a le uarota, e faatulaga le sauniga. Ia ta’u atu i le tagata o le a papatiso le fuafuaga ma pe aisea. Ia talanoa e uiga i lavalava talafeagai, e aofia ai le tuuina atu i le tagata o le a papatiso ni laei papae e ofu mo le papatisoga. Ia malilie faatasi i le nofoaga ma le taimi mo le papatisoga. E masani lava o se tasi o le au epikopo po o le taitai misiona a le uarota e taitaia le sauniga. Ua ta’ua i lalo ia mea taua e fuafua ma faatulagaina.

O se sauniga o le papatisoga e mafai ona aofia ai:

1. Se musika e muai usuina.
2. O se faafeiloaiga puupuu e le taitai perisitua o loo taitai i le sauniga (e tatau ona pulefaamalumu se tasi o le au epikopo).
3. O se viiga ma se tatalo amata.
4. Tasi pe lua ni tautalaga pupuu e faatatau i mataupu o le talalelei, e pei o le papatisoga ma le meaalofa o le Agaga Paia.

Faamatalaga

5. O se musika filifilia.
6. Faataunuuina o le papatisoga.
7. O se taimi faaaloalo a o sui ia laei mago o i latou na auai i le papatisoga. O lenei taimi e mafai ona faalogologo ai i musika vailauga, usuina viiga ma pese a le Peraimeri e iloa lelei, faaali se ata faale-Ekalesia, pe tuuina atu ai foi molimau.
8. O se avanoa mo tagata fou liliu mai e tuuina mai ai a latou molimau, pe a mananao i ai.
9. O se viiga ma le tatalo faaiu.
10. Musika e tata i le faaiuga.

Faamauga

E maua e se tagata le sauniga o le faamauga pe a uma ona papatisoina o ia (tagai i le MFF 20:41). E ta’ua se tagata fou liliu mai o se tagata o le Ekalesia pe a uma ona faia sauniga o le papatisoga ma le faamauga (tagai i le Ioane 3:5; MFF 33:11). O tagata fou liliu mai e faamauina i se sauniga faamanatuga a le uarota o loo latou nonofo ai, a e lē o le sauniga o le papatisoga. O le epikopo e nafa ma le vaaia ua faia le faamauga i se taimi talafeagai pe a uma le papatisoga. O le epikopo po o se tasi o ona fesoasoani e auai i le faamauga. E mafai ona valaaulia e le epikopo ia alii faifeautalai na fesoasoani e aoao le tagata liliu mai ina ia auai i le faatinoga o le faamauga. Ia galulue vavalatala ma le epikopo ma le taitai misiona a le uarota, ina ia mautinoa ua faia lenei sauniga taua.



Pe a Mae’a le Papatisoga ma le Faamauga

I lalo o le taitaiga a le epikopo, e mafai lava e faifeautalai ona faaaauu le faaaumeaina o tagata fou o le ekalesia. Ia faaaauu pea ona aoao i latou ma faamanatu mea sa latou aoaoina. Ia faamalosi atu ma lagolagoina i latou, faitau le Tusi a Mamona faatasi ma i latou, ma fesoasoani ia latou fetufaai atu le talalelei i tagata o o latou aiga ma uo. Pe a talafeagai ai, ia faaaauu pea i lou olaga atoa ona fesootei atu ia i latou sa e aoaoina, ina ia faamalosi atu ma lagolagoina i latou.

A uma le faamauga, ia faaaauu pea ona faaoga le Faamauga o Aoaoga e faamaumau ai au taumafaiga i le toe aoaoina o lesona 1–4 ma le aoaoina o le lesona 5. Ia galulue faatasi ma le taitai misiona a le uarota ma le au taitai o le uarota, ina ia fesoasoani i le tagata fou liliu mai ia tumau le toaga ma maua ia faamanuiaga uma o le Togiola a Iesu Keriso.

Manatua Le Mea Lenei

- Ia saunia lelei ia tagata o le a papatisoina mo le faatalanoaga mo le papatisoga ma le faamauga.
- Ia mautinoa ua ausia e le tagata o le a papatiso ia tulaga e manaomia mo le papatisoga ma le faamauga.
- Fesoasoani ia mautinoa e faagaetia faaleagaga ia sauniga o le papatisoga.
- Faaoga sauniga o le papatisoga ma faamauga o ni avanoa e maua ai [ni tagata aoao].
- Ia sa’o le faatumuga o fomu o le papatisoga ma le faamauga.

Manatu mo Suesuega ma le Faaogaina

Faamatalaga

Suesuega Faaletagata Lava Ia

- Fai se lisi o ni luitau e ono fetaii ma le tagata o le a papatiso. Aisea e taua ai ona lagonaina e le tagata o le a papatiso le alofa ma le fauoga a tagata o le Ekalesia?
- Suesue le Moronae 6 ma le Mataupu Faavae ma Feagaiga 20:68–69. O le a se mea e te aoaina mai nei fuaiupu e uiga i le saunia o tagata mo le papatisoga ma le faamauga? Tusi mea ua e aoaina, ma fetufaai atu ou manatu i lau soa i le taimi o le sueduega faalesoa.

Suesuega Faalesoa

- Na faamalamalama mai e Elder Henry B. Eyring le mafuaaga e taua tele ai le maualuluga o tulaga faatonuina. Ia talanoaina faatasi ma lau soa leni fautuaga ma toe iloilo pe o a ni ou lagona e uiga i le fesoasoani malosi atu i tagata ina ia ausia nei tulaga. “Ua faatulagaina e le Alii Ana faatulagaga ina ia mafai ona la faamanuiaina i tatou. Mafaufau i na faamanuiaga: Na la folafola atu ia i latou e ausia ia faatulagaga, le fesoasoani a le Agaga Paia. Na la folafola atu le filemu o le tagata lava ia. Na la folafola atu le avanoa e maua ai sauniga paia i totonu o Lona maota. Ma na la folafola atu foi ia i latou o e tumau i le ola ai i Ana faatulagaga, o le a latou maua le ola e faavavau. . . . Talu ai tatou te alolofa i tagata o loo tatou auauna i ai, o lea tatou te mananao uma ai lava e faia ia lelei ina ia siitia ai i luga fanau a le Tama Faalelagi i le faamaoni ma le mama latou te moomia, ina ia maua uma ai faamanuiaga a le Alii. . . . E te amataina i le faailoa atu o faatulagaga a le Alii ma le manino, e aunoa ma se faatoese mai ai. Ma o le a faateteleina lava ona o ese mai ai o le lalolagi ma tauemu i ai, o le malosi foi lena e tatau ona tatou tausua ai” (“Faatulagaga o le Tauaogaina,” *Uluai Fonotaga Faaleaoaga a Taitai i le Lalolagi Atoa*, Ian. 2003, 11–12).
- la fetufaai ma lau soa i mea ua e aoaina mai leni mataupu e uiga i le saunia o tagata mo le papatisoga ma le faamauga.
- la talanoa e uiga i le sauniga papatisoga mulimuli na e auai atu i ai. Ia faatusatusa ma taiala o loo i leni vaega ua faaautuina “O Le Sauniga o le Papatisoga.” O le a se mea na lelei ona fai? O le a se mea na mafai ona faaleleia? Ia talanoaina pe faapefea ona e mautinoa o sauniga ua e fuafuaina o le a faagaetia ai faaleagaga.
- la faataitai pe faapefea ona e saunia se tagata sailiili faapitoa mo le faatalanoaga mo le papatisoga.
- la toe faamanatu ia fesili o le faatalanoaga mo le papatisoga. Ia mafaufau pe o le a faapefea ona e taulimaina ia tulaga eseese e pei o nei:
 - E le i ta'uina atu e le tagata o le a papatiso o loo nofo vaavaaia o ia ona o se solitulafono sa ia faia.
 - E le i maua e le tagata o le a papatiso se tali malosi i le tatalo e faapea o Iosefa Samita o se perofeta.
 - Na ula e le tagata o le a papatiso se sikaleti i aso e lua ua tuanai atu.
 - E le o mautinoa e le tagata o le a papatiso, pe sa ia mauaina se tali i ana tatalo.
 - Na maua e le aiga ni uunaiga mai uo, ma ua latou le mautonu ai pe ua latou saunia mo le papatisoga.
- Toe faamanatu le Fomu mo le Papatisoga ma le Faamauga ma le Tusi Faamaonia o le Papatisoga ma le Faamauga. E mafai faapefea ona e mautinoa o faamatalaga e te tuuina atu e sa'o ma atoatoa?

Faamatalaga

Fonotaga Faaleitu ma Konafesi Faalesone

- Ia toe faamanatu le taua o le faatalanoaga mo le papatisoga. Ia talanoaina pe faapefea ona saunia e faifeautalai ia tagata sailiili mo le faatalanoaga.
- Ia talanoaina pe faapefea ona faaoga ia sauniga o le papatisoga ma faamauga o ni avanoa e maua ai [tagata e aoao].

Peresitene o le Misiona

- Galulue faatasi ma taitai perisitua o le lotoifale ina ia mautinoa ai le faaogaina lelei o le Faamauga o le Alualu i Luma.
- E faia i nisi taimi se faatalanoaga muamua lava mo le papatisoga.
- Aoao taitai o le itu ma taitai sone i le ala e faia ai faatalanoaga mo le papatisoga.
- E aoaoina uso o le au peresitene o le misiona ma taitai perisitua i le ala e faia ai faatalanoaga mo le papatisoga mo tagata o le a papatiso, o e na faia ni agasala matuia.



E Faapefea ona Matou Galulue ma Taitai o Siteki ma Uarota?

Faamatalaga

Manatunatu i le Mea Lenei

- O le a se mea e manaomia e tagata faatoa liliu mai ma tagata o le ekalesia e le o toaaga mai, ina ia avea ai ma tagata toaaga o le Ekalesia?
- O a tiutetauave o taitai o siteki ma uarota i le galuega faafaifeautalai, faatumauina, ma le faatoagaina mai?
- E mafai faapefea ona ou fesoasoani i taitai o le uarota e atiina ae le Ekalesia?
- O le a le mea e tatau ona tupu i le fonotaga faamaopopo faalevaiaso ma le taitai misiona o le uarota?

Ua ia te oe le avanoa taua e galulue faatasi ai ma le toatele o taitai ma le au paia i le taimi o lau misiona. O lo outou galulue faatasi o le a faamalositia ai ma atiina ae le Ekalesia a Iesu Keriso o le Au Paia o Aso e Gata Ai. O sootaga o le a e faavaeina ma taitai o le Ekalesia, o le a faamanuiaina ai oe i aso uma o lou ola. O sootaga taua na, a o faapea ona outou taufai saili ma tagata o le Ekalesia e avatu le talalelei toefuataiina i fanau a le Tama Faalelagi. O le malamalama i uluai auala faigofie e galue ai i totonu o le faalapopotoga a le uarota, o le a fesoasoani lena ia te oe e te agai ai i luma ma le agaga tulimata'i tele ma le malosi.

Faamalolositia o Uso Fou ma Tagata e Le o Toaaga Mai

A papatiso ma faamau ia tagata liliu mai, latou te faia folafolaga paia e usitai ma auauna atu i le Atua ma isi, i aso uma o totoe o o latou ola. E avea i latou ma sui tauva mo le faaolataga i le malo selesitila. Ina ia maua faamanuiaga folafolaina, e tatau ona

Faamatalaga

latou tumau e oo i le iuga, i le faatuatua ia Iesu Keriso. E taua le i ai o tagata o le Ekalesia e fesoasoani i tagata faatoa liliu mai ina ia tumau i le toaaga ma le faamaoni.

Na saunoa Peresitene Gordon B. Hinckley: “E leai se uiga o le faia o galuega faafaifeautalai, sei vagana ua tatou taofimauiina fua o lena galuega. E le tatau ona matuueseeseina ia mea e lua. . . . O tagata liliu mai taitoatasi o se matafaioi tele ma le taua” (“Saili Tama’i Mamoe, Fafaga Mamoe,” *Liahona*, Iulai 1999, 122).

I lalo o le taitaiga a le epikopo, o le aufono a le uarota ua i ai le uluai tiutetauave mo le faamalolosia o uso fou ma tagata o le ekalesia e le o toaaga mai. Latou te faamautinoaina ua i ai ni uo a tagata faatoa liliu mai ma tagata o le ekalesia e le o toaaga mai, ia fafagaina i latou i le afioga a le Atua, ma ia i ai ni o latou valaauga ma ni tiutetauave. E mafai ona latou talosagaina le fesoasoani a faifeautalai faamisiona i le faia o asiasiga faaleaiga (pe o faifeautalai tamaitai foi e fai ma faiaoga asiasi) e asiasi i uso fou, o tagata o le ekalesia e le o toaaga mai, o i latou foi ua faamoemoe e avea ma toeaia. E sili atu pe a oulua toalua ma se tagata o le uarota i na asiasiga.

Ua ia te oe foi le tiutetauave mo nei tagata. Na saunoa Peresitene Hinckley: “Outou na faifeautalai . . . o se vaega o lenei tiutetauave o le fusia faatasi o tagata liliu mai i le Ekalesia. Atonu o le a le mafai ona faaauau pea lo outou talatalanoa ma asiasi ia i latou. Peitai, e mafai ona outou tusi atu ia i latou mai lea taimi i lea taimi, ma faamalosi’au atu ia te i latou. . . . A e foi i lou aiga, aua nei faagaloina i latou. Ia e ola agavaa i taimi uma mo lo latou faatuatuga. Tusitusi atu ia te i latou mai lea taimi i lea taimi, e faamautinoa atu ia i latou lou alofa” (*Liahona*, Iulai 1999, 123).

A auai i sauniga lotu, e tatau ona outou nonofo faatasi ma lau soa ma a oulua tagata sailiili, po o tagata foi o le au paia sa oulua faaumeaina mai e lagolago atu ai ma faamalosi i latou. E le tatau ona outou nonofo na o outou lava ma isi faifeautalai.

O se vaega taua tele o lau misiona o le faavae lea o le Ekalesia ma faamalosi le iunite o loo e galue ai. E te faia se vaega o lenei mea i lou fesoasoani atu lea i tagata faatoa liliu mai, ina ia tumau le toaaga, ma lou fesoasoani lea i tagata o le ekalesia e le o toaaga mai ina ia toe toaaga. O se tasi o ou tiute o le aufaatasi lea ma faifeautalai o le uarota, e toe aoao atu ia lesona muamua e fa, ma aoao atu le lesona e 5. E mafai ona fesoasoani faifeautalai o le uarota, o faiaoga o aiga, ma faiaoga asiasi i le aoaoina atu o nei mataupu faavae.

O mea nei sa ta’ua e Peresitene Gordon B. Hinckley e faatatau i lu’itau e feagai ma le toatele o tagata faatoa liliu mai:

Sa ou mauaina i se tasi aso se tusi malie. Sa tusia e se tamaitai na auai mai i le Ekalesia pe tusa ma se tausaga talu ai. Na ia tusia:

“O la’u malaga atu i le Ekalesia sa tulaga ese ma sa luitauina. O le tausaga na te’a nei o le tausaga aupito sili lea ona faigata talu ona ou ola. O se tausaga aupito sili foi ona tele faamanuiaga. I le avea ai ma se tagata fou o le ekalesia, o loo faaauau pea ona lu’itauina a’u i aso uma.”

Na faaauau lana faamatalaga i lona faapea mai, ina ua ia auai i le ‘Ekalesia, na te le’i lagonaina se lagolagosua mai o taitai o lana uarota. Sa foliga e le’i manatu atu lona epikopo ia te ia o se tagata fou. Ona o lona lagona ua tuulafoaiina o ia, o lea na toe liliu atu ai i lona peresitene o le misiona o le na tatalaina avanoa mo ia.



Sa ia ta'ua, "E le iloa e tagata o le Ekalesia le tulaga e i ai se tagata e fou i le Ekalesia. . . . O le mea lea, e toetoe lava ina latou lē mafai ona iloa pe faapefea ona lagolagoina i matou."

Ou te lu'itauina outou, o'u uso e ma tuafafine, afai tou te le iloina pe faapefea, ia outou taumafai e vaai i ai faalemafau fau pe faape'i. E mafai ona faapei ua matua faaesea. E mafai ona atuatuvaale. E mafai ona taufaafepe. O i tatou o lenei Ekalesia, e matua eseese mamao lava mai le lalolagi nai lo le mea o tatou manatu ai. Na faaaauu le tusi a lenei tamaitai: "A oo ina aveva i tatou tagata sailiili ma tagata o le Ekalesia, tatou te ofo i lo tatou iloina ua tatou ulufale atu i se lalolagi e matua ese lava, o se lalolagi e i ai ana lava tu ma agaifanua, aganu'u, ma gagana. Tatou te iloa ai e leai lava se tagata e toatasi po o se punava'i o faamatalaga e mafai ona tatou liliu atu i ai mo le taitaiga i la tatou malaga i lenei lalolagi fou. O le taimi muamua, e ese le manaia o le malaga, e oo lava i o tatou masei e malie, ona oo ai lea ina faavaatu'ia ma i'u ai ina liua i le ita. Ma o taimi nei e faavaatu'ia ma ita ai, tatou te o ese ai. Tatou te toe foi i le lalolagi na tatou o mai ai, i le mea na tatou iloa ai pe o ai i tatou, i le mea na tatou iloa ai la tatou matafaioi, i le mea na tuu atu i ai lo tatou sao, ma le mea e mafai ona tatou gagana ai." [Liahona, Iulai 1999, 122].

Gaoioga: Suesuega Faaletagata Lava Ia po o Suesuega Faalesoa

Faitau le tala lea e i luga. Tusi tali i fesili nei i lau tusi talaaga o suesuega, pe talanoaina ma lau soa. Ia faatu ni sini ma faia ni fuafuaga talafeagai.

- E tusa ai ma lenei tala, o a ni mea moni e faigata ai ona tumau le toaaga o tagata faatoa liliu mai?
- E mafai faapefea ona fesoasoani le faaaofia ai o tagata o le au paia mai le amataga o le faagasologa o le aoaoina, i nei luitau?
- Manatu ia i latou o loo e aoaoina. E mafai faapefea ona lelei atu lou faaaofiaina o tagata o le au paia e fesoasoani i tagata sailiili, e amata ai ona faia sootaga faalevafealoai i le Ekalesia?

Faiaoga o Aiga ma Faiaoga Asiasi

O peresitene o siteki ma epikopo, i lo latou galulue faatasi ai ma le peresitene o le misiona, e mafai ona latou faaaogaina faifeautalai e asiasi i tagata o le ekalesia e le o toaaga mai ma aiga e le lolotu uma. I ni tulaga talafeagai, e mafai ona latou talosagaina ia faifeautalai faamisiona e auai i le faatinoina o faiaoga o aiga ma faiaoga asiasi. O nei avanoa faafaiaoga e tatau ona faamalolosia ai le au paia, faateleina ai le tomali o faifeautalai e aoa atu, ma fesoasoani ai foi i faifeautalai ia maua ni tagata e faafesootai (tagai "Faamatalaga i le Galuega Faafaifeautalai," tusi a le Au Peresitene Sili, 11 Tesema, 2002).

Galulue ma le Aufono a le Uarota e Faamalolosi i Uso Fou ma Tagata o le Ekalesia e Le o Toaaga Mai

O le aoaoina ma le papatisoga o tagata sailiili, e i lalo o le taitaiga a lou peresitene o le misiona. Peitai, o le galuega o le folafolaina atu o le talalelei, o le a sili atu ona mamana lona agai i luma pe a galulue faatasi faifeautalai faamisiona ma tagata o le au paia, i a latou taumafaiga ma galuega.

Faamatalaga

E ono valaaulia soo oe e te auai atu i fonotaga a le aufono a le uarota ma le komiti taitai o le perisitua. O le mea muamua e te faamuamua, o lou mautinoa lea o i ai au tagata sailiili i le Lotu. E tele taimi, o le uiga o lena mea, o le tou o faatasi lea. Afai e i ai se feteena'iga i le auai atu i le fonotaga a le aufono a le uarota ma le aumaia o se tagata i le lotu, alu e aumai le tagata i le lotu. I se tulaga faapena, ia saunia se kopi o le Lipoti o le Alualu i Luma ma avatu i le taitai misiona a le uarota, ma ia mautinoa ua ia te ia faamatalaga uma e manaomia e le aufono a le uarota po o le komiti taitai o le perisitua.

Na saunua Peresitene Gordon B. Hinckley:

“E manaomia e tagata uma e liliu mai ni mea se tolu:

“1. O se uo i le Ekalesia e mafai ona liliu atu i ai i taimi uma, o se o le a fesoasoani ia te ia i taimi uma, na te taliina ana fesili, ma o le a malamalama foi i ona faafitauli.

“2. O se valaauga. O le toaga o se uiga moni lea o lena Ekalesia. O le faiga lea tatou te tuputupu a'e ai. O le faatuatua ma le alofa i le Alii e pei o musele o lo'u lima. Afai ou te faaogaina, o le a malolosi. Afai ou te 'asoaina, o le a vaivai. E tatau ona tofu tagata liliu mai ma se tiutetauave. . . .

“3. O tagata uma e liliu mai e tatau ona faafaiileina i le afioga lelei a le Atua. E matua tatau ona fegalegaleai faatasi ma se korama o le perisitua po o le Aualofa, o Tamaitai Talavou, Alii Talavou, le Aoga Sa, po o le Peraimeri. E tatau ona uuna'ia o ia e sau i sauniga faamanatuga e taumafa i le faamanatuga, e faafou ai feagaiga na osia i le taimi o le papatisoga” (*Liahona*, Iulai 1999, 122).

O le aufono a le uarota e taulamua i le saunia o se uo, o se tiutetauave, ma le faafaiilelega faaleagaga mo tagata faatoa liliu mai. O le a e fesoasoani ia i latou pe a talosagaina. O taitai o le perisitua ma tagata o le au paia, o le a faaumeaina, ma e te fesoasoani foi i ai.

Faauooga

- A o le'i faia le papatisoga ma le faamauga, ia mautinoa e i ai ni tagata o le ekalesia i lesona taitasi, pe afai e mafai. E tatau ona tele taimi e mafuta ai na tagata o le au paia ma tagata sailiili ina ia tali atu ai i a latou fesili, ia malamalama i o latou lu'itau, ma faamalosiua ia te i latou.

- Valaaulia tagata o le au paia e auai i sauniga o le papatisoga, ma faaulufale mai tagata faatoa liliu mai i le uarota. E fesoasoani le au paia i tagata faatoa liliu mai ia maua le lagona mafanafana i sauniga eseese a le Ekalesia. E tatau ona latou faafeiloai atu i latou i isi uso o le au paia.



© 1999 Greg K. Olsen. Faamatalaga a le Mili Pona Press. Aua ne'i kopina.



- Faafeiloai atu tagata sailiili i le epikopo, o ona fesoasoani, o peresitene o le korama a toeaina ma le Aualofa, ma isi taitai o le uarota i se taimi vave e mafai ai. Faamatala i ai matafaioi a le epikopo ma isi taitai o le uarota.

O Avanoa e Auauna Atu Ai

- Fesoasoani i alii e liliu mai, ia malamalama ma sauniuni mo le mauaina o le Perisitua Arona ma le Perisitua Mekisateko. Faamatala i ai o korama o le perisitua, e saunia ai avanoa e aoao ai, tapuai, ma auauna atu ai faatasi.
- Ia faaaofia tagata faatoa liliu mai ma tagata o le ekalesia e le o toaaga mai, i avanoa e auauna atu ai, e pei o le fesoasoani i se tina ua oti lana tane o loo ma'i, pe auai foi i le faia o galuega faatino o le uelefea.
- Faasino tagata liliu mai i faufautua o talafaasolopito o aiga, ina ia mafai ai ona latou faatumuina se pepa o Talafaamaumau o le Vaega Faaleaiga ma le Pepa o le Faasologa o le Gafa. Afai e talafeagai ai ma tulaga, ia fesoasoani ia i latou ia saunia e papatisoina i totonu o le malumalu e fai ma sui o o latou augatuaa ua maliliu.
- Valaaulia tagata ua liliu mai ina ia saunia tagata o o latou aiga ma uo e aoaoina e faifeautalai. E tatau i faifeautalai ona fesili atu i tagata faatoa liliu mai ma tagata o le ekalesia e le o toaaga mai mo ni igoa o tagata e faailoa mai.

Fafaga i le Afioga a le Atua

- Faauma ona aoao atu mataupu faavae i le lesona e 5, "Tulafono ma Sauniga."
- Faamanatu i tagata faatoa liliu mai ma tagata o le ekalesia e le o toaaga mai, ia tautinoga sa latou faia a'o le'i papatiso, ma feagaiga sa latou osia ina ua papatiso ma faamauina.
- Ia uuna'i i latou e tatalo le tagata lava ia i aso taitasi, ma tatalo faatasi foi ma o latou aiga.
- Faamalosi'au ia te i latou e suesue i tusitusiga paia i aso taitasi, aemaise lava i le Tusi a Mamona.
- Faamalosi i molimau a tagata faatoa liliu mai, e uiga i le Toefuataiga o le talalelei a Iesu Keriso e ala mai i le Perofeta o Iosefa Samita. Toe iloilo lesona sa e aoaoina atu a'o le'i faia le papatisoga ma le faamauga, ia fetuuna'i valaaulia mo tautinoga, e tusa ma o latou tulaga manaomia i le taimi nei.
- Ia saga aoao atu pea le taua o le auai i le lotu i Aso Sa taitasi, ma le taumafa ma le agavaa i le faamanatuga. Ia e auai ma nonofo faatasi ma tagata faatoa liliu mai po o tagata o le ekalesia e le o toaaga mai.
- Valaaulia i latou e auai i le vasega o Mataupu Faavae o le Talalelei i le taimi o le Aoga Sa.
- Aoao i latou i le faiga o afiafi faaleaiga i po o Aso Gafua, e faaoga ai le *Tusi Faavae o Afiafi Faaleaiga*.
- Uuna'i i latou e fetufaai atu i isi le talalelei toefuataiina.
- Fesoasoani ia i latou e lesitala i le seminare po o vasega o le inisititiuti.
- Ta'u i ai ia latou iloa punaoa a le Ekalesia e pei o le www.mormon.org, www.lds.org, ma le www.familysearch.org.

Mau Suesueina**Fafaga i le Afioga a le Atua**

Mosaea 18:18–20

Alema 31:5

Moronae 6:4

Auauna Atu

Mosaea 2:17

Mataio 25:40

Guide to the Scriptures, “Service”

O Le A Le Matafaioi a le Peresitene o le Misiona?

O le peresitene o le misiona na te umia ki mo papatisoga o tagata liliu mai. I lalo o lana taitaiga, ua i ai i faifeautalai faamisiona le uluai tiutetauave mo le aoaoina o tagata sailiili. Peitai, o le epikopo na te vaaia le tulaga alualu i luma ma le faauo mai o tagata sailiili a o aoaoina i latou. O le fuafuaga a le misiona a le uarota, e faataunuuina i lalo o le pulefaa-malumu a le epikopo. E fono e lē aunoa le peresitene o le misiona ma peresitene o siteki, ina ia mautinoa ai o loo galulue faatasi faifeautalai faamisiona ma taitai perisitua o uarota. Na te faamaopoopoina taumafaiga mo le talaiga, ma e ofo atu foi e fesoasoani i le peresitene o le siteki, e saunia aoaoga i mataupu faavae ma mea e fai i le galuega faafaifeautalai.

O a Tiutetauave o Taitai o le Siteki ma le Uarota?

O taitai faaleEkalesia ma le au paia i le lotoifale, o paaga aupito sili ia. Faaaloalo i ai ma taumafai e fausia se sootaga lelei ma i latou. A o outou galulue faatasi ma nei taitai, ia manatua e i ai foi isi o latou tiutetauave e tusa ai ma o latou valaauga. Taumafai ia avea oe o se faamanuiaga, ae le o se avega mamafa, i taitai o la outou siteki ma le uarota. O ou uiga e tatau ona faaalua ai le, “E mafai faapefea ona ma fesoasoani atu?” Talanoa ma le epikopo ma le taitai misiona a le uarota e uiga i au fuafuaga ma gaoioiga. Ia mautinoa, o mea e te faia, e lagolagoina ai le fuafuaga a le misiona a le uarota.

O loo faamalalama atu i lalo ia matafaioi a le au taitai perisitua i le lotoifale mo le galuega faafaifeautalai. O le malamalama i a latou matafaioi, o le a fesoasoani e faaleleia atili ai lo outou galulue faatasi ma i latou.

Peresitene o le Siteki

O le peresitene o le siteki e vaaia epikopo i o latou tiutetauave mo faifeautalai, faatumaui, ma le faatoaagaina mai. I lana faatalanoaga i masina taitasi ma epikopo, e talanoa atu ai i fuafuaga ma le alualu i luma o tagata sailiili patino ma tagata o le au paia. Na te faamautinoaina o aoaoga faavae e faatatau i le galuega faafaifeautalai, o loo aoa atu e le aunoa i fonotaga a siteki ma uarota, ma o loo aoaoina foi taitai perisitua ma isi i o latou tiutetauave faafaifeautalai.

E fono foi e lē aunoa le peresitene o le siteki ma le peresitene o le misiona, e faamaopoopo ai taumafaiga faafaifeautalai, e aofia ai le aoaoina o taitai ma le au paia, faaogaina ma le tofia o faifeautalai faamisiona, ma fesoasoani i taumafaiga mo le faatoaagaina mai.

Fautua Maua

E tofia se fautua maua e le au peresitene o le siteki e faalauiloa le galuega faafaifeautalai, faatumaui, ma le faatoaagaina mai i totonu o le siteki. E lipoti mai e ia e lē aunoa le alualu i luma o lenei galuega, i le au peresitene o le siteki. Na te faamautinoaina foi, ua aoaoina lelei taitai misiona o uarota i o latou tiute, e aofia ai le saunia o se fuafuaga o le misiona a le uarota.

Epikopo

O le epikopo ua i ai le matafaioi mo taumafaiga mo faifeautalai, faatumauiina, ma le faatoagaina mai, i totonu o le uarota. E taua tele lona auai ma lana taitaiga. Ina ia fesoasoani i le faataunuaina o le galuega, e valaau ai e le epikopo se tagata agavaa o umia le Perisitua Mekisateko, e avea ma taitai misiona a le uarota. Na te tofia foi ia lava ni faifeautalai faaleuarota, e taulima ai manaoga i le uarota.

E faaoga e le epikopo le komiti taitai o le perisitua ma le aufono a le uarota e faamaopoopo ai taumafaiga faafaifeautalai, faatumauiina, ma le faatoagaina mai. Na te tuuina atu faatonuga e atiina ae ai ma tauaveina se fuafuaga o le misiona a le uarota.



Gaoioiga: Suesuega Faaletagata Lava Ia

Fuafua se taimi e fono ai ma le epikopo. Saili lana fautuaga pe mafai faapefea ona matua lelei lau auauna atu i le uarota.

Taitai o le Perisitua ma Ausilali

E tatau i taitai o le Perisitua ma ausilali ona iloilo e lē aunoa le tulaga o i ai uso fou ma tagata o le ekalesia e le o toaaga mai, ma fuafua pe faapefea ona matua faaaumea mai ma faamalolosia i latou. E tatau foi ona latou galulue vavalalata ma le taitai misiona o le uarota e faamaopoopo faatasi ma faifeautalai o le uarota ma faifeautalai faamisiona ia taumafaiga faafaifeautalai, faatumauiina, ma le faatoagaina mai.

Taitai Misiona a le Uarota

I lalo o le taitaiga a le epikopo, o le taitai misiona a le uarota e:

- Faia se faataitaiga o le fetufaai atu i isi le talalelei, ma faaaumea mai tagata sailiili, o tagata faatoa liliu mai, ma tagata o le ekalesia e le o toaaga mai.
- Faamaopoopo faatasi ma taitai o le perisitua, o taitai o ausilali, ma le au paia le galuega a faifeautalai o le uarota ma faifeautalai faamisiona.
- Faaoga le Lipoti o le Alualu i Luma, o le Lisi o Mea e Tatau ona Fai mo Tagata Liliu Mai, ma le Lisi a le Au Epikopo o Mea e Tatau ona Fai ma Faatalanoaga e iloilo ai le alualu i luma o tagata sailiili, o tagata faatoa liliu mai, ma tagata o le ekalesia e le o toaaga mai, i fonotaga a le komiti taitai o le perisitua ma le aufono a le uarota.
- Ta'ita'ia fonotaga faamaopoopo faalevaiaso a faifeautalai.
- Galulue faatasi ma faifeautalai faamisiona i le faatulagaina o sauniga o papatisoga o tagata liliu mai i le uarota. O se tasi o le au epikopo po o le taitai misiona a le uarota e masani ona ta'ita'i i nei sauniga.

O le taitai misiona a le uarota e i ai foi i le komiti taitai o le perisitua a le uarota, aufono a le uarota, ma le komiti o le uelefea a le uarota ma auai i fonotaga faaleautaitai o le perisitua a le siteki.

Faifeautalai a le Uarota

E tofia uso ma tuafafine ua agavaa e galulue o ni faifeautalai a le uarota. E vaavaaia i latou e le taitai misiona a le uarota.

O faifeautalai a le uarota latou te sailia, faaaumea, ma aoao tagata sailiili. Latou te aoaoina foi ma faaaumea tagata faatoa liliu mai ma tagata o le ekalesia e le o toaaga mai.

O se faifeautalai a le uarota e umia le Perisitua Mekisateko, e mafai ona tofia e auuuna atu o se fesoasoani i le taitai misiona a le uarota.

Faamaopoopoina o le Galuega Faafaifeautalai

O le galuega faafaifeautalai a le uarota, e masani lava ona faamaopoopoina i fonotaga a le komiti taitai o le perisitua ma fonotaga a le aufono a le uarota, e ala lea i le faaaogaina o le Lipoti o le Alualu i Luma, e aumai i faifeautalai faamisiona. O le faamoemoega faafaifeautalai o nei fonotaga o le tuuina atu lea o se lipoti, fuafuaga, ma faamaopoopo tofiga mo le sailia, aoao atu, faaaumea, ma le faatoagaina mai, e pei ona otooto atu i parakalafa o i lalo.

Sailia o Tagata e Aoaoina. O le komiti taitai o le perisitua ma le aufono a le uarota, e talanoaina fuafuaga mo le sauniaina o tagata patino ina ia aoaoina e faifeautalai faamisiona. Latou te talanoaina le alualu i luma o tagata patino o le uarota i le sauniaina o tagata taitoatasi ma aiga mo lesona a faifeautalai.

Aoao Atu ma le Papatisoina. O le komiti taitai o le perisitua ma le aufono a le uarota, e iloiloaina le Faamaumauga o le Alualu i Luma i vaiaso taitasi, lea e faamatala ai le agai i luma o tagata taitasi o loo aoaoina e faifeautalai faamisiona. Latou te faamaopoopoina foi ia fuafuaga mo le aoaoina i aiga o le au paia, faaaumeaina o tagata sailiili, ma le faamautinoaina o le auai o le au paia i sauniga o papatisoga.

Faaaumeaina ma le Aoaoina o Uso Fou. O le komiti taitai o le perisitua ma le aufono a le uarota, e iloiloaina le Lisi o Mea e Tatau Ona Fai mo Tagata Liliu Mai ina ia siaki ai le alualu i luma o uso fou taitasi. Latou te talanoaina foi le auala e faaaumea mai ai uso fou. A talosagaina e le epikopo, latou te fautuaina atu ni valaauga talafeagai mo tagata faatoa liliu mai.

Faaaumeaina ma le Aoaoina o Tagata o le Ekalesia e le Toaaga Mai. O le komiti taitai o le perisitua ma le aufono a le uarota, e faamaopoopoina taumafaiga a korama o le perisitua ma faifeautalai faamisiona e faatoaga mai ai. Latou te fuafuaina foi auala e faaaumea mai ai tagata o le ekalesia e le toaaga mai, aemaise lava i le valaauliaina o i latou i sauniga ma gaoioiga a le Ekalesia.

O Isi Faamaopoopoga e Faia Faatasi ma le Taitai Misiona a le Uarota

O le galuega faafaifeautalai i le uarota, e masani lava ona faamaopoopoina i fonotaga a le komiti taitai o le perisitua ma aufono a le uarota. Afai e tatau ona fai nisi faamaopoopoga, e mafai e le taitai misiona a le uarota ona faia ni fonotaga faamaopoopo faafaifeautalai, faatasi ma faifeautalai faamisiona. O isi tagata e mafai ona valaaulia e auai i lenei fonotaga e aofia ai faifeautalai o le uarota, o se fesoasoani mai le au ta'ita'i o le vaega a faitaulaga sili, se fesoasoani mai le au peresitene o le korama a toeaina, ma se fesoasoani mai le au peresitene o le Aualofa.

O i latou e auai i le fonotaga, e mafai ona latou iloiloaina ma lipoti atu galuega faatino ma sini mai le fonotaga talu ai, ma talanoaina fuafuaga mo le vaiaso a sau. A manaomia, e mafai foi ona latou fuafuaina galuega faatino a faifeautalai o le uarota e galulue faatasi

ai ma faifeautalai faamisiona, ma talanoaina pe faapefea ona sili atu ona lelei taumafaiga tuufaatasi a faifeautalai o le uarota ma faifeautalai faamisiona.

Fuafuaga a le Misiona a le Uarota

E tele uarota ua latou iloa o le faia o se fuafuaga faataatia faamisiona a le uarota, e siitia ai le galuega faafaifeautalai. O lea fuafuaga faataatia e aofia ai sini, o polokalama, ma gaoioiga e fesoasoani ai i tagata o le uarota e valaaulia tagata e faalogologo i le talalelei. E manuia foi tagata taitoatasi ma aiga, i le faia o lea fuafuaga e taialaina ai a latou taumafaiga faafaifeautalai.

E tatau i tagata o le au paia ona faaogaina auala aloa'ia uma e saili ai tagata o loo naunau e faalogo i le savali o le Toefuataiga. E tatau ona latou faamamafaina le sailia o tamā, tina, ma fanau o ē o le a o mai i le Ekalesia o ni aiga. O ni nai fautuaga nei e mafaufau i ai i le amataina o se fuafuaga faataatia faamisiona.

- Tatalo ina ia saunia e le Alii loto o tagata patino e faalogologo i le talalelei. Tatalo foi ina ia e iloa i latou ua Ia saunia (tagai Alema 6:6). "O le a avea ma se aso matagofie," sa aoa mai ai Peresitene Gordon B. Hinckley, "pe afai o le a tatalo o tatou tagata e le gata mo na o faifeautalai i le lalolagi atoa, ae ole atu foi i le Alii ina ia fesoasoani ia i latou ina ia lagolago atu i faifeautalai o e o loo galulue i totonu o a latou lava uarota" ("Galuega Faafaifeautalai," *Uluai Fonotaga Faaleaoaoga a Taitai i le Lalolagi Atoa*, Ian. 2003, 21).
- Ia e mataala mo avanoa e te talanoa atu ai ma tosina mai isi. Ia e agalelei ma e fesootai atu i le alofa i tagata uma.
- Fesili atu i uo ma tuaoi ina ia galulue auauna atu faatasi ma le au paia i mea e pei o galuega auauna atu i nuu, saunia o meaai mo i latou e manaomia, faiaoga i vasega o fonotaga faatamaoigaina a le Aualofa, fesoasoani i gaoioiga faaleuarota, fesoasoani i aiga pe a siitia, galulue i le Sikauti, ma fesoasoani foi i galuega faatino o talafaasolopito o aiga po o le uelefea.
- Valaaulia tagata o aiga e le lolotu, o uo, ma tuaoi i papatisoga, faamauga, ma faauuga i le perisitua.
- Valaaulia tagata e le lolotu e fesoasoani i ni gaoioiga faapitoa, e pei o se toonai i se aso malolo faalemalo.
- I matua'i fai faalelei ma le naunautai ia sauniga faaleuarota, o gaoioiga, o faeasaita, ma faletatala ina ia naunau foi le au paia e valaaulia a latou uo e auai mai i ai.
- Valaaulia tagata i afiafi faaleaiga.
- Asiasi i tagata ua feagai ma ni suiga i o latou olaga, e pei o faaipopoga, fanau mai o fanau, po o ni maliu foi.
- Asiasi ma fesoasoani i tagata ua sii mai i lo outou pitonuu. Faamatala atu i ai faamatalaga e uiga i le nuu, o tuaoi, ma le Ekalesia.
- Faaoga avanoa uma e talanoa ai e uiga i le talalelei. Talanoaina autu e pei o le Faaola, o le Tusi a Mamona, o le Tusi Paia, o le faamoemoega o le olaga, o le aiga, ma le talafaasolopito faaleaiga.
- Uuna'i tupulaga talavou e faauo atu i isi talavou, ma valaaulia i latou i sauniga ma gaoioiga faale-Ekalesia.
- Galulue faatasi ma aiga e le lolotu uma.
- Fuafua lelei sauniga faamanatuga ia faaleagaga ma musuia.

Faamatalaga

Gaoioiga: Suesuega Faalesoa

- Faitau ma talanoaina faatasi ma lau soa, itulau e 34—37 o le *Faamaoni i le Faatuatua*, Taitaiga o le Ekalesia.”
- Fetufaai ma lau soa ma tusi i lau tusi talaaga o suesuega mea sa e aoaoina.
- Talanoaina pe faapefea e lou malamalamaaga ona aafia ai le auala e te faaogaina tou te galulue faatasi ai ma taitai o le Ekalesia.

O Le Tautinoga ia Tumau le Toaga i le Ekalesia

O le galuega faafaifeautalai e i ai lona aafiaga aupito sili, pe a faia ma tausia e tagata le tautinoga e tumau le toaga i le Ekalesia i aso uma o lo latou ola. E lē lava le na ona o mai o tagata i le Ekalesia. E tatau ona o mai e nonofo mau ai. O au aoaoga uma ma au valaaulia, e tatau ona faasinotonu i le faaiuga lea. Ina ia mafai ona maua faamanuiaga uma o loo teuina e lo tatou Tama Faalelagi mo i latou, e tatau i le au paia ona ola pea lava pea i le talalelei ma toaaga i le Ekalesia.

Sa aoao mai e Nifae: “O lenei, o’u uso pe le e, ona ua maua e outou lenei ala sa’o ma le lauitiiti, ou te fesili atu: Po ua faia ea mea uma? Faauta, ou te fai atu ia te outou, E leai; . . . e tatau ona outou fetaoimi atu i luma, o fiafia i le afioga a Keriso . . . ma tumau lava e oo i le iuga, faauta, o loo faapea ona fetalai mai le Tama: Tou te maua le ola faavavau” (2 Nifae 31:19–20).

Ia tuu atu au taumafaiga aupito sili e fesoasoani ai i tagata ina ia agavaa mo le “olaga faavavau, o le meaalofo sili lea i lo meaalofo uma a le Atua” (MFF 14:7).

Manatua Le Mea Lenei

- Ia fausia ni sootaga malolosi ma le epikopo ma tagata o le aufono a le uarota.
- Auai i ni ala talafeagai i fonotaga a le komiti taitai o le perisitua ma le aufono a le uarota.
- Ia e aoga i le aufono a le uarota. Afai e fesili atu sui o le aufono mo lau fesoasoani:
 - Ia e naunau e faaumea tagata liliu mai ma tagata o le ekalesia e le toaaga mai, fesoasoani i o latou valaauga ma avanoa e auauna atu ai, ma toe aoao atu ia te i latou lesona a faifeautalai.
 - A o i ai tagata o le au paia, ia aoao atu i tagata liliu mai le lesona o “Tulafono ma Sauniga.”

Manatu mo Suesuega ma le Faaogaina

Faamatalaga

Suesuega Faaletagata Lava Ia

- Faaoga lau lisi o fuafuaga a le faifeautalai i aso taitasi, e fai ai au fuafuaga e talanoa i tagata faatoa liliu mai, ma uso faatoa toe toaaga mai, e uiga i le suia o o latou olaga ma le auai i le lotu. O le a se mea sa sili ona fesoasoani ia te i latou? I lau tusi talaaga o suesuega, tusi ai ou mafauauga e uiga i o latou aafiaga. O a mea ua e aoaoina, o le a fesoasoani ia te oe a'o e galue i au tagata sailiili o i ai nei?
- Suesue le 2 Nifae 31:18–20; Alema 26:1–7 ma le 32:32–43; ma le Moronae 6. Tusi mea ua e aoaoina mai nei fuaiupu e uiga i le faamalolosa o tagata faatoa liliu mai.

Suesuega Faalesoa

- I le taimi o le fonotaga a le aufono a le uarota, fesili i le epikopo pe i ai ni tagata o le ekalesia i lo outou eria e le o toaaga mai, ma e manao e te asiasi i ai i lenei vaiaso. A e asiasi i nei tagata ua le toaaga mai, taumafai ina ia fausia lo latou faatuatua ia Iesu Keriso. Fesili i ai mo ni igoa e faailoa mai.
- Suesue le 1 Korinito 3:2; Eperu 5:12; ma le Mataupu Faavae ma Feagaiga 19:22. O le a le suasusu lea e faasino i ai? O le a le mea aano? Faatusatusa au tali i aoaoga faavae o loo i le mataupu “O A Mea Ou Te Suesue I Ai ma Aoao Atu?” Aisea e tatau ai ona e avatu le suasusu ma le mea aano i le faasologa sa'o, ma le tele foi e tatau ai? E faapefea ona e faia lenei mea?
- Faitau le saunoaga lea, o loo faamalamalama mai ai e Peresitene Iosefa F. Samita ona lagona i le taimi o lona papatisoga:

“Sa ou lagona i lo'u loto e faapea afai sa ou agasala—ma e moni lava sa faapea e leai sa'u agasala—ma ua faamagaloina a'u; ua ou mama lava mai le agasala; sa lagona i lo'u loto, ma e sa ou manatu o le a ou le faamanu'alia se iniseti itiiti i lalo o o'u vae. Sa ou lagona le ola faafouina, sa faafouina lo'u manao e fai le mea tonu. Sa leai lava se vaega e tasi o le naunautaiga mo le agasala o totoe i lo'u loto. . . . Ae o le aafiaga lenei na oo mai i o'u luga, ma ou te iloa e mai le Atua, ma sa avea ma o loo avea pea ma molimau ola ia te a'u i lo'u taliaina o le Alii” (*Gospel Doctrine*, 5th ed. [1939], 96).

Faitau la'ia le saunoaga a Peresitene Samita e uiga i ona lagona ina ua leva ona uma lona papatisoga:

“Maimau e, pe ana mafai ona ou taofi lena lava agaga ma lena naunautaiga i lo'u loto i taimi uma o lo'u olaga mai le [aso o lo'u papatisoga] seia oo mai i lenei aso. O le tele o i tatou ua maua le molimau, o lena fanaufouina, lena suiga o le loto, atonu sa tatou sese i la tatou faamasinoga po o le faia o le tele o mea sese, ma i le tele o taimi ua tatou le ola ai i tulaga moni i o tatou olaga, ua tatou salamo i le leaga, ma ua tatou saili mai lea taimi i lea taimi le faamagaloina i le aao o le Alii; ma e oo mai i le aso, o le naunautaiga lava lea ma le faamoemoega sa oo mai i o tatou loto ina ua papatisoina i tatou ma maua le faamagaloga o a tatou agasala, o loo tumau pea i o tatou loto, ma o lea foi le lagona o loo taitaiina ai pea o tatou loto” (*Gospel Doctrine*, 96).

- O le a se mea na e aoaoina mai ia Peresitene Samita e uiga i lau lava molimau ma le tautinoga e ola i le talalelei?
- O le a se mea na e aoaoina e uiga i faigata e feagai ma tagata faatoa liliu mai, e oo lava i tagata e avea ma perofeta i le lumanai, pe a uma ona papatiso?
- Mafauafau i tagata faatoa liliu mai ma tagata o le ekalesia e le o toaaga mai, o le a se mea e mafai ona e faia e fesoasoani ai ina ia latou toe maua le “manao ma le faamoemoe” sa ia i latou?

Faamatalaga

Fonotaga Faaleitu ma Konafesi Faalesone

- Valaaulia se epikopo e saunoa e uiga i luitau o le galulue ai ma tagata o le ekalesia e le o toaaga mai ma tagata faatoa liliu mai. Talosaga i ai e faamamafa pe mafai faapefea ona fesoasoani faifeautalai i nei luitau.
- Talanoaina ia faataoto i le mamoe na se, o le tupe itiiti na leiloa, ma le atalii faamaumau oa (tagai Luka 15).

Peresitene o le Misiona

- Galulue faatasi ma taitai o le perisitua i le lotoifale, e uuna’ia i latou e fesoasoani i tagata faatoa liliu mai:
 - la faauuina i le perisitua.
 - la i ai ni faiaoga o aiga.
 - la saunia se igoa o se tuaa e ave i le malumalu ma faia papatisoga mo e ua maliliu.
 - la maua le lesona o “Tulafono ma Sauniga” a o i ai faiaoga o aiga.
- Aoao taitai o uarota i le auala e faaaoga ai faifeautalai i le aufono a le uarota.
- Aoao taitai o uarota i le faamoemoega e faaaoga ai le Faamaumauga o le Alualu i Luma.
- Fesili atu i nisi taimi i faifeautalai e faaali atu ia te oe se kopi o la latou Faamaumauga o le Alualu i Luma.
- Siaki i nisi taimi ia tagata faatoa liliu mai, ina ia iloa ai pe o faapefea mai ma pe mafai faapefea ona fesoasoani atu faifeautalai ma tagata o le au paia.
- Valaaulia taitai o le siteki po o le uarota e saunoa atu i a outou faifeautalai e faamalamalama pe mafai faapefea ona matua’i fesoasoani atu faifeautalai.
- Valaaulia tagata faatoa liliu mai e saunoa mai i faifeautalai, ma faamatala o latou aafiaga i le avea ai ma uso fou o le Ekalesia.
- Talosagaina i nisi taimi tagata o le au paia, o ē sa liliu mai, e fetufaai mai i se konafesi faalesone o latou aafiaga ina ua liliu mai.

A

Afiafi Faaleaiga, 89
 Afio Mai Faalua o Iesu Keriso, 38
 Agaga, mana o le, i le liuaina, 96–97
 aoao atu e ala i le, 3–4
 tatau ona taitaiina le aoao atu e le, 190
 uunaiga a le, 101
 Agaga o Elia, 178–180
 Agaga Paia o le Folafolaga, 95
 Agaga Paia, meaalofa o le of, 95
 aoaoina e ala i le, 18–19
 mana o le, 95
 peresona o le, 94
 Aganuu, moomia ona aoao, 143
 Agasala, e pei ona vaai i ai ia aganuu eseese, 62
 Aiga, faamanuiaina e le talalelei, 32
 e faamanuiaina e le talalelei toefuataina, 3
 aoao atu e uiga i le taua o, 174
 “Aiga: O Se Folafolaga i le Lalolagi, O le” 3, 89
 Aiga, faamoemoega o le, 89
 Aiga o le Atua, 31–32, 169–170
 Alii Talavou, faalapotopotoga, 88
 Alofa, 126
 Alofa mama, 126
 Alofa mutimutivale, faauigaga, 72
 Alofa tunoa, faauigaga, 72
 Anapogi, tulafono o le, 84
 Aoao atu, fetuunai ina ia ausia ai manaoga, 192
 e ala i le Agaga, 3–4
 faatasi ma fesili, 198–200
 faatasi ma mau, 194–196
 faatasi ma se soa, 193
 faatasi ma tagata o le ekalesia, 194
 fautuaga a le Au Peresitene Sili i le, 189–190
 i se valaauga i le Ekalesia, 92
 le talalelei i le aveva ai ma se faifeautalai, 189
 ma faalogo, 200–201
 ma manatuaina, vii–viii
 ma saili, 172–173
 o le auala e amata ai, 190–191
 uumi o feutagaiga, 192
 uumi o lesona, viii
 tagata e leai se malamalamaaga faaKerisiano, 206–207
 Aoaoa i aiga, 233
 Aoaoina o le gagana, ma le kalama, 140
 faatasi ma soa, 142
 fuafuaga e suesue ai, 141
 ma le manatuaina, 140
 mataupu faavae o le, 138–139
 meafaigaluega mo le, 139
 sini, 139
 Aoaoina, o se faagasologa o le mauaina o
 faaaliga, 18–19
 e ala i le Agaga Paia, 18–19
 i le aveva ma se tagata o le Ekalesia, 92
 Aso Sapati, tausia o le, ia paia, 77–78
 Ata o le faaolataga, 47–54
 siata, 54
 Atamai, 127–128
 Atua, aoaoina o tagata e le ni Kerisiano e uiga i
 le, 32
 Atua le Tama, na faaali atu ia Iosefa Samita, 37
 Atua, lo tatou Tama Faalelagi, 31–32, 48
 Atugaluga, moomia ona foia ia atugaluga o
 tagata sailili, 202–203
 Au Peresitene Sili, i le galuega faafaifeautalai,
 29–30
 Aualofa, 88

Auauna atu, i le aveva ma se tagata o le Ekalesia, 91
 e aveva ma punaoa mo le sailia o tagata sailili,
 182–184

Aufono a le uarota, 162, 233–234
 ma le faafaileleina o tagata fou liliu mai, 236
 ma le faaou atu i tagata fou liliu mai, 234–235
 ma le fesoasoani atu i tagata fou liliu mai o
 loo auaua i valaauga, 236
 matafaioi o le faaaumea, 232

B

Ballard, M. Russell, i le mana o le Agaga, 97
 i sini, 158
 Benson, Ezra Taft, i fesili maoae o le agaga, 113
 i le aveva o le Tusi a Mamona ma maa ‘au’au,
 110
 i le aveina atu o le talalelei i le lalolagi, 2
 i le galue, 130
 i le tali atu i fesili e uiga i le Tusi a Mamona,
 115
 i le taua o le Agaga, 190

C

Cabrera, Victor Manuel, tala o le liuaina, 172

E

Epikopo, 162
 faatonutonuina taumafaiga faafaifeautalai a le
 uarota, 232
 ma le galuega faafaifeautalai, 175
 tiute faafaifeautalai o le, 237

F

Faaliga, a le tagata lava ia, 93–94
 Faaogaina o le taimi, matuai lelei, 147–148
 Faaumea, o tagata fou, 228
 Faaeaga, 53
 faauigaga, 59
 Faaeega paia, 90
 Faailoga autu, faauigaga, 148–149
 faat utuina o sini mo, 158–159
 mo le liuaina, 148–149
 Faaiipoipoga faavavau, 89
 Faalogo, ina ia faaleleia ai tomai i le gagana, 140
 faaogaina o le, i le aoao atu, 200–201
 Faamamaina mai le agasala, 2, 5–6, 61–62
 Faamanatuga, 66
 Faamanuiaga, ma tautinoga, 213
 Faamanuiaina, faauigaga, 10–11
 Faamanuiaina o le faifeautalai, 10–11
Faamaoni i le Faatuatua, 22
 Faamasinoga, faauigaga, 59
 o le faamasinoga mulimuli, 53
 Faamauga, 66
 faauigaga, 72
 o le auala e faatino ai, 228
 sauniuniga mo le, 221–222
 Tagai foi Papatissoga ma le faamauga
 Faamaumauga, mo le papatissoga ma le
 faamauga, 226–227
 Faamaumauga o Aoaoa, faamatalaina o le
 fomu, 151–152
 Faamoemoe, 125–126
 Faamoemoega, i le aveva ma se faifeautalai, 1
 Faamoemoega o le faifeautalai, ia aveva ma sui o
 Iesu Keriso, 2
 Faaolataga, e avanoa mo tagata uma, 90
 ata o le, 47–54
 faauigaga, 59

Faapau pepe, ma le agavaa mo le papatisoga, 226
 FaaPeretania, moomia ona aoaoina, 138
 Faatalanoaga mo le papatisoga, fesili, 224
 o le auala e faia ai, 223–224
 o ai e faia, 223
 saunia tagata sailiili mo le, 221–223
 Faatoaga o Etena, 49
 Faatuatua, ia Iesu Keriso, 62–63, 124–125
 ma le sailia o tagata e aoaoina, 170
 ma le tatalo, 98–99
 Faatuina o sini, 147
 Faaugaga, o upu e le masani ai, 22
 Faavaeina le Ekalesia, 10
 Fai mea lelei, 182–184
 Faiaoga asiasi, 233
 Faifeautalai a le uarota, o le auala e faaoga ai le
 “*Tala’i La’u Talalelei*,” xii
 tiute o, 238
 Faiga feusui o le alii ma le alii po o le tamaitai
 ma le tamaitai, ma le agavaa mo le papatisoga,
 226
 Fatatusi a le faifeautalai, ix
 Fausiaina le Ekalesia, 170–171
 Faust, James E., i le faamoemoe, 125–126
 i le aoao atu ma le manino, 197
 Fautua maualuga a le siteki, tiute o le, 236
 Feagaiga, faauigaga, 72
 faamalalamaina, 64–65
 Fesili, ma le tautinoga, 213
 faaogaina o, i le aoao atu, 198–200
 o le auala e tali ai, i le Tusi a Mamona, 115–116
 Fesili o le agaga, ma le Tusi a Mamona, 113–114
 Fetuutuunai, i suesuega, vii
 i le aoao atu, vii
 Fofoaga, o le lalolagi, 49
 Fonotaga faaleitu, ma suesuega, viii
 faamoemoega o, ix
 Fonotaga faamaopoopo a faifeautalai, tiute o le,
 237
 Fuafuaga. *Tagai* i fuafuaga a le faifeautalai i aso
 taitasi
 Fuafuaga a le misiona a le uarota, 239
 Fuafuaga i aso taitasi a le faifeautalai, viii

G

Gafa, e aveva ma punaoa mo le sailia o tagata
 sailiili, 178–180
 Gagana, meaalofo o le tautala i, 143
 Gagana a le misiona, ma le gagana a le atunuu
 lava ia, 137
 moomia ai le naunautai, 138
 saunia e aoaoina, 137
 Galuega faafaifeautalai, ia faia e tagata o le
 ekalesia le, 88
 Galuega o talafaasolopito o le aiga, 90
 Gaoioiga o uiga, iloiloaina o le tagata lava ia, 135

H

Hinckley, Gordon B., faifeautalai ina ia noatia
 tagata liliu mai i le Ekalesia, 232
 i le auuatu atu, 183
 i le faatuatua ma le tatalo, 98
 i le faatumauina o tagata liliu mai, 232
 i le faitauina ma le agaga tatalo le Tusi a
 Mamona, 115
 i le fesoasoani o tagata o le ekalesia i
 faifeautalai, 175
 i le iloaina o le Agaga, 102

 i manaoga o tagata faatoa liliu mai, 234
 i tatalo a le faifeautalai, 98
 Holland, Jeffrey R., i le aoaoina o le gagana, 138
 i le aoao atu ma le mana, 8
 i le faalogo, 200
 Hunter, Howard W., i le iloaina o le Agaga, 104

I

Iaga, Polika, i le mauaina o le molimau, 216
 Iesu Keriso, aveva ma Togiola, 51–52, 60–61
 faaali atu ia Iosefa Samita, 37
 fesoasoani i tagata ia aoao e uiga ia, 47–48
 galuega faalelalolagi a, 34
 Togiola a. *Tagai* Togiola
 Igoa na faailoa atu, taiala mo le galue ai ma,
 177–178
 Igoa e faailoa mai e ala i faasalalauga, 177–178

K

Kalavini, Ioane, 46
 Keriso, Malamalama o. *Tagai i le Malamalama*
 o Keriso
 Keriso. *Tagai i le Iesu Keriso*
 Konefasia, 46
 Konafesi faalesone, ma suesuega, x
 Kimball, Spencer W., i le faamanuiaina i le
 tofiga, 4
 i le galuega faafaifeautalai ma le malumalu, 178

L

Laau o le ola, gaoioiga, 2
 Lalolagi o agaga, 53
 Lapataiga, i le mauaina o faaaliga, 103–104
 Le fiafia, 11
 Leai se malamalama faaKerisiano, aoaoina o
 tagata i le talalelei e, 206–207
 Lee, Harold B., i le aoao atu mo le malamalama,
 209
 i le taua o aiga, 3
 Legavia, tulafono o le, 80–81
 Lesona, e aoao ai tagata sailiili, 29
 faaoga mo suesuega ma aoaoga, 29
 mo tagata fou, 29–30
 Liliuese, o le Liliuese Tele, 36
 faauigaina, 35
 Lipoti Faalevaiaso a le Faifeautalai, faamatalaina
 o le fomu, 157
 Lipoti o le Alualu i Luma, faamatalaina o le
 fomu, 154
 Lipoti o le Aotelega [e Fai e Faifeautalai i Luga o
 le Telefoni], faamatalaina o le fomu, 155
 Lisi o Fuafuaga a le Faifeautalai i Aso Taitasi,
 faamatalaina, 156–157
 Liuaia, matafaioi a le faifeautalai i le, 96–97
 matafaioi a le Agaga i le, 96–97
 Lotomaulalo, 129
 Luteru, Matini, 45–46

M

Maelega, 130
 Makaina o tusitusiga paia, 24
 Malamalama o Keriso, 94
 Malumalu, tapuai i totonu o, 90
 Malo o le mamalu, 53–54
 Malo Selesitila, 54
 Malo telesitila, 54
 Malo terasitila, 54

Manatu mo suesuega ma le faaaogaina, o le auala e faaoga ai, xi
 Manatuaina, ma le aoao atu, vii
 Matafaioi a le faifeautalai i le liuaina, 97
 Maxwell, Neal A., i le faamoemoe, 125
 Meaalofa a le Agaga, 95–96
 Meaalofa o le Agaga Paia, 66–67, 95
 Meaalofa o le tautala i gagana, 143
 Moameta, 46
 Molimau, ia tuuina atu soo, 215–216
 Monson, Thomas S., i le aoao atu faatasi ma tagata o le ekalesia, 194
 i le fuaina o le faatinoga, 163
 i le gagana a le Agaga, 143
 i le onosai, 128
 i le tuuina atu o le molimau, 215
 Mua'i olaga, faauigaga, 59
 Mulimuli i le perofeta, 79

N

Nofoaga Autu o talafaafolopito o le Aiga, e aveva ma punaoa mo le sailia o tagata sailiili, 178–179

O

Oaks, Dallin H., i le valaauliaina o isi e o mai ia Keriso, 9
 Oga aisa tetele, o atugaluga e pei o ni, 202
 Ola faavavau, faauigaga, 72
 Olaga a o le'i o mai i le lalolagi, 48
 faauigaga, 59
 Olaga faitino, 50
 faauigaga, 59
 faamoemoe o le, 31–32
 Olaga i le lalolagi, 50
 Onosai, 128
 Oti faaleagaga, faauigaga, 60
 Oti faaletino, faauigaga, 59

P

Pablo, tala i le liuaina e ala i le auuina atu, 183–184
 Packer, Boyd K., i aafiaga faaleagaga, 101
 i le Agaga i le liuaina, 96
 i le auala e suia ai e le suesue ia amioga, 19
 i le faamalosia o mea faaleagaga, 107
 i le iloaina o le Agaga, 101–104
 i le malamalama o Keriso, 94
 i le mana faafailele o le Tusi a Mamona, 114
 i le papatisoga i le vai ma le afi, 9
 Papatisoga liliu mai, faauigaga, 225
 Papatiso41 ga ma le faamauga, 9, 78
 fesili ma tali e uiga i le, 225–226
 faamaumauga, 226
 Papatisoga mo e ua maliliu, 90
 Papatisoaina, e le talafeagai mo fanau laiti, 65
 i le afi, 66–67
 o tagata e le agavaa, 226
 o la tatou feagaiga muamua, 64–66
 saunia mo le, 221–222
 talafeagai mo le aveva ma tagata o le Ekalesia, 65
 tulaga agavaa mo le, 222
 valaaulia ina ia, 40, 67
 Pau o Atamu ma Eva, 49–50
 faauigaga, 59
 Peraimeri, faalapopotoga, 88

Peresitene o le Ekalesia, i le galuega faafaifeautalai, 12–13
 Peresitene o le misiona, tiute o le, 236
 Peresitene o le siteki, tiute o le, 236
 Perisitua Arona, toefuatai, 37
 Perisitua, Arona, 87
 faauigaga, 32
 Mekisateko, 87
 toefuataiga o le, 37, 87
 Perisitua ma ausilali, 87–88
 Perisitua Mekisateko, toefuataiina, 37
 Perofeta, faamalamalamaina, 34
 matafaioi o le, 32–33
 Perry, L. Tom, i le usiusitai, 131
 Piramita o faamatalaga, 150
 Poloaga, 72–85
 o le auala e suesue ai, 75
 o le auala e aoao atu ai, 74–75
 Pule, a le faifeautalai, 4
 Perisitua, leiloa, 35
 Toefuatai, 36
 Pusa o faamatalaga, i totonu o le "Tala'i La'u Talalelei," x–xi
 Puta (Kotama), 46

S

Sailia, ma le aoao atu, 172–173
 e ala i le Agaga, 170
 faatasi ma tagata o le ekalesia, 174–175
 Sailia o tagata e aoao, 169
 Sailia o tagata sailiili, fautuaga mo, 181–182
 Salamo, 63–64, 203
 ma le tautinoga, 211
 Samita, Ailama, i le aoao atu o uluai mataupu faavae, 6
 Samita, Iosefa, i le aoao atu i mea uma ua i ai, 170
 i le faalagolago atu i le Agaga, 102–103
 i le meaalofa o le Agaga Paia, 95
 i le moomia o faaaliga, 93
 i le papatisoga e ala i le vai ma le Agaga Paia, 9
 i le Tusi a Mamona i le aveva ma maa 'au'au, 109
 i le talaiina o le talalelei 175
 ma le Toefuataiga, 36–37
 ma le Uluai Faaaliga, 37
 Samita, Iosefa F., i lagona ina ua papatiso, 241
 Saolotoga, 49
 Sauniga, faauigaga, 64
 Sauniga o le papatisoga, o le auala e taitai ai, 227–228
 Saunoaga faavaloaga i le galuega faafaifeautalai, 12–13
 Savali a le Au Peresitene Sili, v
 Savali o le Toefuataiga, 31
 faamalamalamaina, 6–8
 ma aiga, 174–175
 Schultz, Frank ma Mildred, tala i le liuaina, 179–180
 Sefuluai ma taulaga, foai, 82–83
 Sefuluai, tulafono o le, 82
 Silisiliese, tapuaiga tonu i le, 80
 Sinaita, tala ia, 120
 Sini, ma taimi e fai ai fuafuaga faalevaiaso, 158–161
 o le auala e faatutu ai, 158
 Solitulafono matuia, ma le agavaa mo le papatisoga, 226

Suesuega faaletagata lava ia, faamoemoega, viii–ix
 fuafuaga, viii
 Suesuega faalesoa, faamoemoega, ix
 fuafuaga, viii
 Suesuega, punaoa faamaonia mo, 23–24
 a o saunia e aoao atu, 19–22
 amataina i se tatalo, 17, 22
 fautuaga mo suesuega e lelei ma aoga, 22–24
 matuai lelei ma aoga, 17
 taiala mo, 20–21
 Suesueina o tusitusiga paia, o se poloaiga, 77

T

Tagata e Ono Mananao e Sailiili i le Talalelei, faamatalaina o le fomu, 154
 Tagata fou o le ekalesia, faamalosia, 228
 ia faaumea e faifeautalai, 232
 ia toe mauaina ia lesona, 232
 mauaina lesona, 29
 o se punaoa mo le sailia o tagata sailiili, 176
 Tagata na tofaatulagaina, 45
 Tagata o le ekalesia, fefefe e fai le galuega faaifeautalai, 175
 fesoasoani e saili tagata sailiili, 174–176
 Tagata o le ekalesia ua le toe toaaga mai, o se punaoa mo le sailia o tagata sailiili, 176
 faamalosia, 228
 o le auala e fesoasoani atu ai, i le galuega faaifeautalai, 176
 Tagata o le ekalesia ua tape igoa, pe papatiso, 225
 Tagata sa sailiili muamua, e ave ma punaoa mo le sailia o tagata e aoao, 180–181
 Tagata sailiili, faatutu sini mo, 158–161
 ia faitauina le Tusi a Mamona, 116–118
 o faifeautalai e saunia, mo faatalanoaga mo le papatisoga, 222
 Taimi e faia ai fuafuaga faalevaiaso, o le auala e faia ai, 158–161
 Taimi e Fuafua ai galuega o aso taitasi, 162–163
 Taitai misiona a le uarota, tiute o le, 237
 Taitai misiona a le uarota, ma le galuega faaifeautalai, 231
 tiute o le, 237
 Taitai o ausilali, tiute o, 237
 Taitai perisitua, tiute o, 237
 Taitai o le siteki, ma le galuega faaifeautalai, 231
 tiute o, 236
 Talafaasolopito o le aiga, e ave ma punaoa mo le sailia o tagata sailiili, 178–179
 “*Tala’i La’u Talalelei*,” faaaogaina e faifeautalai o le uarota ma taitai, xi
 o le auala e faaoga ai, vii
 Talalelei, 61–68
 ausia ai manaoga o tagata, 1–2
 faamanuia ai aiga, 3, 32
 faamoemoega o le, 6
 faauigaga, 5, 72
 Toefuataiga o le, 36–38
 Talalelei a Iesu Keriso. *Tagai* Talalelei
 Talanoa, manatu mo le, faatasi ma isi, 170
 meafaigaluega mo le sailia, 170–172
 Tali atu o le tagata mo ia lava, 163–164
 Tama, tiute o, 87
 Tama Faalelagi, 31–32
 Tama o i le Lagi, 50
 Tamaitai Talavou, faalapotopotoga, 88
 Tamaiti e le atoatoa le malosi o le tino ma le mafafau, ma le papatisoga, 225
 Tatalo, auala e aoao ai le upumoni, 39–40
 fautuaga mo, 98–99
 fua e iloilo ai, 100
 ma le faatuatua, i le liuaina, 98–99
 matafaioi a le, 39
 o le auala e tuuina atu ai, 39
 o se poloaiga, 76
 Tautinoga, faateleina ai le faatuatua, 212
 ma faamanuia, 212–214
 ma fesili tuusao, 213
 ma toe siaki, 217
 vaega moomia o le salamo, 211
 Tautinoga, faamoemoega o, 8
 Teila, Ioane, i le faafaigofie ona aoao atu, 197
 Tete, o le auala e tali atu i ai, ma le Tusi a Mamona, 115
 Tina, tiute o, 88
 Tinetai, Viliamu, 46
 Tino ola pea, faamalamalamaga, 53
 faauigaga, 59
 Tisipenisione, 32–33
 Tisipenisione, faauigaga, 33
 Toe aumaia o se tagata mai se amioga ua fai ma masani, 203
 Toe totogiina, faauigaga, 73
 Toeina faamoemoega, o se punaoa mo le sailia o tagata sailiili, 176
 Toefaatulagaina, 35
 Toefanauina, ma le toetu, 53
 Toefuataiga, o le talalelei, 36–37
 savali o le, faamalamalamaina, 7–8
 Toetu, 53
 faauigaga, 51, 59
 Tofiga, e aoao atu le talalelei toefuataina, 1
 Togiola, 31–33, 34, 48, 51–52, 61–62
 faauigaina, 59
 Togiolaina, faauigaga, 59
 Tulafono, usitai ma faamamalu, 86
 Tulafono e Sefulu, usiusitai i, 76
 Tulafono ma sauniga, o le auala e aoao atu ai, 86
 o le auala e suesue ai, 87
 sosoo ma le papatisoga, 86–92
 Tulafono o le lauelele, usitai ma faamamalu, 86
 Toe siaki, ma le tautinoga, 217
 Tumau e oo i le iuga, 67–68, 92
 faauigaga, 72
 Tupua, 80
 Tusi a Mamona, faalatalata atu ai tagata i le Atua, 114–115
 faamaoniga o le paia o Iesu Keriso, 109
 faamaoniga o le Toefuataiga, 7, 38–39, 109
 faamoemoega o le, 138
 faitau, e aoao ai le gagana a le misiona, 138
 i le ave ma maa ‘au’au, 109–110
 lagolago i le Tusi Paia, 112
 molimau ia Iesu Keriso, 111
 o le auala e faitau ai, faatasi ma tagata sailiili, 116–117
 o le auala e faaoga ai, 116–118
 tali ai fesili o le agaga, 113–114
 Tusi a le eria, faaoga e sue ai tagata sa sailiili muamua, 181
 faamatalaina, 151
 Tusi Paia, e lagolagoina le Tusi a Mamona, 112
 Tusi talaaga o suesuega, faamalamalamaina, x

Tusitusiga paia, faaaogaina o, i le aoao atu,
194–196
makaina, 24–25

U

Uiga, auala e suesue ai, 124
o Keriso, 123
Uiga faaKeriso, meaalofa a le Atua, 123
moomia ona atiina ae, 123
pe faapefea ona atiina ae, 131
Uiga mama, 127
Uikilifi, Ioane, 45
Upu o le Poto, 81–82
Usiusitai, 131
o se poloaiga, 75

V

Valaauga, i le Ekalesia, 91
Tagai foi i le valaauga faafaifeautalai
Valaauga faafaifeautalai, ia aoao atu le talalelei
toefuataiina, 189
ma le tiutetauave, 4
mana ma le pule o le, 4–5
Valaaulia mo tautinoga, 211–212

W

Wirthlin, Joseph B., i le faaaogaina o le Tusi a
Mamona, 117

Manatua Le Mea Lenei . . .

- O lou faamoemoega o le aumaia lea o agaga ia Keriso.
- Saunia tagata ina ia ausia tulaga manaomia mo le papatisoga o loo i le Mataupu Faavae ma Feagaiga 20:37 ma fesili o le faatalanoaga mo le papatisoga.

- la tatalo soo mo oe lava faapea foi ma isi.
- Faalagolago i le Agaga e faaali atu ia te oe po o fea e te alu i ai, po o le a le mea e fai, ma pe o le a foi le mea e te fai atu ai.
- Usiusitai atoatoa.
- Suesue le gagana a lau misiona i aso taitasi.

- Faataatia se fuafuaga i aso taitasi ma taula'i atu i faailoga autu.
- Galue i le aso atoa, ma aso uma ia aoga.

- Fesili atu i **tagata uma** mo ni igoa e faailoa mai.
- Aoa atu pe a e maua; ia maua foi pe a e aoao atu.

- Faitau faatasi ma i latou e te aoaoina le Tusi a Mamona.
- Aoa atu i tagata o se auala taua e iloa ai o Iosefa Samita o se perofeta a le Atua, o le faitau lea ma tatalo e uiga i le Tusi a Mamona.
- Faafesootai tagata sailiili uma i aso taitasi.
- la tuuina atu soo lau molimau.
- la i ai se tagata o le Ekalesia i lesona uma pe a mafai.
- la seti i taimi uma ni aso ma taimi patino mo le isi lesona e sosoo ai.
- la valaaulia tagata sailiili uma i sauniga o papatisoga.
- A mae'a lesona taitasi, ia tuu atu i tagata sailiili se mea e faitau ai ma mafaufau loloto i ai ina ia sauniuni ai mo le isi feiloaiga.

- la fausia fegalegalea'iga ma tagata o le au paia, e ala i le auauna atu ia te i latou ma galulue ma le au taitai o le uarota.
- Fesoasoani i taitai o le uarota i gaoioiga e faatumau ai ma faatoaaga mai [tagata e liliu mai].

- Fesoasoani i tagata uma e te aoaoina, ia latou faia ni tautinoga e salamo ai ma o le a faamalolosia ai o latou faatuatua i le Faola.
- Alofa i le Alii ma auauna atu ia te la i le mea sili e te mafaia.

O LE EKALESIA A
IESU KERISO
O LE AU PAIA O ASO
E GATA AI

